

Abstract

Int 2

123

R. 4

6/24



1790

D. 25
C. 8

Small
De

11
12
13
14
15
16
17
18
19
20
21
22
23
24
25
26
27
28
29
30
31
32
33
34
35
36
37
38
39
40
41
42
43
44
45
46
47
48
49
50
51
52
53
54
55
56
57
58
59
60
61
62
63
64
65
66
67
68
69
70
71
72
73
74
75
76
77
78
79
80
81
82
83
84
85
86
87
88
89
90
91
92
93
94
95
96
97
98
99
100

Palatini Libr. Conspectus in Conspectu de Sine
B.
NICOLAI

LEONICI

THOMAE

DIALOGI



Quorum nomina sequens indicat
pagella.

*

VIRTUTE DVCE,



COMITE FORTVNA.



LVGDVNI APVD SEB.
GRYPHIVM,

1542.

NICOLAI LEONICI THO-
MAEI DIALOGI.

TROPHONIUS, *sive*, De Diuinatione.
BEMBVS, *sive*, De Animorum Immortalitate.
ALVEROTVS, *sive*, De Tribus Animorum Vehiculis.
PERIPATETICVS, *sive*, De Nominum Inuentione.
SANNVTVS, *sive*, De Compescendo Luctu.
SEVERINVS, *sive*, De Relatiuorum Natura.
SADOLETVS, *sive*, De Precibus.
PHOEBVS, *sive*, De Aetatum Moribus.
BONOMINVS, *sive*, De Alica.
SANNVTVS, *sive*, De Ludo Talario.
BEMBVS, *sive*, De Animorum essentia.



NICOLAUS LEO-

NICVS RAYNOLDO

POLO S. D.



V M abhinc aliquot annos uarijs de re-
bus, sed quæ præcipue ad philosophiam
spectarent, sermones quosdam Academi-
corum more confecissem: quorum aliqui
in lucem ita prodierunt, ut in amicorum
quorundam manibus solum uersentur: nonnulli uero ad-
huc in archetypis iaceant, ab eisdem sanè sum rogatus ut
omnes illos examinatos retractatosq; aliquando sub unius
commentarioli uolumine, quasi in corpus unum compre-
hendere & edere uellem: quod quominus adhuc effectum
sit, multa sanè mihi impedimento fuere. Verum quando
tu eruditissime Pole superioribus diebus hac de re non
uulgariter mecum egisti, hortatusq; es, ut editionem
hanc amplius non differrem, & posteritati, quo modo
possem, meæ interesse uellem: quanquàm negotijs plu-
ribus in præsentia distinerer, parui tamen libens, & hos
ipsos, qualescunque sunt, edere, tibiq; dedicare decre-
ui, ut tuo patrocinio adiuti, apud ceteros commenda-
tionem habere mereantur: quodq; per se fortasse, etsi non
contemnendū omnino, exile certe fuisset munusculum, id
autoritate tua cui datum est, aliquid sanè esse uideatur.
Talis est enim de tua singulari eruditione, exactoq; in o-
mnibus iudicio, apud omnes, & tam certa existimatio, ut
quicquid te adire audeat, aut abs te exire, ex cultū sanè et
omnibus numeris absolutū esse, omnes opinentur & cre-
dant. Neq; id immerito mehercule: quotus enim quisq; in
re literaria nunc reperitur, qui in tā paucis, quot ætas ista

tua recipit, annis, omnium liberalium studiorum sacraria sit ingressus: qui Græce & Latine æque sapiat: et utriusq; linguae cum dignitatem & elegantiam, tum dicendi etiam proprietates & modos perpulchre adeo sit consecutus, ut siue docere quippiam siue literis mandare tibi libuerit, id luculenter mehercule & insigniter facere possis: Taceo de philosophiae studiis: ad quæ sola te natum, propter admirabilem in illis excellentiam, facile credi posset: nisi in alijs etiam facultatibus id ipsum egregie præstares: ut res profecto nostro seculo omni admiratione digna merito existimari possit, esse iuuenem qui paulò ante ex ephēbis exierit, cuius adhuc impubes sunt genæ, qui Platonis Aristotelisq; opera omnia lectitauerit: & cum Academicorum omnium, tum Peripateticorum commentarios abstrusarum copia rerum undequaq; refertos, perlegerit, intellexerit, & ad manum etiam paratos habeat. Verum nescio quomodo aliud exordiēs facere institui, aliud nunc ago. Quā ob rem de ijs hætenus, cū præsertim non laudator in præsentia, sed donator accesserim. Libenti igitur animo Pole humanissime hoc, quod tibi trado, munusculū accipias: cui si in omnis antiquitatis refertissima tua bibliotheca aliquē uolueris esse locū, magni sanè autori muneris instar erit. Hilare enim ab eruditissimo uiro admitti, & benigne recipi, aliquoq; in numero haberi, etsi non maxima, non contemnenda certe laus, cui id acciderit, merito esse censetur. Va-

lc. Patauij Pridie Calendas

Sextiles. M. D.

XXIII.

Nicolai

N I C O L A I

L E O N I C I T H O
M A E I D I A L O G I.

T R O P H O N I V S,

S I V E,
D E D I V I N A T I O N E.



V M in Diui Zenonis uiculo, qui non longe ab Asyli distat oppido, apud hospitem quendam nostrum essemus ego & Fuscus frater, quo animi gratia æstate media maximis caloribus Patauio concesseramus, uenit forte ad eum locum, ut interdum solebat, Alexander Capella, uir & nostri semper amantissimus, & ijsdem literarum studijs deditus, & in primis hospiti nostro à pueris quàm maxime familiaris. Hic cum nos pro uillæ foribus, ubi frigus fortè captantes consederamus, offendisset, post mutuos (ut fieri solet) complexus (satis enim longo interuallo, neque ille nos, neque nos illum uideramus) & post communia illa, ut ualcret ipse, ut amici omnes, ecquid noui Venetijs esset, Si quis mihi Deus, inquit, dixisset cum domo exhibam, hic me uos ambos conuenturum, haud facile illi fidem adhibuisssem. Sed te præsertim, ad me respiciens, quomodo enim tu hîc? qui neque è cubiculo ipso temere exire, integrosq; dies lectitando componere sæpius solitus sis, ut tibi hortuli tui limites, si quando ad illos feriatu accesseris, legitima peregrinationis instar censeri possint. Quam ob rem

quid sibi uelit hæc tam lōga insolensq; peregrinatio haud
 quaquam nunc coniectari ualeo, nisi forte Fuscus in cau-
 sa est. Tum ego, Iocaris inquam Capella et me cauillo im-
 petis: an nescis me & ijs relaxationibus quàm maxime
 semper delectatum fuisse, & aliquando non contemnen-
 das etiam peregrinationes animi causa sponte suscepisse?
 neq; enim literarum studijs isthæc officere solent otia, &
 alioqui si talis essem, qualem tu me esse dicis, liberius etiam
 exirem: cum musæ ipsæ, spretis urbium mœnibus, in agris
 & montibus libenter degere, & assidue uagari dicantur.
 Cæterum tu, qui me otij literarij tam acriter insimulas,
 quid tecum libellos circumfers (forte enim ut ab equo de-
 scenderat, theculam quandam cum libello manu gestabat)
 an tu etiam in uia, nedum domi & in cubiculo, ut ego, le-
 gitare soles? Tum ille ridens, Insigniter, inquit, & cito te
 ultus es Leonice: neque, quod aiunt, posteris de te tuis ul-
 tionem reliquisti. uerum codex iste quem tenco, Aristo-
 phanis sunt comœdiæ: quo ego poëta, cum ob linguæ ele-
 gantiam & proprietatem, tum propter conspersos undi-
 que sales Atticos et lepôres, mirifice delectari soleo: ut si-
 quando mihi à seuerioribus musis relaxandus sit animus,
 non crebro alium quempiam præ illo autorem in manibus
 capiam: adeo me iocis suis demulcet ille, & lepôre, uerbo-
 rumq; urbanitate largiter exhilarat: unde si quò exire de-
 cerno (quod non persæpe facio) comes mihi non iniucun-
 dus præsto semper est Aristophanes. Tū Fuscus, Nimirū,
 inquit, si elegās est, et pulchre sapit noster Capella, quan-
 do sales semper Atticos secum portat, quibus & uerba &
 sententiæ suauiter condiantur. & ad me conuersus, Næ su-
 mus, inquit, infacetī nos & illepidi, qui hunc de uia fessum
 hic tenemus, & sermonibus nostris intempestiue nunc
 obtund

obtundimus. Hortati igitur illum sumus (non enim hospes
 aderat noster) ut ingrederetur, et se curaret, quiesceret nec
 meridies enim erat, & flagrantissimo sole ardebat dies. Et
 ille, Minime, inquit, mihi opus est requiete, neq; aliud quip-
 piam in præsentia mihi præstari uolo: nam neq; ita defes-
 sus sum, ut langucam: & bene pransus alioqui huc accessi.
 Meus enim Asylanus hospes, apud quem, Venetijs ueniens,
 proxima nocte diuerti, non nisi me pulchre curatum disce-
 dere permisit: quare non est quod uos in præsentia dimit-
 tam, quos semper & uidere & audire percipio: & nunc
 quod hic offenderim, magni mihi hoc muneris loco adscri-
 bi non abnuuerim. Introeamus autem, quando sic uobis pla-
 cere uideo: nam & sub tecto melius manebimus, & ego
 communem hospitem nostrum, si domi est, uidere et ample-
 xari potero. Sed aderat iam illic festinabundus & hilaris:
 nanq; de quopiam uernularum (ut arbitror) illius aduen-
 tum cognouerat: qui hominem arctissime cõplexus, O' quàm
 optatus, inquit, mi Capella, & quàm tempestiue hodie no-
 bis aduenisti, qui solus huic numero deficere uidebaris:
 profecto bene mecum et feliciter actum reputo, quãdo tria mi-
 hi hic charissima pignora adesse conspicio, quo nihil mihi
 gratius sanè euenire potuisset. Sed quid hic agimus ante
 fores, & non ingredimur potius? & cum dicto ire perre-
 xit. Ingressi igitur simul omnes sumus, et in cõclauē quod-
 dam ascēdimus, quod ad septētriones spectans, patentibus
 fenestris iucundissimos ex proximis montibus excipiebat
 afflatus, adeo ut intensissimus meridiei calor ipsa cœli re-
 gione, & argenti insuper aura, salubriter permulceretur,
 Hic confidentibus nobis lociq; commoditatem, simul &
 prospectus amœnitatem laudibus miris extollentibus, Ca-
 pella, Quãdo nihil aliud, inquit, in præsentia agimus, &

ut uidetur ociosi sumus, neq; quopiam adhuc per æstum exire nobis permittitur, Aristophanes iste me admonet, ut quod nudiusquartus, dum secū loquerer, non planè de illo intelligere poteram, quia obscure nimis & breuiter loquebatur, à uobis ipsis percontari uelim: quamobrem rogo uos & te in primis Fusce (tua est enim isthæc prouincia) nisi tibi molestum est, ut inter nos interpretis uice fungaris. Hic etenim ut scis, non nisi Græce loquitur: & ego nouitius Græciæ sum inquilinus. Tu uero cum utranq; linguam æque calleas, et quæ iste Græce dicit planè percipies, & mihi idipsum Latino sermone commode explicare poteris. Et quid est hoc, inquit Fuscus, quod Capellā lateat? aut quod ego possim, tu ipse per te nō possis? nisi forte ænigmata sint, & gryphi, tuq; me Oedipodem esse nouum arbitraris. Ceterū quoniam uacui sumus, planeq; otiamur, locum mihi hunc in quo hæsitasti cōmostrato: nā si potero, illū tibi complanabo: sin minus id efficere ualuerō, tecum in eodē (ut aiunt) luto hærebo: adest etiā frater, cui si opus fuerit, operæ istius partem delegabimus. Non sunt ænigmata, neq; gryphi, inquit ille, quæ mihi explicari nunc postulo: sed locus quidam ex historia, quam cum maxime semper optarim cognoscere, nusquā tamē illa plenè me legisse memini: quāobrem nūc certe mihi hac in re accidit, quod haud facile in alijs usu euenire solet. Nam si me locum hunc ignorare in præsentia dixero, planè mentiar: habeo enim quæ hac de re apte congruenterq; dici possint. Et si rursum me scire contendero, haud uere sanè profitebor: neq; enim rē uniuersam, ut est, pulchre tenere me arbitror: & multa sunt, quæ diligens alioqui & exactus rerum perscrutator haud ab re ambigere hic possit: unde euenit, ut ceteris quidem, si qui de me hoc fuerint

percontati

percontati, nullo negotio satisfacere ualeam: cū ea dicam, quæ hic à grammaticis afferri diciq; solent: mihi autem ipsi minime satisfaciam: nuda enim quædā hoc in loco, & frigida ab illis proferuntur, qui quidē (ut mea fert opinio) nescio quomodo elegantiorē, pleniorēq; desiderare uideatur interpretationē. Locus autē est (ne uos diutius animi suspensos habeam) ex Aristophane in Nebulis, ubi senex ille, qui se Socrati docendū tradiderat, dum illius scholam ingreditur, se subuereri & tremere dicit, ceu si ad Trophonium descenderet: & mellitam placentam, quam secū portet, Socratē efflagitat: de Trophonio enim & Agamede, qui Apollinis Delphici templum construxerunt, apud Pindarū est uidere, ut Chironæus Plutarchus in consolatōrio ad Apollonium libello memoriæ prodidit, quemadmodū cum mercedē pro operā Deū exposulassent, quasi magni quippiam sibi deberi existimātes, & ille in septimum se diē eis præmium liberaliter repræsentaturū pollicitus fuisset: addidissetq; insuper, ut bono animo essent, & genio interim operā darent: posteaquā ad constitutum peruentū est diem, noctu ambo mortui sunt reperti. Trophonij præterea oraculum in Lebadia Bæotiæ scio fuisse percelebre, solitūq; illic Heroēm se cōsulentibus futura prædicere, apud plerosq; legitur. Cæterū responsis ne, an somnijs darentur oracula: & cur nam adeo extimescerēt homines ad sacrum illius accedentes adytum, ut ille significare uidetur senex, apud neminem (quod meminero) usquam plenē legi. Quare si quippiam ex antiquorum thesauris reconditum seruas, quod ad eiusmodi enodandam rem facere credas, ne graueris oro te id in medium afferre. Rem enim mihi gratissimam feceris, si me hac animi perplexitate liberaueris. Tū Fuscus, Haud magna,

Trophonius.
Agamedes.

Trophonij o-
raculum.

inquit, & nimis recondita scire expetis Capella, sed quæ parata satis, & ad manum habemus. Quamobrem haud magna cum re tibi mos geretur. Cæterum, quoniam multa sunt, quæ hoc in loco grammatici adducere, & ueluti communisci licenter solent, de subterraneo scilicet herois specu, ubi ille (ut aiunt) inedia consumptus est: de draconibus quinetiam ibidem commorantibus, qui placentis & huiusmodi dulcarijs placarentur escis: istiusmodi ego omnia, & quia tibi pulchre esse cognita non dubito, & quia (ut rectissimè indicasti) inania sunt, & frigida, desipientium deliramētis anicularū, fabellisq; haudquaquam dissimilia, consulto præterire decreui: nō enim adeo uacamus, ut nobis nugæ ex nugis temere sint consuendæ, præsertim cum hac de re habeamus, quæ in præsentia luculenter sanè, & cōmodè dicere possimus: ex quibus cum uniuersa perspicuè reserabitur historia, tum oraculorum ratio captandorū per cōmode dignosci explicariq; poterit. Quamobrem his obnūsis, si placet, totam hanc rem ordine recensēbo: nisi fortè tibi & Leonico aliter uidetur. Hic cum ego non solum assentiri, sed magnopere etiam id ipsum percipere significassem, & Capella enixius hanc

Pausanias. rē efflagitasset, sic exorsus est Fuscus. Pausanias, quē ego, inquit, autorem, cum propter rerum seriem uariarum, & styli elegantiam, tum propter reconditam & omnimodam totius Græciæ antiquitatis historiam, cum primarijs historiæ scriptoribus facile cōnumerauerim, in sua Græciæ peregrinatione, ubi de Orchomeno et Lebadea Boœtiæ recenset oppidis, Trophonij meminit & Agamedis, quos Ergiui Orchemenij, qui tertius à Phryxo Athamantis fuit, filios fuisse cōmemorat: licet nonnullos asseuerasse dicat, Trophonium Apollinis, nō Ergiui filium fuisse, cui se

cui se sententiæ magis astipulari, cum ob alia multa, tum nihilo secius ob oraculorū ipsius indubitatam asserit fidē: quæ ipse non de alijs, quod pleriq; solent, inaudierit: sed illius aliquādo adytum ingressus præsens perceperit, & expertus fuerit. Hos igitur, postquam adoleuissent, magni nominis architectos fuisse dicit, & regiarum ædificijs, templorumq; miris extructionibus tota Græcia per celebres habitos: horumq; opera & alia fuisse permulta, & in primis Apollinis Delphici templum, & Hyrici thesauri ærarium: in cuius fabrica hac illos ratione usos fuisse memoriæ proditum est, ut lapidē scilicet quendam extrinsecus tali coaugmentarent structura, ut quando illis collibuisset, nullo illum negotio extrahere, & intra ærarium inde peruadere possent: qui tamē eleganter adco, & affabre cæteris id genus lapidibus cōtinenter iunctus uisebatur, ut nullam fraudis suspicionem præ se ferret, & omnes facile inspectantes latere posset. Hinc igitur illi occlusum ingredientes ærarium, pro libidine quantum auri pecuniæq; uoluissent facile expilabant: quod cum sæpius factitarent, furtumq; iam ipsum non clām esset, cum furti tamen minime dignoscerentur autores: Hyricum ferunt rei nouitate permotum, qui dudum thesauri clauēs sui frustra obseruauerat, aditusq; nequicquam omnes diligenti custodia cōmuniuerat, tale quippiam machinatum fuisse: ferreos quosdam laqueos, & uinculorum latentes nexus uasis illis & fiscis, in quibus auri argentiq; posita asseruabantur massæ, super indidisse, qui se attrectantium facile uincirent manus, arcteq; & indissolubiliter constringerent: ijs ita clām dispositis, forte fortuna Agamedem ferūt haud multò post noctu ad consuetam ingressum prædam, in latētes laqueos incidisse, qui cum arctissime teneretur,

neq;

Hyrici thesauri ærarium.

neq; inde ulla extrahi posset ui, Trophonium desperata omnino re, caput ei gladio à ceruicibus amputasse ferunt, ne quando deprehensus ille aut cognitus rem ut erat palàm faceret, eiusq; facinoris conscios indicio suo manifestaret. Accidit autem, ut non multò post Trophonius etià ipse terræ absorberetur hiatu, eo loci, ubi nō procul à Lebadia in sacro illius luco Agamedis cognomine profunda uiscebatur fovea, iuxta quam columna etiā quædā astabat. Hæc de illorum genere, mortisq; modo (ut percurramus) autor hic aliter quàm apud Pindarū Plutarchumq; legatur, memoriæ prodidit. Cæterū quæ de oraculo Trophonij uir ille commemorat, quibus uel expiarentur sacris homines, qui ad illum responsa petitori accederet, huiusmodi ferè sunt. Cum quispiam ad Trophonium descendere concupisset, in primis statos quosdam dies, non procul ab oraculi loco, in quadam degebat ædícula, quæ bono dæmoni, bonæq; fortunæ sacra esse perhibebatur, ubi et alijs nonnullis, et calidarum maxime lauacro aquarum abstinere iuebatur, quem illi usum, si quando opus esset, Ercyna fluuius, haud procul inde desfluens, assatim præbere poterat. Vescebatur autem carnibus ijs quæ ex immolatis uictimarū corporibus copiose illi quotidie suggererantur: singulis enim litabat diebus, is qui Trophonium cōsulturus accesserat: in primis Trophonio, eiusq; liberis: Apolliniq; postea et Saturno, Iouiq; cognomento regi: Iunoni quinetiam et Cereri, quam cognomine Europam uocabant, eamq; Trophonij fuisse nutricem strebant: sacris autem singulis, cum immolabatur, assistebat aruspex, qui extispicio sedulam præstabat operā, ex ijsq; Trophonij mentē rimabatur, inspiciebatq; utrum ne propitius et uolens, an secus se petentē suscepturus esset heros. Cæterum

aliæ

Oraculū Trophonij.

Ercyna flu.

aliæ quidē quæ immolabantur hostiæ ad Trophonij per-
 scrutandam sententiā, mentemq; excutiendam, nō magnā
 adeo vim habere censebantur, ut aries, qui eadem nocte,
 qua quis ad illum stato dierū numero descēdere debebat,
 extremus in scrabe immolari erat solitus, ubi rem diuinā
 facientes Agamedem magna uoce inclamare moris erat.
 Si enim aliarū quidem hostiarum læta salutariaq; præces-
 sissent exta, Arietis autem dira & tristia subsequuta fuis-
 sent, minime litatum esse censebant, neq; hominē ad Tro-
 phonium descendere permittēbāt: quod si arietis exta cū
 prioribus bene cōuenissent, lætaq; & felicia portēdissent
 euenta, ueluti propitio et uolente hoc ageretur Dæmone,
 alacres bona cū spe ad illum descēdere iuebantur. Prius
 autē quā descendere quispiā, noctu ad Ercynæ fluenta,
 ij quibus id negotij demandatum erat, hominem deduce-
 bant, oleoq; perūgebāt: posthac pueri duo tertiumdēnum
 circiter annorum, ex proxima ciuitate, ingenui & nobi-
 les, quos Hermas uocabāt, in eodē fluuiio illum lauabant,
 & omnia illi quæ Trophonium adituro ex usu erant,
 officioso præstabant obsequio. Exin sacerdotibus qui id
 muneris habebant, tradebatur: qui illum non illico ad o-
 raculum, sed ad geminos prius iuxta se inuicem scaturien-
 tes fonticulos deducebant, quorum obliuionis quidem Fons obliuio-
 unus, alter uerò memoriæ dicebatur. Et prius ex obliuio- nis, & memo-
 nis fonte haustam iuebatur ebibere aquam, ut omnium riæ.
 scilicet obliuisceretur illorum, quæ antea percepisset aut
 cogitasset. Postea uerò ex memoriæ etiam fonte latices
 hauriebat, ut quæ uel uisurus esset posthac apud Tropho-
 nium, uel auditurus, memoriæ firmiter commendaret. Ex-
 inde Trophonij simulachrum quoddam, antiqui sanē
 operis, & à Dædalo (ut aiunt) fabrefactum, inspiciebat,
 uenera

uenerabaturq; cernuus, quod à sacerdotibus nemini unquam, nisi ijs qui Trophonium adituri essent, ostendi fas habebatur: ijs rite peractis, hominem chlamyde indutum linea, fascijsq; subcinctum, & crepidis quibusdam patris generis ritu calciatum, ad oraculum deducebāt. Erat autem oraculum paulò supra lucum in monte situm, crepido uerò quædam ex albo lapide locum unde quaque cingebatur, qui mediocris areæ spatium æquare uidebatur. Crepidinis autem altitudo duorum circiter erat cubitorum, & ex interuallo æneis ueribus illius disternabantur spatia, quos zonæ continebant quædam, in quibus extructæ hincinde cernebantur portæ: in septi autem medio terræ hiatus erat, non fortuiti speciem præ se ferens abscessus, sed si quippiam aliud, arte ingenioq; mûre constructum opus, qui fornicati cuiusdam tecti imaginem referre uidebatur: cuius, ut coniectari licebat, disternans linea, quam Diametrum appellant, quaternos non excedebat cubitos: structuræ autem ipsius altitudo à summo ad imum, haud multo octoniam mensuram excedere cubitorum iudicari poterat. Descensus uerò inferne nullus erat arte constructus: seu cum quispiam Trophonium adire cupiebat, manuales apportabantur scælæ, quæ & bene tractabiles, & usu ipso agiles erant. Postea uerò quàm erat descensum, in ipso loci pauimento medio foramen cernebatur quoddam, quod latitudinem habebat duorum dodrantum: altitudinis uerò dodrantalis speciem præ se ferre uidebatur. Qui igitur descendebat mellitas secum deferens placentas, supra pauimentum sese resupinabat, amboque in foramen illud iniiciens pedes, omni conabatur studio, ut genua etiam sibi interius fierent. Exin haud temere talis sese illi offerre solebat species, ueluti

si uniuer

, uniuersum illius corpus conuulsionibus distraheretur,
 & si maximus rapidissimusq; annis, à genibus exorsus,
 totum uorticibus hominem mergeret raperetq; suis. Post=
 ea uerò ex adyto illi clarissima futurorum dabantur ora=
 cula: uerum haudquaquam uniformia illa: neque eodem
 quisque præmoncbatur docebaturq; modo: sed alius qui=
 dem cernere uisus erat, alius uerò audire, prout mouenti
 libuerat Deo. Exhibant autem inde, cum pedes ueluti spon=
 te sua ex foramine exiluissent illo. Hoc enim certissimum
 reditus signum esse perhibebatur. Neminem uerò ex ijs,
 qui in sacrum Trophonij adytum descendissent, aliquan=
 do interiisse memoriae proditum est, nisi unum duntaxat,
 Demetrii satellitem, qui neque debita numinis uenera=
 tione ingressus fuerat, neque Trophonium (ut dicitur)
 consulturus, sed spreta loci religione, sacros expilaturus
 thesauros, accesserat: cuius etiam cadauer à sacro pro=
 cul ingressu inuentum fuisse dicunt. Exeuntem autem à
 Trophonio sacerdotes ij, de quibus retro est dictum, ma=
 nu ducentes illum, in exhedra quadam collocabant, quæ
 non longe ab ipso adyto humi iacebat, & memoriae ap=
 pellabatur sedes, ubi de ijs quæ uiderat aut inaudierat sin=
 gulatim percontabantur omnia: inde ipsum cognatis tra=
 debant & amicis, qui hominem in ædes illas boni dæmo=
 nis, bonæq; fortunæ, ubi statis prius manserat diebus, acci=
 pientes portabant, adhuc præ timore semianimum & stu=
 pidum, & neq; se tunc, neque alios planè dignoscentem.
 Postea uerò & in alijs nihilominus sapere quàm prius
 sapiebat, & risum qui ab eo defecisse uideri poterat, illi
 redire constabat. Necessse autem habebat is, qui à Tro=
 phonio redisset, quæ uiderat aut audiuerat omnia in tabel=
 la picta dæmoni posthac offerre. Hæc Pausanias de Tro=
 phonij

Sedes memo=
riae.

phonij oraculo, qui non solum de multis isthæc audisse, dicit, sed Trophonium etiam consuluisse, & in sacrum eius adytum descendisse constanter affirmat. Cæterum ut nihil ad plenam huius rei cognitionem deficere uideatur, quando hoc loci peruenimus, quo etiam modo inuentum id fuerat oraculum, paucis, nisi molestum est, recensebo.

Trophonij oraculū quo modo inuentum.

Hic adhortantibus cunctis, & ut reliqua subtexcret insuper orantibus, sic persecutus est Fuscus. Cum cœli interperie aliquando uniuersa laboraret Bœotia, & duos iam annos, sitiens & squalida imbris caruisset regio, delectos ex singulis ciuitatibus legatos Bœotij, quos θεῶν uocabant, ad Apollinis percontandum oraculum Delphos miserūt: quibus respondit Pythia, ut in Lebadiā irent, Trophoniumq; hac super re consulerent: fore enim ut isheros siccitatis illius remedia eos doceret. Cum autem ij deo parentes in Lebadiam uenissent, & nusquam locorum Trophonij oraculum cōperire possent, forte ex illis Saon. quidā, ex Acrephne missus oppido, Saon nomine, qui ætate existimationeq; cæteros faciliē anteibat, siue diuino mētis præsagio, seu auspiciandi peritia, apum uolans conspicius examen, illud insequi statuit, quod aliquantisper fecisse dicitur: residentibus autem posthac apibus eo loci, ubi oraculum postea fuit, specum ingressus, ibi repetum, remq; diuinam in eo faciens, à Trophonio quæ concupuerat percepisse dicitur. Hunc postea Saonem ferūt quæcunq; fieri solebāt ab ijs qui Trophonium adibant, sacra præterea ritusq; omnes à Trophonio edoctum, posteris per manus tradidisse. Hæc sunt quæ de Trophonio dicere in præsentia habui: ex quibus perspicue licet cognoscere, mellitas illas placentas, non draconū gratia à descendens affërri solitas fuisse, qui nulli erāt: sed fortasse ut illis uterentur

uterentur, si quo casu suo ipsorum uitio, aut occulta quadam oraculi inhabilitate serius sibi responsa darentur. Nam de timore quid est quod tantopere admirari debeamus? Subterraneum enim specum soli subintrātes, & ibi admiranda quedam uidere & audire expectantes, quid mirum fuerat, si expauescebant, & mirifice contremiscere uidebantur? Ceterum ne de draconibus omnia confinxisse grammaticos licenter appareat, hoc etiam ab eodem auctore memoria proditum est, iuxta Ercynam fluuium speluncam quandam fuisse, in cuius medio duo cum sceptris, quibus inuoluti erant dracones, simulachra fuisse collocata: quæ, ut ait, aspectu quispiam primo cōtuitus Aesculapium Hygiamq; esse existimare potuisset: uerum Ercynæ Trophonij & Ercynæ imagines. & Trophonij imagines esse perhibebantur: quoniā nihilo magis Aesculapio, quam Trophonio sacros assignari angues antiquitus, uniuersi loci illius accolæ existimauerunt. Hæc Fuscus cum dixisset, finem loquendi fecit, oculisq; humi defixis, ceu quippiam quæreret, quod dictis addere uellet, aliquandiu perstitit. Tum Capella, Ita me Dij ament, inquit, Fusce ut nihil mihi hac re gratius, aut magis ex animi mei sententia fieri potuisset. Quamobrem & optimo tuo Pausania in primis afficior, cuius suavis & erudita sanè narratio aures ita demulsit meas, ut quòd tam cito tacuerit, non modice doleam: & tibi ingentes habeo gratias, qui hoc ipsum mihi, quod diu multumq; conquiesui, sedulò nunc & clare explicaueris. Sed quid tu, inquit Fuscus, faceres, si illum lingua patria uerba sua exprimentem audisses? nam quo spiritu, Dij boni, qua oris rotunditate & elegantia, qua figurarum styliq; ubertate & gratia omnia distincte ornateq; complectitur, & ueluti sub oculis ponit. Ego enim in præsentia fidi more interpretis,

nihil addens aut refecans, sed uerbum de uerbo inuertens, tantummodo quæ ille dicit exprimere curauit. Nam Græce etiam poteram, si uoluiffem, adeo omnia hac de re illius uerba menti mihi resident, & illa ad manum habeo, sed hospitis etiam nostri fuit habenda ratio: uerti igitur pro tempore ad uerbum illa, ut potui, in quo sanè interpretationis modo (ut probe nosti) quantum fidei astringitur, tantum demi solet gratiæ. Verum si quando in illius commentarios incidemus, quod sanè erit si quando ad nos Patavium concesseris, hæc quæ dixi, ut à me in præsentia enarrata fuere, de ipso clare percipere poteris. Memineris hoc Fuisse, inquit Capella. Nam & si nihil aliud intercederet causa, cur Patavium uenire, quò non parum sape (ut scis) accedere soleo, uel hoc me unum impelleret, ut Pausaniam tuum, imò potius iam nostrum, inuisere & complecti mihi detur. Verum amabo te mi Fuisse (quod in bonam accipias partem rogo) quid tu adeo sub narrationis tuæ calce oculis humi defixis, cogitabundoq; similis, & quippiam perquirenti aliquandiu perstitisti, ut non quod iam perorasses, ut feceras, sed quod mox de re ardua uerba facturus esses, speciem mihi præ te ferre uidereris? Quod hospes etiam noster (ut opinor) animaduertens, nutu idipsum, ni fallor, mihi significare uisus est: quasi alia quædam sedulo quæreretur, quæ priori de integro sermoni subtexere cogitares. Effare igitur (nisi quid prohibet) quæ tunc animo uersabas: nanque amicorum qui dixit omnia esse communia, non de externis solummodo bonis, sed de internis etiam cogitationibus, serijs præsertim de rebus (ut opinor) intelligere uoluit: nisi forte eos tu inter se se amicos magis esse putas, qui eadem promiscuo usu domestica utuntur suppellectili, aut iisdem libris, quàm illos qui

cordis

cordis sibi inuicem penetralia referant, intimosq; secretorum adytus peruios habent, & omnia communi inter se consilio, & domi & foris concorditer peragunt: quorum (ut inquit ille) idem uelle, atque idem est nolle. Multum abest, ut id reputem, inquit Fuscus: quare nulla est inuidia mi Capella ea me dicere, quæ animo nuper uolebam, cum hac præsertim in re iacturam nullam, sed potius lucri quippiam facere possim: ueruntamen, si placet, ista dicam conditione, si hanc uidelicet mihi huius diei communem operam condonare promittis, ut illa qua uelim in re maxime uti possim: nam id ego uicissim uobis polliceor, & in me libere recipio, illam à uobis (si mihi obtemperaueritis) satis bene & commodè pro tempore collocandam fore. Hic cum assensi fuisset omnes, & Capella etiam pro omnibus hac de re satis præstare se dixisset: Cogitabam, inquit Fuscus, atque inter loquendum sanè animo uolebam, quæ nam illius oraculi uerissima adduci posset causa: quinimo ut unum plerunq; ex alio inquires animus, & ex illo rursum plura uariaq; parturire & elicere solet, multa mihi sub idem tempus oraculorum genera in mentem ueniebant, quibus uarias fuisse causas, cum diuersa essent & uaria, multiformiq; darentur modo, non ab re existimabant. Non igitur mirandum est, si omnes uos hunc in me animi animaduertistis motum, qui intercisum forsitan & inconstantem narrandi modum in me animaduertere potuistis: non enim cum aliud dicitur, & aliud quippiam cogitatur, commodè utrunq;, aut alterũ etiam eleganter fieri potest. Hæc igitur fuit mea illa de qua quæris cogitatio, & hinc totus pendebam animi, meditans, an ab una & eadem causa tam uaria tamq; diuersa oraculorum effici potuissent genera: an, quod mihi uerum magis

esse uidebatur, à pluribus multiformibusq; ista causis pro-
uenirent, ita ut unumquodq; pro locorum situumq; diuer-
sitate peculiare suæ originis sortitum esset initium. Multa
autem & penè innumera à se inuicè distincta & diuersa
fuisse, non est quod ambigere debeamus. Nanq; ut de cla-
rissimis toto terrarum orbe oraculis taceam, quorum ab
omni antiquitate ad nos usque celebris perdurat fama:
Delphico scilicet & Dodonæo: in quorum quidem altero
Pythia, in sacris residens adytis, deo (ut aiunt) plena car-
minibus hexametris certissima fundebat oracula. In altero
uero Peliades illæ, siue columbæ fuerint, seu Iouis antisti-
tes fœminæ, ex Dodonæa quercu futura hominibus cane-
bant euenta: ut hæc, inquit, missa faciam, quæ nam ferè
mundi regio, uel potius qui terrarum in toto orbe tam se-
positus tunc reperiatur angulus, qui non aliquo oracu-
lorum genere uerissimam penes se futurorum prædictio-
nem hominibus polliceretur? Neque ego hoc in loco ex o-
scinibus præpetibusq; auguria connumerare nunc inten-
do, aut extorum inspiciendorum peculiarem Aruspici-
scientiam: uel quæ in procurandis fulguribus ostentisq; di-
gnoscentis, & signis de cælo seruandis superstitiosa ob-
seruauit Etruria: quæ omnia cum ad diuinationem, futu-
rorumq; prædictionem manifestissime pertinere uidean-
tur, consulto tamè præterire decreui: longissima enim hæc
esset narratio, & integrum sibi proculdubio exposceret
diem. De oraculis tantum loquor, quæ uoce, sortibus, so-
mnijsq; aut certis rerum apparentijs fieri, dari uel dice-
bantur. Hæc etenim ut diuersa inter se & penè dissiden-
tia fuerant, sic etiam uarios efficientes habuisse causas,
uero consentaneum esse uidetur: quòd si illa etiam quæ in-
ter loquendum me commouerunt, & mentem ad sese tra-

Delphicum o-
raculum.
Dodonæum.

xere meam, nunc audire cupitis, quæ alioquin rara sunt,
 & uulgo haud satis cognita, nulla est inuidia, quin ea uo-
 bis omnia in medium afferam, quæ ad futuram forsitan de
 ipsis inuestigationem animorum nostrorum latentes exci-
 tare poterunt igniculos, ut ad perspicuam postea causarū
 nunc latentium lucem mentiū directā acie, clare illas per-
 spicere ualeamus. Dico ne ea, an aliud quippiam in præ-
 sentia uobis agendum esse censetis? Quinimo dic, inquit
 Capella, ut pro istis etiam tibi respondeam, nam postea
 tuum erit iubere quid uolueris, nos uero promissis manebi-
 mus. Bene habet, inquit Fuscus, quare audiatis. Multa mi-
 hi sub idem ferè tempus oraculorum genera succurrebāt,
 & in primis illud quod Patris Achaïæ de fonte Cereris De Cereris a-
 Pausanias memoriæ prodidit, cuius uerissima ferebantur pud Patras fō-
 responsa, cum non omnibus tamen de rebus illuc homines, te & oraculo.
 sed de solis ægrotantibus consultum accederent. Sed fortas-
 se non erit malum illius etiam uerba recensere. Fons erat,
 inquit, in Deæ templo medio, ad quem per gradus descen-
 sus dabatur. Hunc lapidea circundabat crepido, super quā
 stantes speculum quoddam tenui alligatum funiculo sen-
 sim demittebant, obseruantes ne id fonte penitus mergere-
 tur, sed extremo tantum orbe summos cōtingeret latices.
 Exin Deæ supplicantes, thuraq; & cætera id genus alta-
 ribus adolentes, in speculum despiciebant, quod ægroti
 illius imaginem, de quo Deam consulturi illuc accesserāt,
 uel mortui, uel uiuentis speciem præ se ferentem clarissi-
 me ostentabat, uerusq; postea secundum uisas imagines
 rerum sequebatur euentus. Pharis præterea Achaïæ oppi-
 do idem refert autor, Mercurij in foro fuisse simulachrū, Mercurij ora-
 qui eam ob rem Agoreus appellaretur, iuxta quod huius- culum Pharis.
 modi fuisse perhibebatur oraculum: Ante illius pedes la-

pidea aſtabat ara, atq; hincinde plumbo ad aram alligatæ
 æneæ uifebantur lucernæ. Conſulturus igitur ueſpertino
 circiter accenſis luminibus ad Deum accedebat, thusq; in
 aræ illius medio de more comburens, aſtans ſimulachrum
 eius ſuffitu uenerabatur, lucernasq; poſtmodum illas in=
 ſtillato accendens oleo, in dei dextram manum numiſma
 quoddam, loci illius patrium, ex arce ponebat, inde ad ſi=
 mulachri aurem quodcunq; percontari uoluiffet clam in=
 ſufurrabat, obturatisq; poſthac auribus à foro rectà di=
 ſcebat, & cum paulum fori limites feſtinus euafiſſet, au=
 res rurſum aperiebat ocluſas, & quam primam fortuito
 audiſſet uocem, illam oraculi ueriq; ominis uice conſtanter
 obſeruabat. Sed quid de puteo etiam in Hyſia Bæotia ci=
 uitate Apollini ſacro pluribus commemorem, ex quo aqua
 epota, Dei ſacerdotes ſe conſulentibus, ueriſſima dare dice=
 bantur reſponſa? Aut de oraculo quod Argis in arce ad
 Apollinis templum fuiſſe fama eſt, ubi uiri neſcia mulier
 ſingulis menſibus agni ſanguine delibato furens & Deo
 plena futuros prædicabat euentus? In Burenſium præter=
 ca agro, in Achaia ſecundum mare Herculis fuiſſe fanum,
 idem eſt autor Pausanias, in quo ex talis & abaco reſpon=
 ſa conſulentibus, hoc maxime dabantur modo. Deo con=
 ſulturus primum ſupplicabat, inde precibus rite peractis,
 talos quatuor, qui ibi aſſatim reperiébantur, ſuper men=
 ſam iactabat, talorumq; ſitus & figuras diligenter exa=
 minans, quid poſtmodum ex quibuſq; ſignaretur præmon=
 ſtrareturq; figuris, ex abaco illa literis mandatum conti=
 nuuo lætibat. Verum quid ego externa commemoro, cum
 noſtratibus decenter uti poſſum? non ne in agro Patuino
 Geryonis oraculum aliquando fuiſſe legimus, ubi in aqua
 iactis talis, certiſſima conſulentibus darentur reſponſa?

Ex

Apollinis pu=
 tei oraculum.

Herculis fanū.

Reſponſa ex
 talis & abaco.

Geryonis ora=
 culum in agro
 Patuino.

Ex hac etiam (ut arbitror) præfagiorum nota iuxta urbē Prænestinæ
 Romam Prænestinæ fuisse sortes: & Aegeriæ lucus: Fau-
 norumq; & Carmentis matris prædictiones: necnon de-
 cantatæ Lacedæmoniorum in Græcia somniandi causa ex-
 cubationes in Pasiphæe fano, quod in agro iuxta urbem Pasiphæe fanū.
 fuisse locupletissimus autor Cicero testatur. Nam ad Am-
 phiarai fanum somnia tota ferè Asia celebrata, uerissimam
 futurorum prædictionem habuisse uniuersa credidit anti-
 quitas. Quæ omnia oraculorum genera (ut aliquando ad
 id quod dictum est nostra recurrat oratio) si quidē ab u-
 nica & eadem singulari prouenisse dicantur causa (ut
 plerosq; uoluisse physicos audio) cur nam tam uarie mul-
 tipliciterq; darentur, non contemnendam profecto quæ-
 rentibus dubitationem asserre poterunt. Vnum enim ab u-
 no, atq; id uno tantum modo fieri, non ab re dicunt physi-
 ci. Si uerò à pluribus, & iisdem diuersis, quis nam hic tan-
 tus efficientium causarum, & tam uariis exercitus in me-
 dium probabiliter adduci poterit, si quidem omnes illæ
 hoc tantum unum siue uaticinium, seu futurorum prædi-
 ctionem, siue id aliter nostro iure appellare maluerimus,
 efficienter antecedere dicantur? Hoc est quod scire percu-
 perem, & in quo hodiernam collocari operam uolebam.
 Quamobrem considera, inquit Capella, & uide quomodo
 id quod liberaliter mihi pollicitus es, & in te pro ijs etiā
 sponte recepisti, bona fide rependas, nisi forte abnegare,
 & ut mali solent debitores, decoquere mauis, quàm per-
 soluere. Meliora quæso, inquit ille. non enim is sum Fuscæ,
 neq; adeo obæratu existo, ut tam turpiter nullo negotio
 mea concidat fides. Cæterum meminere uelim, me tibi il-
 lud pollicitum fuisse, & solum id debere fieri, quod pos-
 sim, & quod plane representare queam: nāq; quod supra

me est, uiresq; longe excellit meas, nulla (ut arbitror) obstrictum me tenet obligatio: quin tibi illud meo arbitrato, integra etiā fide, abnegare possim. Hoc iccirco dixi, quia te uelut in scena aliqua, ex grammatico philosophum continuo prodisse animaduerti, abstrusasq; occultissimarum rerum causas, historiæ metas transgressum, rimandas proposuisse. Cæterum bono sis animo Fusce, nam quæ ego in præsentia persolvere non potero (quæ mea est fiducia) Leonicus hic pro me intercedens repræsentabit, & ut tibi satisfiat sedulo curabit: & ad me conuersus, Quin tu, inquit, Leonice, amici fidem liberas, cum qua etiā obstricta est tua: & de ijs prædictionū oraculorumq; causis, si quid ex antiquorum mysterijs recōditi seruas (quod de te non dubito) in medium assers? nanq; & promissis fideliter satisfeceris, & omnibus insuper nobis rem gratissimam facies. Quid enim est quod huic rei in præsentia præuerten dum esse putemus: aut ubi potius hodiernam operam impendere sedulo debemus, quàm in ijs, quorū cum omnimodam Fusco narrante cognouerimus historiam, horum etiā te dissertatē causas pernoscere cupimus? Huic cum hospes noster, & Fuscus non solum assensi fuisset, sed me insuper impensius rogarēt, urgerent uē ut id oneris sua causa subire uellem, sibiq; hac in re morē gerere: quandoquidē uos inquam sic uultis, & orando etiam iubere uidemini, parebo libens, & hanc mihi demandatam prouinciā alacriter suscipere non uerebor: in qua (ni fallor) non tantū reprehensionis, si quid aut prætermisum à me, aut præpostere dictū fuerit, quantum ueniā, ne dicam laudis, quod cito uobis paruerim, uel apud iniquos iudices me cōsequutum iri nō dubito. Quotus enim quisq; est qui de re tanta uerba factururus, uel satis paratus merito uideri possit, uel hominū studio

studio plene satisfacere ualeat? nedum ego qui iam diu (ut scitis) ab ijs literarum studijs defeci, & totum me in Aristotelicos commentarios, quos etiam publice profiteor, cōieci, in quibus aut nulla de istiusmodi, aut exigua quædam, & ad phyzicas magis causas, & has quidē depropè spectantia pertractantur: ista uero quæ uos à me in præsentia audire percupitis, & abstrusa sunt certe, & ex media (ut aiunt) philosophia repetita: non ea quidem quæ phyzicas de proximo rimatur causas, rerumq; proprietates & effectiones speculatur: sed ex illa quæ sublimioribus diuiniioribusq; contēplationibus uniuersam planè impendit operam. Quamobrem scio me hodie iciuere admodum & tenuiter, ne dicam inepte, totam hanc rem pertractaturum, quæ neque præparationis, neq; tēporis, ut explicari ex dignitate sua possit, habere uidetur satis. Dicā tamen, quando sic uobis placere nunc uideo, & ea certe dicam, quæ mihi in promptu erunt, & ad manum uenient. Cætera uos recōdita magis, & exactiora, de alijs posthac requirere curabitis. Sed uultis ne, inquā, quoniam satis hic fuimus, & aliud dicendi sumendum est initium, ut locum etiam mutemus, & hos conclusos parietes relinquamus, ut aperto aëre, & liberiori cælo perfrui possimus? Hoc est, inquit hospes noster, quod iam pridem dicere uolebā, sed iccirco tacui, quia uos interpellare, aut alicui uestrum rem ingratam facere subuerebar. Quare si id placet omnibus, egrediamur, nam melius (ut opinor) sub diuo manebimus, quando & dies inclinare iam incipit, & pleraque sunt loca, ubi grata arborum opacitate, saxorumq; frigidissimis umbris, diei adhuc reliquum æstum salubriter temperare poterimus. Hic cum omnes hospitis nostri sententiam cōprobauiſſemus, ut eramus domo egressi, sumus



& per collis iugum, ubi sita est uilla, paululum progressi,
 illo duce ad dextrum inter amœnissimas quercus molliter
 descendere cœpimus, secundum aquæ riuulum quendam,
 qui in subiectâ delapsus uallem, per latissima repens gra=
 mina, tacitus defluebat. hic alijs alia, & eadem inuicem
 miris laudibus extollentibus, & tum aëris salubritatem,
 tum loci ipsius amœnitatem & gratiam magnopere ad=
 mirantibus: Quid uos, inquit hospes, faceretis, si istos uil=
 lam hanc in gyrum complexos colles uideretis? Quibus
 quantum ex hominum cultu detractum est, tantum profe=
 cto naturali accedere gratiæ manifeste percipitur. Pro=
 fecto Faunos illic, & agrestes nymphas, rurisq; numina
 habitare & uagari solere cõtenderetis: undiq; enim irri=
 guis scatent fontibus, ubiq; salutiferis cōuestiuntur her=
 bis, quas Dominicus Sennus, nostræ ætatis (ut scitis) inter
 herbarios præstantissimus, certissimos & præsentaneos
 habere effectus mihi sæpiissime affirmauit. Solet enim hæ=
 rum inueniendarum gratia ad nos sæpius accedere. Sunt
 præterea eo loci speluncæ aliquot, tali structuræ forma
 excæuata, adeo fornicibus cōcamerata crebris, ut artis, nō
 naturæ opera planè uideri possint: quas quoties ingredi=
 or, ingredior autem libenter quoties ad ea loca peruenio,
 toties ceu præsentis cuiusdā numinis religiosus quidā in=
 uadere me solet horror. Verū quid hæc ego, inquit, uobis
 pluribus cōmemoro? cras, si uolueritis, illuc accedere po=
 terimus, ut oculata (ut aiunt) fide, quæ dixi percipiatis.
 Dum hæc hospes loquitur, iam ad uallis ipsius initium per=
 ueneramus, quæ non saxis aspera, aut anfractibus salebro=
 sa & inuia, sed spatijs sensim decliuibus exporrecta, al=
 tissimisq; cōsita populis, inter duos hinc inde assurgentes
 colles, in Boreā spectans, mollior extendebatur: hanc me=
 diam

diam leni defluens susurro placidissimus determinabat
 amnis, parvus ille quidem, verum argenteis nitidus aquis,
 & ad uadum usq; perspicuis. Huius utrinq; ripas molli
 uestitas gramine, letissimæ largiter adumbrabant populi,
 quæ per totam alioqui conuallem plurimæ connata, eo ta-
 men loci aquarum (ut arbitror) altrice ui, pulchriores
 procerioresq; surgere uisebatur. Tum Capella, Quid tu,
 inquit, hospes proximos refers colles illorūq; nobis amœ-
 nitatem pluribus inculcas? nonne hæc amœnissima uallis
 omnium sanè elegantiam locorum uel sola superare po-
 test? Quæ situ salubris, arboribus consita, gramine ferti-
 lis, aquis irrigua, auium sonora concentibus, undiq; omnia
 bus renidet angulis, ut neq; decantatas Penei amœnitates,
 neq; Thesalica Tempe, iure quis illi comparare ualeat.

Quamobrē, si sapimus, hic in umbra confidamus, & pro-
 pe aquulam istam amœnissimam inceptum à nobis sermo-
 nem absoluamus: uidetis ne ut hæc ripa, ceu id habuerit
 operis, ut hæc nobis ad disceptandum efficeret sedem, sen-
 sim decliuis molliter se substernat, plenosq; herbarū tho-
 ros largiter subministret? Vera narras, inquit Fuscus, qua-
 re nisi quid aliud Leonico uidetur, hic confidamus. Mihi
 quidem inquam nihil hoc loco pulchrius, nihil gratius,
 aut ex animi mei sentētia magis esse potest: quare nulla est
 mora, quin hic sedentes, quod agendum nobis est commo-
 de peragamus. Confedimus igitur omnes, alius aliò secun-
 dum flumen, quo quisq; loci cōcupiuerat maxime. Et ego,
 Quandoquidem inquam hoc mihi hodie dicendi munus
 omnes iniunxistis, & tantum me oneris subire uoluistis,
 parebo libens. Cæterum antequam ad propositam deuo-
 luamur quæstionē, Deū prius Opt. Max. à quo omnia quæ
 mente, sensu ue percipi possunt, per gradus producta, ad
 illum

illum rursus numeris quæque suis retro feruntur, supplices ueneremur: illumq; intentis precemur animis, ut mentis nostræ oculos splendore suæ claritatis illuminet, ut & quæ sibi grata sint in primis dicere ualeamus, et rei quam nunc quærimus naturam, & essentiam satis commode explicare possimus. Et isthuc quidem omnium posthac dicendorum quam accommodatissimum in præsentia propositum à me sit proœmium. Caterum quod omnes ferè ij qui accuratius quippiam pertractare rimari'que aggrediuntur, planè facere solent, ut rem scilicet illam, de qua disputaturi sunt, rationibus esse demonstrent, ueterum testimonijs confirment, crebris stabiliant experiētijs: id mihi in præsentia de diuinatione uerba facturo haudquaquam agendum esse censeo: non alia profecto de causa, nisi quòd hæc (ut opinor) res clarior testatiorq; est, quàm ut ullis ostētionum comprobationumq; indigeat adminiculis. Est enim isthæc uetus opinio, & ab Heroicis usq; (ut ait Cicero) ducta temporibus, & omnium etiam gentium firmata consensu, quandam inter homines uersari diuinationem, futurorum'que diuersa diuinitus ostendi præsentia. Quamobrem non satis belle mihi fecisse uidentur Stoici, & inter eos Chrysippus maxime, qui diuinationum genera esse, futurorumq; præsentiones inter homines reperiri, pluribus argumentorum euidentijs ostendere est conatus. Hoc enim longis annorum seculis fuit comprobatum, & uniuersa asseueranter confirmauit antiquitas, huiusmodiq; etiam quotidie nonnulla salutariter experitur uita. Omnium præterea ueterum philosophorum natio, præter unum aut alterū duntaxat, qui de Dijs male opinati sunt, Diuinationem esse constantissime approbauit. Ista nanque bene reciprocari, & in sese recurrere dixerunt,

Si diuina

Diuinationem
esse.

Si diuinitio est, Dij certe sunt: & si sunt Dij, est Diuinitio. Clarum autem est Deos esse, & eosdem rebus consuleretur humanis: quare & Diuinationum clara sanè & perspicua omni procul dubio reperiri genera certum est. Quas futurorum prædictiones siue præensiones esse hominum uitæ maxime conducentes & commodas, concorditer omnes definire philosophi. Positis igitur & constitutis duobus ijs, quæ in quæstionibus (ut Peripatetici uolunt) prima obuersari solent, quòd sit scilicet, & quid sit Diuinitio, ad reliqua si placet omine cum bono pergere cõtendamus. ea autem sunt, ut Diuinationum effectrices causas, siue naturalibus constare dicantur initijs (ut uoluerunt nonnulli) seu naturam ipsam excellere & supereminere uideantur, pro uirili inuestigare conemur. Hoc enim est (ut opinor) quod Fusci mentem inter narrandum insigniter commouerat: & quod omnes postea uos à me explicari enodariq; magnopere exposulastis: uerum antequàm ad id, quod mihi demandatum est, nostra se flectat oratio, necessaria prius hac in re antiquorum diuisione quadam uti constitui, ut ex illa & quæ nobis in præsentia pertractanda sint, & rursus quæ silentio prætereunda clare dignoscere possimus: non enim omnia (ut aiunt) uasaria in præsentia excutienda esse duxi, & temporis alioqui mihi, necnon uestrum in primis est habenda ratio. Est autem diuinitio huiusmodi, duo scilicet esse diuinationum communia genera, unum quod artis sit particeps, alterum quod arte careat. Et primum quidem illud coniectura, iugiq; rerum obseruatione constare antiqui uoluerunt: Secundum uero, animi concitatione quadam & furore effici, cum is soluto liberoq; motu futura præsentit: quod & somniantibus sæpenumero contingit, & non

Diuinitio duplex.

Sibyllæ.
 Bacchides.
 Epimenides.

Et nonnunquam uaticinantibus per amentiam & furorem: ut Sibyllas quondam fecisse, & Bacchidem Bæotiū, necnon Epimenidem Cretensem memoriæ proditum est, qui deo pleni, & à Phœbo afflati esse dicebantur. Cuiusmodi homines Græci φοιβόληπτοι καὶ νυμφολήπτοι appellare consueuerunt. Quales etiam Pausania teste, Cyprius fuit Euclus, & Musæus Antiophemi filius, genere Atheniensis, & ex eadem præterea Vrbe Pandionis filius Licus. Vniuersum igitur illud non naturale, sed artificiosum diuinādi genus (si placet) in præsentia dimittamus, quod & à iuniori sanè Academia, & à Peripateticis insuper copiose insigniterq; reprobatur, & obstinate acriterq; defenditur à Stoicis. Vbi & aruspicina cōtinetur omnis, & extorum inspiciendorum superstitiosa sanè ratio uersatur: uniuersaq; insuper sortium, portentorum & omnium coaceruatur disciplina. De altero autem disertemus genere, quod natura constare dicitur, & iccirco ab illis naturale appellari solet, quando animorum (ut dixi) uis & potestas sine ratione & scientia, motu ipsa suo soluta, & libera, cōcitari, & futura præsentire uidetur. Quod diuinādi genus (ut in Phædro inquit Plato) antiqui Maniam, id est furorem, siue insaniam uocauerunt, quoniam soli diuino furore afflati & perciti uere uaticinarentur & prædicarent Vates: Posteriores uero T, interposito elemento, Mantiam, id est, diuinationem appellauerunt. Quo in genere oracula omnia, & somniantium etiam præsentiones manifestissime contineri perhibetur. Siquidem his duobus tantum modis sine ratione & scientia liberi & soluti incitantur animi: Vno uidelicet furentes, altero somniantes. De ijs igitur uerba nunc faciemus: nanq; de singulis diuinationum generibus distinctius uel

le per

le perquirere, & infinitum profecto esset, & à re quam proposueramus proculdubio perquam alienū. De oraculorū enim prædictionibus & causis se libèter audire uelle dixerat Fuscus: & idipsum in præsentia pertractare nobis fuerat constitutū. Cæterū quæstionē hanc bonis (ut aiunt) auibus aggredi incipiētibus, nobis ea prius, quæ ab antiquis per manus tradita tenemus, de diuino scilicet beatoq; & omnibus undiq; partibus absoluto animali, omnia in sese animalium complectenti genera, in præsentia supponantur, & pro receptis habeantur. Hoc enim cū omnes in se omnium rationē cōtineat & causas, cunctaq; perpetuo & iugi circumductu ex sese producat, & in se uicissim recipere dicatur, nō immerito omnium uera primariq; perhibenda est causa. Hoc Græci quidē *νοῦς*, nostri uero mundum, cum ob illius exactū excellentemq; ornatū, tum propter omnimodā rerū uarietate, nō ineleganter sane appellauerūt, animal æternū beatumq; omnia uidens, audiens omnia, rationaliq; insuper animo, et diuina præditū mente. Nihil enim prohibet (ut opinor) me hodie ex Academiæ penetralibus diuinationis causas depromere tentantem, Academicum ex Peripatetico fieri, illorumq; sectam audacter profiteri, qui mihi alioquin cum in alijs ferè omnibus, tum hac maxime in re, mirifice consensisse uidentur: quoniā admirabiliū ferè omnium, quæ quotidie nescia experitur uita, de quibus aliorum planè silent dogmata, ipsi latentes rimantur causas, & semper habent aliquid quod de huiusmodi omnibus in mediū luculenter & cōmode asferre possint. Diuinū igitur hoc animal, siue mundus, seu uniuersum, siue alio quouis nomine appellari gaudet, omnia in se animalium cōplectens genera, ceu sui partes & mēbra, uitali cuncta spiritu permeans animat,

pariaq;

Mundus animal omnibus partibus absolutum.

pariaq; comparibus copulans, & contraria determinans à diuersis, mirabili quodam harmoniæ temperamēto uniuerſa cōponit & temperat, ſummaq; concilians imis, & medijs extrema coniungens & uinciens, indiſſolubili rerum nexu cuncta conſtringit. Ex quo omnes omnium rationes & cauſas, ceu à perenni quodā fontis exordio, partium ad ſe inuicem concordia & diſcordia, quæ Græci *συμπάσαι* καὶ *ἀντιπάσαι* uocant, emanare effluereq; certiffimum eſt: has autem ſuis quaſq; & peculiaribus numeris, ſingulatim quidem ſolus ipſe exacte cognoscit, ſiue quis ex meliorum ordine cum illo omnia luſtrat: genera uero is qui rerum naturæ perſcrutationibus non ſine acri iugiq; ſtudio uniuerſam impendit operam. quorū ego ueſtigia ſequutus diuini furoris, quem uaticinium ſiue diuinationem uocant, ubi tota (ut diximus) oraculorum natura cōſpicitur, probabiles aſſerre iam nunc aggredior cauſas: non enim Geometricas hoc in loco neceſſitates quiſquam à nobis iure exigere debet, tali præſertim de re, quæ naturam etiam ipſam (ut nonnulli philoſophorū & ij non ignobiles, uoluerunt) longe excellere uidetur. Cæterum ut ad rem aliquando perueniamus, quia unam horū omnium & eandem eſſe exiſtimo rationē, in primis de Trophonij oraculo, quod huiusmodi nobis anſam præbuit quæſtionis, ſi placet, uideamus, ubi totam hanc rem phyſice prius executere & indagare tentabo: poſtea etiā (ſi per uos, quominus id fiat, non ſteterit) altiores illius rationes & cauſas, deo fauente, inueſtigare conabor. A diuino igitur illo, de quo diximus, animali noſtrum capiamus exordium, cuius calētem uitalemq; (ut Poëta inquit) undiq; diſfuſum ſpiritū, & uniuerſum hunc globum, ceu uaſtū quoddā & inmeſum corpus permeantē & mouentē, à ſolidis maxi-

me &

me & cōpactis illius partibus (qualis esse perhibetur terra) multos sanè uariosq; excitare, & expellere halitus, à quibus diuersæ apud nos rerū cōsequutiones efficiantur, uerisimile esse uidetur. Vnde enim tot locorū diuersitates, tot uariarū genera aquarū, tātāq; & tales terrarū differētiæ constare dicētur? Nāq; multi planè salubres sunt situs, quidā uicissim graues & pestilentes, nonnulli letales etiā & mortiferi perhibētur, ut de Ampsancti in agro Hirpino: & de Plutonia terra in Asia refert Cicero: Quid quòd aliæ quidē terræ acuta & excussa producant ingenia, aliæ uero pingua et obtusa? Quæ omnia sanè fieri ex cœli uarietate, & ex disparili terrarū spiratione uero (ut aiunt) uerius esse constat. Quid mirū igitur, cum tot sint terrarum, & tam diuersi anhelitus, & respirationes, tam uaria in super tanq; inter se distantia situ suo, cœliq; positura loca, si aliquò terrarum ij exeant spiritus, qui hominum animos ad futurorum præsagia suapte uel pronos & procliuēs, & à diuino furore non alienos, cōcitare, & ueluti diuinitus inflammare ualeant? Quid enim (ut de Trophonio loquamur) subterraneū illum specum? Quid medio in specu excauatum foramen, in quo ille qui Trophoniū consulturus accedebat, cōiectis pedibus conuulsiones quasdā, torrētisq; rapidissimi speciem totum se uorticibus rapientis sentire uidebatur, aliud sibi uelle dicemus, quàm aduentantis motionē cōcussionem uel spiritus, locis præsertim cauis, cuiusmodi sunt spelunca & antra, non alienā, à quo inflatæ mētēs & diuino illo halitu grauidæ futura facile præsentire & prædicare poterāt? Aut diuinādi quidē uires (ut nonnullis placere sentio) ipsi secū affērūt animi: id autem quod eos excitare, cōmouereq; dicitur, aëris quædā est & spiritus peculiaris proportionatāq; temperies. Aliæ

namq; alijs cognatæ & commodæ existunt res, & ob id
indissociabili quadam inter se uitæ concordia, & agere et
uicissim pati natæ sunt. Quemadmodum enim abstrusos
conchyliorum colores admixtum commode & efficaciter
extrahere dicitur lamentum: cocciq; succum nitri uis ad=
dita ualenter educit: sic animorum latentes alioqui notio=
nes, futurorūq; in ipsis adumbratas præsentiones, loci il=
lius diuinus anhelitus excitare, et perspicue collustrare po=
test: non enim absurdum est, animum ipsum, qui ab omni
æternitate uixerit, & cum innumerabilibus uersatus sit a=
nimis, omniaq; insuper quæ in rerum natura sunt uiderit,
signis quibusdam cōsequentia declarantibus futura præ=
sentire posse. Non enim illa quæ futura sunt (ut inquit Ci=
cero) subito existunt, sed est quasi rudentis explicatio, sic
traductio temporis nihil noui efficientis, sed primū quod=
que replicantis. Quibus rationibus ea etiam quæ de sacri=
ficijs dicta sunt, cæteroq; illius cultu, qui Trophoniū con=
sulturus in sacrum illius specum descendebat, manifestissi=
me suffragari uidentur: omnia enim illa animorum expedi=
ta erant piacula præparationesq; nimirū illos expurgan=
tes, ut ab omni aliorum impedimento liberi & soluti, uim
illam diuini halitus bene recipere, & constanter perferre
possent. Nam prophanos et cōtaminatos homines, aut nō
afflari penitus, aut nō sine perniciæ sua oraculi illius peri=
culum facere, indicio esse potest contumax ille & impius
Demetrii satelles, qui nulla numinis religione permotus,
nullis expiatus sacrorum cæremonijs, spretoq; Dæmonis
cultu, & ijs quæ de more fieri solebant neglectis, sacrum
Trophonij specum ingredi ausus est. Quamobrem mor=
te (ut ferunt) repentina sublatu, temeritatis, impietatisq;
sue meritas luit poenas. Nec dissimilis ferè (ut arbitror)
diuinandi

diuinandi fuit ratio in Delphico Apollinis oraculo toto terrarum orbe celeberrimo: nisi quod ille quidē, qui Trophonio utebatur uate, uel audiebat quippiā, uel futurorū cernere uidebatur euenta. Pythia uero ipsa deo plena, in sacro residens adyto, hexametris uersibus certa fundebat oracula. causam enim eandem fuisse, diuersum uero modū uerisimile est. Nam terræ etiam diuino quodā halitu Pythiam incitari, uel locus ipse testimonio esse potest. Antrū enim erat ubi sedens illa futurorum præcinebat oracula: & in eo secretior quædam pars, quam adytum fere omnes, nonnulli cortinam uocauere: ex qua fætidicus ille spiritus, nō sæpe, neq; eodem semper modo, sed incrementis quibusdam & decrementis exhalare dicebatur: quem hauriens Pythia, atq; inde furore percita & afflata, futuros præcinebat euētus. Statis etiam quibusdā temporibus domus illa (autore Plutarcho) odoratis uaporibus, quales fere à pretiosissimis exhalare solent unguentis, uniuersa replebatur: qui ueluti à fonte quodā, ex ipsis adyti faucibus eleuati, sensim postea euanescere sentiebantur. Calidi scilicet cuiusdā natura (ut par est) aut ui quapiā alia illos commouente & excitante, quinetiā Pythiæ ipsius corpus purū castumq; per omnē sanē uitā esse oportebat, & ab omni hominū conuersatione, externorumq; contagio penitus alienum. Non enim omnium mentes diuino illo halitu æquē concitari inflammari ue poterant: neq; corporis cuiusq; habitus ingruentis uim spiritus facile suslinere ualebat. Quamobrem propitij etiam, & modo non aduentantis Dei, & contrā auersi & nolentis, ex oblatiis uictimis clarissima sumebant indicia: non enim esse aptum oraculum, qui illis præerant sacris dictitabant, nisi astant contremuisset uictima, & toto succussa corpore, non si-

ne soni cuiusdam tremantis strepitu ab inis pedibus ex-
agitata fuisset, quod in capite solummodo immolandarum
hostiarum in aliorum sacrificijs deorum moris fuerat ob-
servare. Quam rē apud nos uates Vergilius, nullius nō di-
sciplinæ peritissimus, non grāmaticis ex triuio, qui ijs ar-
centur sacris, sed rerum naturæ studiosis, cum de hoc lo-
queretur oraculo, ijs uersibus elegantissime significauit:

Vix ea fatus eram, tremere omnia uisa repente,

Liminaq; laurusq; dei, totusq; moueri

Mons circum & mugire adytis cortina reclusis.

Halitus enim fatidici (ut opinor) præsentiam ostendere
uolens poëta, motionem illā, & rerum etiā anima caren-
tium concussionē recensere uidetur, sine qua neq; Pythiā
oraculi illius antistites introducere solebāt, & oraculum
respondere nolle contumaciter assuerabant. Cui etiā sen-
tentiæ ea quæ de primis oraculi illius initijs memoriæ pro-
dita est fama, clarissime astipulari uidetur. Ferunt enim pa-
storem quendam Coretum nomine, qui eò loci gregem
compulerat, forte fortuna iuxta specum illum aliquando
consedisse: cunq; deo percitus furens cderet uoces, &
futura prædiceret, primo quidem à confluentibus illuc un-
diq; pastoribus neglectum, & pro insano habitum fuisse:
mox autem cum ea quæ prædixisset ille, certissimos sorti-
rentur euentus, unice ab incolis cultum, eo loci clarissimi
toto orbe terrarū oraculi certissima iccisse principia. Ex
quibus cuius clarissime patere potest, Delphicum oracu-
lum ab ipsa rerū omniū parente, et eadem altrice natura,
effectrices sortitū fuisse causas: terræq; diuinū halitū ua-
ticinij architectum extitisse, & iccirco nō æque omnibus
se insinuasse, uiresq; uulgo suas ostēdidisse: quia per cognata
germanā uē congruenti sibi tēperamento corpora, ex-
purgatas

Coretus pa-
stor.

purgatas hominū solūmodo permeare mētes, & furentiū
 linguis indubitata futurorū euenta, prædicere & præmon
 strare natus fuerat. Nō enim (ut diximus) incredibile cui=
 quā merito uideri debet, in tanta præsertim rerum naturæ
 uarietate, alia ab alijs intimo quodam uitæ cōmercio, na=
 turaliq; rerum concordia quodāmodo affici & pati, quæ
 à cæteris ne parūper quidem moueri sunt apta. Hercules
 lapis (quem magnetē uocant) ferrum ad sese trahit, palcas Magnes ferrū
 non sentit: cōtra electri uim, quod succinū appellāt, palea attrahit, pale-
 rum festucas non solū attrahentem, sed arcte etiam tencn=as respuit: Ele
 tem uidemus: cui si ferrum applices, nihilo sanè plus effi=arum contrā.
 cies, quā si palcas magneti proximas facias. Sed quid
 ego hæc, quando magnes etiam ipsa quantūuis pusilla &
 tenuis, altero sui latere ferrū trahit, altero respuit & ex=
 pellit? ne miremur uarias rebus in uarijs naturæ affectio=
 nes reperiri, quādo in tantillo lapidis corpusculo cōtrariæ
 adeo & dissidentes inter se uires manifestissimè conspi=
 ciantur. Potuit igitur illum qui ad Trophonium descende
 bat, uis ea terræ futuri imaginofum, & præscium redde=
 re: sicut Pythiā diuinus ille halitus incitare ualebat. Multa
 enim ijs ipsis in rerum natura haudquaquam dissimilia
 quotidie experitur uita, quæ si quis clara mentis acie ani=
 maduertere uoluerit, profecto ijs etiam quæ recensuimus
 haud magna cum re fidem præstare poterit. Hederæ folia
 commanducata ebrietatis speciem quandam repræsentare, Hederæ folia
 & procliues ad furorem mentes ualenter incitare, autor inebriant.
 est Plutarchus: & ideo (ut opinor) non tantum præsidis
 dei causa, quantum quia ipsos mouere, & inflammare po
 terant animos, hederacæ poëtis coronæ dabantur: qui
 sine furore quodam (ut Democritus & Plato testantur)
 magni sanè esse non possunt. Vinum quinetiam ipsum Vini uis.

non ne liberalius haustum ad secretorum recōdita elicienda, & nullo respectu proferenda uel maximam habere uim ab omnibus serè perhibetur? unde apud Græcos natum prouerbum οἷν & ἀλήθεια, id est, uinum et ueritas: quod etiam, ut Aristoteles refert, ad uarios in hominibus efficiendos mores, & ad multiplices animorum cum sedandos, tum incitandos motus, pro corporis cuiusq; habitu, & temperamento, necnon ipsius mensura admirabiliter ualere uulgo experientia docet: alij enim illo epoto hilares fiunt & garruli, tristiores alij & taciturni, nonnulli seueriores & rigidi, contrà plerique faciles & misericordes. Sunt & qui furentes penitus eo & insani efficiantur: ut merito diuina quædam in illo uis & natura existimari possit, quæ mentes hominum, ut quæque affici nata est, incitare & commouere efficaciter ualeat. Et hæc sunt ut de multis pauca, quæ de Trophonij prædictionibus & Delphico Apollinis oraculo in præsentia dicere habui. Ex quibus duo etiam illa quæ refert Porphyrius, oraculorum genera, quæ nam fuerint, et ex qualibus prouenire potuerint causis, non ab re cōiectari potest: quorum unum fuerat Colophonium, ubi aqua ebibita de futuris uates respondere solebant. Alterum uero Branchidicum, in quo halitum ex aqua ascendētem haurientes antistites uentura prædicebāt. Vtrisque enim simul (ut par est) diuinandi suberat ratio, quamuis quo dabantur modo uaria esse uiderentur. Quemadmodum ijs etiam quæ paulo antè ex Pausania retulit Fuscus, ijs inquam quæ naturalia sunt & per furorem fiunt, minimeq; ad artificiosum illud diuinandi referuntur genus: ut de puteo scilicet in Hyssia Bœotiae ciuitate, cuius aqua ebibita Appollinis sacerdotes futura prædicebant: & de oraculo præterea Argus in

arce, ubi statis diebus agni epoto sanguine, uiri nescia mulier, futuros præcinebat euentus: omnia enim ista rerum naturæ sunt opera, ex cæli uarietate et disparili (ut diximus) terrarum respiratione profecta, quæ hominum animos pro uaria cuiusq; affectione incitare & commouere suo iure ualenter possunt. Quos non solum ijs, sed alijs etiam plerisq; concitari rebus afflari uel perspicuum sanè est. Multi enim Phrygijs (ut ferunt) cantibus, uariisq; sonorum harmonia uehementius impelluntur animi: nonnullos nemora & syluæ, plerosq; amnes aut maria magnopere commouent, & non solum ij terrarum halitus, et afflandi, quos recensuimus modi: in tantum ut nihil magis diuinam animorum naturam & uim, quàm illorum frequens concitatio & permotio nobis declarare possit. Caterum hoc quispiam in loco non immerito ambigere posset, quoniam modo ij terrarum halitus, qui corpulenti alioqui crassiq; esse perhibentur, animum ipsum à corporea seiungatam natura pertingere, talesq; illi affectiones inurere ualeant: id nanque quod corpore caret, à corpulento patine suspitione quidem bene fingi potest. Huic pro tempore breuiter sanè hoc occurri potest modo, huiusmodi uim, siue illam terrarum naturam, siue animam & habitum spiramentâ uel quædam appellare malumus (nihil enim refert quo nam eam uocemus nomine) ipsum quidem non afficere animum, quamuis pro sermonis cursu sæpius id ipsum dixisse uidemur, sed illius secundarium uehiculum, id est fantasticum, siue animale spiritum, quem nonnulli primum eius esse dixerunt corpus, concitare & inflare posse: quæ illius affectiones cum postea ab ipso propter essentiæ cognationem facile percipiantur animo, efficiunt sanè, ut ille latentes posthac & abstrusas in sese rerum



excitet rationes, ex quibus iugi cōsecutionis serie ea quæ futura sunt multo antè præuidere & prænoscere potest. Verum isthæc quoniam altioris cuiusdam quæstionis dubitationem disquisitionemq; afferre uidentur, in præsentia missa faciamus, propositumq; de naturali diuinatione negotium hic opportune concludamus, quādo efficientes eius causas & rationes in rerum natura insignitas reperiri satis distincte (ut arbitror) in ijs quæ retro dicta sunt demonstrauimus. Vnū tantūmodo hic addā, quod pleriq; hac de re non immerito ambigere, & animi dubios facere solet, uires uidelicet illas corporū animorumq; motrices aliquando posse deficere, quemadmodum à supra dictis locorū sitibus, longo decantata æuo euanuisse uidemus oracula: non alio quippe modo, quàm quosdam defecisse fluuios, aut in alium contortos cursum, & deflexos fuisse, manifestum sanè est: nihil enim à lunæ completitur orbe, quod longinquis temporum spatij aliquando non fatiscat & corruat, & alioqui physica dictat ratio, quæcunq; aliquando ortum habuerint, finem quoque ut habeant necesse esse. Verum posse etiam uicißim non negauerim, annis uoluentibus, ijsdē uel alijs numeris eadem de integro exoriri, ut rerū inuariabili serie illa summus mundi opifex ante secula fōre præscripsit. An non meministis miraculi illius, quod superioribus annis in agro Veronēsi, non longe à Benaci lacu Alpes uersus, uulgo proditum est contigisse? Templum scilicet quoddam diuæ Mariæ eo in tractu dicatum esse, in quo statis diebus quidam terræ excitabatur halitus, qui ædem sacrā ingressos homines excitabat adeo & cōmouebat, ut singulis primū artibus cōtre miscerent, mox etiam (si diutius permansissent) nō sine incondita quadā manuum & ceruicis iactatione incessanter saltarent

saltarent, neq; nullo consistere possent modo: quod tamen
 non omnibus accidere dictū est, sed plerisq; quos (ut opi-
 nor) exhalans ille spiritus pro habitu quodam corporisq;
 tēperamento, solummodo afficere & concitare poterat.
 Qui postmodū terræ halitus deficientibus (ut par est) cau-
 sis, illo quo exire cœperat anno, euauisse dicitur, licet id
 ipsum, ut moris est, uulgus imperitorū supersticiosius etiā
 nunc interpretari nō desinat, & supenaturalibus assigna-
 re id causis contendat. Et hæc de naturali diuinationum
 genere, quod per furorem fit, deq; illius physis rationi-
 bus & causis in præsentia dicta sufficiant. Reliquum est,
 ut alteram eius partē, in qua uniuersa somniorum contine-
 tur ratio, pro uiribus explicemus, ut uniuersum hoc genus
 ex omnibus, ut aiunt, angulis solerter excutiatur: & nos
 id, quod à principio polliciti fuimus, bona fide rependere
 uideamur. Qua in re (quod in superiori etiā fecimus capi-
 te) eas primum inuestigabimus causas, quæ & naturales
 sunt, & in nobis ipsis originē habere uidentur suam: reli-
 quas uerò siue extrinsecus accedentes, seu naturam etiam
 ipsam excellere creditas, quas pleriq; solas et ueras huius-
 modi somniorū causas esse uoluerūt, postea si uos id ipsum
 uelle cognouero, pro uirili inuestigare conabor: quam-
 uis animi dubius sim, totam hanc rem me hodie (ut par est)
 satis plenē cōgruenterq; explicare posse. Video enim de-
 ficientē iam cedere diem, rupiumq; & arborū duplicatas
 excrescere umbras, & non pauca adhuc restant quæ dici
 cōueniunt. Caterū quod hodie fieri non poterit, nihil (ut
 arbitror) prohibebit quin cras, uel perendie, aut quando
 uolētibus magis uisum fuerit uobis, distinctius cōmodius ue-
 etiam fiat. sed unde egressi sumus iterum (si placet) reuer-
 tamur. Somniorum rationem fatidicorum uniuersumq;

Somniorū fati-
 dicorū ratio.

insuper illud diuinandi genus, quod liber dormiente corpore ex sese proferre dicitur animus, neq; prorsus esse cōtemnendam, neq; omnino admittendā & confirmandam Aristoteli placuisse uideo: quippe qui omne id naturalibus quidē prouenire causis, uerum ex corporis ipsius habitu tēperamentoq; emanantibus, haud dubitanter existimet: & iccirco ea solūmodo, quæ ad somniantis pertinent corpus, præminari præmonstrareq; posse confirmat. Reliquorū uerò neq; causas esse somnia, neq; indicia, sed fortuitorū quorundā uicem solūmodo uult obtinere. Quamobrem eos absurda opinari dicit, qui somniorū à deo mitti genera existimauere: quod si alioqui uerū esset, sapientibus, inquit, ea, prudētibusq; uiris, & nō cuius è populo à dijs mitti illa utiq; par esset: & ad summā uniuersum hoc diuinandi per somnia genus extenuare labefactareq; planē contendit Aristoteles, & pro corporis habitu qualitateq;, præteritarū quinetiam modis cogitationū formari efficiq;, & res quæ ad somniantis pertinet corpus solū præmonstrare assuecrauerat affirmat. Caterum omnis contra illū hanc ob rem Academia & uniuersa insuper Stoicorum reclamationatio. Vita quinetiam omnis, cuius certe firmū ualensq; esse debet testimoniū, res agatur, somniorum esse diuinationē futurorumq; præmonstrationē quandam contumaciter assuecrauerat: uerorumq; ab omni antiquitate, & indubitatorū exemplorum, quæ uulgò etiam quotidie experimur, infinitam penē multitudinē in mediū adducentes: quæ ego in præsentia iccirco prætermittere decreui, quia & tēporis ad illa explicandā nō satis habere uidemur, & ex illorum uos commentarijs commodius ea posthac & seriosius colligere poteritis. Vnum tamen hoc silentio præterire non possum, quod de Aristotele ipso lo-

cuples

cuples sanè autor refert Cicero, ex quo non omnem illum somniorum diuinam præfensionem funditus sustulisse, sed animos aliquando nostros curarum impeditioe liberos iacète & mortuo penè corpore futura præuidere uoluisse clarissime (ut arbitror) percipietis. Scribit enim in suis de diuinatione commentarijs is autor, post uaria somniorum exēpla, his planè uerbis: Quid singulari uir ingenio Aristoteles, & penè diuino, ipse ne errat, an alios uult errare? cum scribit Eudemum Cyprium familiarem suum iter in Macedonia faciētem Pheras uenisse, quæ erat urbs in Thessalia, tum admodum nobilis, ab Alexandro autem tyranno crudeli dominatu tenebatur: in eo igitur oppido ita grauitè ægrum Eudemū fuisse, ut omnes medici diffiderent. Ei uisum in quiete egregia facie iuuenem dicere, fore ut breui conualesceret, paucisq; diebus interiturum Alexandrum Tyrannum, ipsum autem Eudemum quinquennio post domum esse rediturum. atq; ita quidem prima statim scribit Aristoteles consecuta, & cōualuisse Eudemum, & ab uxoris fratribus interfectum Tyrannum: quinto autem anno exeunte, cum esset spes ex illo somnio in Cyprium illum ex Sicilia esse rediturū, præliatē cum ad Syracusas occidisse. Ex quo ita illud somnium esse interpretatum, ut cum animus è corpore excesserit, tum domum reuertisse uideatur. Intellexistis ne quæ de Eudemo familiari suo, deq; eius somnio, quo nihil clarius, nihil diuinius unquam fieri potuit, Aristoteles scripta reliquit? Nō omnia igitur fortuito euenire somnia, aut futuras solummodo corporum habitudines ex paruis præmonstrare initijs uir ille, ut uidetur, existimauit: sed alia quædā esse somniorū diuiniora genera, quæ à corpulentis non essent querenda causis, constantissime credidisse, cum hæc scri-

pscribit

pferit, uerifimile est. Et profecto ita se res habet: nō enim
 dissimilis admodum somniorum uidetur esse ratio à uatum
 furore illo, de quo retro uerba fecimus. Nam quæ uigilan-
 tibus accidunt uatibus, eadem dormientibus nobis fere
 euenire solent. Viget enim in somnis animus, liberq; à sen-
 sibus, & curarum solutus nexibus, & à sopito insuper
 corpore, cū iacente & mortuo sciugatus euolat, & quo-
 dammodo foras excurrit, uidetq; omnia illa & percipit,
 quæ in rerum dicuntur esse natura, si modo (ut inquit Pla-
 to) temperatis escis, modicisq; potionibus ita est affectus,
 ut sopito corpore, ipse uigilet, suasq; tunc res agat. Et
 hæc profecto somniantis uera est & indubitata futuro-
 rum præsensio. Cui certe sententiæ cum Academia omnis,
 tum uniuersa etiam Stoicorum fauet natio, omnisq; insu-
 per uita consentit. Neq; hic tamen obstare sanè potest id,
 quod obijcere non ab re multi solent: infinita scilicet fäl-
 sa euenire somnia. nanque forsitan haud fälsa sunt, sed no-
 bis obscura & recondita. Verum sint fälsa nonnulla, con-
 trā, uera pleraq; quotidie experitur uita: quæ etiam mul-
 to plura proculdubio euenirent, nisi nosmetipsos cibus po-
 tionibusq; suffarcientes onusli certè, & marcescentes cu-
 bitum iremus, partemq; animi illam (ut inquit Plato) quæ
 mentis consiliq; particeps est, affluentibus sepeliremus
 epulis, & uino obrueremus, malisq; insuper prauarum co-
 gitationum illecebris corrumperemus. Hæc namque ipsa
 diuinationi sanè officere, & illius claram aciem penitus
 perstringere solent. Verum quid ego nunc de re tam per-
 spicua, totq; ueterum testimonijs approbata, tantis anti-
 quorum philosophorū fulcita exemplis, & ab omni præ-
 terea uita constantissime recepta & credita, pluribus a-
 pud uos agere contendo: & nō potius quod propositum
 est

Tres somniorum fatidicorum causæ.

est, illius causas rationesq; inuestigo? Quamobrem ijs dimissis, ad rem nostram (si placet) deueniamus. Tres somniorum causas esse fatidicorum, tribusq; modis dormientium animos futura prænoscere posse ab antiquis memoria proditum est: Vno quòd suapte ui ipse per se præuideat animus, quippe qui inter diuina et mortalia medius existere, eaq; cognatione quadam & affinitate facile pernoscere dicatur. Alio quòd immortalium plenus animorum sit aer, quos demones uocare cōsueuimus, in quibus omnis ueritatis insignitas animus noster percipere possit notas, & ab illis etiam de rebus sanè omnibus plenè doceri queat. Tertio quòd ipsi nobis dii, superiorq; natura (sic enim in præsentia ipsam supereminentem appello essentiam) hanc animis nostris diuinationē insinuent. Nam Democriti & Epicuri de imaginibus simulachrisq; suis sententias, quæ nocturno præsertim tempore propter sensiteriorū uacationem, aerisq; immobilem tranquillitatē, animos nostros ingredi, & ueluti pulsare uolebant, & sic uisa nobis efficerere, iamdiu reiectas & explosas in præsentia missas faciamus. Ex ijs igitur tribus quos recensuimus modis, posteriores illos duos qui Dæmonū generi, decorumq; naturæ diuinationis per somnia munus acceptum referunt, silentio nunc ideo præterire decreui, tum quia extrinsecus huiusce rei causas afferre uidentur, nos autem naturales cognatasq; & internas quærimus rationes, tum etiā quia totum hoc (ut diximus) negotium, ueluti ab alio quodam exordientes initio, post expletam hanc (si dabitur) quæstionem, commodius distinctiusq; pro uirili explicare conabimur. Primū igitur illum (si placet) uideamus modū, qui animis nostris intrinseca quedā diuinationis per quietem & connata semina inesse uoluit: in quo eam nimirum iuncta

*iuncta esse uidetur diuinandi ratio, quam uigilantibus per
 furorem animis in superioribus contingere diximus. utro
 bique enim soluti & liberi animi ceu spreto corporum
 contubernio ex sese ea nimirum proferunt, quæ quominus
 sæpe proferre possint, corpulenta obstat uidetur moles,
 isq; qui ei debetur necessarius uitæ cultus: corporis enim
 angustijs conclusus animus & sensuum impeditioe di-
 stractus ceu captus oculis, quæ possidet bona non animad-
 uertit: qui si fortè per diuinum seuocatus furorem, aut per
 placidæ quietis munus in sese respiciens, ab illius societate
 & contagio liber euaserit, ea certe prospicit, ex quibus
 constare dicitur: cuius cum media inter uere entia, & illa
 quæ ad generationem ueniunt perhibeatur esse natura, o-
 mnia etiam peculiari & suo possidere modo uero consen-
 taneum est. Meminit igitur præteritorum, præsentia cer-
 nit, futura præuidet. Diuinusq; certe opere in illo, quin
 imò ueluti mûdanus quidã esse cõsetur Deus. Vtrum quo-
 nam modo illa quæ liber ipse per se cernit animus somni-
 ans percipiat homo, quispiã non immerito hic ambigere
 posset. Quamobrem ut hanc etiam rem bene excutere, &
 introspicere ualeamus, quædam prius nobis ex ipsa philo-
 sophia in præsentia sunt mutuanda, quæ sunt huiusmodi:
 Mentem sanè animi nostri caput eo nempe se habere mo-
 do ad animum ipsum, quo se habent uere entia ad ea quæ
 nō esse, sed fieri ab Academicis dicuntur. Sicut enim mens
 coniunctim omnia ceu per contactum, & unico (ut aiunt)
 ictu intelligere dicitur: humanus uerò animus ratiocinan-
 do uarios agit discursus: Ita quodcunq; in seipsis ea quæ
 uere sunt entia, simpliciter coniunctimq; colligunt, illa
 quæ generantur & fiunt longis sanè uarijsq; processibus
 & regressibus diuissim explere conantur. Eodem igitur
 (ut di*

(ut diximus) se habent modo uere entia ad ea quæ fiunt, quo mens ad ipsum se habere animum dicitur. Si igitur in quatuor ijs supra narrata transferatur similitudo, & ut mathematicorū certissima nos docent præcepta, cōmutatim uarietur proportio, illud sanè, quod erit primū tertio, hoc secundū esse quarto uerissimum est. Sicut igitur mens se habet ad uere entia, ita se habebit animus ad illa quæ fiunt. Sed hoc in concessis est, mentē uere entium in se species habere omnes: animum ergo eorum quæ fiunt species possidere omnes, & in se continere necesse est. Habet igitur sanè omnes, in actum uerò producit illas quæ conueniunt, atque ijs ipsis speculi more fantastica illuminat uim, per quam animal quæ intus sunt posthac animaduertere dicitur. Cæterū quia totam hanc rem (ut opinor) disputantiū magis, quàm docentiū more arctius cōstrinxisse nunc uideor, & ideo ista quæ modo dixi, uobis obscura cognituq; difficilia esse non dubito, ne malorū exemplo ducū, in itineris ipsius terrano & calce, ex patētibus campis, latisq; uiarum spatij in angustissimos calles, & impedita salebrosa q; uos loca coniecisse uidear, & animi dubios & perplexos reliquisse, id ipsum quod obscurius dixi (nisi forsitan audire piget) nullo negotio uobis breuiter & expedite cōplanabo: ubi etiam uniuerſa somniorū ratio quoad intrinsecas eius & naturales causas, cōmode colligi, & pro tēpore congruēter cōcludi poterit. Nā de alijs extrinsecis causis, tam ad rem istā, quàm ad alterum illud diuinandi genus quod per furorē fit, pertinentibus, cū hodie ob temporis angustiam pertractare posse iam desſerem, cras nisi quid aliud uobis huic rei præuertendū esse duxeritis, accuratius pleniusq; explicaturū polliceor, & in me sanè recipio. Sed redeamus. Animum humanū Accedemic

demicorum inherentes uestigijs, omnium illorum quæ generantur plenitudine ornatum insignitum'ue, in ter-
 reum hoc domicilium descendere affirmamus, omnino=
 dasq; rerum in se continere species dicimus. Sed cum im=
 mortalis res & diuina, morti obnoxia rei & ut ita dicam
 prophana, & indiuidua natura undiq; sectionem diuifio=
 nemq; patienti, apte coniungi commisceri'ue non possit,
 corpore iccirco quodam opus fuit medio, quod illi uehicu=
 lum uocant, quæ res dissidentes inter se adeo naturas, &
 ueluti contrarias naturali quodam nexu, temporaneisq;
 uinculis coniungere uincireq; posset. Hunc animalē spiri=
 tum alij, nonnulli fantasticum illum appellant, primum
 animi corpus, uel secundum, si tribus in descensu utitur
 uehiculis animus, ut multos ex Academicis uoluisse ani=
 maduerto, qui cum etiam sensuum omnium communissi=
 mum sensiterium esse dicunt. Omnes quippe sensus fanta=
 stico ministrare spiritui, & assidue illi famulari & præ=
 sto esse perhibentur. In hunc igitur solutus & uere sa=
 piens animus, placidaq; quietis tranquillitate, à sensuum
 perturbationibus molestijsq; otium agēs, quæ extraneas
 alienasq; in illum naturas passionēsq; inferre solēt, quot=
 cunq; possidet species & rerum formas, & quot etiam à
 superiori accipere dicitur mente, deriuare transfunde=
 req; consuevit: qui speculi in morem perspicuis insignitus
 illustratusq; imaginibus, in ipsum ut conuenit ab animo
 traductis, in se conuerso animali illas clarissime spectan=
 das uidendasq; proponit, ex quo certissima ueritatis indi=
 cia plerunq; animaduertit homo, futuraq; tum uigilans,
 tum somno cōpositus naturaliter præuidere potest. Nihil
 enim refert utrum cōcitatus spiritus (quod in uigilantibus
 fieri diximus furore) animū excitet ipsum: latentesq; rerū
 imagines

imagines inde elicere ualeat: An contrà (quod in somnijs accidit) animus ipse expurgato puroq; spiritui ea quæ possidet bona affatim largiatur: eadem enim utriusque diuinationis esse censetur ratio: licet non eodem procedat modo. Non semper autem ea quæ animo insunt uidet homo, quia non semper in fantasticum illius spiritum eorum quæ in animo resident uestigia insigniuntur: quo nō moto nihil profecto cernere licet: quemadmodum neque mentis ipsius actionem deprehendere ualemus, priusquam cum qui patibilis appellatur, mouerit intellectum: omne autem quod non eo fit modo, nos penitus latet. Quamobrē spiritum hunc ut ad huiusmodi peragēda mysteria aptus cōueniensq; esse possit, quàm purissimum defecatissimumq; habere oportet: quod tum religiosis sacrorū cærimonijs, necnon philosophiæ studijs, reliquisq; illius expiationibus: tum uictu modico, modestisq; & temperatis potionibus, bonisq; insuper, & diuinarum rerum assiduis cogitationibus effici posse, ij nobis pro constanti tradidere, quibus hæc inuestigare & perquirere curæ fuit. Non mirum est igitur de Esseorum apud Iudæos gentē, diuino semper cultui dedita, ut Iosephus narrat, & Porphyrus etiam memoriæ prodidit, si inter eos futura multi præfagire ualuerunt, & ideo prophætæ sunt cognominati: ab animalibus enim per omnem ætatem, & ab omni prorsus uitæ luxu, & incontinentia eos pertinacissime abstinuissē memoriæ proditū est: solisq; religionis mysterijs, & diuinis cōtemplationibus assiduam impendisse operā: à quibus uitæ institutis expurgatæ (ut par erat) mentes, se ipsas facile introspicere & futura perspicue poterant præuidere. Simili ferè uitæ cultu & instituto Pythiam, Dodonæasq; uates omnem traduxissē ætatem, eodemq; uictitasse modo

d

ab an



ab antiquis rerum scriptoribus traditum est. Amphiarai præterea, Pasiphaæq; in Lacedæmone somnia, non aliter prouenisse uerisimile est: in omnibus enim ijs una & eadem ferè expurgatorum animorum subesse uidetur ratio. Diuina enim prophanis insinuari posse negat Plato. Et hæc de diuinandi genere illo, quod naturale uocant, & in uigilantium furorem, dormientiumq; fatidica disternant somnia, pro temporis breuitate, ingenioliq; nostri mediocritate dicta sufficiant. Reliquam uero debiti pensionem, qua uobis distringor, nulla erit mora (nisi quid aliud forte uidebitur) quin eam cras uobis integram bona fide persoluam. His dictis assurreximus omnes, & inclinata iam ad uesperam die, domum ire perreximus.

B E M B V S,

S I V E,

DE ANIMORVM IM-
MORTALITATE.

PETRV M Bembum, qui Leonis Pont. Max. à secretis fuit, nemo est qui ambigat, inter ætatis nostræ eruditos ferè omnes optimarum artium facile sibi prius uindicare: neque id mehercule iniuria: namq; admirabili quadam à teneris annis ingenij dextertate bonarum literarum disciplinas ingressus, & excellentissimis usus præceptoribus, in magna electissimorum librorum copia, neq; sumptuum, neq; laboribus parcens ullis, plurimum illis studij impendit & temporis: unde ad eum sanè liber trahimur peruenit apertum, ut sine controuersia cum doctissi

doctissimus, tum omnis elegantiae specimen & sit, & merito ab omnibus esse censeatur. Verum diuinæ illius philosophiæ, quæ à Socrate primum exorta, à Platone postmodum Academicisq; pertractata, & illustrata fuit: quæ seculi nostri ignauia haudquaquam cognita, admodum spernitur, cum prius eruditorum ferè omnium animos sola teneret & componeret sola: illius inquam philosophiæ omnes ferè ad hanc usque diem uel ignarum omnino illum, uel neglectorem constanter arbitrati sunt: idq; ipsum, ut opinor, propterea accidisse crediderim, quæ cum illum summa quadam animi affectione humanioribus literis delectari animaduertent, & poeticiis interdum studiis, pandendisq; carminibus uacare cognoscerent, grauioribus eum ac planè seuerioribus philosophiæ præceptis adhibuisse operam non existimabant: aut hominum fortasse uitio id suspicabantur, qui quod in se esse non sentiunt, aut etiam assequi se posse diffidunt, nec habere alium quempiam, nec consequi posse contendunt. Verum longe aliter se res habet: Is nanque uir cum in cæteris philosophorum decretis, tum in Academicis præcipue tantos habet progressus, ita in reconditos disciplinæ illius recessus sese penitus indidit, ut cum excellentibus eo in dogmate uiris, non modo ætatis nostræ, qui sanè sunt perpauca, sed prioris etiam seculi, tum cum excultior multo erat ætas, non immerito comparari, certareq; possit: adiunxit præterea tot tantarumq; rerum cognitioni admirabilem quandam eloquentiæ gratiam, ut siue quid ex tempore proferre uoluerit, siue scribendo literis mandauerit, ita illius fluat niteatq; oratio, is certe scriptiois sequatur stylus, ut unus nostræ ætate, quod raro sanè prioribus etiam contigit seculis, dicendi leporem, cum rerum peritia

copulasse merito uideri possit. Quod cum sæpe aliàs Rōmæ in publicis administrationibus, tum superioribus diebus priuatim apud nos manifestissime declarauit: cū enim Patauij esset, quò ex diutino grauiq; morbo conualescens, ualeitudinis recuperandæ causa paulò antè cōcesserat: & ad eum uisendum, salutandumq; nonnulli senatorij ordinis uiri primarij conuenissent, inter quos Antonius Iustinianus, & Ioannes Baduarius, uiri ingenio doctrinaq; præstantes erant, quorum alter Aristoteli peripateticisq; mirifice erat affectus, illorumq; etiam placita aliquot annos Venetijs luculenter professus fuerat: alter uero Platonem ueterisq; Academiæ assertores in primis admirabatur & extollebat: post prima illa, ut ualèrent, & quid noui esset, cæteraq; huiusmodi, quæ primis in congressibus fieri diciue solent, cum iam factum esset silentium, & alterius ille sermonis ansam quæreret, ad Antonium conuersus, & Ioannem qui iuxta sedebant: Quid uos, inquit, Antoni & Ioannes, quando philosophiæ ambo egregiam nauatis operam, talibus ingenijs, tantaq; eruditione illam secatis distrahitisq;, & ut seditiosi solent ciues, in partes (quod aiunt) coniunctam illius, & copulatā Rempublicam dissipatis, neq; unā potius ut est, eam esse permittitis? Audio enim uos sæpenumero uestris in congressibus multum diuq; hac de re inuicem dissidere, & altercari solere, cum uterque uestrum, tanquam pro aris & focis, pro hæresi obluētetur & depugnet sua. An ignoratis Peripateticos ipsos, & Academicos ex eadem quasi fontis cuiusdam origine defluxisse, nominibusq; solum differre illos, cum rebus sententijsq; inter sese optime congruant, & uere concordent? Tum Antonius, Dicuntur, inquit, isti Bembe, dicuntur mehercule facilius quàm explicentur,

& an

& antiquorum nonnulli, ut audio, & recentiorum etiam aliquot, id ipsum ostendere sunt conati, sed meo quidem iudicio, non minus ij quàm illi (ut in prouerbio est) oleum & operam perdididerunt. Nec immerito mehercule, quando ea philosophorum secta pugnâtibus inter se nixa decretis, non in paucis quibusdam aut leuibus, sed in omnibus ferè, & maximus præsertim de rebus toto (ut aiunt) diametro inter sese distare, & dissidere uidetur. Et quæ tandem sunt ista, inquit ille, in quibus hæc pugnât dogmata, & cõuenire non possunt? Et Antonius, An parua tibi, inquit, (ut hinc exordiar) non uerborum sed rerum potius uidetur esse dissensio in ijs, quæ statim de primis rerum initijs utriq; dicunt & sentiunt? Nostri enim quatuor rerum omnium esse uoluerunt principes causas, Materiam scilicet, Formam, Efficiēs, & Finem: illi autem his non contēti, alias insuper adiungunt duas, Instrumentalem nescio quam, & Exemplarē: recte ne, an secus, hæc quaquam laboro. Non enim id indagare excutereq; præsentia contendo: sed quòd diuersa loquantur & sentiant (ut facio) id nunc ostendere cogito. Mundum præterea nostri neque aliquando genitū, neque interiturum unquam pro certo cõfirmant: illi uero & à Deo fabrefactum esse illum, & quantum in ipso est, corrumpi posse autumant. Astra illi animo sensuq; prædita, & singularia quædam esse animalia dicunt. Nos uero neq; seorsum animata, neque sensibus insignita, sed cæli esse partes affirmamus. Animos præterea generat Plato, & ut sibi uidetur, ostendit illos esse perpetuos. Aristoteles uero neq; ullum animorū recēset ortum, neq; planè æternitatē declarat. Eosdē perenniter à se ipsis moueri cõtendit Plato: ab ijsdem uero omnē motionis abnegat modum Aristoteles.

Peripatetici &
 Academici in quibus dissentiant.



Longum profecto esset, & proluxi operis, in quibus ij discerepant uiri, si recensere uellem omnia, de prouidentia, de fato, de dijs ipsis, de media demonũ natura, de inferis. Quamobrẽ temporis angustia parcens, & breuitati studens, præsertim cum te audire potius, quàm ipse dicere & disertare cupiam, pauca de multis, & hæc ipsa cursim quæ mihi ad manum uenerunt, nunc in medium attuli. Ex quibus tamen uel cæco (ut aiunt) manifestum esse potest, Academicos Peripateticos'ue neq; uerbis unquam, neque sententijs fuisse cõcordes. Tum ille subridens, ut sæpe solet, quam accurate inquit, & quàm memoriter Antoni collegisti omnia, quæ Peripatetici Academiciq; nostri (utrosq; enim æque complector) cum litigare quam conuenire malunt, hac de re in mediũ asserre solent. Quamobrem tu mihi haudquaquam aliud agēs in præsentia, sed bene mehercule præmeditatus, aut certe ab ijs disceptationibus satis recens huc planè accessisse uideris. Verum quanquàm non tam dicendi mihi nunc, quàm audiendi habenda esset ratio: adestis enim hic duo philosophiæ lumina: quia tamen nonnulla habere me credo, quæ hoc in loco mediocriter adduci possent, quibus (nisi opinione fallor) uerborum solummodo, non rerum, ut dixi, inter illos uiros ostenditur esse dissensio, ea si uidetur, ut potero breuiter recensco: nisi forte uos aliud quippiam huic sermoni præuertendum putatis. Et quid aliud, inquit Ioannes, non solum nobis, sed bonarũ etiam artium studiosis omnibus, quin potius uniuerso hominũ generi, uel maius à dijs immortalibus, uel optabilius contingere unquam posset, quàm inueniri quempiam, qui ceu honorarius arbiter, recto iudicij examine inter Platonẽ Aristotelemq; componere & posset & uellet. Verum prolixa admodum (ut
arbitror

arbitror) istiusmodi cōstres, plenāq; controuersæ dissensionis, & longæ uerborum ambages, pluresq; essent, ut probe innotesceret causa, explicariq; posset, comperendinationes faciendæ. Temporis autē breuitas, nedum ad omnia, quæ ad tantam pertinere controuersiam uidentur, explicanda non sufficit, sed neque ad ea, quæ modo dixit Antonius, quæ quota illorū est portio enarranda, satis cōmode se habere uidetur. Quamobrem non absurde meo quidem iudicio feceris, si aliquā ex prædictis seorsum ceperis quæstionem, illamq; ut soles omnia, distincte luculenterq; pertractare cōtenderis. Vera narras mi Ioannes, inquit ille, & ego iam pridem largus pollicitator cogitabam quonam me coniecissem imprudens, unde non facile sanè ob temporis angustiam me expedire nunc possem. Verum quanam de re tu audire malles? De primis ne rerum initijs? An de mundi genitura, & astrorum naturis, an potius de animorum æternitate? quicquid enim horum tibi sumpseris, ut id ordine explicari queat suo, integrum sibi nimirum exposcet diem. Quid enim aliud, inquit Ioannes, ex te audire nunc malim, quàm de quo mihi cum Antonio nostro non cōuenit, & pro quo plura sunt prælia decertata, & adhuc sub iudice lis est? Quid tandem isthuc est, inquit ille. Animorum, inquit Ioannes, æternitatem nescio an credat Antonius, certe totis contendit uiribus (quod etiam cum loqueretur animaduertere potuisti) non esse illam à Platone nostro sufficiēter ualideq; demonstratam. Hac de re hodie, nisi quid aliud forte cogitas, differentem te audire percuperem, quando & Academicæ (ut audio) cum Peripateticis probe coniunxisti, & professioni alioqui hoc tuæ maxime consentaneum existat: extinctis enim aliquo interitu animis,

omnem funditus tolli religionem est necesse. Tum ille, Faciam, inquit, ut lubet, quando & sponte mea id sum pollicitus prius, & tibi nunc rem gratam facturum me esse percipio. Verum quid noster Antonius ait? Et Antonius, Præuertit me, inquit, hac in re Ioannes meus: id ipsum enim abs te, si tacuisset ille, expostulaturus eram. Rem igitur mihi gratissimam feceris, si Platonicas de animorum immortalitate rationes docentis more uniuersas explicaueris, eas præsertim, quæ scribuntur in Phædro, quæ mihi cum obscuræ alioqui & breues, tum haudquaquam (ut dixi) quod uolunt ostendentes, non immerito uideri solent. Quasdam enim animis adscribunt motiones, quibus sublatis, uel non concessis, uniuersa animorum concidat æternitas necesse est. Tum ille, Demōstrāt, inquit, Antoni, & mirifice sanè demonstrant animorum æternitatē rationes Platonicae: quod autem breuiter & subobscurè fortasse id faciant, non eo inficias: res enim de qua agitur multis obstructa est difficultatibus, & antiquorum (ut scis) fuit iste mos, res arduas & graues menti potius insignire uelle, quàm auribus inculcare. Verum licet pluribus in commentarijs suis idem hoc facere animaduertatur Plato: de animorum enim immortalitate & in libris de Reipub. loquitur, & in Timæo, & Phædone non minus disferit: nonnullaq; etiam hac de re in epistolis ab eo sunt conspersæ: hoc tamē in loco, quē à me tibi explicari nunc expetis, peculiariter ex ipsius essentia animi, & ex ijs quæ illi per se inesse censentur, illius à Platone demonstratur æternitas: cuius ego inherens uestigijs, quandoquidem hoc me subire oneris uoluistis, & ego libens id ipsum recepi, hanc totam rem pro uirili eo concludam modo, qui & facilior mihi, & ad nostrum disputandi usum

usum accommodatior esse uidebitur: uerum meminisse uos uelim, quando ad hoc de animorum æternitate Platonice conuiuium, neque inuitati (ut aiunt) neque oblatis accessistis hospites, sed ultro uos ingessistis, si non ex dignitate uestra, si non opipare & laute, sed ieiune & tenuiter accepti fueritis, ut non mihi succensere potius, quàm uobismet imputare uelitis. Ardua enim res est, plenaq; immensæ subtilitatis de qua est agendum, & ad quam non il lotis (ut aiunt) manibus proculdubio esset accedendum. Quamobrem feretis me, inquit, & æquo etiam animo partemini, si uerbis interdum uti cogar nouis, nonnunquam etiam si externis, cum clarius quippiam nobis illa aut significantius, quàm nostra exprimere uidebuntur: non usitato enim admodum calle nostra progreditur oratio: & ideo omnibus undiq; fulcienda adiuuandaq; est adminiculis. Vt lubet, inquit Ioannes, modo rem ipsam intelligamus. Non enim ij sumus, qui uerborum splendorem, & fucum potius, quàm res ipsas quærere curemus: perge modo. Propositum igitur, inquit ille, nostrum, quando uobis ita uidetur, deo cœptis fauente, hoc aggrediamur modo. Constitutum nobis est in præsentia Platonice rationibus animorum immortalitatem ostendere, illorumq; cum diuinam excellentemq; tum æternam & incorruptibilem declarare naturam. Isthuc autem non incōmode me facturum planè confido, si prius quidem quot sint corruptionis & interitus modi in medium afferam, doceamq; deinceps nullo illorum modo animos posse corrumpi. Si enim hoc ita contingeret, ut arbitror, animorum certe æternitatem omnino ab illis sublato interitu, proculdubio à me hodie demonstratam esse iudicabo. Ita ne uobis uidetur Antoni & Ioannes? an aliter esse censetis? Nobis profecto, inquit An-

Animorum immortalitatem Platonice rationibus probat.

Corruptionis
duplex modus

tonius, (ut pro Ioanne etiam respondeam meo) haud aliter uideri potest: quod enim corrumpi & interire nequit, id perpetuo manere et uiuere necesse est: quam ob rem id ipsum monstrato modo: hoc enim opus, hic labor est. Tum ille, Probe, inquit, existimatis, quamobrem sic uideamus. Quod corrumpitur omne bifariam sanè corrumpi & interire percipitur: aut enim ipsum à se ipso, ob materiam in sese existentem, corrumpitur: aut extrinsecus ab alio quopiam interimitur. Verbi gratia: lignū aut sponte corrumpitur sua solitarius iacens, putredine scilicet teredinibusq; consumptū: in seipso enim sui gestat interitus causam, materiā uidelicet, quemadmodum in suis de Repub. commentarijs scribit Plato, asserens quæcunq; sponte sua intereūt, omnia à domestico quodam & interno corrupti uitio: aut rursus extrinsecus lignum corrumpitur, ut cum ab igne comburitur, seu à dolabræ acie cōminuitur, siue secatur à serra. Valens enim sui natura etiā num perstare, externa interit iniuria. Quoniā igitur (ut uidimus) duo sunt uniuersales corruptionis modi, geminæ iccirco à Platone nostro in Phædro de animorum immortalitate afferuntur rationes, duorum ui & potestate syllogismorum necessario collectæ: quarum altera quidem à semetipso animum destrui non posse demonstrat, quando seipsum mouet animus, et ideo mouetur semper. Altera uero, quòd neque ab alio perimi potest animus clare ostendit, quando alijs omnibus ipse motionis cuiusq; est initium & origo. Cæterum ad clariorem non minus dictorum, quàm mox dicendorum intelligentiam, fertasse non erit malum, syllogismos utrosq; cum suis seriatim recensere propositionibus, ut uniuersa isthæc explicata materia ueluti sub oculis posita, nullo posihæc negotio percipiatur. Prioris igitur rationis

rationis hæc planè est series: Animus à seipso mouetur: quod à seipso mouetur, semper mouetur: quod semper mouetur, est immortale: animus igitur immortalis est. Hæc, ut diximus, ratio nobis sanè ostendit, à se ipso animum non posse corrumpi. Secundæ autem processus ratiocinationis hoc maxime constat modo: Animus seipsum mouet: quod seipsum mouet, motionis est principium: quod est principium motionis, est ingenitum: quod est ingenitum, est incorruptibile: quod est incorruptibile, est immortale: animus igitur est immortalis. Hæc autem (ut dictum est) ratio peculiariter animorum immortalitatem ostēdit, ideo, quia à nullo extrinsecus alio destrui corrumpiue potest animus. Et hæc profecto duæ sunt illæ rationes, quæ de animorum æternitate a Platone in Phædro sunt adductæ, quas tu Antoni, cum breues admodum & concisas, tum difficiles & subobscuras tibi uideri dixisti: quæ licet sint duæ, alia (ut diximus) atque alia animorum immortalitatem ostendentes uia: quia tamen inter se aptæ quodammodo, & bene connexæ sunt, unica uideri utrinque sumpta potest ratio. Neque immerito mehercule: quod enim à seipso non destruitur, neque ab alio etiam quopiam destrui & corrumpi potest: nam cum in semet sui causam gerat perennitatis & salutis, quonam modo ab alio destrui & corrumpi ualeat, uix bene fingi potest: quando quidem sibi semper adest, & saluum se esse uult. huiusmodi autem est (ut ostendetur postea) id quod à seipso mouetur. Et rursum quod ab alio non corrumpitur, sed principium est, & causa potius ut alia conseruentur, & uiuant omnia, ut id à seipso destrui corrumpiue possit, haudquaquā possibile esse uidetur, quale motionis ostendetur esse principium, cum præsertim neq; à superioribus illud corrumpi causis uicissimile sit,

Syllogismi
duo Platoni
ci.

le sit, à quibus conseruatur & fouetur magis: neque ab ijs
 quæ infrà sunt, cum ipsum essentia illis initium existat &
 caussa, omnibusq; sui præsentia motionem largiatur &
 uitam. Si autem à nullo corrumpitur, quonam modo rur=
 sum seipsum corrumpat & destruat, iugis omnibus fons
 existens & origo uitæ, reperire nedum difficile, sed im=
 possibile esse uidetur. Recurrunt igitur in sese rationes
 (ut diximus) istæ, quæ licet idem probare concludere que
 animaduertuntur ambo, peculiari tamen & propria qua=
 dam uia utraq; id facere contendit. Sed nescio quomodo
 dum de complicatis connexisq; rationibus istis loquimur,
 nostra labens sensim prætergressa est oratio, multaq; flu=
 xu rapuit & inuoluit suo, quæ alioqui non mediocri ex=
 plicationis indigēt cura. Inhibeamus igitur, si placet, pau=
 lisper, & unde egressi sumus, cò redeamus, ut ordine quæ=
 que suo & explicentur accuratius, & melius intelligi,
 percipi q; possint. In superioribus (si recte animaduerti=
 stis) rationibus cōmunis quædam duobus syllogismis sum=
 pta est propositio. ista uidelicet, Animus se ipsum mouet,
 siue à seipso mouetur: nihil enim refert (ut arbitror) u=
 tro dicatur modo, cum utrobique propositionis diuersi=
 mode prolata eadem sit uis & potestas: quod enim sci=
 psum mouet, à seipso mouetur: & idem etiam rationis
 propositione transposita probe recurrit modus. Hanc igi=
 tur in primis propositionē pro uirili explicare conemur:
 & de natura se ipsam mouente, quæ in ijs quæ mouentur
 primaria sanè esse censetur, diligēter perquiramus, quam
 magni certe nominis uiri, & in primis philosophus Ari=
 stoteles infirmare & destruere sunt conati. Simul enim
 propositum recte agemus nostrum, & inter primarios
 philosophos Platonem & Aristotelem obiter etiam com=
 ponere

ponere poterimus, qui mea quidem sententia (ut saepe dictum est) & in alijs ferè omnibus, quibus dissidere uidentur, & in hac præcipuare, de qua uerbo tenus litigant, sententia ipsa rectoq; rationis intellectu bene cõueniunt, & cõcordant. Cum enim omnes corporeas ab animis motiones seiungat Aristoteles, & iccirco neque semper moueri, sed neq; moueri omnino illos asserat, haudquaquam merito, apud eos, qui hanc rem rite perpendere uolunt, Platonem taxare potest: qui aliam esse animorum, aliam corporum asserit motionem: & proprijs peculiaribusq; utraq; hæc moueri affirmat motibus. In decimo enim de legibus commentario isthæc ad uerbum memoriæ prodidit Plato: Trahit quidem animus cœlestia omnia, & terrena insuper, & ea quæ in mari sunt, suismet motionibus, quarum ista sunt nomina, Velle, considerare, curare, consulere, opinari siue recte, seu perperam, gaudentem, confidentem, dolentem, timentem, amantem, perosum. Ex quibus uel cæco (ut aiunt) est manifestum alias motionis esse species, quas animus assignat Plato, & alias quas ab eisdem Aristoteles remouet, & in uerbis solum hac de re inter præceptorem & discipulum omnem esse controuersiam. Quod enim Aristoteles animi affectiones, siue ægritudines, seu passionες appellat, id motiones uocat Plato, cum uterque tamen corporeos motus ab animorum essentia censeat alienos. Neque hoc inmerito equidem: quod enim indiuisibili & continuæ cõuenit endelechiæ, indiuiduæ animorum essentiæ quæ conuenire potest? Verum hæc (ut dixi) pro talium concordia philosophorum à nobis obiter in præsentia sint adducta: quamobrem ad nostrum redeamus propositum, probemusq; pro uirili aliquod motionis initium in rebus necessario reperiri, idq; ipsum natura

turam

turam esse, quæ seipsam mouet. Hoc autem præcipue ag-
 grediamur modo. Cum planè cōstet perspicuumq; sit, esse
 in natura aliquid quod ab alio manifeste moueatur, quæ-
 rendū sanè est, utrum ne id quod mouet, moueat & ipsum
 ab alio motum, & illud rursum ab alio etiam motum mo-
 ucat, & sic ad infinitum: aut circulo illa quæ mouetur ab
 alio, se inuicem mouent, & à se mouentur, ita quod pri-
 mum semper moueatur ab ultimo: aut est tandem ad pri-
 mum uenire quiddam quod seipsum mouens, & alia, à nul-
 lo extrinsecus alio moueatur. Neque aliud quisquam à su-
 prædictis eorū quæ mouentur omnino reperiri potest mo-
 dus. Cæterum cum duo illi priores motorum modi ratione
 penitus careant, quoniam neque infinitas, ut ita dicatur, in
 essentijs reperitur ulla, infinitorumq; ratio sub scientia ca-
 dere nulla potest: & circularis ille à se inuicem cum mo-
 uentium, tum motorum contextus uniuersi ordinem de-
 struit, cum idem eiusdem causam faciat & causatum, ut
 merito explodantur illa, ad quiddam sanè motionis per-
 uenire principium necesse est, quod iugi perenni; uitæ a-
 ctu cuncta post se mouet & temperat: quod esse animum
 & Plato proculdubio, & Aristoteles uoluerunt, licet is
 immobilem illum esse asserat. Plato autē naturam seipsam
 mouentem, eo quo diximus modo constanter asseueret. Cæ-
 terum si commutentur nomina, & seipsum mouentis lo-
 co, seipsum perficiens reponatur, aut seipso uiuens, & in
 seipsum agens & patiens, omnia profecto Aristoteli &
 Platoni quā optime quadrare uidebūtur. Intellectus si-
 quidem, quem animi supremam ambo esse uolunt caput,
 & seipsum intelligit, quando eius essentia illius est actio,
 & seipsum perficit: & licet improprie, per transumptio-
 nem tamen in seipsum & agere & pati non inconcinne
 dicitur

dicatur: sed quoniam paulò post hac ipsa de re suo dicitur loco, ideo reprime me nunc, & non prosequar longius. Constitutum igitur cum sit in presentia, & de philosophorum consensu utrorumq; sanè compertum & declaratum, motionum omnium principium & fontem esse animum, quod is seipsum moueat, & à seipso moueatur, hoc deinceps uideamus modo. In uniuersa entium omnium latitudine à contrario in contrarium nusquam nisi per medium comeat pertransitq; natura, hoc enim modo à calore in frigus intercedente permeat tempore: & ab albo in nigrum fusco interueniente transmittit: ab oppositisq; semper qualitatibus ad oppositas per illarum graditur media: quod in anni etiam temporibus est uidere: ab æstate enim ad hyemem, & ab hyeme rursus ad æstatis tempora natura, hic interiecto uere, illic autumno progreditur medio: & ad summam tum in corporibus ipsis, tum in natura etiam incorporea omnes à contrario in contrarium transitus peculiaribus proculdubio fieri medijs animaduertuntur. Simili igitur rationis modo in proposito etiam fieri nostro est necesse. Cum enim in entium reperiatur genere id quod ab alio solum est motum, & rursum id quod penitus est immobile, interstitio sanè reponi in medio necesse est id quod tum mouet, tum mouetur, quod à seipso moueri dicimus, unum inquam & idem numero existens & subiecto, mouens & motum, ut obiter Aristotelem & peripateticos caueamus, qui animal huiusmodi esse per se & à se motum autumant. Non enim idem numero & subiecto in ipso animali mouetur & mouet quippiam, sed anima quidem solum mouet (ut illis sanè placet) corpus uerò mouetur solummodo. Non igitur seipsum mouere proprie dicitur animal, cum isthæc ipsa
proprie

proprietas in simplici solitariaq; natura, quod retro dixi-
 mus, in eodem numero & subiecto reperiri debeat, quæ
 media ut uidimus, reperta est inter immobilem penitus na-
 turam, & illam quæ solum mouetur ab alio. Et alioqui
 cum ipsum animal, ut Aristoteli adscribunt, ex immobili
 quadam natura, anima scilicet, & ab alio mobili, corpo-
 re uidelicet, planè sit compositum & conflatum, non po-
 test id quod in præsentia quærimus esse seipsum scilicet
 mouens & agitans, cum neque anima secundum illum pe-
 nitus moueatur, neque corpus quippiam moueat: seipsum
 autem mouens, ut Græcum bene indicat nomen αὐτοκίνη-
 τος, idem numero, & subiecto existens, tum mouet se, tum
 à semet mouetur. Quamuis (ut sæpe dictum est) si recto
 iudicij examine rem hanc bene perpendere uellemus, na-
 turam profecto se ipsam mouentem, de Aristotelis sen-
 tentia, ipsum esse animum non iniuria contendere posse-
 mus. Scribit enim is uir in *Physicis* suis ijs ferè uerbis:
 Quòd si opus fuerit determinare utrum nam sit motio-
 nis initium & causa, seipsum mouens uidelicet, an id
 quod ab alio mouetur, illud profecto sine controuersia
 omnes dabunt: principium autem motionis omnium ani-
 mum esse apud philosophum Aristotelem clarius est quàm
 ut aliquo ostensionis egeat adminiculo. Præterea cum a-
 nimatum omne ab inanimi ipsa sit determinatum distin-
 ctumq; uita, uiuere autem nihil aliud sit quàm intrin-
 secus ab anima per illius altricem agitari potestatem,
 quam in suis de Anima commentarijs, motionem tum
 ad nutrimentum, tum ad augmenta & decrementa phi-
 losophus uocat Aristoteles, cur non de illius etiam sen-
 tentia à seipso mobilis, id est, αὐτοκίνητος, iure dice-
 tur animus, qui sua se sponte excitat, & corpus ita agitat
 & imp

& impellit? Verum hæc in præsentia obiter sint transcur-
 sa. Cæterū quoniam cōplures hac de re huc usq; & uarie
 in medium sunt adductæ rationes, nōnullaq; etiam inter-
 icta, quæ etsi ad propositum fac iunt negotium, interpel-
 lata tamen dicendi serie, obscuriorem fortasse, quàm deside-
 ramus, orationem effecerunt nostram, si uolentibus uobis
 facere me crederem, breuiter quæ dicta sunt colligerem om-
 nia, ut & uniuersa, de qua agitur, res melius innotesce-
 ret, & sub uno statim contuitu apte teneretur. Sub hæc di-
 cta cū reticuiisset ille, ceu quid sibi mandaretur expectans,
 Antoniusq; & Ioannes isthuc summe se cupere dixissent,
 rursum hoc exorsus est modo: Initio esse quoddam Antoni
 & Ioannes, originemq; motionum omnium (ut animad-
 uertistis) necessaria diuisione collegimus, idq; ipsum esse
 animum Platonis Aristotelisq; consensu planè dijudica-
 uimus: porrò cum in interstitio collocatum medio perspe-
 ximus naturæ penitus immobilis & illius quæ solum mo-
 uetur ab alio: quamobrem non immerito diximus motio-
 num omnium animum esse principium: & qui seipsum
 moueret, & à semet moueretur: quod Græci unico expri-
 mentes uocabulo, apte & significanter ἀνοξίντων appel-
 lant: inde etiam ad quotidianum loquendi usum res ista
 peruenisse uidetur. Animatum enim omne id appellat uul-
 gus, quod à seipso moueri, id est, intrinsecus agitari, perci-
 piunt: ceu animæ sit ista uis & potestas seipsam prius, &
 corpus deinceps mouendi. Quemadmodum enim in entiu,
 quæ intelligunt, ordine quiddam est quod ab alio intelli-
 gendi accipit munus, ueluti de Aristotelis sententia mens
 illa est quam potestate intellectum uocat ille, aliud autem
 à seipso intellectionem habet quam impertit alteri, ipsum
 autem cum omnimodæ sit fons & origo intellectionis, &

alia sanè omnia & seipsum non minus intelligit, ut illa est mens quam actu intellectum Peripatetici appellant: Ita in ijs quemouentur, hæc quidem ab alijs solum agitari moueriq; percipiuntur, ut corpora sunt omnia: illa uero & alijs motum præstant omnibus, & se ipsa mouere nata sunt, quales esse animos retro (ut arbitror) manifeste satis est demonstratum. Hæc igitur diuina animorum est natura, iugi seipsam motione semper agitans, quam in suis de legibus commentarijs diuinus ille Plato primum omnium motionum initium, & unicam esse causam præclare demonstrat: nam & efficiens motionis est causa, & exemplaris, & finalis, quæ propriæ ueræ quæ entium sunt causæ. Formalis enim siue specifica cum in producta facta quæ reperiatur re, imò res ipsa sit iam effecta, causatum potius quàm causa merito existimari potest. Materia autem longius etiam à uera causæ distat ratione, cum in earum reponatur numero causarum quæ à philosophantibus, sine quibus non, appellari consueuerunt. Quamobrem in iisdem de legibus commentarijs diuinus Plato omnium esse causam motionum naturam seipsam mouentem alia etiam ostendere. uolens uia, Si omnia, inquit, quæ mouentur starent, quid nam esset id quod primo moueretur? An illud sanè quod sua sponte & à seipso mouetur? Neque hoc ab re. Si enim id quod motrici propè fit causæ, manifesto moueri uidemus, omnibus quæ alieno mouentur impulsu quiescentibus, profecto hæc ipsa se mouens natura cum in se motricem gerat potestatem, illiq; non solum fiat propior, sed uniatur etiam & copuletur, quin imò omnem essentiae suæ inde capiat rationem, & prima mouebitur utique, & alia motu sua

moue

mouebit omnia. Ambigimus autem nos hac de re, &
 non facile rationi obtemperamus, quia corporeis eman-
 cipati sensibus, & illorum iudicantes arbitrio, mētis ob-
 tusos & hebetes oculos habemus. Quemadmodum enim
 si quispiam aut loci uitio, sicut de Cimmeriorū dicitur po-
 pulis, aut casu etiam aliquo, solis nunquam conspexisset
 iubar, dici tamen cerneret claritatem, is merito mehercu-
 le dubitaret, disquireretq; quæ nā tam immensi splendoris
 existeret causa. Ita quia animum ipsum non cernit uul-
 gus, & ab oculorum consuetudine difficulter se abdicat,
 motionis illum esse principium, & à seipso moueri non
 inmerito ambigere animaduertitur. Qui tamen cum alia
 moueat omnia, multo prius seipsum mouere uerisimile
 est, haud dissimili mehercule commemorati solis exemplo,
 qui alia illustrans omnia, multo prius se ipsum splendi-
 disimo uegetat, & replet lumine. Vnumquodque enim
 à se ipso (ut recte physici dicunt) perfecta actionum sua-
 rum semper orditur initia. Verumenimvero cum sit con-
 stitutum, & satis (ut arbitror) ex dictis ostensum, motio-
 num oranium initium esse animum, & quòd is se ipsum
 sponte mouet sua, & à seipso mouetur, facilius profecto
 post hoc, & longe clarior Platonice deductio rationis
 existet, per quā illius demonstratur æternitas: quod enim
 à se ipso mouetur cum semper sibi adsit, & nusquam se
 deferat, absistatq; nusquam, semper moueri necesse est. Si
 enim quæ mouentur ab alio, eo usque moueri animaduere-
 tuntur, quoad usq; motori adherent & appropinquant
 suo, quid illi consentaneum est accidere naturæ, quæ non
 tantum coniunctam, sed unitam etiam & consubstantia-
 lem (ut ita dicam) sibi habet motricem uim? nihil aliud
 profecto nisi perēniter illam & semper agitari et moueri.

Animi enim motio finem ideo nunquam est habitura, quia nunquam se ipse diserturus est animus: quod autem finem non habet, semper est: agitetur igitur animus semper necesse est. Ex quo deinceps illius certissima ratione colligitur æternitas. Animi namque motus illius est uita, cum in ipso principium et origo omnis reperiatur uitæ. Cæterum hoc in loco obiter uos admonitos uoluerim, hanc philosophi rationem non ex probabilibus, quæ fidem solum faciant, procedere rationibus, sed certissimæ necessitatem in se demonstrationis habere. Ex primis enim & per se, & in se inuicem recurrentibus, quæ conuertibilia iuniores uocant philosophi, manifestissime deducitur, ex quibus omnis sanè conflaturs scientiæ modus. Quod enim principium est motus, seipsum mouet, & semper mouet: & quod se ipsum mouet, tum semper mouet, tum motionis est principium uniuersæ. Et rursum, quod incessanter mouet, & se ipsum mouet, & omnibus alijs prima motionis præstat initia. Sed alia etiam uia isthuc ipsum ostendi demonstrarique hoc maxime potest modo: Id quod præstare ualet excellentius quippiam aliquo in genere & dignius, idem profecto eodem in genere inferius uiliusque; aliquid facile præstare poterit: excellentius autem sine controuersia est & dignius, bene esse, quam ipsum simplex esse: id autem sibi ipsi præstat animus, quando se excolit & perficit, & à corporis se contagio seuocat & abducit. Præstabit igitur sibi & ipsum esse: animi autem esse illius est uita: Vita uero nihil aliud esse censetur, nisi perennis quædam iugisque; motio: sibi ipsi igitur motum præstabit, & à seipso mouebitur animus. Quamobrem hoc etiam modo ex incessanti illius motu animi apparebit æternitas. Nec immerito mehercule: diuina enim omnia, & quæ aliquid primo alijs præsta-

re imp

re impertiriq; uidentur, à semet incipere, & exordiri ne-
 cesse est: quod uel claro diurni syderis exemplo nobis cla-
 rere potest: sol nanq; cuncta lumine collustrans suo, ipsum
 certe est lumen, splendorisq; fons, et origo uniuerſi. Quā-
 obrem cum ceteris omnibus uitam & motum præſtet ani-
 mus, illius enim gratia Aristoteles ἀνορίωντος, id est, à se-
 ipſo motum appellat animal, multo profecto magis &
 prius ſibi ipſi & uitam præſtare & motionem neceſſe est.
 Semper igitur mouetur animus, & deficit nūquam. Quæ-
 cunque autem externo agitantur impulſu, cum in ſeipſis
 motricem illam non habeant uim, aliquando motū ab alio
 recipientia, quandoque etiam illum amittere eſt neceſſe.
 Ceſſante autem illo, ceſſat uita, inquit Plato: motum enim
 animi, illius (ut diximus) intelligi uult uitam. Cæterum hoc
 in loco de cœli corpore non contemnenda ſanè oritur dif-
 ficultas. Si enim, quoniam ſemper mouetur, à ſemet illud
 moueri conceſſerimus, nō ſolum animo, ſed corpori etiam
 principiū et originem dabimus motionis: quod fieri haud-
 quaquam poteſt, ut unius ſcilicet rei duo prima reperian-
 tur exordia. Si autem ἀπορίωντος, id eſt, alterius impulſu
 agitatū illud eſſe dixerimus, de Platonis ſententia ali-
 quando à motu eſſe ceſſaturum illud, & interituum
 quandoque concedere cogemur: quod, exceptis paucis,
 philoſophantium concedit nemo. Vtrinque igitur (ut
 percipitis) nos urgent anguſtiæ, & in ſalebris (ut aiunt)
 noſtra uerſatur oratio: quamobrem complananda mihi
 ueritatis eſt uia, hocq; pro uirili in primis eſt explican-
 dum, ſimulq; Platonis dicto in præſentia moderandum.
 Hoc autem maxime aggrediamur modo. Id quod à ſe mo-
 uetur, quod ἀνορίωντος Græci uocant (nihil enim probi-
 bet, ut opinor, breuitatis perſpicuitatiſq; cauſa iſthuc ſe-

pius usurpare uocabulum) in duplici percipitur esse differentia: aut enim simplex est, nulli obnoxium diuisioni, & omni prorsus carens parte, & huiusmodi proprie est, & dicitur *ἀτοκίνητον*, qualis est animus: aut est interualis quibusdam, quas dimensiones uocant, iam distinctum, & corpoream habens molem, quod licet improprie *ἀτοκίνητον*, tamen & ipsum appellatur, cuiusmodi esse cælum animaduertitur: quod quia corpus est, & ideo à motionis totius fonte distat animo, *ἰσότοκίνητον* merito dici potest: quoniam autem in corporum genere primum est, materiaq; caret transmutabili, & connatum in essentia sua gerit uitam, à qua deseritur nunquam, unde etiam perpetuo mouetur, ideo ad illius similitudinem, quod proprie tale est, *ἀτοκίνητον* nō ab re appellari potest. Est igitur cælum media quædā inter id quod uere à se mouetur, & id quod proprie mouetur ab alio, collocata constituta'que natura, utriusque particeps rei, & utrorum'que, licet improprie, sortita tamen, ut dictum est, nomen: neque enim *ἀτοκίνητον* per se, neq; *ἰσότοκίνητον* proprie cœli est corpus, cū & moueatur ab animo, & incessabili semper motione uersetur. Ceterum haudquaquam immerito hoc illi contingere uidetur: semper enim secundarum summitates & apices rerum, ut uniuerſi seruetur continuitas, omniāq; conuenientibus repleantur medijs, & primorum copulantur extremis, & illorū non nihil sapere naturæ perhibentur. Cum igitur primum in corporum genere sit cælum, ultimum autem intelligibilis naturæ sit animus, complicari copulari'que isthæc, & similitudinem conuenientiam'que ad se inuicem habere quandam necesse est: quam obrem æthereum corpus, si ueluti anima quædam, & uita extensa quodammodo, & in molem differtita à se

moueri, & indefinenter perpetuoq; agitari dicatur, non perperam profecto falso que dicitur: connatam enim (ut diximus) & ceu commixtam in essentia sua gerit uitam, à qua cum deseratur nusquam, perpetua iccirco motione uersatur. Caterum alia hoc in loco ex ijs quæ dicta sunt eritur difficultas. Sunt enim qui nobis dant, & id quidem libenter, à se ipso moueri semperq; agitari animum: addunt tamen id illi contingere donec fuerit, uerum nihil prohibere eum quandoque extingui et interire. Quos non ab re percontandos in præsentia ducimus, utrum ne cum interit (ut uolunt) animus, illius antè cessat actio, quam *αὐτοκινήσις* Græci, nos iugem sui ipsius motionem dicemus, postmodum uero ipsius deficit essentia: aut è cōtrario, prius ipsa desinit essentia, postea uero perennis illa interit motio: an simul essentia deficit, & motio: præter enim treis istos alius profecto inueniri non potest modus. Caterum cum neque essentia ante actum possit desinere, ab illa nanque omnis fluit operatio & motus, pariq; modo, neque actus ipse ante essentiam destrui corumpiq; possit: constitutum enim concessumq; ab illis est, donec perstat animus, perpetuo illum à semetipso moueri. Tertium necessario concedendum, in animi scilicet interitu ambo simul desinere, essentiam uidelicet & actionem: aut quod idem ualeat, esse ipsius, & eius motionem. Rursum igitur hoc ita constituto, absentes aduersarios, ac si adessent, isto interrogemus modo: quandoquidem uultis ô uiri, imò concedere nunc coacti estis, animum interire, quia simul (ut dictauit ratio) & essentia deficit, et motio: à quonam huiusmodi accidere illi dicemus interitum? Profecto aut à se destruatür animus, aut ab alio extrinsecus interimatur necesse est: quod in superioribus cla-

rissimo ligni docuimus exemplo : neque sanè est dare ter-
 tium illius interitus modum . Caterum tantum abest ut se-
 ipsum interimat corrumpat'que animus, ut se perenni il-
 lo, & ut ita dicam, essentiali saluet potius & custodiat mo-
 tu, uitam'que iugiter foueat suam . Simplex præterea ani-
 mi est natura, neque habet in se quicquam admixtum,
 quod dispar sit sui atque dissimile. Quamobrem neque di-
 uidi usquam, neque interire potest : quod quia naturæ se-
 cus accidit corporeæ, iccirco à se ipsa sathiscere illam ali-
 quando & dissipari necesse est . Sed neque extrinsecus ab
 alio quopiam interimetur animus, alioqui non ἀποκί-
 νητο' esset ille, sed ἐνδοκίνητο', cum externa ingruente ui
 ad interitum compellatur, contra id quod positum à uo-
 bis concessumq; retro fuerat, animum scilicet dum ani-
 mus est, & à se ipso moueri, et incessanter moueri. Præter-
 ea si ab alio destruitur animus, aut à superioribus lon-
 geq; se dignioribus destruitur causis : aut ab infra se po-
 sitis, ignobilioribus'ue. Atqui superiores omnes supra ani-
 mum collocatæ stantes'que causæ illum perficiunt potius,
 & saluum uolunt . Diuina enim huiusmodi sanè sunt o-
 mnia, haudquaquam inuida, & bonorum suorum large
 munifica, redundantiq; salutaria bonitate: inferiores uero
 hoc efficere nequeunt causæ, cum illi obsequantur & pa-
 reant magis, & ab illo ceu à perenni quodam fontis exor-
 dio suarum auspicentur initia motionum . Non igitur à
 semetipso, sed neque ab alio quopiam (ut osiensum est)
 destrui potest animus: quamobrem immortalem illum pro-
 culdubio & incorruptibilem semper manere necesse est.
 Est & alia subtilis mehercule & de naturæ penetralibus
 eruta ratio, id ipsum hoc efficiens & cogens modo. Cum
 enim corruptionis totius & omnis interitus (quemadmo-
 dum

dum in physicis philosophus docet Aristoteles) priuatio existat causa, id certe quod isthuc non admittit incommo- dum, nulli unquam patere corruptioni necesse est: porro neq; forma ipsa, quam & speciem uocant, neq; quod sua- pte natura formæ est particeps, priuationem in se recipe- re ullam animaduertuntur: illa quidem merito, quoniã ni- hil suum admittit recipitq; contrarium: formæ autem con- traria est priuatio. Hoc uero ideo, quia dum est, connatam semper habet suæ formæ præsentiam, quamobrem cōtra- riam recipere priuationem haudquaquam potest. Ignis enim quia congenitam habet caliditatē, iccirco frigiditatē admittere nullam potest. Cum autem animus quædam sit forma & species priuatione semper carens, omni prorsus carebit interitu. Neq; hoc ab re mehercule, quod enim cor- rumpitur, omne ideo corrumpi & interire censetur, quia naturam in se habet quandam, quæ aduentitias & exter- nas (ut ita dicam) formarum admittit impressiones, & iccirco cōtraria facile recipit omnia, quinimo ceu idipsum habeat muneris, in ijs alternare per uices uariariq; nata est: qua quoniam caret animus, ideo omni prorsus carere interitu est necesse. Habet autem substantia illa, quam com- positam phisici uocant essentiam, ab ea de qua loquimur natura, quam hylen Græci, nos recto materiam appella-
mus uocabulo, indefinitum quicquid habet omne, & in-
constans, & libricum. Continuae nanque mutationi & corruptioni materiale obnoxium est omne, nunquam eo-
dem consistens gradu, sed semper Protei modo labens & prætersfluens: & fiens uerius quàm factum: & quod gene-
rari potius dicatur, quàm uere existere. Siquidem momen-
taneum solummodo habet esse, cum utrinq; non esse liqui-
dò habere percipiatur: antè quidē quia generabile est, re-
tro

tro autem quia est corruptibile. Ab huiusmodi igitur materie natura composita tot incommoda patitur essentia: à forma autem, siue specie, & ipsum habet esse, & determinatam essendi possidet rationem: & omnino quod perfectum quiddam in entium est genere, & quod existit huiusmodi quale esse percipitur, omnia illi merito refert accepta. Ex quibus omnibus clare (ut arbitror) animorum patet aternitas: & rationis explanatio prioris Platonici syllogismi etiam est manifesta, quo in superioribus dixeramus, animi immortalitatem ea scilicet ostendi uia, quoniam à semetipso destrui corrumpiq; non potest animus. Secunda autem ratio per quam eadem animorum, licet modo alio, ostenditur immortalitas, unicam in se ancipitem recipit propositionem, eam scilicet quæ dicit, motionis ingenitum esse principium: nanque aliæ tum communes sunt, & in superiori explicatæ ratione, tum autem non solum à Platone, sed ab Aristotele etiam & Peripateticis comprobatæ: quamobrem dimissis illis, hanc ipsam, de qua ambigere quispiam posset, diligenter in præsentia excutiamus. Sunt enim qui dicant ingenitum esse, non omni conuenire principio. Nam nihil prohibere quippiam alicuius esse principium, non tamen id esse ingenitum: & exemplo etiam se iuuant, Ecce, inquit, Acacidarum principium est Acacus, & tamen is generatione non caret: ad infirmam autem destruendamq; propositionis communitatem, unicam aiunt sufficere adductam instantiam. Iis igitur occurrentes, dicimus principium, quantum ad propositam spectat rem, illud certe esse, quod primo uniuersam illius, cuius dicitur esse principium, producit specie: uerbi causa, ipse homo, quod *ἀνθρώπου* Græci, nos hominis ideam, siue speciem, seu exemplar dicimus,

omnes

omnes ubique potestate sua producit homines. Simili' que modo ipsum æquale, omnes in omni genere efficit æquales, & οὐκ ἔστιν ὅτι omnes motionum omnium producit rationes. Huiusmodi autem ingenita esse principia est necesse, eo scilicet modo, quo animaduertuntur esse principia. Nihil enim prohibet eadem ut intelligibilia sunt, uerbi causa, aut intelligentia, aut entia, ab alijs sanè prouenire principijs: uerum eo rationis modo principia non existūt, sed ab alijs desiuunt emanantq; principijs. Principium igitur omne, ut est huiusmodi, ingenitum proculdubio esse necesse est. Non enim fit principium eorum quippiam quorum principium dicitur: uerbi gratia, intellectus principium intellectionis existens, nō aliunde, sed à semetipso intellectionem habere cōsetur. Ens ipsum aliorum omnium essendi causa & origo, non ab alio, sed à seipso essentiam possidet: ipse sol uniuersi fons & principium luminis, nusquam id accipit quod omnibus impertit iubar. Verum cur ego hac in re tam diu & uobis fortasse negotium præbeo, & ipse inuicem mihi faceſso, quæ unico facillime uerbo concludi potest? Principium motionis ingenitum esse contendimus, nec immerito id quidem: nam si genitum esse confirmetur, cum generatio omnis, aut motus sit, aut non sine motu, ante omnem motionem dicere sanè cogemur esse motum, quod cum per se sit absurdum, & manifestam in se contineat repugnantiam, tum etiam absurdius fieri uidetur, quando ad infinitum nobis hac in re progressionis aperit modum, in nullo cogitationis termino firmante se animo, sed motum semper ante motum indefinenter sibi affligente & nusquam stante. Concedendum igitur est (ut arbitror) principium omne, ut est huiusmodi, esse ingenitū, quare motionis etiam principium esse ingenitū

Principium
quid.

ingenitum fatendum est. Cæterum quoniam in Platonica
secundæ rationis ostensione plures etiam partialium ra-
tionum latitant modi occulta probantes ut principium om-
ne ingenitum esse: age quādo quidem hanc cœpinus na-
uare operam, & uobis non aliud uidetur agendum, illos
etiam breuiter & cursim (ut aiunt) explicemus. Princi-
piū omne primo est id quod esse dicitur: uerbi gratia, prin-
cipiū luminis primo luminosum esse cœsetur: Caloris prin-
cipium, primo calidū & est, & esse dicitur. Simuliter alia
principia omnia hoc se habere modo fatendum est. Nul-
lum genitum primo tale est: cum omne genitum ab alio sit
generatū, & ab alio procedat simili. Nullum igitur prin-
cipium est genitum: ingenitum igitur. Præterea cū omne
genitum ex alio generetur sui ortus principio, si genitum
detur esse principium, ex principio utiq; alio erit genitū.
quamobrem principij (ut retro uisum est) erit principiū,
& ad infinitum principiorum extendetur progressio.
Adhuc etiam omne genitum ex aliquo non huiusmodi cō-
stitui generari que percipitur: homo nanque ex non ho-
mine, animal ex non animali generatur: & in ijs etiam
quæ arte fiunt, similis illorum fabricæ deprehenditur esse
ratio. Læctulus enim fit ex non læctulo: & domus, ex non
domo fabricatur. Quamobrem si usquam generaretur
principium, ex nō principio utique fieret: & rursum cum
omne (ut diximus) genitum ex principio generaretur, ex
principio fieret principium. Ex non principio igitur, &
rursum ex principio generabitur principium, si genera-
tionem aliquam illi assignare uoluerimus, quo nihil certe
absurdius, aut pugnans magis dici aut communisci potest.
Satis igitur (ut arbitror) ex dictis ostensum est ingeni-
tum esse principium. Ingenitum autem omne incorrupti-
bile

bile est, quicquid autem corrumpi nō potest æternum est, quod est æternum neque morti obnoxium est, neq; aliquo interit modo. Animorū igitur essentia incorruptibilis est, & immortalis, iugi se ipsam uegetans motu, & omnes in=super motionum species, id est, uitæ modos, ex sese inces=santer producens & proferens. Cæterum quoniam semo=to à principij natura, generationis exordio, corruptionis etiam uerisimuliter semouendus est finis, hoc certe in loco uniuersa de animorum immortalitate sufficienter commo=de que conclusa uideri poterat ratio, cum & alioqui om=nes hac in re omnium consentiant philosophorum se=ctæ, & Aristoteles euidenter in suis de Cælo commenta=rijs ingenitū omne incorruptibile etiam esse demonstrat: quamobrem si recte meministis, in ijs quæ retro diximus, hac de re me non esse uerba facturum non immerito præ me tuli. Quia tamen diuinus Plato siue admirabili qua=dam ingenij copia & ubertate, nihil intactum hac in re, nihil non excussum dimittit, siue id potius de composito hominum causa facit, ut omnibus illi numeris diuinam in se agnoscant & uenerentur partem, & iccirco non so=lum ingenitum, sed incorruptibile etiam probat esse prin=cipium: age & nos illius rationem, quæ non ex directo (ut aiunt) propositum, sed per impossibile sequens ad oppositum, concludit datum, breuiter hoc explicemus modo. Si principium (ut dictat ratio) incorruptibile non est, corruptibile utique erit. Supponatur igitur corru=ptum esse principium. Corrupto certe principio, ne=que ipsum ab alio quopiam poterit restitui & effici, ne=que aliud quippiam ab illo fieri produci uel poterit. Quo=niam enim omne quod generatur, ex aliquo generare prin=cipio necesse est, interempto certe destructo que illo, nihil
profect

profecto poterit aliud generari. Et rursum, neque ipsum ab alio quopiam fieri produci que poterit, quoniam omne quod fit, ex quodam fieri principio concessum est: positum autem fuit principium esse corruptum. Quamobrem ceu rerum omnium præcisa enectâ que radice, nihil inde emergere pullulare que amplius poterit. Incorruptibile igitur est principium, uel omne (ut inquit Plato) decidat cælum necesse est, generatioq; intereat & cesset uniuersa, motionis interempto principio primo. Quod cum animi esse naturam in superioribus clare sit ostensum, animû incorruptibilem esse & immortalem summa est necessitas, cuius ut probatum est, neque à se usquam, neque ab alio quopiam destrui corrumpi que potest essentia. Verum hoc quispiam in loco, ob ea quæ retro dicta sunt, de elementorum naturis non immerito posset ambigere: cum enim in anima elementa sint omnia, & uniuersa in hoc philosophorum omnium consentiat natio, ad peculiaria tamen quæque ferri loca, & interno agitari principio animaduertuntur. Ignis enim naturæ permissus suæ, summa petit statim. Terræ autem gleba non prohibita, rectâ defertur ad ima. Animantis quinetiam extincti corpus, sponte sua ad corruptionem moueri percipitur. Quamobrem aut non omnium esse motionum principium animum concedere planè cogemur, si illa inanima ut sunt, fatebinur esse corpora, aut si dixerimus animata, ad inconuenientius profecto quiddam & absurdius merito deuoluemur, in putrescente animalis cadauere largitorem uitæ & essentiæ animum collocantes, destructionisq; & interitus causam illum esse asseuerantes. Ad has igitur & ad istiusmodi alias, uerborum potius quàm rerum obiectiones, unica & eadem facili occurrentes uia, omnium
 princ

principium motionum esse affirmamus animum, id'que omni assueuratione contendimus, qui iugi perpetuaq; sui agitatione, & omnia motionum ex sese producit genera, & rebus insuper omnibus esse largitur & uitam. Nam & elementa ipsa, de quibus præsens ambigit ratio, quæ in anima esse peculiari partiali'que uere existimantur anima, ab ipso certe uniuerſi animo nihilominus ſouentur & animantur omnia, ab eodem'que illorum intercedente natura ad propria quæque moueri loca certum est. Naturam enim & in ijs ipsis, & in alijs etiam omnibus, animi ueſtigium quoddam & exemplum esse proculdubio elegantiores omnes uoluere philoſophi: pari'que rationis modo extincti animantis corpus, cum uniuerſi quædam ſit portio, animo præditum quodammodo esse fatendum est. Quemadmodum enim in nobis quæcunque ſunt omnia, excrementa etiam & ſordes, dum inſunt, uitali quodam participare contineri'que calido animaduertuntur, ita quæcunque circumiectu ſuo capax complectitur mundus, omnia illius complecti contineri'que animo, uero conſentaneum est. Mouetur igitur ab uniuerſi animo animantis extinctum corpus, non ad corruptionem ſanè & interitum: dudum enim id interiit animal, ſed ad eſſe aliud, & ad aliam uniuerſitatis trãſfertur indigentiam. Ad com modum enim decens'que uniuerſi motus omnes ſuos mundanus temperat animus. Quod etiam in corporibus ſacere noſtris partialem naturam animaduertere licet, cum pro indigentia ſui hos quidem in nobis diſſipat & conſumit humores, alios uero corrigit & emendat, nonnullos autem ceu rebelles & noxios procul à ſe abdicat & expellit. Et hæc de animorum immortalitate, & Platoniciſ hac ſuper re adductis rationibus, quæ mihi in promp

promptu fuerunt, & pro tempore sese mihi obtulerunt, in
 medium libens mehercule attuli, ut & utrorunq; uestrum
 quos plurimi sanè facio, morem gererem uolūtati : uolui=
 stis enim me quid de ijs sentirem ostēdere : & ut mihi etiā
 ipsi non minus satisfacerem, si diuinam hominis partē me=
 rita præconiorum laude pro uirili concelebrarem. Laus
 enim animi meo quidem iudicio est uel immensa, & omnes
 uerborum omnium celebritates exuperans, illius explica=
 ta ostensaq; natura, qua hominum genus peculiari quo=
 dam domesticoq; cognationis uinculo proxime ad deos
 ipsos accedere sanè existimatur. Nec me præterit multas
 etiam alias hac ipsa de re, cum antiquorum, tum recētium
 philosophorum, idem ostendentium, in præsentia adduci
 posse rationes : sed non omnia (ut aiunt) nunc excutienda
 sunt uasaria. Et alioqui noua sermonum, præsertim lon=
 gorum, exordia temporis non patitur breuitas, cum &
 ipsa iam inclinēt dies, & nonnulla fortasse alicui uestrum
 sunt obeunda negotia, quorum mihi in primis est habenda
 ratio : quamobrem dicendi finem faciam, si isthuc prius ceu
 coronidem quandam sermoni addidero meo : in animorum
 scilicet natura, ut ex Platonicijs uidimus rationibus, ter=
 nariū reperiri istud, quod illorum dignationem exactamq;
 proculdubio indicat perfectionem. Scitis enim inter alios
 hūc esse perfectissimum numerum, tum quia ex imparium
 genere primus reperitur, tum quia numerorum solus prin=
 cipium, medium & finem illum præcise constituentes con=
 tinet partes. In animi uero natura ternarium est, seipsum
 scilicet mouens, semper motum, immortale : ita quod unum
 quodammodo & tria idem censetur esse animus : in quibus
 etiam causarum quidam esse percipitur ordo. Primum enim
 secundi causa, illud autem tertij non immerito esse perhi=
 betur.

betur. Verbi gratia, seipsum mouens causa est semper moti: & motum semper immortalitatis est causa. Cum enim isthæc duo (ut retro diximus) in entium reperiantur genere, immobile scilicet prorsus, quod omni motu, & omni melius est uita: ceu illud est unum quod omnem supereminet essentiam, & primariæ insuper unitates. & rursum id quod externo agitur principio, quod peius & inferius omni procul dubio existit uita: id certe quod seipsum mouet & uicinius ipsi immobili essentiæ, & similis esse censetur. Semper enim quod seipsum mouet appetit & uult se saluum esse, quemadmodum semper est ipsum prorsus immobile, primum uidelicet omnium principium: ipsum uero immortale illi appropinquare magis uidetur naturæ, quæ mouetur ab alio, cū à mortis priuatione dicatur, ceu illud interni priuatione motus ab alio moueri censetur. Quamobrem immobilia omnia supra ipsum sunt immortale: immortalitas enim uita quædam est, & ueluti animorum essentiæ spiritus quidam. Hæc igitur ternarij ratio in animorum (ut dictum est) spectatur essentia, qui cum inter immobile penitus, & ab alio extrinsecus mobili planè existant medij, quod in unico τὸ αὐτοκίνητο uocabulo significanter & diuine expressit Plato: illud enim αὐτὸ nobiliores superioresq; animis indicat essentias: illud autem κίνητος inferiores uilioresq; signare uidetur naturas. Per primam quidem Ternarij ipsius partem immobili magis appropinquare cernuntur essentiæ: per extremam uero uiciniores ei (ut diximus) fiunt naturæ, quæ solum mouetur ab alio, & externo agitur impulsu. Hæc cum ille nō minore grauitatis indicio, quàm uerborum lepore & copia recensuisset: omniumq; expectationi munifice satisfacisset, cogitabundo simulis finem loquendi fecit, ut ex oris illius

habitu planè coniectauerint omnes plura illi hac de re, quæ rite dici possent, alia occurrere & animo obuersari. Quamobrem Antonius, qui attētissimā alioqui illi præstiterat operam, & omnem illius sermonem siccis (ut aiunt) auribus, ebiberat, postquam omnia in illum admirationis suæ præconia, nō minus uere quàm largiter effudit, Quādoquidem, inquit, eruditissime Bembe hoc Platonico disputationis conuiuio allekti potius quàm satiati abs te discedimus, nihil prohibet (quæ tua est liberalitas) nos denuo, ut pro ijs etiam loquar, cras aut perendie ad reliqua conuiuas accipere: hac enim re nihil gratius nobis, neq; magis ex animo quicquam facere poteris. Accedemus igitur uel nō uocati: & ego, si nihil aliud, integram tibi sanè huiusmodi esculentorum asseram famem. Tum ille subridens hilarè, ut semper, Tuo, inquit, iure mi Antoni omnia de me tibi polliceri libere potes. Verū memineris (ut in prouerbio est) ne collecta ad conuiuium exigas, & cum dicto asurrexit, idq; omnes fecerunt. Pauloq; post inde discessu est.

ALVEROTVS,

SIVE,

DE TRIBVS ANIMORVM
VEHICVLIS.

ALVE Capella. CAP. Et tu Lucas amantiſſime. LV. Vnde nam, & quod? CAP. Verona redeo, quo me literis superioribus diebus Daniel Rhenerius aduocauit, qui iſtic, ut noſti, præfectum agit, cum quo mihi à pueris magna beneuolentiæ & amoris intercedit neceſſitudo. Ad te autem ueniebam, ſi quid uelles

uelles, nam cras aut ad summum perendic Venetias ire cogito, ut & senatui meo, quam debeo, præstem operam (cōplusclos enim abfui dies) & meos insuper reuifam.

L V. Mirabar equidem Capella, & ubi nam esses conietari haud facile poteram: nam neq; te hic uidebam, quòdum ades deambulatum uenire soles, & te Venetijs non esse certò sciebam. Caterum bene habet, quando hic incolumē te uideo: nāq; dum aderis, meo arbitratu te frui poterò, & de re quadam mea opportune etiā consulere, quæ cum non leuis sit momenti, & angit me (ut par est) & quid consilij de illa capiam, dubium me animi facit. Opportune igitur uenisti, nam cum te prudentia insignem semper noui, tum mei etiam in primis amantissimū: quamobrem (ut spero) me ab hac animi perplexitate facile explicabis.

C A P. Ludis ut soles Luca, & me cauillo impetis. An tibi defunt quæ in eas consilia, tua præsertim in re, quem tum ob ingenij præsens semper acumen, tum propter multiplicem rerum experientiam alij consulere solent? L V. Age age Capella notiora quæso, nāq; me ijs præposteris laudibus, quas neque in me esse cognosco, neque recipio, non ornas, sed oneras: & alioqui fugit ne te uulgatum illud, homines proprijs in rebus haudquaquam recte perspicere, sed ualde sæpenumero cæcutire: necnon ægrotos medicos non se ipsos curare, sed alios qui sibi medeantur adhibere solitos? Et profecto ita seres habet: affectus enim & commotus animus haudquaquam rite despiciere & iudicare ualet. Consilium nanque affectioni contrarium ut sanè est, ita non immerito ab omnibus huiusmodi esse censetur. C A. Quàdo ita tibi uidetur Luca, id fiat quod expetis: nihil enim prohibet mea oīa, quantum Lucūq; sunt, tibi præsto semper esse, & alioqui Homericū

me mouet illud, Duo simul omnia melius & rectius: uerū hac si placet conditione id fiet, ut antequam quod ad te pertinet aggrediamur, quando ut uidetur in præsentia uacas, & ego hodie ut me de uia colligam, nihil aliud agere decreui, mihi seriatim prolixeq; narrare uelis, quæ superioribus diebus, cū apud Alucrotū cœnaretis tu & Leonicus noster, aliq; præterea eiusdem notæ uiri, disceptata fuerunt: quædam enim mihi non de conuiuio (ut aiunt) collecta, sed selecta potius & recondita Veronæ Baptista Turius noster, uir (ut nosti) & bene eruditus & bonarum literarum studiosissimus, qui illi interfuit cōuiuio, per capita discurrendo tetigit potius, quàm enarrauit. Quæ tamen mihi adeo insederunt, sic me audiendi quæ reliqua fuere uehemēti desiderio repleuerunt, ut nihil æque doceam, quàm me illi suauissimo conuiuio non interfuisse. Discumbentium enim unus fuissem certò scio. Verū tu mi Luca quando, ut dixi, in præsentia nihil tibi, ut opinor, aliud est agendum, & qua es memoria, rem totam te tenere non dubito, me amœnissimi illius conuiuij, & uere Socratici (ut fieri potest) participem facere uelis: rem enim mihi gratissimam feceris, si illa omnia quo fuerunt enarrata ordine recensueris. Postmodum, si uidebitur, opera consilioq; meo, quando id tibi curæ est, ad omnia iure tuo uti poteris. Locus quinetiam iste nonnihil nos admonere uideatur, ut hic totam rem istam commode transigamus. Riparum enim toros, propter hunc amœnissimum fluuium, mollis cōuestit herba, omnesq; ruris iucunditates & gratias urbanus iste facile superat amnis, ubi & melius commodiusq; sermones illos recensere poteris, & ego inuicem, quem de uia cœpi laborem, grate quiescendo deponam. L v. Ad rem (mehercule) iucundam me reuocas Capella

pella, quæ mihi eo suauior sanè memoratu erit, quo tibi
 rem gratam, ex ijs quæ dixisti, me facturum esse intelli-
 go: & alioqui isthæc ipsa sæpius retractata non solū non
 satiant, nouitatisq; gratiam deperdunt, sed mirum quan-
 tum semper oblectent magis, audientiumq; auribus uelu-
 ti recentia iucundissimum quendam discendi relinquunt
 pruritum. Consideramus igitur hic, quando ita tibi placet:
 nanque ego te pluribus non tenebo, sed rem omnem, quo
 gesta fuit ordine, à principio exordiri aggrediar. CAP.
 Sic faciamus. LV C. Superioribus diebus Capella, dū apud
 Aluerotum nostrum inuitati (diē enim natalē celebrabat)
 discumberemus, ego & Leonicus, & Hieronymus medi-
 cus frater meus, necnon Baptista Turius, de quo isthæc
 inaudisti, & alter Baptista cognomento Leo, philoso-
 phiæ & literarum delitiæ, alijq; præterea complures
 Alueroti necessarii, laute sanè, & opipare accepti fuimus,
 nosti enim uiri minime parci uitæ cultum, & cū alijs in
 rebus, tū in hoc cōuiētus symplosiorumq; genere nō pro-
 fusam & superfluentem, sed ciuilem & aptam magnificen-
 tiam. Et quoniam non corporibus solum eruditus hospes,
 sed animis etiam consultum uolebat, inter epulas aderat
 Anagnostes, eius, ut arbitror, ex sorore nepos, puer qui-
 dem ille & adhuc impubis: uerum ut apparuit literis ex-
 cultus: nanque scite admodum lectitabat, claraq; & sua-
 ui uoce conuiuiarum animos tum leniter demulcebat, tum
 etiam ad dictorum intelligentiam, nescio quomodo, effi-
 caciter excitabat. Lectio autem fuit de sexto Aencidos li-
 bro, ubi altius caput diuinus extollēs Maro, & ueluti poē-
 ticæ oblitus, philosophum planè induit, eumq; nō de tri-
 uio, sed melioris (ut aiunt) notæ: quando scilicet de mundi
 agit anima, menteq; ipsum iugi motione intrinsecus agi-

tante, ex quo prima rerum initia, quæ elementa uocant,
 prodire: mox etiam & animalium genera omnia: nihil
 autem prohibet (ut arbitror) & carmina ipsa nunc sub-
 texere, quæ mihi adeo placent, ita animo penitus insident
 & inhæret meo, ut quoties illū relaxare uolo, isthæc ipsa
 decantem, profundissimūq; illorum sensum, dulci coniu-
 ctum lepore, suauiter mente reuoluam: Sunt aut (ut nosti)
 ista:

Principio cœlum, & terras, camposq; liquentes,
 Lucentemq; globum lunæ, Titaniaq; astra
 Spiritus intus alit, totamq; infusa per artus
 Mens agitat molem, & magno se corpore miscet.
 Inde hominum, pecudumq; genus, uitæq; uolantum,
 Et quæ marmoreo fert monstra sub æquore pontus:
 Igneus est ollis uigor, & cœlestis origo
 Seminibus, quantum non noxia corpora tardant,
 Terreniq; hebetant artus, moribundaq; membra.
 Hinc metuant, cupiuntq; dolent, gaudentq; nec auras
 Respiciunt, clausæ tenebris & carcere cæco:
 Quin & supremo cum lumine uita relinquit:
 Non tamen omne malum miseris, nec funditus omnes
 Corporeæ excedunt pestes, penitusq; necesse est,
 Multa diu concreta modis inolescere miris:
 Ergo exercentur pœnis, ueterumq; malorum
 Supplicia expendunt: aliæ panduntur inanes
 Suspensæ ad uentos: alijs sub gurgite uasto
 Infectum cluitur scelus, aut exuritur igni.
 Quisq; suos patimur manes: exinde per amplum
 Mittimur Elisium: & pauci læta arua tenemus:
 Donec longa dies perfectæ temporis orbe
 Concretam exciuit labem, purumq; reliquit

Aethercum

Aethereum sensum, & aurai simplicis ignem.

Has omnes, ubi mille rotam uoluere per annos.

Lethæum ad fluuium Deus euocat agmine magno,

Scilicet immemores supera ut conuexa, reuisant,

Rursus & incipiant in corpora uelle reuerti.

C A P. Ita uiuam, mi Luca, ut ista semper admiratus sum carmina, & latentiores quosdam illis subesse sensus semper existimaui, quàm quomodo ab interpretibus habentur exposita. Non enim (illorum pace dixerim) Vergilianum apicem illi mihi contingere uidentur. uerùm prosequere. Spero nanque hodie quæ ab illis habere nūquam potui, à te certe habiturum. L V. De me nihil expectes Capella, neque tibi quicquam pronūttas: non enim is sum, qui isthæc recte explicare possim, sed auditos referam sermones, tu postmodum illos pensiculabis: hodie nanq; meum me narratorem habebis. C A P. Vt lubet: perge modo. L V. Sub ijs igitur lectis secūda iam afferebātur mensæ, pomorum uarijs generibus, & omni bellariorum apparatu & copia refertæ: tacebantq; omnes, ut mihi uidebatur, lectorum carminum uerba sensusq; examinantes, & animo retractantes. Sed inter ceteros clara mehercule admodum Leonici nostri fuit admiratio, qui ueluti extra se positus, & quodam afflatus spiritu bis exclamauit: Euge, euge Maro: statimq; conticuit, eo corporis habitu oculorumq; contuitu, quem ij qui ecstasim patiuntur manifestò habere solent. Et Aluerotus, cum Anagnostæ nutu silentium indixisset, ad Leonicum conuersus, Quid tu inquit Leonice in supremam (ut aiunt) mentis arcem te penitus recepisti, & tanquam Lethen ad fundum biberis, & loci sanè oblitus es, & temporis? An te fugit cōiuniorum hilaritatis condimenta quædam præsentium esse ser-

mones, tristesq; & seueras huiusmodi cogitationes à sym-
 posiorum iucunditatibus semper fuisse explosas? Effare igi-
 tur, & si non aliud, id saltem quod in præsentia animo
 uersas eloquere. Videris enim mihi Vergilianis carmini-
 bus, ueluti prægnaus effectus, torqueri quodammodo, &
 non belle te habere, nisi cito pepereris. Ita est, inquit ille,
 suauissime Aluerote, & me puer ille ceu non poëticiis uer-
 sibus, sed magicis quibusdam cantationum præstigijs ex-
 cātaſſet, sic externauit, ut nisi tu me interpellasses, & uer-
 bis tuis me mihi restituiſſes, adhuc hærerẽ. Et quid est, in-
 quit Aluerotus, quod te adeo affecit, ut ceterorum obli-
 tus, illis summa animi intentione uacares, ita ut imprudens
 opinor, & id te facere neſciẽs, subito exclamares, Euge,
 euge Maro. Considerabam, inquit ille, Aluerote quonam
 afflatus spiritu nullius non philosophiæ peritus Maro illa
 deprompſiſſet, quæ omnia Academicorum, Stoicorumq;
 decreta, ea inquam quæ ad uniuerſum hoc animal perti-
 nent, omnia in ſe animalium genera complexum, quem
 mundum appellamus, comprehendunt & continent. Tan-
 git enim in primis illam quam cum Academici & Stoici,
 tum Peripatetici ferè omnes, mundi uocant animam uni-
 uerſæ illius infuſam moli: eamq; penitus cunctasq; illius
 partes perenni quadam tranabiliq; ſpiritus natura uiui-
 ficantem, animalq; hoc maximum efficientem & animā-
 tem, cuius corpus quicquid ſenſu percipitur merito eſſe
 cenſetur. Stoicorum quinetiam dogmatis peculiariter me-
 minit, qui calorem igneamq; naturam quo aluntur cre-
 ſcunt quæ omnia, & iugi motione cientur, mundo il-
 lius quæ partibus includi uolunt: omne etenim de illorum
 ſententia quod uiuit, ſiue animal, ſiue terra editum, id cer-
 te uiuit propter incluſum in eo calorem: ex quo intelli-
 gant

sanè debet, eam caloris naturam uim habere in sese uitalem per omnem mundum pertinentem, & omnia in illo permeantem: quod noster hic Maro cum uigorem igneum, tum coelestem uocat originē. Vera narras, inquit, Leonice, & isthæc ipsa Vergiliani exponunt interpretes: uerū de animorum circuitu posteaquam hinc emigrauerint, & de illorum rursus ad corpora descensu, & quibus id eueniat causis, præterea de illorum purgatione, poenarum uel quas expendunt generibus, de quibus hic loquitur Maro, aut nihil omnino, aut satis exigua, & frigida mehercule, ueluti comminiscetes, in medium adducunt. Quare rogo te si quid habes, habes autem, certo scio, ut ne graueris id & mihi, & ijsdem omnibus, qui te tacentes rogare uidentur, recensere, egregiumq; hunc philosophiæ colophonem natali meo apponere. Recondita, inquit ille, Alucrote, & non uulgata philosophiæ exposulas mysteria, quæ hoc in loco Maro noster potius tægit, quàm exprimit. De partialibus enim animorum naturis, ut mihi uideris, deq; uitarum electionibus, ascensu quinetiam illorum & descensu audire desideras, temporumq; periodis, quibus cum in coelo, tum uicissim in terris humani degunt animi. Et Alucrotus, Isthæc ipsa, inquit, Leonice audire percipio: præterea de poenarum apud inferos generibus, quibus impuri, fontesq; plectuntur animi, illorumq; purgationibus, à quibus in pristinam restituti naturam, sublimes posthac euadūt, & uice crassi solitarij; cuiusdam corporis, cuius in terris curā gerebant, uniuerſi ipsius cum alijs eiusdem notæ animis efficiuntur curatores: Hæc enim & hic tangere uidetur Maro: & ego apud Ciceronem nostrum, quosdamq; etiam alios ueteris memoriæ autores uidi potius, quàm planè intellexi: non enim is sum, qui ijs

præsertim de rebus impudenter mihi blandiri uelim. Non immerito, inquit ille, ista tibi Aluerote obscura, & non bene peruia esse uidentur: nam & re ipsa huiusmodi sanè sunt, & auribus præterea tuis (ut opinor) insolita. Noua autem semper omnia, præsertim à communi remota usu, etsi non suapte natura, nouitate tamen ipsa duriuscula uideri solent. Sunt præterea quædam, quæ non recte considerata, merito hac in re difficultatem augent: & quæ nouitiorum philosophantium haudquaquam concedit natio, quo scilicet rationis modo humani mouentur animi, & modo sursum uersus, alias deorsum, statis quibusdam temporum curriculis, firantur. Corporum enim huiusmodi sanè sunt motiones. Animus autem cum ex hoc terreo crassoq; emerfit corpore, ad suam poslliminio reuersus naturam, incorporea censetur essentia. Pari'que rationis modo, incorporeum quippiam pati à corpore, & aut aqua dilui, aut igne (ut inquit Maro) exuri, haudquaquam uero consentaneum esse uidetur. Poenarum igitur, hoc rationis modo, secundum quosdam, suppliciorumq; apud infros ratio, uana sanè erunt inaniaq; uerborum terculamenta, anicularumq; fabellis quam simillima, uulgi quidem animos nonnihil fortasse mouentia, apud eruditos autem & constantes uiros pro futilibus semper habita, & nunc etiam habenda. Et Aluerotus, Ista sunt, inquit, Leonice quæ ex te audire percupimus (ut pro ijs etiam loquar, qui iamdudum id ipsam mihi nutu significat) quare quādo nihil aliud in præsentia nobis est præuertendum, hoc dici reliquum, si placet, ijs sermonibus iucunde & utiliter componamus. Cumq; ceteri id ut facere uellet Leonicum rogassent, subridens ille, de composito, inquit, ut uidetur, Vergilianes uersus illos Anagnostem

recitare

De animorum
apud inferos
supplicijs.

recitare uoluistis, ut isthæc uobis de me exquirendi dare=
 tur occasio. Verum nulla est inuidia, quin ea nunc ex
 me audiat, quæ ego ex multijuga Academicorum le=
 ctione collegi. Vniuersam enim rem istam, Platone duce,
 uiri illi abunde sanè in commētarijs pertractant suis, quæ
 proculdubio secutus hic esse uidetur Maro. Cæterum an=
 tequàm exordiar, uos omnes nunc admonitos esse uolo,
 ut ea dicendorum probetis teneatisue sola, quæ nostræ=
 tium, id est, Christianorum, diuinis comprobantur decre=
 tis: cætera uero explodatis. Hæc enim uere cœlitus de=
 lapsa philosophia, ut de Tiresia inquit Homerus, sola sa=
 pere uidetur: cætera uero tanquàm umbræ uagantur. Ab
 omnium igitur opifice initium facientes, illumq; tota mē=
 te (ut par est) uenerati, dicimus, & ueraciter asseueramus,
 cum cum aliorum omniumquæ sensu intelligentiaue cō=
 prehendi possunt, tum partialium animorum, de quibus
 mox uerba facturi sumus, primam, ueram, solamq; esse cau=
 sam: quapropter hunc deorum hominumq; patrē uniuers=
 samerito appellauit antiquitas. Ab hoc autem in corpo=
 ra humanos emanare, uel potius illis adesse animos, non
 tempore aliquo aut motu, sed non alia magis expresse rei
 similitudine, quàm ut à solis lumine radius ipsi sese insi=
 nuat oculo, pro intellectus nostri captu dicere possumus.
 Nō enim ineffabile huiusmodi mysterium, aut recte intel=
 ligere (ut arbitror) aut commode eloqui hominibus est cō=
 cessum. Diuinitus autem id efficiatur, sicut illi uisum est.
 Nos autem, quod Academici senserunt, qui cuiusmodi do=
 re inter reliquos philosophos, sine cōtrouersia, & melius,
 & copiosius sunt loquuti, pro uirili nostrā in præsentia
 explicare contendamus. Humanum igitur ij animum mē=
 tium diuinarum ultimum, & mutabili quadam natura
 præditum

Deus sol⁹ rerū
omniū causa.

Deorum homi
numq; patrē.

Animus huma
nus.

præditum esse uoluerunt: æternum quidem illum, & mortali minime obnoxium, cum ob illam qua præditus est essentiam se ipsam mouentem, & nunquam se deserentem, ut in Phædro, & in commentarijs de Repu. ostendit Plato: tum propter opificem causam, à qua primo est productus: immediatis enim affectibus quæque producens causa multum certe sui condonat & concedit. Hanc igitur, de qua loquimur, ultimam mentem, humanum uidelicet animum, ut mundi incola efficiatur, mundanusq; rite appellari possit, corpus quiddam connatum, & ab architecto illo primario fabricatum habere necesse est: sine illo nanq; in mundo solum modo uiuit illo, qui intelligibilis appellatur, cū hoc uero sensibilis est portio uniuersi: æthereum igitur corpus purum, limpidumq; & totum illustre illi summus applicuit opifex: neq; id (mehercule) sine causa. Vltimā enim mentem supremo primum adhærere corpori consentaneū uero esse uidetur: neque adhærere solum, sed etiam penitus infundi. Et hoc profecto est, quod in Timæo diuinus scribit Plato: ubi postquam sphaerarū animis ætherea assignauit uehicular, humanos etiā animos cōsimilibus uti uehicular uoluit, æthereūq; illis corpus applicuit, à quibus, ceu ab omnium opifice attributis, nusquam absoluuntur animi, sed illa semper uiuificant, & mouent: eoq; certe modo sempiterna etiam & immortalia reddunt. Verum hoc in loco anceps profecto inter Academicos exoritur quaestio, utrum uidelicet humanus animus sine corpore isto æthereo (quod eius uehiculum uocant, & nos posthac illos imitati, huiusmodi utemur uocabulo) nobilior meliorq; erat, quam cum illi isibuc adiungitur corpusculum, aut ignobilior & deterior. Si enim nobilior de per se & solitarius erat animus, profecto inquirunt sphaerarum animis,

mis, quibus statim puoductis peculiaria opifex adiungit uehacula, humanus erat nobilior animus, nullo antè adiuncto uehiculo: quod neque uera dictat ratio, diuinos illos animos, ab omni prorsus generationis labe absolutos, & liberos, ijs qui in generationem decidūt animis esse ignobiliores, deteriores uē: neque Academicorum quispiam, aut omnino philosophantium aliquis dicere unquam est ausus. Si autem uehiculi istius appendiculo nobiliorem melioremq; illum esse dicemus, alia rursus uia sagax re clamat ratio, absurdū, & ab omni penitus ueritate alienum esse, dictitans summi illius opificis fabricam iusta re prehensione non carere, à quo non perfectissimum statim suo in genere processisset opus: sed ab eo quod præter naturam est productionis suæ fecisset initium, quandoquidē ab imperfectiori ad perfectius quiddā & melius uehiculi applicatione humanus procederet animus. In salebris igitur (ut aiunt) de sui ipsius natura anceps & dubius hæret animus, cum utrinque ut uisum est, non satis peruiæ occurrant angustie. Caterum iidem ipsi, qui hanc infligere plagam uisi sunt, efficacia statim solutionis afferunt medicamenta. Dicunt enim cum animorum, tum uehiculorum ipsorum productiones à rerū opifice simul emansasse, nullo temporis medio interuallo: prioris autem & posterioris uocabulis necessario quodammodo uti oportere, quando non aliter animorum excellentia à corporis (ut ita dicam) ignobilitate & depreffione uerbis indicari & exprimi recte possit. Cum igitur partiales semper animi æthera illa annexa habeant uehacula, nusquamq; illa (ut post etiam uidebimus) deponant & exuant, eiusdem semper nobilitatis dignationisq; non iniuria esse censentur. Tūc Alucrotus, Profecto, inquit, Leonice, egregius

egregius isthuc ipsum sensisse uidetur uates: primūq; huius corpusculi & animorum uehiculi recte se intelligentibus indicamenta posuisse: cum post illorum purgationem æthereum restare sensum, & auræ simplicis ignem scripsit. Et Leonicus, Vera, inquit, narras Aluerote: Cæterum poëtarum more eo in loco noscer Maro id quod habetur, pro eo quod habet, sanè posuisse uidetur. Sensus enim in corpore est, & proprie sine corpore esse non potest: pro uehiculi igitur æthereæ essentia sensum posuit æthereū. Verum de istiusmodi sensu mox plura: nunc de uehiculorum naturis prosequemur. Post æthereum hoc corpus, quo cecurru quodam descensurus in generationem uehitur animus, quod de natura sui purum, illustreq; & astro simile esse assuerāt, antequā ad tetrū isthuc cōpositum ue & mortale decidat corpus, quod terreum ostraceumq; merito appellant, alia induere corpora humanum animum, quas simplices uocāt tunicas, est necesse. Naturales enim huiusmodi progressionēs non nisi conuenientibus fieri meritis merito est censendum. Hoc autem secundum animū uehiculum esse dicunt, ex simplicibus constans elementis, & ipsum certe tenue & simplex, sed multum quantum ab æthereo illo peculiari connatoq; animorum uehiculo distans, cum sinceritate puritateq; ipsa, tum excellentis dignatione naturæ: quod illis non opificem causam, uerum nouitios secundosq; efficere deos, id est, elementares sphaerarum animos, autumant. Quamobrem posthæc elementare hoc ingressus uehiculum animus, non solum mundanus, quod ut esset à primo habuit uehiculo, appellatur, sed ad hoc generationis etiam (ut aiunt) ciuis efficitur. In uniuersi enim parte illa concessit, in qua cum actiones omnimodæ, tum mutabilium rerum passio-

nes

Nouitij & secundi dij.

nes affectionesq; manifesto fieri conspiciuntur. Cum hoc posthac ultimo loco terreum compositumq; ingredi censetur corpus: quod ultimum illius uehiculum nuncupatur, cum re uera teter tenebricosusq; potius appellari debeat carcer, quàm uehiculum. Mortale quippe id est, ^{Corpus mortale} corruptibile: neque hoc semel, ut uidetur, & existimat uulgus, sed continuo: nam singulis horarum momentis interit, nusquamq; eodem permanet in statu. Quod etiam ostreacū, similitudine à duro obstipōq; ostreorum tegumento deducta diuinus appellauit Plato. Et quoniā in corporum natura ab animorum essentijs, cū à lumine radij, peculiare propriq; uitarum dependent species, cum quibus mox ipsi etiam prodeunt sensus, ut ipsum æthereum corpus primum animi uehiculum simplex purumq;, & astro simile esse perhibetur, ita perennis in illud immortalisq; ab eodem animo uitæ emanat species, deficiens nunquam, illiq; semper adhærens, cuius causam retro diximus animorum cum huiusmodi corporibus perpetuam indissolubilemq; planè esse copulam. Neque id (mehercule) sine ratione censetur: nam cum per suam essentiam corpori uitam præstet animus, essentia certe illius sempiterna, uita est sempiterna: porro sempiterna uita cui adhæret, primo eadem sempiterno adhærere necesse est: & cum animorum perpetua sit essentia, corpus sibi proximum perpetuo animare uiuificareq; par est. Nā perpetuæ essentia proprius actus uiuificatio est sempiterna. Et hoc est profecto (ut id etiam obiter dicatur) quod recte perspicientibus Aristotelem innuere uoluisse uero consentaneum est, quando in secundo de animalium generatione commentario, cum ostendisset intellectualem animam à corpore esse separabilem, propterea quòd cum illius operatione corporea

non

non communicat operatio, subiungit huic animorum species corpus certe aliquod conuenire quod sit à genitura corpore separabile. Et hæc profecto illa est uitæ species per quam, ut plerisq; in locis more suo refert Plato, alis præditus insignitusq; animus, & similis dijs effectus, cum eisdem uniuersum temperat & regit mundum. In secundo autem animorum uehiculo, quod à nouitijs diximus præstari efficiq; dijs, uitæ quædam influitur species, non immortalis illa quidem & perpetuo manens, ut prior illa, de qua dictum est, uitæ: uerum diuturna quædam & longæua, & quæ multis annorum curriculis cum illo perseueret: de qua mox plura dicemus. In postremo uero eorundem uehiculo quod ex uarijs multiformibusq; conflatum naturis materiale, & compositum, terreumq; merito appellauimus, uitæ influitur species, quæ morti obnoxia, leuib; de causis facile corrumpitur, & cito deficit, simulq; cum ipso interit corpore. Pari quinetiam rationis modo triplices dicuntur esse sensus, ab animorum essentijs in tria hæc corpora trifariam constituti. Et in primo quidem unicus est sensus, & is immaterialis & simplex passionibusq; haud quaquam obnoxius, & omni puritate conspicuus, quod noster tågere uidetur Maro, cum dicit, Purumq; reliquit Aethereu sensum. Hunc præterea uirtuti, quam phantasiæ uocant, eandem habere naturam plerique academicorum uoluerunt, & utrorumq; essentiam utrisque communem esse dixerunt. In secundo uero animorum uehiculo, quod tum spiritale & elementale, tum aëreu à prædominante uocant elemento, unicus etiam dicitur esse sensus, non seorsum quidem habens auditum, seorsumq; uisionem, reliquosq; eo modo sensus, sed unitos sanè & in idē deductos¹ qua certe ratione principalem (ut arbitror) &

unicum

unicum uocat sensum Aristoteles illum qui de ceterorum operationibus sensuum constans fert iudicium. Ceterum is à priori de quo diximus distat sensu, quoniam neque ea excellit puritate, quam simplicis auræ ignem uocat Maro, & passioni planè est obnoxius, nanque superiora quidem comprehendere non censetur, inferiora autem solum & extranea patiendi suscipit & admittit. In tertio autem uehiculo (quod pluribus appellauimus uocabulis, sed terreum præcipue Academici à prædominante uocant elemento) animi uis & præsentia plures efficit sensus, & omnes patibiles: unitasq; dissipatur & diducitur illa quæ in superioribus censetur esse uehiculis: imbecillitateq; sua is quinquepartito disiunctus sensus, sensibiles sibi species haudquaquam continere conseruareq; potest. Vt igitur quæ de animorum uita, sensuq; in ijs quæ recensuimus uehiculis Academici memoriæ prodiderunt, pro uirili breuiter perstringamus, sciendum est humanos animos in æthereo quidem uehiculo ceu mundanos Deos uniuersalem influere uitæ speciem, cum qua uniuersum (ut dicunt) cum superioribus animis mundum temperant, & gubernant. In secundo uero uehiculo, cum quo generationis effecti sunt ciues, partialiter, ut inquiunt, uniuersalem infundunt uitam, cum scilicet eo in statu non uni tantum addicti sunt animi, sed ad uarias uitarum species arbitrato electione uic sua insinuare se possunt. In tertio autem uehiculo, crasso illo & terreo, partialis, imo singularis potius uitæ constituitur species, cum uniuersi uice nutu suo singularis cuiusdam rei curatores moderatoresq; humani efficiuntur animi. Et hoc est quod de pennarum fluxione, illorumq; exinde ad inferna casu diuinus refert Plato: similiq; rationis uia in

illis sensus differentias uariant & modos. In primo nanq; animorum uehiculo æthereo scilicet corpore illis coalito, unicum esse uolunt sensum, eumq; acerrimum, purumq;, & unite in sese collectum, sensus reliquos comprehendentem, & nulli præterea obnoxium passioni: quemadmodum enim mundus ipse, qui uniuersalis est corpus animi, cum rotundus effectus est, ut circulari motione duos animi circulos ipsum constituentes inuicetur (ut in Timæo est uisum) tum sensus in sese habere censetur omnes non peculiaribus diductos seiugatosq; sensiterijs, ut in partialibus est uidere animalium generibus, sed unitos & simul omnes. Idemq; in ipso sensile, sentiens, & sensus esse censetur. Ita in primis inquirunt, partialium animorum corporibus omnes certe simul sunt sensus. In secundo autem corpore, spiritali uidelicet, siue æreo uehiculo, unicum etiam, sed non ea puritate sensum esse dixerunt: qui tamen passioni esset obnoxius. In terreo uero illo ostreaceoq; corpore cū multos esse sensus inter se diductos, & seiugatos, tum ab externis etiam obiectis patibiles, & qui sensilia haudquaquam seruare (ut dictum est) ualeant. Præterea cum hominem corpore utentem animum ipse

Homo triplex definiat Plato, hac etiam ratione uiri illi triplicem asserunt esse hominem, & primum quidem incorruptibilem & immortalem, humanum scilicet animum, æthereo utentem uehiculo, qui ueluti mundanus quidam Deus (ut retro dictum est) merito existimari potest, & cum compatribus mundum regit animis. Secundum autem hominem humanum esse asserunt animum, dum spiritali siue ærio utitur uehiculo, cum quo etsi non sempiterno perscuerat, per multa tamen annorum degit curricula, Dæmonq; terrarum incola esse censetur: quos ære circūfusus, terras

peruagari

peruagari, hominumq; facta inuisere Ascræus cecinit uates. Tertium uero & posremum hominem esse dicunt animinum hoc mortali caducoq; utentem corpore, quem merito exulem extorremq; appellare possumus, tēporancoq; addictum carceri, seu ut leuiore commodioreq; utamur uocabulo, terrarum hospitem ad cœlestia contemplanda, quibus solum augetur & perficitur, natum. Qui demum tunc liber euadat, & uere ad patriam reuertatur suam, cum diffracto hoc terreo tetroq; carcere, alacer, libensq; in auras exit: à quo tantum sanè abesse dicunt ut corporis interitu detrimenti quippiam patiatur, ut ignauum existimat creditq; uulgius, ut tum demum uegetetur & crescat, perfectionemq; proculdubio uendicet & acquirat suam. Cæterum ne isthæc quæ dixi apud uos communisci uidear, aut impudenter fingere, locuples sanè Platonis nostri testimonium in medium adducam: ut quæ à me in præsentia de triplici ordine hominum audistis, de illo, si placet, etiam audiat. In Politia nanq; de primo certe homine mentionem facit, quando dicit animos esse homines in Saturnia periodo, in qua quod immortale in nobis est solum uiuit, cum totus uidelicet in mētem, id est, in eius caput recurrit animus, diuinæq; propius fit unitati. De secundo autem homine in Phædone loquitur Socrates, cum dicit, in extremis terrarum confinibus habitare homines longæuos magis & diuturniores, quàm sunt ij qui in hoc degunt loco. De tertio uero & ultimo quòd loquatur homine, nihil est quòd uos obtundam. Clarior enim est res, quàm ut ullo testimonij egeat adminiculo. Est igitur homo ut secundum Platonem concludamus, utens corpore animus aut immortalis, aut longæuo, aut caduco & fragili, uitæq; breuioris, quem ἰχθύσιον Græci appellare

Homo terrarū
hospes.

Homo quid
Platonis.

solent. Hæc cum intente satis (ut mihi uisus est) recensuis-
 set Leonicus, finem loquendi fecit. Et Aluerotus, Præcla-
 re me equidem, inquit, Leonice de triplici in nobis homi-
 ne, deq; tribus animorum uehiculis in præsentia differui-
 sti: & ut de me ipso loquar (nihil enim prohibet quæ uera
 sunt ingenue confiteri) multa ex te nunc didici, quæ mihi
 prius erant ignota: multamq; gratiam Anagnostæ habeo
 nostro, qui nescio quo ductus spiritu nuper illa nobis car-
 mina recitauit: nisi forsitan animus ipse, ut de se loquere-
 mur, hanc illi iniecit mentem, ut nobis dictorum, dicendo-
 rum uel hanc præberet ansam. Non intermittendus igitur
 Leonice, inquit, sermonis est cursus, neque molliter agen-
 dum: multa enim & præclara (ut mihi uidetur) dicenda re-
 stant, quæ de te audire expectamus. De animorum enim
 ad tria uehicularum descensu solummodo est pertractatum:
 quo autem modo iidem ascendant animi, & ad opificem
 reuertantur suum, quæ illorum sanè est beatitudo & ue-
 ra felicitas, quæ uel interim agant & patiantur, nondum
 est enarratum: quare à te summopere omnes cõtendimus,
 ut quæ reliqua sunt in præsentia nobis dicere & declara-
 re aggrediaris. Non ideo, inquit, Leonicus, paulò antè
 reticui Aluerote, ut sermonis nostri finem facerem. Scie-
 bam enim satis grandem mihi restare uiam, antequàm ad
 materiæ huiusmodi calcem peruenire possem: uerum ut
 usu sæpenumero euenire solet, cum multa mihi uno tem-
 pore sese offerrent dicenda, à quo nam potissime incipe-
 rem, animi ambiguus eram. Sed quod tunc animi intentio-
 ne quærebam, nescio quomodo, dum me alloqueris, mihi
 sese obtulit, & præsto fuit. Consentaneum nanq; mihi ui-
 detur, quando de triplici diximus homine, tribusq; uehi-
 culorum essentijs, necnon de sensus ipsius in unoquoque
 uarietate

De animorum
 ad suum opifi-
 cem reditu.

uarietate & differentia, de ipsis etiam uehicularum aliquid dicere, qua nam sint forma figuraq; præditi, & quibus agitentur cienturq; motionum generibus. Cum enim (ut dictum est retro) superiora illa duo planè sint corpora, de tertio nanque in præsentia, cum sub oculorum cadat contuitu, non est quod ambigere debeamus, & conformata esse illa, & aliquo cieri motu necesse est. Qua in questione Academici, quos in præsentia conspectamur, orbiculata, rotundaq; illa esse corpora, circuloq; sine cōtrouersia per figuræ exigentiam suæ agitari & moueri asseuerant: id autem intelligi uolo cum eorum moderatores, id est, partiales animi, qui in illis ceu curribus habentis parentibus uehuntur, menti maxime fiunt similes: neque hoc mehercule ab re. Quemadmodum enim (ut retro dictum est) mundus ipse uniuersalis, corpus animi, originem imitatus suam, tum globosus est figura & rotundus, tum circulari agitur motione: Ita etiam partialium uehicularum animorum, & illorum utrobique sumpta motione, necnon uniuersitatum etiam, quas totalitates uocant, suarum causa, primum ætheris ipsius, alterum aëris, tum rotunda & circinata esse, tum circulo moueri necesse est: cum naturaliter scilicet recteq; se habent, absolutaq; sunt & libera. Vtrum quando annexa sibi habent corpora, dura inquam illa & materialia, id est extremum illud uehiculum, neq; sanè agile, neque habentis facile parēs, tunc profecto nonnihil à propria illa peculiariq; deuiant motione, temereq; sæpenumero & inconcinne feruntur: nam neque circulo exacte inculpabiliterq; moueri possunt, propter materialium sibi annexam corporum molem: neque rursus recto cientur motu, propria peculiariq; in ipsis refragante & renitente natura. Et is profecto unus

est laboris angustiaq; modus, quem à materialium obtusorumq; contubernio corporum huiusmodi existimantur habere uehicularia. Quamobrè in extremo isto ostreaceoq; corpore laboriosam ærumnosamq; nō immerito humanæ uitæ prouenire difficultatem iidem asserunt uiri, quoniam animorum agitationes motusue, quatenus rationales intellectualesq; existunt; circulares (ut diximus) iure & merito esse debent: eoq; & motu & configurationis forma cum æthereum illorum uehiculum perpetuo illis annexum, tum etiam elementare prædita insignitaq; esse asseuerant. Cæterum corpulenti crassi; illius uehicularia natura & contubernio in diuersum trabuntur: isthuc enim tum crescendo & decrescendo, tum sentiendo & mouendo recta prorsus agitur motione, amboq; illa gyratione circuloq; moueri nata, suo ferri agitariq; cogitur motu. Laborat igitur & fathiscit homo, tanquam præter naturam agitur suam. Et profecto sic se res habet: præter naturam enim id merito censendum est esse, ubi meliora excellentioraq; peioribus & uilioribus parere coguntur. Verum ut alia de alijs emergere pullulareq; solent, & humanus plerūq; exiguae occasionis initio multorum ferax est animus, quædam mihi de istiusmodi uehiculariis nunc sese obtulerunt, quæ nihil prohibet (ut arbitror) hoc etiam in loco recensere: In diuinis enim legitur elo-

Ezechielis. 1. quijs Ezechielis prophetæ uisio, quæ hanc ad rem forsitan tendere uidetur: locus autem est, cum animalia quatuor illa aspectum ignis & ardentium lampadarum præseferentia, ire & reuerti in similitudinem fulguris cornuscantis dixit, & præfigurauit. Ire nāq; & reuerti, circulo moueri potest intelligi. Cum enim sphericum mouetur corpus in fine semper & principio motus sui merito existimari

stimari potest, & tum ire, tum reuerti uerisimiliter dicitur. Lampadum uero commemoratio, & flammarum coruscantisq; fulguris, quid aliud signare uidetur, quàm æthereum illud corpus ardens & lucidum, astroq; ut diximus simile? Præterea rotæ apud eundem in rotâ similitudo & motus, duorum inter se uehiculorum complicatio nem figuramq; & motus speciem circularis innuere non immerito uideri possunt. Helicæ quinetiam in cælum tēden 4. Reg. 2. tis ignitus ille currus ab Heliseo conspectus, huiusmodi de uehiculis sententiæ non iniuria quadrare potest: neq; hoc immerito mchercule, innumeras enim (ut magno placuit Dionysio) hic etiam sensilis, nedū æthereus ille ignis præ se ferre uidetur proprietates & similitudines, quæ superioribus diuinisq; proculdubio quadrant cōueniuntq; naturis. Et ego hoc etiam in loco, multa alia à patriarchis prophetisq; mystice dicta, & huc sanè tendere uisa in medio asserre possem: uerum ne id agamus nunc, temporis nos breuitas admonet, cui necessario est parendum. Hic Alucrotus, Ita me dij ament, inquit, Leonice, ut ista mihi Academicorum dogmata adeo præclara esse, sic rerum quadrare naturæ uidentur, nostrisq; etiam consentire decretis, ut non immerito illorum ducem, Platonem uidelicet, philosophorum deum appellauerit Cicero, quidam etiam è nostris philosophiæ parentem. Cæterum quoniam de duabus animi potestatibus, sensitiua scilicet & mouente dictum est satis, quo'ue rationis modo tribus illis continenter conuenienterq; se insinuent corporibus, sufficienter est ostensum: De rationali etiam irrationali'ue, & de altrice illius ui quid uiri illi senserint, ex te audire nūc uellem: quæ nā sint illæ, & quibus primo appareant in uehiculis, & utrum ab illorū essentijs separabiles

existant, an penitus separari non possint. De ijs cum audire cuperem, uerererq; ne tu (ut sæpenumero eucnire solet) sermonis fluxu, superfluentisq; copia materiæ aliò delabereris, iccirco te interpellaui, dicendorumq; legem nimis cupide fortasse, ne impudenter dicam, tibi imposui: uerum quæ tua est humanitas, amico ignoscet, cupide quæ recta sunt noscere uolenti. Et Leonicus, Age, age, inquit, Aluerote, Siccine conuiuas accipis & tractas tuos, ut non solum quid comesse, sed etiam de quo loqui debeant arbitrato despenses tuo? quare sic fiet, quando tu ita iubes: noueris tamen quod isthæc ipsa, quæ nunc audire cupis, non ideo prætermisi, quia illorum oblitus essem, sed in alium planè distuleram locum, cum in animorum scilicet ascensu, de quo mox plura, hac etiam de re loqui cogitarem: uerum nihil prohibet, quando ita uobis placere uideo, hic etiam de illis loqui. Animaduertendum igitur est altricem animi partem, siue uim illam & potestatem, seu potius uitam appellare uoluerimus, quam nutritiuam recentiores uocant (ab ea enim ceu uitarum ultima incipere nunc uolo) in terreo crassoq; corpore suum habere esse, inseparabiliterq; illi inherere, & cū illo penitus interire. Huiusmodi autem officium est uitæ, cum sustentare corpus illud & nutrire, tum augere & in maius dare: assumptos enim ea conficit cibos & potus, digestosq; illos ad singulas eius partes transmittit & dirigit. Duratq; eousque hæc uitæ istius opera, donec cum hoc uehiculo in terris humanus degit animus, simulq; cum illo (ut diximus) perdito deperit & corrumpitur. Irrationalis autem uitæ species, in hoc ultimo animorum uehiculo suum utique non habet esse, sed in secundo illo, & aëreo collocatur corpore, quod illi sedes subiectumq; iure esse

esse censetur: appetitiones enim, & desideria huiusmodi dicuntur esse uitæ germina: tum ambitiones, amores, o= dia, similitates: & ad summum omnia illa quæ animorum perturbationes & sunt, & merito appellari debent, hoc collocantur in loco, & ex ista nimirum pullulant uitæ specie, cum qua etiam diutius permanent, et opera osten= tant sua. Rationalis autem uita, à qua characterem insi= gneq; suum humanus accipit animus, in primo illo sim= plici æthereoq; uehiculo merito collocari censetur: cum enim id primo uiuificet animus, sibi à rerum opifice in= dissolubiliter copulatum, immortalis nimirum illud ratio= naliq; & purissima condecorat uita: quando, inquam, nō deuiò fertur calle, æquabiliterq; cursum dirigit suum, & quādo (ut par est) inferioribus moderatur ratio, eorumq; dominatur, & non paret peioribus. Hoc autem sicut ex= cellens diuinum quæ est opus, dum hic in terris degit ani= mus, sic certè factu arduum, & difficile merito esse exi= stimatur, pauciq; huiusmodi censentur notæ, quos æquus amauit Iupiter, aut ardens euexit ad æthera uirtus. Quapropter in Phædro diuinus ille Plato, ubi decorum uehacula tum æquabiliter riteq; ferri scribit, tum habentis aurigæ quæ parentia, perpetuos agere circuitus dicit, statim subiungit alia animorum uehacula, de humanis lo= quens animis, qui ueluti affeclæ dominos comitātur suos, id ipsum summa cum difficultate & uix facere posse. Et hæc sunt quæ de tribus partialium animorum uehiculis, deq; illorum uitis et sensibus ex Academicorū deprompta sacrarijs in medium adducere habui. Nec me præterit de huiusmodi animorum uehiculis uarias antiquorum Aca= demicorum fuisse sententias, & quasdam etiam omnino inter se distantes & contrarias, quæ ex multiplici Plato=

nicorum commentariorum intellectu originem habuerūt, quæ tamen à posterioribus ijsdem que legitimis eiusdem philosophi interpretibus non immerito fuerunt explosæ, quorum ego inhærens uestigijs, hæc quæ retro disserui, quàm breuiter dilucideq; potui pro ingenij mei captu, temporisq; breuitate collegi. Quare, si placet, antequàm is elabatur dies, qui iam ad uesperam inclinare uidetur, quod nobis reliquum est peragamus. Est autem ut de humanorum purgatione animorum, & eorundem ad supera ascensu, quæ uiri illi senserunt differamus: isthæc enim non ster etiam tetigisse uidetur Maro. Cæterum quod à principio sermonis nostri statim feci, isthuc itidè in præsentia sanè facio: admonitos enim uos esse uolo, ut cum animorum ascensum descensumque auditis, huiusmodiq; prolata percipitis uocabula, non eos intelligere, qui corpori debetur motus, sed mutationes, siue emanationes quasdam, seu inclinationes ipsis peculiare animis, quas uix bene mehercule intelligere, nedum uerbis clarè exprimere declarareque possimus. Dictum est enim in partialium essentijs animorum quandam mutabilem inesse naturam, non semper in eodem statu permanentem, sed uicissim alia post alia permutantem. Magna præterea (ut hoc etiã obiter dicatur) animorū secundum Platonicos & diffusa est latitudo, neque ea tamen sine ordinis serie constituta: alij enim sunt ex eorum numero animi, qui in generatione descendunt nunquàm, id est, in corpus generabile non decidunt: sed æternam separatamque & felicissimam degunt uitam: quales diuini sunt animi, illis que quicunque sunt proximi. Alia autem animorum est series; quæ descendit quidem, & à meliori ad minus bonam delabitur uitam: uerum haudquaquam uitiorum inficitur

notis

Animorū ascensu & descensu quomodo intelligendi.

Varia animorum genera.

notis, neq; quicquam subit mali, sed in puritate synceritateq; perseverat sua: cuiusmodi demonum bonorum, nec non heroum animi esse censentur. Alij uerò cum descendere, tum maculari & infici nati sunt animi: uerum temporū quibusdam curriculum purgari possunt, macularumq; labem deponere, & rursum ad meliora redire, quales humani censentur esse animi. Quartum autem faciunt etiam animorum pessimum quoddam et maleficum genus, quo cadere potius quàm descendere dicunt, omnibus tum uitijs, tum malis commaculatum & deforme, quod neque ascendere posse amplius, neque uelle assuecunt, cuiusmodi perniciosos maleficosq; demones esse autumant. Ad dunt quinetiam iidem uiri, in summis illis primi ordinis, animis neque secundum essentias, neque secundum actiones suas ullum reperiri posse uitium, quod in infimis animorum umbris, & quarto illo pessimorum genere, secundum horum utrunque proculdubio riperitur. In medio autem animorum ordine, id est, in humanis partialibusq; animis (nam heroum bonorumq; demonum animi secundum deos censentur) uitium quidem illorum non attingere affirmant essentiam, posse autem actiones maculare & inficere: & ideo istos solos, ut ad priorem reuertantur naturam, purgationibus indigere, quas in hoc etiam terreo ostreaccoq; corporis ergastulo humanū asse qui posse animum dicunt, si obsequens illud, & minime rebelle, tanquam mansuetum habuerit animal. Ieiuniorū enim abstinentijs maceratum, & cum precibus assiduīs & intentis, philosophiaq; insuper studijs, tum expurgationibus lauacris uel quibusdam, & uaporum generibus suffitibusq; præparatum & cōcinnatum id corpus, liberiores profecto & agiliorem efficit animum, & ad con-

iunctum

Animi qui pur
gandi ueniant,

iunctum etiam expurgandum corpus, quod secundum diximus animi uehiculum, mirum quantū facere uidetur. Et hoc est profectō quod Platonius refert Porphyrius, cuius quia uerba huc spectantia teneo, nihil, ut arbitror, prohibet ea ut iacent ad literā inuersa totidem penē uerbis in medium asserre: ait enim ille: Quemadmodū aquarū latices illi, qui à montosis scaturiētes fontibus, per petrarum alueos deuoluuntur & fluunt, synceriores multo incorruptioresq; esse solent, quā ij qui per cœnosa palustriaq; defluunt loca, quibus ut multam lutulētāq; secū attrahāt materiā est necesse. Sic animus is, qui sicci astricti uel ministerio corporis uires tēperat exercetq; suas, melior proculdubio incontaminatiorq; est, & ad prudentiā expeditior, quā qui ex redundanti plenoq; corpore idipsum efficere cōtendit. Fœdatur enim, & ueluti sordes cōtrahit animus, cum ira & gaudio, tum libidine & timore, ceterisq; huiusmodi extraneis affectionibus, quarum origo omnis & causa immodica esculentorū poculentorumq; licentia non ab re esse perhibetur. Quod etiam Heraclytus Ephesius innuere uidetur, cum dicit, Astrictū & siccum animū esse sapientiorē. Quamobrem cuius patere potest, ultimum hoc uehiculum, si rectē & non perperam agatur, nōnihil ad expurgandū animum facere posse. Extinctis enim, siue potius sedatis perturbationibus illis, quas in secundo ipsius uehiculo, cū in rationali uita sedem habere retro diximus, agilior profectō expeditiorq; efficitur animus, eosq; producere pennarū pullulos incipit, qui bus ad supera nullo postmodum negotio euolare possit. Sed quoniam magna hominum pars quo minus id facere possint, & uitæ præsens illecebris, & præposteræ educationis usu præpediuntur: quibus etiā extrema uita suffragatur

fragatur species, quam altricem appellauimus, quæ corpus hoc fouet & colit, & ueluti plus nimio indulgens nutritrix, dum immoderantius pascit, eo ipso perditum it magis: exiens hinc animus, haudquaquam liber exire potest, & multum secū corporis abducatur necesse est. Et ea profecto pestes sunt & labe, quas in diuinis carminibus illis noster commemorauit Maro, cum dicit:

Quin & supremo cum lumine uita relinquit.

Non tamen omne malum miseris, nec funditus omnes
Corporeæ excedunt pestes, penitusq; necesse est
Multa diu concreta modis inolescere miris.

Hæc enim post hominis interitum, terreiq; uehiculi dissolutionem, in uita perstant inrationali, cuiusq; elementalī, siue aëreo corpusculo, in quo multis postmodum temporum curriculis humanus degit animus, cum quo etiam antè actæ uitæ perperam gestorum meritas luere poenas dicitur: neq; hoc ab re mehercule. Diuina enim prouidentia, quæ omnia regit & temperat, non solius esse rerum, sed & ipsius bene esse (ut aiunt) decentem gerit curam: quapropter haudquaquam humanus ab illa negligitur animus, cum ad id quod præter naturam illi sanè est, fuerit delapsus, sed conuenientem ægritudinis suæ assequitur curationem. Et quoniam (ut aiunt) peccādi delinquendiq; ratio uoluptatis cuiusdam suasu, titillationeq; illi fuit acquisita, expurgari posthac dolore & cruciatibus nō immerito censerī debet animus: islic namq; contraria etiam contrariorum sunt medicamenta. Quamobrem expurgatus utique languet doletq; animus ijs cruciandi pressus generibus, quibus affici apud inferos fontes perhibentur. Quod profecto haudquaquam fieri posset, si ab hoc terreo corporis ergastulo absque aëreo illo uehiculo liber
& abso



Et absolutus exiret animus: non enim solitarius à corpore quicquam pati posset, cum materiales huiusmodi affectiones et passionis corporum non animorum naturæ propriæ et peculiare existant.

Ergo exercentur pœnis ueterumq; malorum
Supplicia expendunt, aliæ panduntur inanes
Suspensæ ad uentos, alijs sub gurgite uasto
Infectum cluitur scelus, aut exuritur igni.

Pro delictorum enim in antea acta uita conditione, perturbationumq; impressionibus id uehiculū nulla proportionis mensura aut dissipatum distractumq; à calore immodico, aut econtrario à frigore geluæ immoderantius compactum et constipatum, dolore suo peculiariq; cruciatu animum ipsum mouet et afficit, et propter illam quam Græci Sympathiam, nos naturæ cōcordiā appellare possumus, illum proculdubio cōturbat et grauiter dolere facit, non dissimili sanè rationis modo, quo hic apud nos corpore dolente, ob naturale quo illi afficitur uinculum, condolet et compatitur animus. Aliquandiu igitur, ut Pythagoricis Platoniciq; placuisse uidetur, huiusmodi purgationis generibus, et debitis exercitijs pœnis, apud inferos merito esse et plecti censetur animus, nondum à generationis regno absolutus, sed deorsum manens: quod profecto illi non cōtingeret si exiens liber ilico (ut diximus) et emancipatus, omni deposita corporis sarcina sursum fereretur. Sed (ut retro dictū est) fieri non potest ut id illi prius contingat, et à generationis conditione absolua-
tur, quàm se ipsum conuenientibus temporū periodis expurgauerit. Quoniam enim ^{aut dixit}, id est, se ipsum mouens, et à se mobilis humanus est animus, et naturali quadam uoluntatis ratione ab ipso effluit deciditq; bono
(mutabi

(mutabilitatem enim quandam in illius essentia reperiri diximus) ut rursus ascendat sursumq; feratur, sponte sua ipsum à se ipso expurgari necesse est. Nam poenarū apud inferos loca conditiones ue haudquaquam animū sursum reducere queunt (non enim ea illorum est uis) uerum id solum efficere ualent, id tantum illis acceptum referendum est, quod animos scilicet conuertunt, & admonent, & ut sese respiciant faciunt: qui postmodum se ipsos dignoscen-
tes proprio peculiariq; quodā naturæ suæ impetu & ap-
petitione quam *δρῶν* Græci uocant, seipsos expurgant:
uolentesq; & sponte sua id sanè exuunt, quod antea uo-
lentes & sponte sua induerant. Vinculaq; uoluntarie dis-
rumpunt illa, quibus uoluntarie antea fuerant præpediti.
Quamobrem iidem postmodum subiungunt iuri, de Zo-
roastis, Mercurijq;, necnon Pythagoræ, & Platonis sen-
tentia assenerantes, partiales animos, posteaquam apud
inferos multa diuq; perpeſsi fuerint, legitimūq; purgatio-
nis expleuerint tempus, plus minus ue secundum ea, quæ
perperam in priori gesserant uita, ceu à generationis ab-
solutos lege, simul cum aëreo uehiculo iracundiam appe-
titionemq;, et omnino uniuersam irrationalis uitæ speciē
deponere, liberosq; iam et ab ijs quæ deorsum humiq; eos
detinebant absolutos, posthac in ætherco illo puroq; cor-
pusculo, quod à summo rerum opifice fabrefactum perpe-
tuo illis annexum esse diximus, totū illustre, rotundumq;,
& astro simile, cum cœlestibus dijs felicem beatamq; a-
gere uitam. Et tunc demum naturæ restituti suæ, uereq; ad
patriam reuersi, partiales cēsentur animi, qui eousq; ex-
torres peregrini que merito existimari poterant. Quam-
ob rem ut cō citius perueniri possit, ore Pythagorico Zo-
roastis fertur anigmā hoc modo nos admonētis, *μὴ πικρὰ
μολόειν*

μολύνῃς, μὴ δὲ βαθύνῃς ἐπιπεδῶν, quod totidem uerbis in-
 uersum Latine sonat : Ne fœdes spiritum, ne uic profun-
 dum facias planum. Per spiritum & planum aëreum (ut
 aiunt) illud significans uehiculum : non quia corpus non
 sit atque profundum, sed propter tenuissimam splendidis-
 simamq; puritatem, quasi non corpus esse censetur. Præ-
 cipit igitur & nos admonet Zoroastes, ne propter terrei
 caduciq; affectionem corporis cogamus hoc ipsum etiam
 corpusculum, dum à præsenti abscedit uita, impurum sor-
 didum que, & ueluti stigmatibus quibusdam insignitum
 istinc abscedere. Cæterum locus iste me admonere uide-
 tur, ut priusquàm ad alia pertranscam, digrediar paulu-
 lum, dicam que etiam, quonam cultu curauit aëreum hoc
 corpusculum, dum adhuc in terris degit animus, custodi-
 ri integer, conseruariq; possit: quod profecto etsi pro par-
 te retro dictum est, dum terrei corporis pro animi salu-
 britate curam enarrauimus : quia tamen uiri illi Zoroasti
 præceptum explicantes, nonnulla hac etiam de re memo-
 riæ mādauere, nihil prohibet opinor illa nunc etiam bre-
 uiter p̄currere. Asserunt enim corpusculum illud pro-
 culdubio ali & nutriri, non autem eo quo terreum hoc
 corpus alitur modo: sed uaporibus quibusdā suffituumq;
 generibus: non quadam sui parte receptis, & in alijs rur-
 sum partibus confectis & digestis, quod in hoc terreo
 corpore altricem efficere diximus uitam, ubi etiam diuer-
 sa uarios ad usus uisuntur instrumenta, sed totum per se
 totum ali, non alio similiori quàm spongiarum exem-
 plo, quæ se totis nutrimenta capiunt, recepta que confi-
 ciunt, & illis nutriuntur. Quamobrem uiri inquirunt
 boni, qui huiusce rei curam gerunt, nonnihil studere ui-
 dētur, ut subtilioribus siccioribus uel tantis cibis. Inedia
 quinetiam

quinetiam corpus hoc terreum macerant, & conficiunt, ne spiritale illud crassescat uehiculū, sed purum, tenue ue, & naturæ suæ conformē quā maxime reddatur. Expurgationes præterea, & mysticas adhibent caeremonias, ut id cōmodius assequi ualeant. Nanq; ut terrea isthæc crassaq; corporis moles aqua diluitur & nitescit, puraq; ut esse potest, lauacris & nitro smegmatibusq; quibusdam redditur: ita spiritale id animi corpusculum cum iciuniorum abstinentijs & precibus, tum lustrationibus suffitumq; generibus quibusdam, ad naturam reuertitur suam, puramq; & tenuem acquirit sinceritatem. Quamobrem post terrei interitum corporis, cum hoc aërio corpusculo sic probe curato, non diu apud inferos & in generationis regno humanus perstat animus, sed illo etiam exutus, æthereum illud sempiterno sibi annexum (ut diximus) regit gubernatq; corpus. Verum si secus ac dictum est huiusmodi concinnatum curatumq; fuerit corpusculum, impurus que cum illo à terris abscesserit animus, longo quodam temporis spatio uagari illum, & cum hoc corpusculo per inuia, desertaq;, & squalentia terrarum loca diu errare assueuerant. Ex quo etiam simulachra quædam plerumq;, & hominum ferarumq; similitudines, & idola, necnon silentes umbrarum effigies circa tumulos & sepulchra uideri refert Plato. Non enim id quod cernitur, animus esse censetur, siquidem sub cōspectu non cadit ille. Sed impurus (ut aiunt) is sanè est animus illo utens aëreo corpusculo, quod multum sordium à terreo crassi corporis contubernio secum attraxisse uidetur: quod etiam impura postmodum usus diæta terrenoq; infectus halitu crassescit, & cerni nimirum uideriq; potest, haud expressiori similitudinis argumento, quā aëris, qui purus quidem existens, & uisioni

peruius, haudquaquam cernitur: si uero coalescat, & in nubem cogatur, crassescit certe, formasq; capit uarias, & bene conspici uideriq; potest. Quam ob causam uero consentaneū existimari potest impuros hos animos, cum consimilibus sui corpusculis errātes, & uagos, alia rursus corpora, cum ferarum, tum hominum ingredi, quorum contubernio societateq; adeo plerunque gaudeat, ut uix inde postea extrudi auelliue possint. Et fiunt hominis illius nouissima, ut inquit Veritas, peiora prioribus. Ceterum non unus solummodo, sed simul etiam plures impuri huiusmodi spiritus idem saepenumero ingredi occupareq; possunt corpus, quod uexant profecto postea, & male habent, nisi in precationibus quibusdam, & mysticis carminū quorundam excantationibus, operose michercule, & difficulter admodum, inde extrudantur. Sed quoniam satis iam euagati sumus (si placet) unde digressi fuimus reuertamur. Humanos dixeramus animos propriae restitutos naturae, & ad patriam postliminio reuersos, cum connato sibi indissolubiliter corpore beatam degere uitam. Quamobrem id quod in Platonis Phædro Socrates loquitur, isthuc michercule innuere uidetur: dicit enim animos cum ex lethea emerferint aqua, id est, cum à generationis conditionibus liberi euaserint, annatis sibi denuo pennis, quas antè amiserant, altius euolare, eoq; loci peruenire, ubi primo cœlestem cum mundanis simul dijs, deinde supercœlestem cum supercelestibus circuitum agant, eo scilicet ordine, ut alij cum alijs ibi numinibus circumuagētur, huiusmodiq; circuitus alternis repetant uicibus: quam nimirum felicitatem beatq; uitæ conditionem, idem etiam in Platonis Symposio Socrates augere, & in maius dare uidetur, cum dicit purgatos animos, qui diuinam præ cæteris pulchritudinem

dinem amauerunt, in ipsum tandem diuinæ pulchritudinis
 pelagus sese prorsus immergere, diuinosq; ibi liquores,
 non tantum bibere, sed illis ebrios etiā factos in alios iam
 ex seipsis transfundere. Cæterum in Epinomide supremū
 beatitudinis felicitatisq; colophonem cōcludit Plato, ubi
 ait animum purgatissimum, omni tum mutabilitate firma-
 ta, tum multiplicitate collecta, sese in propriam peculia-
 remq; unitatem, intellectu ipso superiorem, penitus colli-
 gere & conferre, per hancq; statim in unitatem diuinam,
 intelligibili mundo superiorem, iam transferre, deoq; po-
 tius uiuere, quā seipso, cui certe mira quadam super in-
 telligentiam ratione sit coniunctus. Et hæc profecto uera
 est felicitas, diuiniq; iam effecti animi suprema beatitudo.
 Id autem effici uult Plato diuina quadam luce, quæ pro-
 fecto non aliter in mente refulgeat, quā si amore dei ac-
 census prorsus animus, in ipsum transformetur Deum. Ex
 quo nimirum diuinum amorem in Platonis Phædro omni-
 bus diuini furoris gradibus animiq; bonis longissime præ-
 posuit Socrates. Quibus profecto consentire attestariq;
 uidentur multa illa & præclara, quæ in sacris nostratum
 elogijs de amore et charitate scripta reperiuntur. Sed iam,
 si placet, receptui canamus: nam & de ijs quæ fuerāt pro-
 posita satis (ut arbitror) pro uirili à nobis est pertracta-
 tum: & dici iam finitæ terminus, ut loquendi etiam finem
 faciamus, non immerito nos admonere potest: nisi fortasse
 uobis aliter uidetur. Et Aluerotus, Profecto, inquit, Leo-
 nice, & nobis abunde (ut pro ijs etiam loquar) hac de re
 in præsentia satisfactum esse confiteor: & ea sanè dixisti,
 quæ tum uniuersam nobis Platoniam scholam totis (ut
 aiunt) foribus aperuerunt, tum Maronis nostri luculentis-
 sima illa diuinaq; carmina adeo explicauerunt, ut nunc

demum mihi illa exacte clareq; intelligere uidear. Antè enim, ut in diei splendore oculis captus cernit quidem ille nihil, aliqua tamen solis claritate perfunditur: ita ego in rerum tantarum luce nonnulla superficie tenus dignoscēs, ad interna reconditaq; planè cæcutiebam. Verum quædā (ut opinor) restare uidentur, de tribus scilicet illis uersibus iam recitatis, qui alios mirifice claudere, & eleganter componere uisi sunt: nihil enim de illis est pertractatum. Quamobrem si de ijs etiam aliquid in medium adduxeris, & nobis certe omnibus abunde satisfeceris, & natali insuper meo conuenientiſsimam disputationis coronidem imposueris. Sunt autem carmina illa (ut nosti) huiuscemodi,

Has omneis, ubi mille rotam uoluere per annos,
Lethæum ad fluiuium deus euocat agmine magno:
Scilicet immemores supera ut conuexa reuisant,
Rursus & incipiant in corpora uelle reuerti.

De animorum enim descensu, & ad superos regressu qui statis quibusdam temporum spatijs eueniunt, à te retro dictum est, quando de mutabilitate cum animorum essentijs connata, cuius gratia neq; semper sursum, neque deorsum semper partiales perstant animi, sed per uices eunt redeuntq; uerba fecisti. Verum quidnam sibi uult annorum numerus ille, quem scribit Maro, sicco (ut aiunt) calce pertransisti: quare si quid ab illis habes quod in medium afferre possis, nobis recēdere ne graueris: nisi fortasse finitus ille & terminatus pro indefinito à Marone hoc in loco positus est numerus. Et Leonicus, Vera, inquit, narras Alucrote, neq; numeri me illius fugerat ratio. Sed quoniam annexam secum illius speculatio profundissimam de fâto habet quæſtionem, cuius disquisitio & longa sanè est, & plus certe uirium requirit, quàm meas esse nunc sentio, iccirco consul

Animos mille
annos uagari:
quid sibi uelit
numerus ille
millenarius.

consulto ab ijs destiti. Humani nanque animi dum sursum manent, à fàtali prorsus necessitate sunt liberi: cum autem descendunt, quod natura sponteq; sua illis proculdubio euenire diximus, sub fàti necessario legibus constituuntur: ceterum plus minus ue, ut plus aut minus corporibus addicti fuerint suis: qui enim bene uixerint, & in terris cœlestem (ut aiunt) egerint uitam, philosophiæq; ueris mysteriorijs fuerint expurgati, ij profecto hoc etiam in loco possunt puri liberiq; degere, & ab omnibus ijs, quæ fàtali apporantur lege, uere sequestrari: nisi quantum summa est necessitas, ut illis propter cognationem coniunctionemq; corporis communicent, & obsequantur. Et istiusmodi fortasse est quod inquit ille, Sapiēs dominabitur astris. Huius quinetiā notæ excellens est ille uir qui in Theæteto à Platone describitur, qui corpore quidem in terris est, mente autem supra cœlos uersatur, neq; ubi nam terrarū sit animaduertit, atq; etiam id ipsum quod nesciat, nescit. Qui autem corporibus addicti sunt animi, ad illaq; uergunt & nutant, contrario certe se habent modo. Curant enim quæ curanda non sunt, eaq; negligūt, quæ summo studio quærere sectariq; deberent: quare fàti eos subijci legibus summa est necessitas. Quòd si in peius etiam ruant, mortaliq; uitæ & irrationali fuerint emancipati, tanquam abdomini seruientes belluæ, tunc serui penitus obnoxiaq; fàto fiunt mancipia: illis enim posthac utitur fàtum, tanquam omni ratione carentibus. Elegerūt nanq; illi hanc uitæ speciem, & eligentes merito sibi conuenientem degunt uitā. Sed isthæc (ut dixi) pulcherrimas prolixasq; de fàto disceptationes nimirum secum afferunt, in quas profecto dum me abstinere prædico, prudens sciensq; penè incidi: quas forsitan tentare alias conabimur: nunc quominus id facere

h 3 possumus,

possimus, temporis excludimur angustijs. Nihil tamē prohibet quod exposulas Aluerote, ut de Maroniano etiam annorum numero aliquid in præsentia breuiter in medium adducamus. Statum quendam animorum circuitum mille annos Academici esse uoluerunt. cum hos nomino uniuersam à Zoroaste Mercurioq; , mox à Pythagora et Platone descendantem philosophiam intelligi uolo. Mille inquam annorum periodum partiales animi, siue recte, seu secus in terris uixerint, aut in cœlis cum dijs (ut diximus) aut in poenarum apud inferos locis, antequam ad secundarum electionem uitarum deueniant, transmittere dicuntur. Et hanc statam decretamq; animorum periodum esse autumant, secundum quam uices exercent suas, unusq; descensus in illa, unicusq; ascensus unicuiq; partiali debetur animo: cum neq; sursum manere (ut diximus) incommutabiliter possint animi, neq; rursus deorsum semper stare illis sit concessum. Cuius profecto rei hanc etiam esse uolunt rationem. Hominis aiunt ætatis esse mensuram & terminum centum annos, quemadmodum etiam in Platonis Politia determinat Socrates. Is enim numerus, cum à denario numero quadratus existat, qui sanè in se omnes numerorum continet species, quas capitales arithmetici uocant numeros, & excellentis nimirum esse natura, & inferiorum animalium excellentissimo homini, qui illius uitæ claudat periodum, non immerito attributus esse censetur. Porro is numerus si per decem multiplicetur, & ex quadrato efficiatur solidus & cubus, Maronianū illum mille annorum reddit completq; numerum. Decies enim decē decies, milenum faciunt numerum, qui & cubus sanè est, & ab illis $\chi\theta\omicron\nu$, id est, terrestris appellatur, ob firmitudinem, inconcussamq; stabilitatis rationem, terræ elemento tanquā peculia

pecularis & affinis assignatus. Dicunt igitur hunc animorum conuenientem esse circuitum, & ceu mille annorum peregrinationem quandam, à generatione uidelicet ad generationem alteram, ut decupla sit illis uel delictorum malorumq; præteritorum apud inferos expensio, uel econtra recte factorum in terris penes superos merces & compensatio. Hæc Academici de partialium naturis animorum Aluerote, ut ex illorum commentarijs percipi dignosciq; potest, proculdubio sensisse uidentur: quæ ego eatenus (ut retro dixi) approbanda tenendaq; censeo, quatenus nostris, id est, Christianis concordant quadrantq; dogmatibus: alia autem quæ non eiusdem sunt notæ, neq; sentienda omnino, neq; admittenda esse contendo. Quantum enim quisq; ab illis discesserit, tantum profecto à rerum natura ueritateq; ipsa elongari aberrareq; certissimum esse iudico. Hæc cum dixisset Leonicus, finem loquendi fecit. Sub ijs dictis introducti tibicines quidam, tibijs præclarissime cecinerunt, intentosq; præterita disputatione conuiuiarum animos concinna modulationis harmonia relaxarunt. Et quoniam iam instabat aderatq; nox, remanentibus cum Alueroto alijs, Ego & Leonicus & Hieronymus frater circiter accensis luminibus inde discessimus. Habes Capella Alueroti conuiuium, in quo etsi quæ ad corpus pertinebant epulæ, decentes sanè sumptuosæq; fuerant, longe tamen animi escis, quibus à Leonico copiosissime fuimus accepti, inferiores uilioresq; merito existimari possunt.

Verum memineris eius, de quo paulo antè conue-

nimus, ut tu mihi inuicem cras operam

præstes tuam. C A P. ME-

mini: & ita fiet.

h

4

PERIP

PERIPATETICVS,

SIVE,

DE NOMINVM INVENTIONE.



NE QV E O profecto satis coniectari Leonice, quid nam sit illud, quod de rerum nominibus asseuerare te uideo: natura scilicet rebus constare nomina, & non hominum consensu, arbitrio uē iisdem fuisse imposita. Nemo enim (ut opinor) isihuc tibi concesserit: nisi sicui forte tunicas etiam, & calciamenta à natura fieri, & singula, quæ usu artificioq; adinuenit uita, natura constare uideri possit: ut inde uniuersæ artes, & hominum uaria inuenta de medio prorsus tollantur: Ego profecto tibi uel omnia, in re præsertim literaria, facile concedere possem: uerum hæc quæ paulò antè dixisti (pæce tua dixerim) nec iuranti quidē credam. **LEON.** Nec mirum Alexander: pulchra enim (ut in prouerbio est) ardua existunt, nec cuius ex facili sese offerre consueuerunt. Verum cum tu tali ingenio, tantaq; cruditione uir, hac de re non modo non ambigas, quod à plerisque fieri solet, sed in alteram potius partem totus incumbas: quid isti facere debent, quorum mens neque doctrina planè ulla, neque rerum usu concalluit? An non tibi Platonis Cratylus perlectus, & excussus bene est, ubi hac de re uniuersa frèrè absoluitur quæstio? Solebas enim (si rite meministi) philosopho illo mirifice delectari, & in commentariorum eius assidua lectione quàm maxime uersari. Quam obrem admirari satis non possum, cur profundè adeo hæc in te sententia insederit, ut Platone etiam refragante anniten

nitentē ue, stirpitus conuelli non possit. ALEX. Hoc ipsum est Leonice quod me distrahit, & ambiguum animi hac in re ancipitemq; diu habuit. Nam cum Platonem ipsum audio, nihil est quod sanè dubitem: totus enim ex illo pendo, & in illo sum totus: adeo sententijs me suis uir ille & apte copiosè que fluentibus uerbis implet & obruit. Rursum cum ad Aristotelem Peripateticos que me conuerto, qui rationibus alijs, necnon communi hominum sententia me inde transuersum rapiunt, alius statim fio, & ueluti leuissimus transfuga, priorē mentis habitum nullo negotio commuto, neque quo loci consistam satis perspectum habeo, sed huc illuc nouus ego & ridiculus Proteus, formam de forma uarians, facile delabor & feror. LEON. Mira profecto de te narras Alexander, sed tamen quæ tibi bene credi possint: uerum cur non Menelaum aliquē hic, aut Aristēum reperire curassi, qui procacem hunc, fluentem que Proteum, si non aliter, uinculis saltem coercerent, & ad ueram illam, stabilem que mentis effigiem redire compellerent? An non sunt hac in urbe uiri plerique cum ingenio & doctrina, tum rerum etiam usu præstantes, qui Academicorum ac Peripateticorum placita iure sibi uendicant? quos iampridem consultos oportuit, ut ijs rerum ambagibus explicaretis.

ALEX. Quos tu uiros narras Leonice? An ne quæstuarios istos, qui se philosophos nominant, qui ue miseras literulas compendij habent loco, quos annua mercede conductos, uilibusq; addictos salarijs, palam profiteri uidemus? LEON. Hos ipsos dico Alexander, etenim uariantem hunc Proteum fortasse compelescuiſſent, & te hac mentis inconstantia & perplexitate facile liberassent. ALEX. Non mihi hos, per Deum immortalem Leo

In sophistas no-
stri temporis.

lem Leonice, qui sine honoris præfatione honeste nomi-
nari non possunt: tantum enim abest ut ab istiusmodi ex-
culti aliquid eruditi que discas, ut e contrario si quid e-
ruditi prius excultiq; didiceris, cum ad illos accesseris,
eorum contagio proculdubio dedocearis oportet. An non
ego decem integros annos horum auditoria, ne dicam
lustra, assidua contriui opera, omnesq; illorum ineptias,
& futiles captionum trichas, siccis (ut aiunt) auribus
ebibi? anxie semper queritans, si quid inde excerpere
possem, ne uacuis, quod dicunt, manibus, & oscitans
domum redirem. Verum, dii immortales, quam rerum ina-
nitatem apud illos, quantam bonarum literarum solitudi-
nem reperiri: in quo tamen, ut in malis, nihil mihi magis
sapere uisus sum, quam quòd cum illis desipere aliquando
destiti, neq; per omne uita spatium, ut plerique solent, in
coenosa illa ignorationis uoragine demersus contabui.

LEON. Stomachari mihi horu memoria fastidiose uide-
ris Alexander. ALEX. Et cur non stomacher Leonice?
aut non cuomam potius, cum sordidissimos hos scurras
inter eruditos uiros connumerare te senserim, & in phi-
losophorum numero recensere? Quamobrem rogo te, ut
hos in præsentia missos faciamus: indigni enim sunt, de
quibus serio uir quisquam probus loquatur. Et quoniam
in præsentia (ut uidetur) uacuum te esse conspicio (quan-
tùm semper aliquid cogitas & excudis) rem profecto
mihi gratissimam feceris, si de hoc ipso, de quo superius
me ambigere dixi, quippiam quod lectione uaria, cum
Græcorum tum Latinorum autorum conquisitum & de-
positum custodis, in medium afferre uolueris. Scio enim
quàm diligens sis, & quàm exactus ubiq; pensiculator,
ijs præsertim in rebus, de quibus inter antiquos illos pri-

marios

marios maxime uiros , aliquid subesse controuersiae uideatur. Deprome igitur de penu tuo aliquid , quod me pascat, & satiet: nam quod oblectare ualeat, haudquaquam dubito. LEON. Callidus es Alexander, & id proculdubio in praesentia mihi agere uideris, quod ueteratores saepenumero, ad eos quos fallere cupiunt , facere solent: qui cum mirifice semper illos laudent & extollant, tum inuicem ea quae illis grata , aut ingrata esse cognouerint, omni studio aut summopere laudant , aut contra penitus proculcant & deprimunt , ut illis sensim istiusmodi insinuentur blanditijs , & obsequentes posthac captos uel quod uelint facile deducere possint. Sic tu partim mea extollendo, quae alioqui mediocria esse cognosco, partim sophistas hos insectando uellicandoque, cui me in sensum nationi non ab re existimas, huc omnino tendere uideris, ut quid hac de re sentiam, omni prorsus elicias studio. Sed nulla est inuidia, quando hoc tibi placet, & temporis haec nobis grata commoditas casu quodam opportune sese offerre uidetur. Vergit enim iam ad uesperam dies , quod temporis ego lectione intermissa uacuus , curandae ualetudini tribuere soleo , & exercitationibus, inambulationibus uel operam impendo: quare tibi pro uirili mos geretur. Sed utrum ne mauis, sedendo, an deambulando negotium hoc peragamus? ALEX. Ut lubet Leonice: uerum ne quid de consuetudine incommodo detrahas tuo, si placet deambulemus, nam utrunque (ut arbitror) percommode facere poterimus. LEON. Recte dicis Alexander & Peripateticam alioqui controuersiam non inconcinne deambulando explicare & componere tentabimus. ALEX. Quid? tu peripateticam Leonice hanc appellas controuersiam, & non potius (ut est) Peripateticorum cum Academicis

demicis diffensionem? Inter Peripateticos enim nulla hac de re (quod sciam) huc usque intercessit lis: sed uniuersa inter duas illas, siue sectas seu hæreses uocare mauis, isthæc est disceptatio. LEON. Excitasti Alexander hoc in loco non contemnendam sanè quæstionis occasionem, quam forte non erit malum breuibus recensere, ne posthac rursum, si quid huiusmodi audiueris uelut nouum admireris. ALEX. Quid hoc rei est? ediffere Leonice: Lucrum nanque ex insperato fecero, si quid reconditum elegansq; hoc loci ex te audiuerò. Etenim id quod præter operam est, plerunque opera ipsa non ingratius euenire solet. LEON. Nihil reconditi, abstrusiue audies Alexander, sed ea tamen audies, quæ ingenio cuique ignorare quidem turpe est: cognoscere autem, etsi non admodum gloriosum (quid enim in parua historiuncula esse potest?) elegans tamen, & eruditum merito existimari potest: hoc autem est quod dicere uolebam, Peripateticos Academicosque non diuersa diuersorum esse cognomina, ut plerique falsò existimant, sed apud ueteres rerum scriptores omnes illi qui postmodum in Academicos Peripateticosque fuerunt determinati, à Platone Peripateticos primo fuisse appellatos. ALEX. Quonam modo isthuc dicis? non enim intelligo. LEON. Peripateticos inquam Alexander, omnem Platonicam familiam in primis cognominatam fuisse memoriæ proditum est: quod sanè nomen à deambulandi usu deductum fuisse, uel ipsa uocabuli significatio palàm facere potest. Consueuerat enim diuinus ille uir, ut apud Ammonium, & plerosque alios legitur, cum non minus corporum, quàm animorum curam habendam esse censeret, utrisque coniunctim salutaria præbere remedia: & corpus quidem laboribus

Peripatetici
qui dicantur.

laboribus exercitationibusq; uegetum & ualens reddere:
 animos uero disciplinarum studijs, moribusq; excolere:
 hinc ambo ista apte coniungens & copulans, semper se=
 re familiares suos in Academia deambulando docere per=
 seuerauit:uniuersum'que literarium illic negotium inam=
 bulationibus planè transigebatur. Quamobrem omnes
 illi qui Platonem audire consueuerant, sunt Peripatetici
 cognominati. Caterum Platone è uita sublato, Speu=Speusippus.
 sippo'que eius ex sorore nepote, qui ei ceu hereditario
 quodam iure in Academia successerat, paulo post uita
 functo, bisariam Peripateticorum diuisa est secta: & ij Peripateticorū
duæ sectæ.
 quidem Aristotelem Stagyritem ex Macedonia: illi ue=
 ro Xenocratem Chalcedonium secuti sunt, qui in Aca=
 demia docere perseuerauit. Aristoteles autem cum suis
 in Lycium (nomen autem porticus Athenis erat Ly=Lycium.
 cium) transijt, ibidem'que docere instituit. Ex qua Pe=
 ripateticorum distractione ab ipsis sanè locis, ij qui=
 dem Academici, illi uero Lyciaci sunt cognominati, cum Academici,
Lyciaci.
 utrique tamen Peripatetici à docendi (ut dictum est) mo=
 do ab omnibus planè fuerint appellati. Postmodum au=
 tem, ut fieri consuevit, Aristotelis sectatores nomen qui=
 dem, quod sibi à loco inditum fuerat, amiserunt, com=
 mune'que illud à deambulandi officio cognomen, ceu
 peculiare quiddam & proprium, retinuerunt, & Pe=Peripatetici.
 ripatetici tantummodo sunt appellati: contrà Xenocra=
 tici priori oblitterato nomine, loci cognomines facti
 sunt, & solum Academici ab omnibus perseueranter co=Academici.
 gnominati. Non igitur perperam (ut arbitror) neque
 temere sum locutus, quando hanc de nominibus disce=
 ptationem, de qua mox pertractabimus, Peripateticam
 controuersiam esse dixi. Peripateticum enim cognomen
 à Platone

à Platone ortum, omnibus Platonis discipulis & assertoribus optime conuenire uero consentaneum est. Nec me præterit tamen M. Ciceronem in Academicis suis hac de re aliter memoriæ prodidisse: uerum quæ nam uirum illum mouerint causæ, in præsentia recensere non cogito: longior enim esset digressio, quàm isthæc temporis patiatur angustia, & alioqui multa nobis interim ad institutam disceptationem sunt discutienda. Quamobrem in præsentia hac in re Græcos sequamur autores. ALEX. Ita uiuam Leonice, ut hæc me res hucusque latuit: quare multam tibi sanè habeo gratiam, qui mentis meæ, cæcutientes alioqui & obtusos, oculos, hac ueritatis luce perfuderis: sed perge obsecro te ad eam quam de nominibus inceperamus quæstionem. LEON. Ita faciam, quando hoc tibi placere nunc uideo: uerum meminervis me hac de re philosophorum more pertractantem licentiosiori docendi genere uti decreuisse, ne forte à me accuratam, excultam uel exigas uocabulorum, & styli elegantiam. Noua enim & externa introducenda sunt nomina, & Græcis plerunque utendum, ubi nos Latina defecerint, ut res commode explicari dignosci uel possint, circa quas uniuersam ferè philosophantium operam absumi par est. Dabis igitur ueniam, si quod insolens, nouumque uerbum delicatas aures tuas perstringens offenderit. ALEX. Non est quod ita mecum agas, perge modo ea dicere, quæ planè intelligam: nam quo id dicas modo, & an splendide Latineque prolatum sit quippiam, aut secus, haudquaquam laboro. LEON. Audi igitur Alexander, quando ita es animatus. Duas de inuentione, & ueluti genitura, nominum inter se diuersas antiquo

Heraclius. rum fuisse sententias certum est: unam Heracleti, cuiusque sectæ

sectæ philosophantium, qui ab illo Heraclitici sunt deno-
 minati: alteram Parmenideorum quorundam, inter quos
 nō ignobilis sanè assertor fuit Hermogenes, quo Plato (ut
 perhibent) in ijs quæ ad theologiam pertinebant, usus est
 præceptore: sicut in physicis Cratyli Heraclitici auditor
 fuisse dicitur. Et primi quidē nomina sola constare natura
 dixerunt, nihilq; in ijs formādis aut inueniendis hominum
 effecisse consensum. Secundi uero adeo non esse rerum na-
 turæ effectiones nomina affirmarunt, ut pro mero etiam
 cuiusuis arbitrio confirmata, & rebus assignata imposi-
 tiq; fuisse dixerint. Et Heracliticos quidem sequi uidetur
 Plato, qui in Cratylo Socratem de recta nominum ratio-
 ne differentem inducens, ipsorum effectiōnem rerum natu-
 ræ facit ascribere. Aristoteles autem, & qui post eum Pe-
 ripatetici fuisse cognominati, in altera omnino censen-
 tur classe, eorum scilicet, qui nomina hominum consen-
 su rebus imposita fuisse uoluerunt. Vnde posterioribus
 (ut opinor) facilis suspicandi data est occasio, philoso-
 phos hos hac ipsa de re diametro (ut aiunt) inter se dis-
 sentire, quod tamen nos minime uerum esse euidentiissi-
 mis certe signis rationibusq; pro uirili demonstrare con-
 tendemus, si prius illorum sentētias philosophorum, qui-
 bus uē nitantur rationibus, in medium summam, cla-
 reque adduxerimus. Hoc ipsum igitur, si placet, prius
 facere aggrediamur. ALEX. Imo ita placet, ut nihil
 mihi unquam magis. LEON. Nomina Academici na-
 tura ipsa, & non hominum arbitrio constare, Alexan-
 der, hoc dicebant modo: Nam cum uoces quasdam ef-
 fe uellent nomina: In uocem enim, tanquam in genus,
 uniuersam eius complectens essentiam, omne sanè refer-
 tur nomen. Voces autem naturæ, non artis sunt opera:

iccirco & nomina ipsa talia esse oportere affirmabāt natura rerum effectiones, & non hominum consensu industriaq; excogitata signa. Præterea cum orationū alia quidem uera, alia autē falsa esse dicatur, orationis ueræ partes cum illius sint partes, & ipsas necessario ueras esse oportere: & itidem falsæ orationis partes falsas esse constare: orationis autē partes esse nomina: quāobrem nominum ipsorum hæc quidē uera esse, illa autē falsa asseuerabant. Non autē eo uera modo & falsa dici nomina, quo orationē ueram uel falsam dicere consuetū est. Orationis enim ueritas illa & falsitas, ex cōplexione fieri perhibetur, ita ut res sunt, uel non sunt designatæ. Nomina autem simplicia esse, nihilq; huiusmodi signare posse: sed dici uera esse nomina, quia res ita ut sunt, magis, quā ut arbitrio placet nostro significanter declarent: cōtra falsa existimari nomina, quoniam rerum naturæ non belle conuenire quadrareq; uideantur. Nullo igitur consensu nostro indigentia, ut uel falsa sint, uel uera nomina natura ipsa constare uerisimile est. Sed & hoc etiam instabant modo: Sicut rerum essentias natura ipsa existere certissimum est, nulliq; omnino dubium: ita earū actiones passionesq; naturales esse proculdubio est censendum: ab essentia enim has deriuare & fluere clarissime animaduertitur. Vt si rem aliquam (uerbi causa) secare studeamus, non tam pro libidine nostra hominumq; arbitrato, quā pro rei ipsius natura id faciamus oportet, & eo etiam instrumento, non quod nobis placuerit magis, sed quo id aptius diuidi secariq; possit, utamur. Nominare autem cum actio quædam effectioq; sit, & ideo naturā sortiatur essentiæ, non esse sicuti nobis, sed sicut rerum naturæ maxime placet, cuius instrumenta sunt nomina, ad res naturali modo signandas,

gnandas, & non pro libidine arbitraturq; nostro, rebus
 ipsis accommodata. Quod hinc etiam clarissime posse pa-
 tere dicebant: non enim cuiusque esse tale reperire instru-
 mentum, cuiusmodi uera censentur esse nomina, ad res sci-
 licet rite discernendas, audientesq; optime docendos adeo
 accommodatum, uerum artificis cuiusdam nominum inuen-
 toris, qui cum prudentissimus esse deberet, rerumq; natu-
 ræ indagator solertissimus, rarissimus profecto esset inuen-
 tu, qualem illi Dialecticum suum esse uolebant, omnibus
 liberalibus disciplinis, & morum etiam uirtutibus insi-
 gnitum & conspicuum, qui ad ipsas rerum ideas mente
 conceptas intuens, instrumentum illud luculenter inde-
 commodèq; posset elicere. Imagines enim rerum esse nomi-
 na, & eorum censeret finem, rem sicut est, nobis quadam
 illius similitudine apte signare, & non hominum arbitrio
 consensuue, sicut inania & surda temere sonare. Nomi-
 num præterea partitionem secundum rerum ordinem di-
 stributam determinatamq; esse dicebant, & alia quidem
 diuinis rebus conuenire nomina, alia uero his quæ sensu
 & opinione comprehenderentur. Vnde & uatem Home-
 rum recte sensisse dicebant, cum alijs deos usos esse nomi-
 nibus, alijs homines eadem in re memoriæ prodidisset: ut
 illud, Quem Xanthum dij uocant, homines uero Scaman-
 drum. Et rursum de uolucris, Chalciden dij nominant, mor-
 tales uero Cymindin, aliq; huiusmodi complura. Alias
 enim deorum esse notiones, & alias partialium cognitio-
 nes animorum: & iccirco apud utrosque alia etiam esse
 nomina. Diuina enim eius esse notæ quæ totam denomi-
 natorum rite indicarent essentiam. Humana uero quæ il-
 lius solummodo partem declarare possent. Et diuina
 quidem nomina uulgo esse incognita, cum humana pa-

Alijs dij nomi-
 nibus res ipsas
 uocant, alijs
 homines.

lām in promiscuo reperirentur usu: non alia expressiori similitudine, quàm earum imaginum & simulachrorum, quæ à sacerdotibus in adytis sacrorumq; penetralibus religiosissime seruarentur: quorum id quidem quod in aperto esset, quiuvis è populo libere palamq; cerneret, cum tamen id quod latitaret interius, in quo arcana decorum declarantur mysteria, à solis ijs cerneretur colereturq;, qui & initiati essent, & caremoniarum sacrorumq; ritu instituti. In sacris præterea quibusdam nominibus miram latitare uirtutem, ad ea sanè efficienda opera, quæ supra hominem esse censerentur, & diuinitati non immerito attribui possent. Et iccirco ab ijs qui interiores & reconditas calluere literas, memoriæ proditum est, non esse transferenda ea aut immutanda uocabula, sed ut sunt suis characteribus ueluti diuinis quibusdam notis religiose conseruanda. Quod magos etiam diuinorum peritos præcepisse dicebant, ne in carminibus scilicet & precibus ad Dæmonas Hæroasq; eliciendos aut placandos fisis, precandi ritus aut nomina immutarentur, siue Chaldaica forent ea seu Persica, & omnino barbara: quoniam uim, qualiacunq; essent, haberent maximam, & illis Dæmones insigniter gauderent. Vniuersam denique Zoroastis sapientiam, quam Plato in Alcibiade diuinam, & in Charmide animorum corporisq; curatricem appellat: non alia re magis, quàm nominibus constare dicebant. Hæbræos quinetiam diuinorum quorundam nominum notiones omnibus alijs prætulisse scientijs, & mira sæpius horum prolata opera ab eorum factitata prophetis memoriæ prodidisse, ut non à natura solum, sed ab ipsis etiam inuenta fuisse dijs, & hominibus tradita non immerito creditum fuerit. Huius autem
rei

Zoroastis sapientia.

rei non uulgare etiam signum esse preces, imprecationesq; nostras, quæ semper adiectis nominibus fieri consuevere: ex quibus uel palam ladi cos quorum recensentur nomina, uel iuuari, manifestius certe esse, quàm ut aliquo demonstrationis indigeret adminiculo. In urbium præterea oppugnationibus obsidionibusue ea uocari eliciq; consueuisse numina, in quorum tutela urbs illa posita esse crederetur, ut loco scilicet eo relicto, ad se uolentes & propitij migrarent dii: neque alio unquam modo obsessam urbem, quàm præsidum abscessu deorum capi aut posse, aut fas esse, non abs re creditum est. Quamobrem antiqui urbium fundatores, coloniarumq; deductores, alterum quidem tutelaris dei nomen manifestum esse, alterum uero sanctius augustiusq; omnes semper latere uoluisse, ne quando ab hostibus cognitum magicis cantibus precibusq;, & rite peractis sacris in bellorum discriminibus elici & euocari is posset deus, cui diuinum illud adscriberetur nomen. Atqui hominum quidem cum hominibus consensum commerciumq; proculdubio esse posse dicebant: deorum autem & hominum conspirationem, neque animo comprehendi, neq; suspitione apte fingi posse. Ex ijs igitur cuique palam esse dicebant, naturam ipsam, ueluti rerum imagines quasdam hominibus, uera tradidisse nomina, neq; ab ijsdem consensu aliquo uel casu inuenta & rebus assignata rerum fuisse uocabula. Cæterum quoniam ex Nigidianis cõmentarijs, quòd naturalia, & non arbitraria rerũ sunt nomina, lepidam sanè et festiuam refert Gellius rationẽ, non crit malũ (ut arbitror) hæc etiam ipsam pro Academia in medium adducere, quæ ipsius Gellij uerbis hoc maxime prolata est modo: Vos, enim, inquit, cũ dicimus, motu quodã oris conueniente cum ipsius uerbi

Aul. Gellius
Noct. Att. lib.
10. cap. 4.

demonstratione utimur, & labias sensim priores emouemus, ac spiritum atq; animam porro uersum, & ad eos quibuscum sermocinamur intendimus. At contrà cum dicimus, nos, neq; profuso intentoq; flatu uocis, neque proiectis labijs pronunciamus, sed & spiritum, & labias quasi intra nosmetipsos coërcemus. Hoc idem fit in eo quod dicimus, tu, & ego, & tibi, & mihi. Nam sicuti cū annuimus, & abnuimus, motus quidem ille uel capitis, uel oculorum à natura rei quam significat non abhorret, ita in ijs uocibus quasi gestus quidam oris & spiritus naturalis est. Eadem ratio est in Græcis quoq; uocibus quam esse in nostris animaduertimus. Et hæc ferè sunt quæ de nominum ratione Academicorum cum ueterum, tum nouiorum pro se afferre solita est schola. Cui sententiæ Stoicorum etiam Zenone, Cleante, Chrysippoq; ducibus, uniuersa fauet natio: contrà uero Aristotele duce niti uidentur Peripatetici, nomina scilicet nō natura, sed hominum consensu arbitrioq; constare: quædam etiam casum reperisse ipsum cōtendentes. Quatuor enim hæc esse quæ ordinem inter se quendam & continuatam haberent seriem: res uidelicet ipsas extrinsecus existentes: animi conceptiones notiones uel: ea quæ uoce proferantur: & ultimo loco illa quæ characteribus notantur. Istorum uero quatuor ordinem talem esse dicebant, ut prima scilicet à secundis signarentur, cum illa planè secunda efficerent. Res enim natura constantes, notionum esse principia: notiones autem & conceptus, res ut extra se habent intrinsecus designare. Hoc etiam modo ea quæ tertio ponebantur loco, efficere quidem ultima illa, signari uero & representari ab ultimis: siquidem ea quæ uoce proferrentur efficientes essent causæ eorum quæ characteribus inscribi
insign

insigniriq; contingerent : illa uero ideo scriberentur , ut commode prolatas signare possent uoces , & labili hominum memoriae suffragari. Horum porro quatuor duo illa prima natura constare dicebant , duo uero reliqua hominum inuenta fuisse arbitrio, & ideo in ijs ipsis artis magis quam naturæ relucere uestigia: idq; ex hoc uel maxime conspici posse dicebant. Etenim res ipsas, & animi notiones conceptiones uel in omnibus semper easdem existere, neq; aliquo locorum interuallo , aut temporum spatijs usquam inmutari . Easdem enim semper fuisse res , & de ijs ipsis easdem animi notiones apud omnes homines , & semper futuras esse, cum ea quæ uoce dicerentur nomina, necnon illa quæ characteribus perscriberentur, apud alios alia & semper fuisse , & nunc esse sit perspicuum . Aliter enim loqui & scribere Græcos , aliter Aegyptios , Latinosq; certum est, cum tamen omnes iisdem de rebus medijs animi conceptionibus & loquantur & scribant. Ex quibus palam omnibus sanè esse potest, postrema hæc duo hominum inuentis, & non rerum naturæ muneribus adscribi debere. Nihilq; sanè obstarè ea quæ hoc in loco ab Academicis adduci solerent, uocem scilicet naturæ esse, ad quā inquam uelut ad genus nomina referuntur omnia. Neque enim uocem nominum propriè genus esse, neque totam illorum essentiam rite complere . Materiam quidem nominum esse uocem, se haudquaquam inficias ire, genus uero ipsorum proprium & peculiare, penitus abnuere. Quemadmodum igitur si quispiam lectulum, quia ex ligno sit, lignum esse diceret, & ideo naturæ opus, is ridiculus merito haberetur: ita quisquis nomē dicit, quia uoce constat, ideo naturaliter nobis aliquid significare, non immerito risu dignus esse perhibetur: nullā enim esse necessitatem

si quippiam de materia fiat naturali, ut id prorsus natura-
 le efficiatur. Vniuersa nanq; illa quæ artificio quocun-
 que struantur, & quæ hominum sine controuersia adscri-
 bantur industrie, mechanicæ inquam structuræ opera,
 ex materia constare naturali, circa quam omnia artium
 uersentur ingenia. Similiq; rationis modo uocem quidem
 rerum naturæ donum esse hominibus eiusdem largitate
 concessum. Natura enim uocales certe sumus, nomina au-
 tem & uerba, uoces simpliciter non esse, sed uoces quas-
 dam, tali aut tali distinctas dearticulatasq; modo, ab ani-
 mæ ui illa quam λεκτικὴ φωνή illi, nos quia id unico
 uerbo exprimere nō possumus, dictionum effectricem fan-
 tasiam dicemus. Hanc enim uocalia mouere instrumenta
 non alio sanè modo quàm lignum moueri aptariq; à li-
 gnario dicimus fābro, ut lectuli figuram commodè possit
 recipere. Quemadmodum igitur lignum antequam lectu-
 li conformetur effigie, minime uocabitur lectulus: codē mo-
 do uoces etiam, antequàm tali aut tali articulentur distin-
 guantur uē modo, haudquaquam nomina, aut uerba di-
 ci oportere. Nostro igitur arbitrato & nostra positura
 constare ea, & non natura uerisimile esse. Neq; quo mi-
 nus id uerum esse fateamur ea intercedere, quæ illi de na-
 turali instrumento hoc in loco adducere solent. Nomina
 enim non esse naturæ instrumenta, sed ὀργανώματα, id
 est effectiones: instrumenta nanq; uocalium animæ ui-
 rium esse pulmones, palatum, & illam quam asperam ar-
 teriam medici uocant: à quibus, siue medijs quibus uocem
 effici, clarissime apparere, cum exsufflatus aër, & ex
 uniuerso thorace missus spiritus, congestim asperam il-
 lam uocatam arteriam, gulam uē percusserit, & ab illa
 inuicem reperiussus fuerit, tali quæ plaga sensilem effe-
 cerit

cerit sonum, animæ quopiam affectionum charactere insignitum. simplicis igitur uocis instrumenta illa esse: nominum uero & uerborum, quæ iam dearticulatæ & distinctæ sunt uoces, alia propria & peculiaria magis esse instrumenta, quæ non φωνικὰ ὄργανα, id est uocalia ut illa, sed διαλεκτικὰ, id est loquendi instrumenta recte dicantur. Et huiusmodi esse cum linguam ipsam, tum dentes & labias, quorum affectionem, uocali adiuncta materia nomina esse & uerba. Quamobrem non inconcinne, Stoicos dicere solitos aiunt, linguam quidem plectri similem esse, chordarum uero dentes, nares autem cornibus ijs quæ ad nervos resonant in cantionibus: cum ea uocem à pulmonibus immoderate profusam frangat & terminet, & cum ad dentes ipsos, tum ad alias oris partes impellendo, distinctos & pressos illius efficiat sonos. Non igitur esse naturæ instrumenta uerba & nomina, sed effectus & opera, & ideo natura constare haudquaquam necessarium esse. Non semper enim naturæ opera naturalia prorsus effici, sed in artem plerumque degenerare & desinere, quod cum ex alijs compluribus naturæ operibus, tum nihilo secius ex ipsa saltandi peritia manifestissime potest patere. Cum enim omnis, secundum locum motio nobis proculdubio natura insita connataque sit, tali tamen, aut tali moueri modo, & numerosa manuum gesticatione, Herculem (uerbi causa) uel Oedipodem posse signare & effingere, ab arte ipsa proficisci meridiana (ut aiunt) luce clarius esse, hominumque industriæ hoc, non naturæ largitati acceptum oportere referri. Nam illud quod dicere etiam solent de precibus, & supplicationum modis, numinumque magicis euocationibus, hoc sibi somnijs, anilibusque deliramentis uideri

deri quàm simile dicunt : immutabilem enim diuinam esse naturam, & certa causarum serie, eademq; firma & inuariabili uniuersa (ut par est) gubernare moderariue, & non puerorum more cultu pollicitisq; hincinde compelli & allici certissimum esse. Fieri tamen posse, quoniam ratione utentes nos deus esse uoluerit, & liberum motionis principium nobis largiter condonauerit, iccirco multorum etiam operum effectores esse uoluisse : actusq; nostros, & animi consilia, quæ ex libera electionis uoluntate prouenirent, pro meritis sæpius larga benignitate sancire. Aut magis etiam in nobismetipsis, si quis bene introspicere ualuerit, horum initia & causas cognoscere, qui circa huiusmodi consilia & preces, non sine iugis quadam affectionis & fantasie motione uersati, & iccirco hunc, aut illum uitæ habitum eligentes, huiusmodi præparatione media, & sequestre decorum procuratione prouidentiaq; secundum electionis nostræ modum abunde perfruanur. Sicut in quibusdam planè dignoscere licet corporibus, quæ ignita quidem leuitate sua superne facile ascendere possunt : rursus si quid ponderis ab humida omnino, aut terrea conceperint natura, eadem facilitate ipso declinantia nutu, ad lineam deorsum feruntur. Necnon solis splendore mundum collustrante, si quis apertis oculis expectatus liberq; diem contueri uoluerit, hunc clarissima frui luce necesse est. Siquis autem uel obdormiuerit, uel in tenebrosa se loca coniecerit, aut caput alioqui pannis conuoluerit, is certe uitio suo, non solis causa claritate illa minime perfruetur. Diuina etenim omnia, excellenti quadam redundantis naturæ ubertate, largiter ubiq; omnibus, nulla inuidia, sese offerre & concedere consueuerunt.

Deiq;

Deiq; providentia hoc modo, pro uitæ cuiusque electio-
 ne & meritis, affatim omnibus sese participandam, fruen-
 damq; æquabiliter præstat. Ex quibus certè effici, nihil
 preces supplicationes'ue facere, quominus nomina pro
 hominum uoluntate & arbitrio constare dicantur. Hæc
 sunt ferè Alexander, quæ de nominum ratione Academi-
 ci Peripateticiq; ueteres memoriæ mandauere, & in qui-
 bus inter sese dissensisse uulgò creduntur. Nam recēsiore
 isti philosophi, de nostratibus loquor, nec uerbo quidem
 tenuis quæstionem hanc attigisse uidentur. Quæ iccirco
 à me breuiter nūc percurſa magis, quàm pertractata fue-
 re, ne quam tibi molestiam longa dicendi series faceret:
 & ipsa alioqui nox iam aduentare incipit, satisq; pro cō-
 ſuetudine à nobis (ut uidetur) deambulatum est. Quare si
 placet finem faciamus, nisi aliud fortasse est quod me ue-
 lis. ALEX. À me quidem, tantum abest ut isthæc mihi
 tua longa fuisse uideatur oratio, ut contrà non mediocri-
 ter etiam doleam, quòd tam cito dicere desieris: nam de no-
 cle nihil sanè moror, ut citius etiam ruat, quando non
 procul, ut ſcis, habito: & illarum extensa prolixitas lu-
 cubrationibus à me commode diſpertiri ſoleat. Sed quæ
 nam lucubratio, quod ſtudium, mihi optatius eſſe poſſet,
 quàm ea de te audire, quæ adhuc ego à nullo percepi, ne-
 que apud quempiam ſcripta reperi? Perge modo, ſi pla-
 cet, reliqua ſubtexere, & ſi quid tui hæc de re eſt iudicij,
 in medium liberaliter aſſerre. Verum ſi uidetur, quando
 inambulauimus ſatis, ex porticu iſta in conclauē tranſea-
 mus, ubi & hoc ueſpertinum frigus ſalubriter declinabi-
 mus, & ſedentes alioqui commodius, ea quæ nobis agen-
 da ſunt, peragemus. LEON. Vt lubet Alexander, quan-
 do non ſolum animorum, ſed corporum etiam ualeitudini

non minus est seruendum, sine qua illi neque recte ualere, dum hic sunt, neque quippiam constanter speculari possunt. Caterum sciebam equidem ab initio etiam, cum ea exorsus sum, quæ iam recensui, pertrahere, te huc tandem peruenturum fore, meamque de ijs sententiam omni studio excutere tentaturum: & ideo (si recte tenes) tunc ego te licentiosius fortasse, quam par fuit, sed amice tamen, ut semper, ueteratoribus illis non dissimilem esse dixi. Veruntamen quando hanc ego personam semel indui, hæc mihi certè strenue est agenda. Quanquam cur mihi non in optatis sit etiam hæc tecum conferre, qui mihi inter amicos primarius cum sis, ingenio etiam & cruditione eò loci peruenisti, ut sanum cum de alijs omnibus, tum hac ipsa de re iudicium ferre ualcas. Accedit ad hoc, quòd ueterum illorum talis tantusq; admirator existis, ut eos tantum non constructis aris numinum loco uenereris & colas. Audi igitur & reliqua, quæ non mea certè sunt, sed quorum etiã priora fuerunt. Verum antequàm ad illa nostra se conuertat oratio, unica, & eadem breui propositione (quod Geometræ facere solent) totam hanc claudam quæstionem: ea autem est huiusmodi. Academicos Peripateticos uè de nominum ratione eadem proculdubio sentire, nihiloq; inter sese, nisi uerbis tantum differre. Scio is hæc tibi mira sanè uideri, qui priora audiueris: oculata tamen (ut aiunt) fide, si ea quæ dicam intelligere curaueris, hanc rem planè sic se habere percipies.

ALEX. Qui possum is hæc tibi credere, & non potius deorum hominumq; implorare fidem, quando mihi tu talia profers monstra? què enim fieri potest, ut duæ pugnantissimæ inter se sententiæ eadem esse dicantur? aut quoniam modo tute tibi id unquam persuadere potuisti? Nisi fortè

fortè idem album & nigrum esse tempore etiam eodem tibi uideri potest. LEON. Nimis delicatus es Alexan= der, & ut uidetur dictorum impatiens, citoq; sanè cōmo= ueris: uerum iterum, & tertio etiam scias uelim, me quod tibi modo sum pollicitus, bona fide iam nunc in numerato (ut aiunt) repræsentaturum, ne pigeat modo patienter au= dire. ALEX. Audiam quando ita iubes, imò auscultabo potius. LEON. Colligamus igitur (nisi molestum est) A= lexander, ea quæ dicta sunt prius, & si inter nos conue= nit, uideamus, ut quid nobis posthac dicendum sit, planè scire possimus. ALEX. Bene habet, sic faciamus. LEON. Reuoces igitur te ad superiora. Academicos dixeram no= minum rationem natura ipsa, non hominū arbitrato con= stare uoluisse: est'ne ita? ALEX. Est ut dicis. LEON. Pe= ripateticos autem, consensu arbitrioq; hominum eadem inuenta esse nomina, & rebus accommodata affirmasse. ALEX. Et hoc ita. LEON. Quomodo autem eadem utriq; senserint: & quonammodo cū pugnare inter se cæ uideantur sententiæ, rite consentiant & quadrent, reli= quum est ut à me in præsentia ostendatur. ALEX. Hoc nimirū restare uidetur. LEON. Exordiamur igitur, quā do sic placet, hoc maxime modo. Bifariam dogma illorū, qui natura constare nomina, & non hominum arbitrio rebus imposita esse dicebāt, scētum diuisumq; fuisse planè accepimus, & ij quidem ut Heraclitici, naturalia ideo uo= lebant esse nomina, quia naturæ effectiōnes ea esse et ope= ra, asseuerabant: propria enim & peculiaria rebus singu= lis nomina à rerum natura preparata assignataq; esse, nō aliter quàm sensili cuique rei proprii secreti'ue ab eadem attributi sunt sensus: aliud enim ipsum spectabile à tracta= bili esse censeri, quia alio iudicetur percipiaturq; naturæ
sensu

sensu. Nomina enim naturalibus similia esse simulachris, qualia certè sunt illa quæ in speculis, aut in stantibus cernantur aquis, non ijs quæ artificio constare uidemus. Et nominare profecto eos censeri, qui huiusmodi uera & solida proferrent nomina: qui autem secus facerent, nec nominare quidem eos, sed sonum tantummodo aut uocem emittere. Officium autem esse prudentis eruditiq; uiri, & uerè philosophi, ea semper indagare rimari uè nomina, quæ rebus singulis à rerū natura peculiariter constituta assignataq; essent: quemadmodum illius esse partes, qui acute oculorū polleret acie, proprias uisilis cuiusq; similitudines recte pernoscere & diiudicare. Alij autē dogmatistis huius ore tenus assertores, ut Academici suere omnes, id est, ueteres Peripatetici (sic enim eos in præsentia intelligi uolo) natura constare nomina dixerunt, quoniam rerum denominatarum naturæ conuenire quadrareq; uolebant: illustria enim ea & significantia, ut præclare res ipsas exprimerent esse oportere: ut si quis (uerbi causa) à natura tali præditus esset prudentia, ut ad regendos moderandosq; populos pulchrè natus uideretur, huic Agesilai, aut Archidami nomen probe conuenire dicebant. Et iccirco natura talia esse nomina, quoniam rebus ipsis, quæ ijs signentur nominibus, significanter conuenire uiderentur. Archidamus enim quia populo imperare possit: Agesilaus autem, quia populi sit ductor, luculenter dici posse censetur. Addebant præterea isli, nomina imaginibus esse similia: uerum ijs duntaxat, quæ non ipsa natura, sed hominum artificio constarent: qualia essent illa, quæ à pingendi, fingendi uè arte efficerentur, ubi uarias simulachrorum similitudines, uarijs rerum exemplaribus conuenire palàm perspicimus: & has quidem magis, illas uerò

uerò minus expressas rerum reddentes effigies, prout artificis peritia, artis dexteritate adhibita, commode illas ualeret effingere. Quod uel ex hoc clarissime cuius patere posse dicebant, cum saepe usu ipso deprehendantur homines & à nominibus ipsis denominatarum rerum naturas regressione ad priora (quam ἀνάσσειν uocant) indagari: & ijs rursum perspectis, conuenientia rebus imposita esse nomina demonstrare. Sed non dissimili etiam rationis modo illorum dogma, qui rerum nomina hominum consensu arbitrio uel adscripserunt, bifariam diuidi secarique contingit. Et ij quidem talem nominum posituram intelligi uolebant, qualem Hermogenes Parmeniædæus apud Platonem in Cratylo esse asserit: pro cuiusque scilicet arbitrio quæque formari posse nomina, etiam si id nulla fieri ratione contingeret, ut si cuius hominum, quam sibi libuerit rem, quocunque nomine pro libidine appellare placuerit, id illi sanè rei nomen proprium accommodatumque existere. Qualia pueros & mulieres ioco sæpenumero factitare percipimus. Vnde Diodorum quendam cognomine Diangelticum non contemnendæ uirum literaturæ, huius sectæ placitis mirificè fauentem, seruis suis præpositionum & aduerbiorum etiam uocabula, nominum loco imposuisse memoriæ proditum est, quasi nihil aliud ad rectam nominum rationem, præter hominum studium & arbitrium exigì oporteret. Alij autem, ut peripatetici fuisse, non eo sanè modo nomina hominum arbitrio rebus imposita fuisse dixerunt, sed ea quidem à nominum conditore quopiam proculdubio formari assignarique oportuisse, non temere, ut Hermogenes uoluit, sed consulto, si quid aliud: hunc autem merito prudentissimum fuisse, et omnimodam rerum naturæ calluisse scien-

scientiam, ut ex hoc scilicet cuique rei proprium decensq; nomen posset adiungere. Pariq; rationis modo si quis noua rebus quibusdam imponere studeat nomina, talem esse oportere, aut si talis esse non posset, ab huiusmodi saltem quopiam doceatur necesse esse uiro philosopho, totius rerum naturæ peritissimo, ut rebus congruentia imponere possit nomina. Et hoc esse quod dicerent consilijs hominum ea, non ipsa constare natura: quoniam non naturæ munere, sed ratiocinantis animi discursu & inuenta sint nomina, & rebus ipsis rite accommodata. Non enim temere primores illos, & nullo mentis negotio, paludes quidem fœmineo denominasse genere, fluuios autem masculino (ut de animalibus uiuentiumq; taceatur genere) sed has quidem ueluti amnium quædam receptacula fœminino protulisse genere: Fluuios uerò ceu illas intrâtes, seq; illis inmiscentes, masculina generis proportionem nominare uoluisse. Similiq; modo intellectum quidem nomine dixisse masculo, cum animam ipsam fœminæ terminatione signassent: quoniam hic quidem ei lumen infundat, illa uerò id excipiat, & ab illo repleti collustrariq; uerissime dicatur. Pariq; generis analogia in sole etiam & luna non ab re usos fuisse, cum hic quidem lumen illi affatim ingerere, illa autem ingestos excipere radios planè animaduertatur. Neutrum uerò genus & cômune quod epicœnum uocant, cum ex horû uel mixtura uel distractione cōstitui componiq; iudicentur, alijs nonnullis rebus congrua naturæ proportionem significanter adiecta fuisse. Et hæc de duorum à principio dogmatum in quatuor opinionum capita distributione, deq; illarum explanatione pro uirili mediocriter pertractata sufficiant. Ex quibus cuius non obscure etiam patere poterit, si quidem uegeta
mentis

mentis adhibeatur intentio, hanc quam suprà retulimus Peripateticorum sententiam, ab illa quam secundo recensuimus loco, & Academicorum placitis adscripsimus, nō alia re, quàm uerborum prolato esse diuersam. Quæ enim nomina à prudentissimo uiro, & ut ipsi aiunt, uere philosopho, rebus quibusque commode adscribuntur, rerum naturæ conuenire, propriaq; esse proculdubio & significātia est necesse. Atqui primum illud Peripatetici, secundum (ut uidimus) Academici uoluerunt: quamuis illi quidem hominum arbitrio nomina, isti uerò natura constare protulerint. In uerbis igitur diuersitas (si qua est diuersitas) non in rebus sententijsq; iure esse censebitur. Quamobrem ut à nominum conditore illo originem habent nomina: nulla est inuidia, quin pro arbitrio consensu hominum fabricata & inuenta fuisse dicantur, dum modo natura etiam constare eadem, seu ipsis congruentia rebus, & rerum naturæ quadrantia, bona pace dicere liceat. Res enim philosophi quærere, inuestigareq; debent, non anxie rerum perscrutari uocabula: quæ etsi rerum (ut diximus) imagines rite esse censeantur, nihil tamen obstat unius rei plures esse imagines, magis & minus archetypum reddentes suum: utri autem illorum imaginibus ijs melius accommodatiusue sint usi, ipsi sanè uiderint: nobis enim in præsentia abunde satis sufficere potest, manifestissime (ut arbitror) demonstrasse, philosophos hos, etsi nominibus differre uideantur, rebus tamen ipsis, sententijsq; proculdubio bene conuenire. Quod uel ex hoc etiam clarissime patere potest. Nam apud Platonem inter dissidentes de nominum ratione Hermogenem & Cratylum, medium sese constituit Socrates, & multis utrosq; rationibus insigniter reprehendit. Neque enim hominum
solo

solo constare arbitrio nomina planè demonstrat, ut asseuerare uidebatur Hermogenes, propter uniuersalia maxime genera, resq; immutabiles, et sempiternas, quibus tum quia perpetuæ cōstantesq; sunt, & omnibus ab initio cognitæ, tum quia immobilē definitamq; sortitæ sunt naturā, stabilis & recta nominū bene adscribi potest ratio. Neq; rursum nomina natura cōstare ostēdit, eo quo Heraclitus Heracliticiq; uolebant modo, propter singularem indiuiduorum uel labilem, & fluxam naturā, quibus neq; conueniēter assignari, neq; diu bene quadrare possent nomina. Nihil igitur, ut manifestissimè patet, à diuino Platone & Academicis, Aristoteles & Peripatetici dissentire uidentur: cū illi nomina ideo natura cōstare dixerint, quia rerū naturæ accommodata peculiariter res ipsas signarent: ij autem iccirco pro hominū arbitrio eadem esse cōtenderint, quoniam à prudentissimo nominū conditore, & quasi loquendi architecto ea secundum naturæ exigentiam, & inuenta, & rebus solerter assignata fuissent. Negāt igitur ea natura esse Peripatetici eo quo Heraclitus uolebat modo: rursum Academici, hominum arbitrio esse inficiantur nomina, quomodo illa Hermogenes esse (ut in Cratylo est) asseuerabat. Inter se autem ij philosophi ita nō dissentiriūt, ut de recta sanè nominum ratione una sola, constans que Academicorum & Peripateticorum esse perhibeatur opinio. Quod Aristoteles etiam in plerisq; commentariorum suorum locis non obscure comprobare uidetur: nam si quando noua, inusitata que rebus tentat imponere nomina, semper illa rerum naturæ quā accommodata assignare contendit. In commentarijs enim de physica auditione, siue de principijs (utraque enim legitur inscriptio) τοῦ αὐτομάτου nomen ijs quæ sponte sua quasi temere
nulla

nulla determinata proueniunt causa, luculenter assignat: in libris autem de sublimibus quæ μετέωρα uocant, τῆς τε καὶ τοῦ οὐρανοῦ, quæ pluuiæ sunt uocabula, significanter formasse censetur. Nam speciei nomen, quam ἐντελέχεια uocat, terminorum præterea in syllogismis quos ὁ θεὸς appellat, nec non τοῦ ἀορίστου διόματ' καὶ ῥήματ', καὶ τῆς οὐρανόθεν, uniuersa nomenclatura, quid aliud nobis declarare uidentur, quàm indubitatam philosophi huius hanc fuisse sententiam, nomina scilicet rebus secundum naturæ exigentiam quàm conuenientissime semper adscribi assignariq; oportere? Hæc sunt Alexander, quæ de nominum ratione tibi pro temporis angustia, & hac ieiuna facultatis nostræ mediocritate, dicere in præsentia habui. Reliqua tu (quo es ingenio) iungi uaria quæ antiquorum lectione perquires, & ab eruditis uiris percontando posthac felicius excutere poteris. Nam mihi satis nunc superq; fuit, tuæ ut potui, & debui, morem gerere uoluntati.

S A D O L E T V S,

S I V E,

D E P R E C I B V S.



HERCVLEVS lapis, quem Magnetem uocant, Burgarine charissime, occulta quadam ui, & naturæ (ut aiunt) concordia, distans ad se trahere ferrum percipitur: ferri uerò præsentiam & conspectum audaces aâ se uiros rapere Homerus est auctor. Votis porro & precationibus quibusdam elicitos fuisse deos, & ad humanos accessisse conuentus, credula
 k existimauit

Iupiter Eli- existimauit antiquitas. Inde Iouis cognomen Elicij apud
 cius. Romanos, & Numæ regis cum Egeria nympa fabu-
 Egeria nym- losi celebrantur congressus. Nos autem, qui sanctioribus
 pha. loqui celebrantur congressus. Nos autem, qui sanctioribus
 proculdubio uiuimus institutis, & ab antiquis per manus
 tradita patribus, ueræ religionis dogmata casto, pioq;
 mentis obseruamus cultu: deum quidem ipsum, & præ-
 stantes supra hominem naturas loco moueri, & ad nos
 accedere, terrasq; & hominum genus peregrinatum mo-
 do inuisere, haudquaquam existimamus. Preces uero exau-
 dire, & hominum supplicationibus & uotis flecti, &
 cum mala multa ab eisdem ideo auertere, tum inuicem bo-
 na ijs largiter præstare, pro certo tenemus. Hinc sacerdo-
 tum apud nos diurnæ nocturnæq; diuinarum laudum de-
 cantationes, & quotidianæ in templis precantium Chri-
 stianorum frequentia. Hinc uotorum etiam duris in rebus
 nuncupationes, & gratæ postmodum magnificæq; per-
 solutiones processisse uidentur: ut id sileatur quod omni-
 bus ferè horis tacitus sibi unusquisque aliquid peculiari-
 ter precatur, & rogat. Quæ sanè uitæ institutio, & certa
 credulitas, cum uetustissima est, & initio omnium secu-
 lorum memorijs comprobata, tum hominum etiam generi
 perquàm utilissima esse censetur. Deos enim esse credi,
 & illos rerum curam gerere humanarum, maxime ex
 usu uitæ est. Quamobrem reges & principes, rerumq;
 publicarum rectores, & antiquis semper temporibus, &
 nostra etiam ætate, religioni quidem & sacrorum cæ-
 remonijs deditos uiros, uacationibus semper, & immu-
 nitatibus sunt prosequuti, emolumentisq; etiam omnibus
 illos, & uitæ commodis fouerunt, & fouent. Impios uero
 & religionis hostes, contrà, cœu hominum generi pesti-
 lentes & noxios, supplicijs, & pœnis, & exilijs multa-
 uerunt,

uerunt, & nunc isthuc ipsum etiam facere perseuerant. Et profecto ita se res habet. Qui enim Deos aut nullos esse, aut humanas non curare res credunt, & neque uotis, illos, neque precibus ullis moueri existimant, ij profecto nulla mentis ratione, sed infræni uiuētes libidinis impetu, quod turpiter, siue auare, seu crudeliter appetunt, id pulso procul metu, dummodo latere se credant, omni prorsus studio, totisq; uiribus parare contendunt. Quod secus ijs accidere necesse est, qui præsentes ubique, & omnia uidentes, & audientes deos, recto mentis iudicio existimant, & credunt. Quo in numero, si quisquam alius, uir certe est philosophus, qui exactam naturæ cognitionem rectis uirtutum moribus copulans, & excellentes solus ab omni que seiugatas sensu contemplatur essentias, & illas pio (ut par est) mentis cultu ueneratur, & colit solus. Horum preces & uota propitius certe audit deus, cum ij maxime precando dum se corporibus auocant, & in mentis caput ascendere cōtendunt, per quam similes sanè Deo fiunt. Caue enim putes Bugarine quoruncunq; precantium à præstantibus naturis quasquæque exaudiri uoces, qui aliud sæpenumero agentes, non corde, sed labijs (ut aiunt) Deum honorant. Cum enim multa rite precantes habere oporteat, tum solitariam maxime, & deo intentam mentis aciem habere debent, ab omni quidem alia re seiugatam prorsus & liberam. Soli uero illi, cui preces fundunt, affectam, & ceu nexu quodam indissolubili copulatam. Qua de re superioribus diebus, cum apud Reuerendissimum præsulem Iacobum Sadoletum forte essem, ad quem sæpius (ut scis) salutandi gratia accedere soleo, illum audiui cum eleganter & copiose (ut semper solet) tum à consuetis isthæc pertrahendi

Vide Sadoletum
in psal. xciiij.

Non quasquæque
à dijs exaudiri
preces.

ratione diuerſe admodum uerba facientem. Aderant du-
 tem mecum cum alijs plerique, tum Hieronymus Magnanus,
 Veſtinus epiſcopus, uir & religione conſpicuus, & lite-
 rarum etiam ſtudijs in primis clarus. Cum enim ſtati forte
 adeſſent dies, quibus omnes ſerè urbis ſacerdotes quotan-
 nus de more per compita & plateas celebri pomparū fre-
 quentia pro frugibus precari ſolent, & illorum concin-
 ne precantium, & canentium, in quo eramus cubiculo
 clare exaudirentur uoces, ad me cōuerſus Sadoletus, Au-
 diſ'ne, inquit, Leonice canentium choros, hymnoſq; , &
 preces, ueteri inſtituto pro frugibus deo fundētium, quali
 harmoniæ gratia illi, & quo lepōris concentu omnium
 aures iucunde ſimul & efficaciter permulceant? Neſcio
 proſecto quid alijs, ego certe (ut uera ſātear) ab huiusmodi
 re multum afficior, mouentq; me mirifice, & neſcio quo
 modo animum altius euocāt meū. Tum ego, Nec mirum,
 inquam, reuerendiſſime D. tali te affici modo, quando duo
 ſimul iuncta ſunt, quorum uel alterum recte ſe habentes
 animos eximie ualeat commouere: uocis enim modulatio,
 & amoena ſuauiſſima (ut uerborum in præſentia taceam
 uim) nedum homines, ſed ſeras etiam ipſas proculdubio
 flectere & permulcere poſſunt. Vt non immerito (me-
 Orpheus. hercule) Orpheum antiqui uates uoce & fidibus canen-
 tem, cum ſerarum genus omne, tum inanimis etiam &
 ſurdas res demulxiſſe, & poſt ſe traxiſſe memoriæ prodi-
 derint. Quæ ſanè res Platonis (ut arbitror) ſententiæ,
 quam de animorum conſtitutione, diuine potius quàm hu-
 mane uir ille recte intelligentibus ſcriptam reliquit, miri-
 fice ſuffragari uidetur. Numeris enim & harmonia hu-
 manus conſtans animus, numeroſis nimirum uocum mo-
 dulationibus excitari percipitur, & loco ſtare neſcit co-
 gnatione

gnatione (ut aiunt) & contagione quadam, quam Græci sympathiam, nostri concordiam uocant, commotus & excitus. Quæ ad inanimes usque res iugi etiam tenore delabitur. Siquidem percipere licet distantis lyre fides ad alterius sonum lyre simili harmoniæ temperamento contentæ, manifestissime motari & resilire. Sed quid ego isthæc inquam tibi in præsentia, an (quod aiunt) sus Mineruam? Tum ille ad me hilari conuersus uultu, Quid tu, inquit, Leonice, sus Mineruam? aut cur tu te ipse adeo despicias? qui huiusce rei Academicorum decretis optime coniectans causam, illam non minus dilucide quàm breuiter nunc explicasti. Nisi forte recto nostrorum instituto te humilem facis, ut merito postmodum ab alijs extollaris. Verum sint ista certe ut abs te dicta sunt: & homines tum numerosæ (ut uidetur) moueant uoces, tum uel maxime preces & uerba deducant & frangant. Cur autem eæ (ut in confessis est) Deum etiam ipsum tangant, & precantium uotis excellentes supra hominem exorentur naturæ, hoc abs te Leonice in præsentia audire percuperem. Quare age nunc & aliquid de Academicæ penu reconditum deprome. Tum ego, non ea inquam Reuerendissime D. uis nostra est, talesque res, & tam arduas ingenia pusilla non sufferunt. Noli igitur mihi id oneris imponere, quod humeris impar est meis, & sub quo mihi turpiter cadendum esset: tibi hæc debentur certamina, tuisque rotis isihæc conterenda est meta. Et Magnanus, Miro, inquit, desiderio Reuerendissime D. & sedulo expectabam quid nam quæstioni propositæ responsurus esset Leonicus. Hac enim de re ea, quæ nostri ferè omnes dicunt autores, studiose perlegi omnia, ad manum etiam habere me credo. Verum

politiora quædam de precibus, & antiquorum lucubra-
 tiones magis redolentia de illo audire desiderabam. Noui
 enim illum cum multæ lectionis semper fuisse, tum Aca-
 demicis mirifice addictum decretis, quæ mihi sanè philo-
 sophorum natio, ut alijs ferè in omnibus quæ ad philo-
 sophiam spectant, cæteris haudquaquam postponenda
 uidetur sectis, ita longe omnibus (meo quidem iudicio)
 præponenda in ijs quæ de superioribus pertractat natu-
 ris, illarumque cum uires, tum beneficam ad omnia pro-
 uidentia & bonitatis ostendit curam. Qui locus ad re-
 ligionem proculdubio, diuinumque cultum totus perti-
 nere uidetur. Cæterum quoniam is suas tibi delegat par-
 tes superiori; (ut par est) cum in cæteris omnibus, tum
 in ijs præcipue spõte cedit sua, bene certe mecum in præ-
 sentia actum esse existimo, & non mediocriter fecisse lu-
 crum me reputo, quando te hodie hac de re Academico-
 rum more disertantem audire non dubito. Scio enim
 quòd neque meo hanc rem, neque Leonici nostri studio
 inuidebis, & hodiernam disputandi operam nobis libe-
 raliter præstabis. Tum ille hilare (ut solet) renidens, Et
 tu, inquit, etiam Magnane cum Leonico facis, mihi que
 hoc oneris imponere contendis. Atqui disceptantium fe-
 rè omnium, sed Academicorum præcipue, constans sem-
 per fuit institutum, ut qui proponebat aliquid, ille au-
 daret. Contra autem, de quo quippiam quærebatur, is
 sanè diceret. Quamobrem recto rationis ordine æquum
 profecto erat Leonicum dicere, me uero auscultare. Ve-
 rum quando ita uultis, & uestro à me iure hoc enixius
 contenditis, libens id uestra aggrediar causa: quod an ex
 animi nostri sententia explicare nunc possim, haudqua-
 quam scio. Magnæ enim (ut nostis) & assidue, cum pu-
 blice, tum

blicæ, tum priuatæ etiam occupationes, ijs præsertim temporibus, me nimis diu ab huiusmodi studijs auocarunt: sed si vires deficient, uoluntas certe non decrit. Quare uobis in præsentia geratur mos. Verũ de precibus & uotis uerba facturos, Deum in primis precari æquum esse censeo, qui mentis nostræ oculos splendore suæ claritatis illuminet, ut quæ placita illi grataq; sunt, & comprehendere ualeat animus, & uerbis postmodum luculenter possit exprimere. Hic cum omnes assensi fuissimus, tacitisq; etiam mentis precibus unusquisq; id ipsum expetisset, paululum moratus, sic exorsus est ille: Vetus & constans est opinio ab antiquis usq; repetita temporibus, & populorum etiam omnium gentiumq; comprobata consensu, diuinæ quasdam supra hominem esse naturas, quæ inferiorum quidem omnium bonitate sua curam gerant, & illis cum bona largiter tribuant, tum mala & aduersa ab eisdem benigne & salutariter auertant & propellant. Hosq; propitios, ut sunt, existimantes & uocantes deos, rite illos pieq; semper colere, & illis preces & uota assidue fundere omnes ferè consueuerunt. Adeoq; hæc in hominum mētibus congenita cēsetur opinio, ut nulla gens neq; tam humana reperitur & docta, neq; tam immanis rursus et barbara, quæ hac de re, ceu naturali quodam admonitu & instinctu excitata, aliter loquatur & sentiat. Taceo hoc in loco paucos quosdam, apud ueteres ab omni plane uita, & hominum commercio explosos, Diagoras inquit, Theodoros, Protagoras, & si qui alij prauo mentis errore nullos esse dixerunt deos. Epicurus quinetiam haudquaquā in præsentia perhibendus, qui uerbo quidem tenuis esse asserit deos, re autem ipsa eos sanè de medio tollit, cum illis nullum omnino actionis opus, nullam rerum humanarum, neque etiam

cœlestium relinquat curam: sed monogamos quosdam
 (ut ait Cicero) & solitarios & perflabiles in intermun=
 dijs suis degere illos existimet. Alij autem omnes, cum ci=
 uilibus negotijs dediti, & rerum publicarum guberna=
 tionibus emancipati, tum philosophi maxime, qui res ab=
 ditas & abstrusas solerti mētis indagine rimari sunt soli=
 ti, & deos esse constantissime crediderunt, & illos preci=
 bus & uotis, ceu audientes, & curantes omnia, propitios
 sibi, & placabiles semper reddere contenderunt. Hinc
 apud Aſyrios, Chaldæi: apud Indorum populos, Brach=
 manes: penes Gallos, Druydæ: apud Persas, Magi: penes
 Aegyptios, sacerdotum natio, aſiduam religioni diui=
 noq; cultui præſtantes operam, cæremonijs & sacris, uo=
 torumq; inſuper nuncupationibus, & aſiduis precum ob=
 ſequijs deos colebant, uenerabantur, adorabant. Qui cer=
 te mos uoluentibus ſeculorum curriculis, ceu per naturæ
 manus traditus, & ad nos uſque perueniens, eo rectius
 nunc, & deo ſanè gratius obſeruari percipitur, quo inte=
 merata ueræ religionis myſteria ſacraq; incorruptæ fidei
 dogmata, Dei Opt. Max. ineffabili quadam bonitatis ple=
 nitudine ſolis tradita & reuelata ſunt Chriſtianis: ut hæc
 demum uera & ſolida dei religio & cultus uideri, & re=
 ctissime exiſtimari poſſit: cum primæ illæ religionis potius
 imagines, & umbræ quædam, quàm religiones merito ap=
 pellari debuerint. Omnes igitur ferè (ut unde digreſſi ſu=
 mus reuertamur) & deos eſſe conſtanter aſſeuerant, cu=
 ramq; illos rerū humanarū gerere credunt, & uotis pre=
 cibusq; inſuper illis aſidue ſupplicandū eſſe cenſent. Sed
 quoniam de precibus in præſentia me agere uoluisti, &
 quo nam illæ modo Deum tangant & moueāt audire per=
 cupitis, idq; ipſum ut ex Academicorū declararem inſtitu=
 tis, nomi

tis, nominatim etiam perscriptis, cōsuetā philosophantiū,
 & eorum maxime quos sequimur, procedens uia, ab illa-
 rum primo descriptione & formæ explanatione initium
 capiam (rei enim de qua agitur ignorata natura, frustra
 profecto ad reliqua festinaret oratio) quo sanè factō, ad
 illa postmodum explicanda me conuertam, quæ huic con-
 uenientia rei, & commoda esse uidebuntur. Sunt autem
 preces, siue oratio & supplicatio (ut usitatoribus apud
 uos utar uocabulis) uis quædam animis superne concessa,
 illos sursum rapiens, & ad deum ipsum constringens &
 uinciens, secundaq; omnia semper prioribus uniens, & rite
 copulās. Cum enim omnia, quæcunq; sunt entia, ita à Deo
 procedant & defluant, ut ab illo tamē nusquam dicantur
 abscedere, alioqui ruerent prorsus, & in nihilum deuolue-
 rentur, omnia profecto in deo esse, & in illo collocari ne-
 cesse est, ut postmodum ceu intimo quodam orbis ambitu
 progrediētia, ad deū ipsum rursus, à quo, & in quo sunt,
 diuino & mirabili reuoluantur modo. Neque hoc magnis
 duntaxat, & excellentibus cōtingere dicimus naturis, quæ
 alioqui ordine & dignatione propē ad deos accedere ui-
 dentur: Sed minimis quibusq; , imò infirmi etiam surdæq;
 materiæ, quæ inter omnia ab excellentibus diuinisq; remo-
 tissima esse censetur causis. Omnibus igitur æqualiter re-
 bus diuina adest præsentia, cum in omnibus ubique ipsum
 ex æquo reperiatur unum. Neq; hoc quispiam miretur in
 loco, aut potius ueluti pugnans reijciat, quod diximus à
 deo labi et procedere omnia, & rursus progressa omnia,
 in deo tamen esse & collocari. Nam progredientia ueris-
 sime manent, & tanquam firmis innixi radicibus in Deo
 stabiliūtur. Quò enim progredi possunt, ubi nō sit Deus,
 cuius plena sunt omnia, & qui proculdubio & ubiq; est,

Et omnia in se stabiliter cōtinet entia? Miro igitur quodam rationis modo et progrediuntur omnia, et non progrediuntur à Deo: nam progressa manent, neque separantur omnino, alioqui (quod retro diximus) delaberentur in nihilum. Et ut ad summam breuiter iste cōcludatur locus, entia omnia sibi quidem ipsis progredi et procedere iure censentur, in deo autem firmiter illa manere summa est necessitas. Caterum quoniam non solum à Deo progredi entia, sed ad Deum quoq; recurrere, et retro flecti debēt, ut in hoc etiam superiorum ordinum ad ipsum unum imitentur regressum, aliam quandam à Deo perfectionis capiunt notam, qua ad illius bonitatem retro flecti nata, in ipso (ut diximus) radicitus nixa, in seipsis uero procedentia, rursum ad ipsum diuino quodam munere reflexa perueniant, et innitantur, admirabilem quendam (ut dictum est) efficientia circuli ambitum, à Deo incipientem, et desinentem in Deum. Cum enim ab unitate (ut dictum est) diuina omnia prodeant entia, secum profecto unitatē sibi impressam afferunt et conseruant quandam, diuinæ illius unitatis, imaginem, qua postmodum et reuocantur ad illam, et reuocata diuino quodam perficiuntur modo, qui perfectorum animos rapit entium ad preces et uota, quibus unio cum Deo nobis (ut paulopost uidebimus) manifestissime completur, et perficitur. Et hoc certe est quod in suo de diuinis nominibus commentariolo ijs ipsis uerbis theologus refert Dionysius, Votis et precibus ad diuinā bonitatem perueniendum est. Nam ipsa quidem adest omnibus, non autem illi adsunt omnia: ubi uero ipsam castissimis precibus, animoq; inuocamus defecato et tranquillo, atq; ad diuinam idoneo coniunctionem, tunc nos quoque illi adsumus. Neq; eniquam profecto hoc quod diximus

mus de entium regressu incredibile uideri debet, quando is non in animorum solummodo natura percipitur, sed in rebus etiam anima carentibus id ipsum animaduertere licet: eæ etenim natura sui impressa huiuscerei gerentes uestigia, quo maxime possunt modo, ad supernas se conuertunt causas, & ad diuinos illos superiorum siue ordines, seu sortēs appellare malumus, unde procedunt & defluunt, & quibus firmis naturæ nexibus sunt copulata, ceu ad solem solaria (ut ita dicam) se conuertunt, & ad lunam lunaria, similiq; cetera modo duces quæq; suos naturaliter consequuntur. Et hæc profecto est concordia illa seu consensus siue naturæ contagio, quam Græci Sympathiam uocant, cum inanimes & surdæ res ad alias, & ad alias superum potestates habiles aptæq; reddantur: à quibus uestigia etiam quædam naturaliter habent impressa, quæ à rerum peritis, cum usu & experiētia, tum illarum interdum admonitu, comprehendendi & dignosci recte possunt, ex quibus naturalis (ut nonnulli aiunt) magicæ fluxerunt initia. Cum igitur omnia (ut uisum est) entia, duo hæc in sui gerant essentia, signa siue uestigia, seu proprietates (multa enim adducēda sunt nomina, ut naturales has rebus omnibus impressas notas rite explicare possimus) in Deo scilicet manendi, & ad Deum cum progressu fuerint recurrendi, tum dignius profecto, & prius ipsos hæc in se gestare animos censendum est, quibus rerum opifex ille & æternus eorum sator & parens diuina bonitatis largitate concessit, ut per unum quod in ipsis est, in Deo firmiter manerent: per mentem autem siue intellectum (utroq; enim uis ea dicitur modo) à Deo progressi, felici quodam orbis gyro ad Deum rursus ipsum recurrerent. Ad quem profecto regressum maximam supplicationes uim habent & preces,

ces, signis quibusdam intercedētibus, quæ opifex ille Deus cunctis inseruit animis, quæ neq; recte dici possunt, neq; si possent, illa certe in uulgū proferre fas esset. Illis igitur superorum sibi beneficentiam planè conciliat animus, quæ alioqui precantes etiam ipsos copulant & uniunt ad eas quas precantur naturas : diuinamq; mentem precantium rationibus coniungunt, & admirabili quodam permiscunt modo. Et ut ad summam dicatur, supremæ illius bonitatis mentem ad omnia largiter animis impertienda commoda huiusmodi mirifice mouent preces, diuinæ cuiusdam suadele (ut hoc loquamur modo) ad Deum uim magnam habentes, & ut se ineffabili bonitatis largitate benigniter participandum præbeat sanè efficientes. Ad nos igitur uota & preces non trahunt Deos. Neq; profecto inclamati illi, aut uerbis allekti hominum inuisunt cœtus, ut credula licenter fabulata est antiquitas : sed nos potius ad illos ceu ad legitimos beneficosq; parentes filij, quodam tenuis progressi, precibus medijs reuertimur, trahimur, rapimur, ut illis iugiter assistamus, copulemurq; etiam, atque penitus uniamur. Qua de re, quia illius mirifice naturam exprimunt, eiusdem Dionysij de eodem commentario uerba subtexere non erit malum, quæ hoc se habent modo: Itaq; nos ipsos ad celsiorem diuinorum clarissimorumq; radiorum contuitum supplicationibus in primis præparamus, ueluti lucidissima cathena ex cœlesti summitate suspensa, & huc usq; pertingente, si semper eam manibus alternis in anteriora porrectis capimus, trahere quidem ipsam uidemur, re autem uera, non illam ipsi deducimus, quippe suprâ infrâq; præsentem, sed ipsi magis ad sublimiores illustriū radiorum fulgores promouemur. Aut certe, quemadmodum nauim ingressi, cum rudentem ex saxo

quo

quodam ad nos usq; porrectum tenemus, quippe cuius nitur auxilio, non saxum ad nos, sed nos ipsos magis nauimq; ad saxum promouemus. Sicuti contrà, si quis maritimum saxum in naui stans propellat, nihil quidem stans & immobile saxum uiolabit, sed sese potius ab eo magis arcebit: quantoq; in illud uiolentius impulerit, tanto ab eo procul repelletur. Non incommode igitur (ut arbitror) neq; inconcinne in ijs quæ retro sunt enumerata, uerarum precum adducta est descriptio, quas dixeramus uim esse quandam superne animis cõcessam, illos ad Deum rapien- tem, & eosdem cum illo uincientẽ, secundaq; omnia prio- ribus semper unientem: id enim ipsum ineffabili quodam modo mirabiliter efficere preces pro rei natura clare satis (ut arbitror) est ostensum. Quamobrem uniuersus ferè in illis ueræ religionis non ab re uersari cultus perhibetur. Siquidem ut à Platone mutuatus refert Cicero, is Deo- rum cultus est optimus, idemq; castissimus atque sanctis- simus, plenissimusq; pietatis, ut eos semper pure integra incorrupta que mente, & uoce ueneremur. Quo in loco (quoniam religionis facta est mentio) obiter leuioris in- genij nonnullos commonefaciendos esse censeo, ne huius- modi in re ab incorrupta religionis semita, sensim & in- caute ad superstitionem delabantur & ruant. Nam lubri- cus sanè locus est, & uigili cautionis indigens cura. Non enim anilibus precum deliramentis totos dies blaterandũ est, neq; assiduis uotorum ineptijs Deus (ut aiunt) defati- gandus & obtundendus. Sed matutinis duntaxat uespera- tinisq; adorationibus, non labijs, sed puro sinceroq; cor- dis affectu rite precandum est. Hoc enim modo preces & legitimum utique habebunt pondus, neque (quod aiunt) à uentis ferentur irritæ, & opus certe suum efficaciter per-
ficere,

Superstitio ca-
uenda.

ficere, & plene complere poterunt. Verum quoniam de precum, siue adorationis natura & essentia, qui locus inter philosophos Academicorū est maxime proprius, pro mediocritate nostra & tēpore satis (ut arbitror) est pertractatum, quando nostra in cursu uersatur oratio, & adhuc prandij non adest tempus, nisi forte me auscultando iam defessi estis, pauca quædam uolentibus uobis ijs addere decreui, quæ ijsdem de fontibus hausta, ad exactissimā precum notionem eximie facere uidentur. Hic cum omnes id percipere uno ore dixissemus, rogassemusq; insuper, ut si commodo suo fieri posset, nos Academico illo prandio saturos dimitteret, sic prosecutus est ille: Nequeo satis admirari Magnane & Leonice, quantam ijs, quos sequimur, uiri, & quā exactam cum alijs in omnibus, tum in ijs maxime, quæ ad ueram pertinent religionem, iugis industrie curam semper adhibuerint, quantæq; fuerint diligentie. Nam ut alia obmittā multa, & multi iuga, & in re proposita maneam, nonnulla etiam illi, quæ ad ueras & efficaces requirantur preces, & illas præcurrere debeāt, mihi ro quodam distinctionis ordine, & inuenerunt soli, quod sciam (de antiquis loquor philosophantibus, semperq; nostros excipio, qui omnia melius) & soli posterorum memorie scriptis suis reliquerunt. Sunt autem huiusmodi, Præcurrere inquit ueras exactasq; preces debere, naturæ primum illius, quam quisque precatur, & cui uouet, certam cognitionem. Non enim apte is accedere cuiquam uidetur, qui illius naturam & proprietates non nouit. Quamobrem ignitam mentis notionem, primum in diuino cultu habere ordinem, sacrum apud illos censebat eulogium, ignis (ut arbitror) calore & motu, iugem uegetamq; designans cognitionem. Hanc secundo sequi loco
appropr

appropriationem uolūt (æquo seratis animo precor istam uerborum nouitatem, & insolentiam: inusitatis enim rebus & nouis, noua sunt conformanda uocabula, & ad uerbum, ut conceditur, de Græco exprimenda) Ist hæc autem appropriatio iuxta illorū decreta, conueniens quædam uitæ nostra ad Deum est assimilatio in omnimodæ synceritatis affectu, castitate scilicet & puritate, & scientia, & ordine proueniens, quæ nostros animos proxime ad Deum accedentes, humili & subiecta mētis affectione, cuncta ab illo adipisci bona autumant. Tertiū ueras præcedere preces debere affirmāt contactum, quo Dei ipsius essentiam homines supremo animorum uertice ad illam quasi uergentes & proni, contingere censentur. Quarto connumerant loco uicinitatem, siue propinquitatem quandam, quæ ipso exactior uidetur esse contactu, animosq; collustrat, & Deo propiores facit. De qua sacrum apud illos uerba faciēs eulogium, Mortales, inquit, igni appropinquantes, à Deo diuinam habebunt claritatem. Quem ego ignem (si coniecturæ quisquam in ijs est locus) charitatis apud nostros diuinum signare incendium, haudquam dubitauerim. Quintam & ultimā post quatuor illa recensent unionem, quæ animorum unitatem in suprema Dei collocat & inserit unitate, unamq; quodammodo in utrisq; operationum efficit actionē, per quam non suimet amplius, sed dei est animus diuino persistās in lumine, à quo clarissime collustratur & circūfunditur. Et hæc uerissime exactissimæq; adorationis extremū & optimū esse asserant finē, quando illa scilicet sequestre & media procedētium animorū reflexio, siue regressus, statui copulatur & mansioni, & omne id, qd' ab uno processit, rursum in ipso uno stabiliter fuerit collocatū: animorumq; lumē à diuino
undiq;

undiq; lumine fuerit circumfusum. Quamobrem non par-
 uam iure, inquit, totius religionis portionem esse preces,
 cum ea, si recte (ut uisum est) fiant, hominum animos sur-
 sum rapere, & omnia quæ dicta sunt certissime efficere
 possint. Non ab re igitur (ut arbitror) apud Platonem A-
 theniensis hospes, solis philosophantibus & probis uiris
 rectas conuenire contendit preces, ijs enim expeditissima
 ad felicitatem sanè est uia, cum proxime ad deos accedere,
 & à generatione, terrenisq; se auocare rebus, ij uel soli,
 uel maxime possint uiri: prauis autem hominibus, & ali-
 qua contaminatis labe, isthuc haudquaquam cōceditur. Im-
 puro enim (ut idem refert Plato) purum contingere nefas
 est. Accedat igitur is qui recte & efficaciter precari uult,
 puro synceroq; cordis affectu, deum ipsum excellentesq;
 supra hominē pie ueneratus naturas, optima ab initio in-
 stitutus religionis norma, assidueq; diuinis uacans rebus,
 incessantiq; etiam utatur adorationis obsequio: celebre e-
 nim apud illos eulogium, Perseuerantibus, inquit, uiris cre-
 bro assistunt dij. Quod nobis ipsa etiam præscripsit ueri-
 tas, Petite, inquiēs, & accipietis: pulsate & aperietur uo-
 bis. Domoq; insuper ternarium hunc secum afferat nume-
 rum, Fidem scilicet, Veritatē, & Amorē, optimamq; præ-
 terea bonorū omnium Spem, & inuariabile diuini susce-
 ptaculum luminis. Nam quòd à cæteris seiugari oporteat
 rebus is, qui solitarie soli conuersari uult deo, uel hinc pa-
 tere potest, quia multitudo ab uno exiens, eo magis ab illo
 discedere percipitur, quo plus in numerū tendit. Quemad-
 modū enim haudquaquā cōmode intermedio non ente ad
 ipsum acceditur ens, sic inepte & perperā (mehercule) id
 facere uidetur, qui cū multitudine unitati cōiūgi, & copu-
 lari cōtēdit. Non immerito igitur diuinus, et mihi sæpius
 hac

Matth. 7.
 Luc. 11.



hac in re perhibendus, Dionysius isthac ad uerbum scribit: Et ideo maiores nostri orationē hominis ad deū unionem quandam esse dixerunt, necnon angelorum opus illa uocauerunt, & ueluti procēmium quoddam felicitatis & futuri gaudij, & imaginis æternæ beatitudinis appellauerunt. Non esse autem illotis (ut aiunt) manibus ad illam accendendum, uerum animo expurgato cum ab omni cogitatione prauī, tum à reliquis etiam affectionibus, quæ illum circa materiam & terrena addictum retinent, ita ut ueluti tersum & undique nitidum speculum diuinas rite imagines accipere, & illas clarissime reddere ualeat: ijs etiam addi uolunt erga pauperes misericordiā, & elemosynas, & ardentium lacrymarum copiosas imbres. Hæc ille. Ex quibus (ut arbitror) clarissime etiam apparere potest id quod à principio dixeramus, dum adorationis definitionem adduximus, illam scilicet non solum animos ad deum rapere & deuincire, uerum etiam secunda quæque ad priora copulare, & coniungere. Omnia enim (ut magnus inquit Theodorus) precantur et supplicant, præter ipsum primū, quem omnis inferior natura incessabilibus precando ueneratur obsequijs. Cæterū quia nihil sine causa aut fieri, aut esse posse, uniuersæ philosophorum Causæ precū. contendunt scholæ, sex uero causarum genera ij, quos in præsentia sequimur, uiri esse uoluerunt, efficientium scilicet, finalium, exemplarium, formalium, instrumentalium, & materialium, ipsius certe adorationis has omnes causas, præter instrumentalem, quam illius natura non recipit, non minus scite, quàm breuiter & dilucide commemorat. Et efficientes quidē illius dicunt esse causas efficaces quasdā diuinarum mentiū potestates, quæ animos hortantur et reuocant, conuertuntq; ad deum: Finales uero recensent

incontaminata sempiternaq; animorum bona, quibus deo coniunctos perpetuo frui necesse est. Exemplares autē causas autumant,entium priores quasdam causas ab ipso primitus bono procedentes, illiq; secundum ineffabilem quādam unionis copulam connexas. Formales uero dicunt esse causas, naturas quasdam, quæ animos tum similes deo efficiunt, tum uniuersam illorum uitam perficiunt & complent. Materiales autē illius esse causas uolunt, signa illa seu imagines & uestigia (ut retro diximus) quæ ab animorum opifice deo illis impressa, ad parētis remuneratiam excitant, & illos interna quadam ui ad regressum uegetos reddunt. Verum quoniam tum pro salutari animorum ope deum precantur homines, tum pro incolumitate salubritateq; corporum, nonnunquam uero pro ijs, quæ sunt extrinsecus, siue aduersis depellendis, seu bonis adipiscendis, precū quædam & uotorum genera, & nomina etiam illis accommodata rebus, & nouerunt Academici, & memoriæ mandauerunt. Perfecti uas nanq; illas appellauere, quæ pro animorum salute fundebātur preces, quoniam id haberēt muneris, huiusmodiq; naturas tangerēt, quæ id efficaciter adimplere & perficere poterant. Opifices autē illas denominarūt preces, quas pro imbribus fundebant et uentis, tum tempestiuos & salutare sibi precantes, tū pestilentes & noxios deprecātes: opifices enim quasdā medias naturas, illorū esse causas uolebant. Quamobrē Atheis quondam statæ quotānis pro salutaribus uētis ad Deū fundebantur preces. Et apud Romanos fulgurum & tempestatum solennes quædam erāt deprecationes. Nonnullæ etiā ab illis expurgatoriæ uocitatæ sunt preces, quibus tū morborū genera omnia, tū siccitates, terræmotus, labes, cæteraq; huiusmodi deprecabātur mala. Quasdam etiam illi

Preces perfecti
uæ.

Opifices.

Expurgato-
rix.

uitales

Vitales.
Animabiles.

uitales siue animabiles appellauere preces, quibus superio-
ribus quibusdam rite supplicabant naturis, quibus id mu-
neris esse credebant, ut omnimodam fructuum, animaliumq;
genituram & incolumitatē augerent & custodirent. Vnde
apud Romanos etiam cum aliæ pleræq; sacrorum cære-
moniæ, tum uitula factitari pro frugibus solitum fuisse le-
gimus. Quod etiam nostri sanctioribus cæremoniærū insti-
tutus, & celebri pomparū discursu precibus uē, quotannis
ijs semper diebus, rectius profecto, & Deo gratius facere
solent. In ijs autem precum generibus (ut ab illis etiā me-
moriæ traditum est) conueniens sanè is erat modus & or-
do, ut eæ scilicet, quæ ad ipsos pertinere dicebantur ani-
mos, & priores certe, & omnium excellentiores non im-
merito existimarētur. Quæ uero ad corporum naturā in-
columitatemq; spectabant, secundo connumerabantur lo-
co. Vltimæ omnium erant illæ, quæ pro ijs quæ extrā sunt
rebus fieri fundiq; solebant. Neque me præterit hoc in lo-
co nonnullos etiam superuacuo quodam diligentia (ne cu-
riositatis dicam) studio adorandi tempora quædam et mo-
dos distinxisse, & quæ quibusnam anni tempestatibus,
quo uē corporis cultu et habitu fieri maxime conuenirēt,
preces recensuisse. Horarum quinetiam momēta, & loco-
rum situs quosdam, siderumq; insuper inter se cōspectus,
congressusq; certos addidisse, quæ tamen omnia consulto
nunc præterire decreui, quia uanam mihi potius supersti-
tionis cuiusdam insaniam & temeritatem, quàm ullum ue-
ræ religionis cultum merito sapere uidentur. Illud potius
addam, quod in Legibus suis diuinus refert Plato, an-
ceps periculosum quæ esse precibus uti ullis cum, qui pru-
dentia mentis quæ sit expers: quinimo cum illo multo cer-
te melius agi, si secus, ac uelit, illi euenire contingat.

Quamobrem in Alcibiade publicas, priuatasq; apud Lacedæmonios solitas fieri preces, mirifice laudat, quibus probis uiris commoda prosperaq; præstari à dijs immortalibus exposcunt. Sed iam prandij adest tempus, in quo mecum hodie eritis omnes, ut spiritali cibo iam depastis animis, corpora etiam apud nos suis curentur alimentis: et ad me conuersus, qui iam surrexeram, & discedere parabam: Mane, inquit, Leonice, neq; hinc abscedas, nam tecum mihi quædam sunt conferenda. Tū ego, Ita faciā, inquam, quādo sic iubes Reuerendissime D. hac tamen conditione, ut quæ de adorandi modo tibi dicenda restabant, quæ tu siue temporis angustia, seu illa potius, quæ abs te adducta est causa, missa fecisti, ea pro bellarijs nobis in secunda apponas mēsa. Tū ille hilare renidens, Talis profecto es, inquit; Leonice, qui omnia (ut aiunt) uasaria semper excutere cupias. Cæterum ut uoles, & cum dicto consurgens è cubiculo in proximū conclaue, ubi paratæ erant mēsa, ire perrexit, nosq; ponē illum sumus sequuti.

S A N N V T V S,

S I V E,

D E C O M P E S C E N D O

L V C T V.



V M ob luctuosam amantiſſimi fratris mei mortem, graui percussus uulnere, dolorosiſſime conflictarē, et acerbo sæuientis fortunæ ictu penē confectus, planē iacērem, nullisq; consolationum medelis, aut amicorum solatijs leuior fierem, ut aliquam saltem doloris aberrationem reperirem, ad ea mihi recurrēdum animorum

morum remedia esse statui, quæ olim memoriæ mandata, longo temporis spatio intermissa, iamdiu non regustaueram: ea autem sunt, quæ ad se uenientibus salutaria & eadem præsentanea, diuina pollicetur philosophia. Verebar etenim, & animo commouebam maxime, ne posthabitu id, & neglectum in maius excresceret malum, uiresq; tempore non contemnendas ascisceret: neque hoc ab re mehercule: nanq; sicut in corporum morbis usu euenire percipimus ut ij plerumq; initio neglecti ad insanabiles sæpius recidere sint soliti ægritudines: ita animorum perturbationes commotas, si diutius perseueret, mora q; ipsa et assuetudine altiores agant demittantq; radices, tanquam affines iam illis & cognatas temporis diuturnitate factas, haud facile postmodum & leui (ut aiunt) brachio euelli extirpariq; posse. Ex quo magna non immerito postea uitæ cōsequuntur incommoda. Etenim memoriæ proditum est, nonnullos primis animi perturbationibus, tanquam nascenti malo, non aduersatos, uniuersas postmodum ætates luctu mœroribusq; confecisse: plerosq; uero eam ob causam ad insaniam etiā, qua nullum infelicius hominum generi accidere potest malum, deuolutos, omne postea æuum furiosos egisse: ex quibus nonnullos sanè sibi ipsis postremo uiolentas iniicisse manus. Hæc igitur mecum cogitanti Balbe, & huiusmodi remedia acri, & intento perquirenti animo, illorum mihi forte sermonum subiit ratio, quos superioribus annis cum clarissimo uiro Marco Sannuto, simili de re, domi illius habui, cum ad illum, ob acerbam Bernardi fratris mortem mœrore confectum, & domi se continentem, officij causa, quod & alioqui sæpe faciebamus, ego & Lucas Bonafius, & Alfonsus Paulutius accessissemus, quos in præsentia retractare decreui: tum ut dolori (quod retro dixi) sa-

lutariter occurram meo, commotoq; & perturbato animo salubria Philosophiæ adhibeam remedia; tum ut intelligas Balbe multum ijs profici posse, si conuenienti admoti tempore, & ab amico prolato homine, integras uires, & legitimum consolationis habuerint pondus. Quando hac mendendi ratione uirum illum, quem summum cum excellenti eruditione, tum rerum usu, & experientia in Republica Veneta nostra uidit ætas, animi mœrorem à quo male habebatur, reuocata mentis ratione, omnem postea deterisisse, et ab sese procul abiecisse animaduertimus. Et profecto ita se res habet: ut enim Tragicus inquit Euripides,

Medela sermo est mentis affectæ potens,

Si molle fandi tempus expectes dari.

Verum ut res hæc ordine procedat suo, & quo tunc acta est modo, ut bene perspicui, dignosciq; possit, ita nunc etiam agatur, uniuersam disputationem illam, sermonemq; nostrum Socratico differendi more conflatum, quātum memoria id assequi potero, quā breuiter colligam, & conscribam, qui hoc fere coeptus et pertractus est modo. Cum enim ad illum (ut dictum est) tunc uenissemus, & in superiori ædium porticu postmeridiano eum deambulantem offendissemus, post ea quæ huiusmodi in re fieri diciq; solent, utrinq; de more prolata, Quid tu, inquit ille, Leonice, à nobis tam diu absuisisti, ut neque nos (quod sæpe solebas) per tot dies inuiseris, neque amantißimum tui Bernardum meum, qui nuper uita functus est, uel moriētem saltem uidere curaueris? nam de Luca & Alfonso minus queror. Vt enim in sole cunctibus semper corpora comitantur umbrae, sic ij quocunque ire perexeris, te consequuntur, & nusquam abscedunt. Tum ego, Videris, inquam, mihi Marce tui in me muneris omnino oblitus esse, & de me iniuria conque

conqueri. An te fugit me nunc Patauij, ubi philosophiam profiteor, quotidianis lectionibus addictum distineri, neque usquam discedere posse? nisi si quæ fortasse interuenerint feriæ, quales sunt istæ, quas ob Diui Antonij celebres dies, & nundinarum statâ solennia, uniuerſa ciuitas illa festos & letabiles agit. Verum ut hæc absentiae hinc meae satis (ut arbitror) legitima est causa, ita nulla profecto esset, si pridem Bernardi nostri letalem morbum cognouissem, & non prius illum mortuum quam ægro- tantem inaudissem. Sed nescio quo aduerso, lugubri quæ casu, hoc inexpectatum mihi ex improviso inflictum fuit uulnus, ut duplici de causa merito mihi summe dolendum esse nunc iudicem, & quòd tali sim orbatus amico, & quòd illi, quod debui, officium haudquaquam præstare potui. Tum ille, Et cognoueram, inquit, Leonice legitima te causa hinc abesse, & Patauij detineri. Neque isthuc etiâ dubitabam, te, si de Bernardo quæ acciderunt percepisses, nullus unquam neque obligationum nexibus, neque lectionû ita adstringi potuisse uinculis, ut non huc ocyus conuolassēs. Sed nescio quomodo dolori obsequens meo (et si id iniuria facere me sentio) quos tamē hinc abfuisse comperi (de intimis loquor) dum ille à nobis miserabiliter est ablatuſ, inofficiosos proculdubio, et parū gratos fuisse iudico. Atqui inquam Marce dedecet te, tali præsertim gravitate & prudentia uirum, de bene perspectis alioqui & cognitâ familiaribus tuis huiusmodi & sentire sanē & prædicare. Quâquam (ut uera fatear) persuadere mihi uix possum te isthæc de certa animi sententia nūc retulisse. Tū ille, Vera, inquit, narras Leonice, et recte me nosti, nā tali profecto sum erga uos animo. Verum nisi omnia uobiscū & facere & dicere libere me posse considerem, hauquaquam

in amicorum numero, & talium præsertim, uos haberem; à uerbis igitur meis hæc faceret suspicio, quæ neque serio mehercule, neque de certa animi sententia, sed mœroris impulsu et animi ægritudine fuisse prolata. Sed uides ne Leonice quàm graui fortunæ fulmine omnis frater nostra considerit domus? De fratre scilicet, inquam, narras Marce, qui immatura sublatus morte, domesticis quidem omnibus luctum, & lacrymas, amicis uero immensum dolorem non immerito reliquisse uidetur. Alterum enim mehercule præclare familie uestræ columnen est emissum: Alterum extinctum est lumen, quod & illi sanè decori & emolumento, patriæ uero laudi & gloriæ, si superfuisset, proculdubio erat futurum. Verum isthæc Marce communia cum sint, & humana, à uiro præsertim forti, qualem te esse non dubito, æquo animo sunt ferenda. Hac enim conditionis lege in hoc mundi theatrum ingressi sumus, ut aliquando inde etiam nobis esset exeundum. Tum ille ex imo suspirans petore, Qua nam, inquit, ratione possum Leonice æquo esse animo, aut tantum dolorem constanti mente perferre, qui tali ingenio, ea indole, tot uirtutibus præditum amiserim fratrem, qui cum mihi natura germanus existeret, ætate tamen & educatione à me iure filius existimari poterat. Nam cum uiginti fere annis minor esset natu, me non aliter quàm parentem suum colebat, & præclaris imbutus moribus & institutis, in talem profecto euaserat (ut cætera sileam) qualem uos cum & uidistis, & cognouistis. Quamobrem durus profecto & inhumanus essem, nisi impensius hoc luctuoso illius casu dolerem. Tū ego: Magna inquam Marce, magna profecto in illo est facta iactura. Nemo isthuc unquā negauerit, neque ego inficias eo. Sed si dolendum hanc ob causam est (nam de hoc ipso, si uidebitur,

bitur, mox dicemus) cur nō modice potius et humanē dolendum est, ut fortibus conuenit uiris, quā propense ut dicis & anxie, quod mulierculas, et illis similes homuntiones facere animaduertimus? Quoniam, inquit ille, non de leui & cōtēnenda re, aut quæ paruo rursus negotio reparari possit dolemus: sed de charissimo sanē amisso pignore, quo nobis perpetuo est carēdum. Tum ego, Quæso inquam Marce, quādo nihil aliud in præsentia est quod potius agamus, respondere non graueris ad ea, quæ te percontari nunc uolo. Et quid est, inquit ille, quod huic rei præuertendum putem, aut quod magis nunc cupiam, quā ex te audire quæ hac de re tibi dicenda succurrunt? Credibile autē est optima tibi multa in mentem uenire, quando nō de fece (ut aiunt) sed de limpidissimo philosophiæ hauris fonte. Et ego isihuc inquam in me Marce neque agnosco sanē, neq; præ me fero: optima enim illa quæ dicis, maiores isti & elegantiores profiteantur & sentiant: mecum in præsentia satis bene agetur, si illorū uestigia sequutus mediocria quædam decenter inuenire, et recte explicare poterō. Tum ille, Exordire modo inquit Leonice, et quod uis me percontare, ne id quod ex te audire cupio, in longū nimis trahatur. Verum ambulando ne, an sedendo rem istam transigere mauis? Vt lubet inquam Marce, et ut isti malunt, ego enim ad utrumque æque sum paratus. Deambulemus, inquit ille, potius (si placet) quando & huiusce rei conueniens est hora, & uos (ut de te & Luca nostro loquar) peripatetica profiētes decreta libenter id facere uerisimile est. Sed iam quod uelle dixeras (si uidetur) aggredere. Tum ego sic quodammodo sum exorsus: Impensius tibi esse dolendum retro dixeras Marce, ob acerbū Bernardi fratris interitū, quia scilicet non leue quiddā et con-

temnendum, sed charissimum pignus amiseris, & quo tibi perpetuo posthac esset carendum. Sunt ne ista tua Marce, an quippiam secus, ac dictum à te est, nunc retuli? Sunt, inquit ille, & id ipsum uehementer assuecro. Et ego, Si doles, inquam, Marce ob fratris mortem, quod profecto & confiteris, & ut sentio uehementer facis, de tribus sanè ijs unum sequi necesse est, aut te id tui ipsius gratia facere, ita quòd tua solum causa doleas, aut illius qui uita functus est doles gratia, aut utrorunq; causa, tui scilicet & illius: omnis enim qui nos tangit & perturbat dolor, aliquā profecto habere censetur causam, qua nos uellicet & male habeat. Quid ad hæc Marce? Tū ille, Facilis, inquit, Leonice & ad manum ad huiusmodi quæstionem mihi sanè succurrit responsio. Doleo nanq; & illius, & mei ipsius causa. Tū ego, Videor mihi, inquā, Marce probe tenere quod sentis: Doles enim uidelicet, tum quia iucunda illius caræ consuetudine, usuque & cōmodis, quæ cum domi, tum foris tibi ab illo præsto semper erant: tum quia & ijs ipsis illum carere existimas, & cæteris præterea uitæ commodis, quæ apud uos ampla sanè & magnifica conspiciuntur. Spatiosas has dico pulcherrimarū ædium substructiones, magnificentissimam omnis generis suppellectilem, amplissimam familiam, uillarū instructissimas amœnitates, preciosorum latifundia prædiorū, cæteraq; huiusmodi, quæ qui possident, beati & felices uulgo esse existimantur. An tibi uilia, inquit, ista Leonice, & pro nihilo ducenda esse uidentur? quæ nedum uulgi imperitorum, sed omnes etiā appetunt boni: aut quicquam afferre nunc potes, quam obrem isthæc, ut sunt, non censeantur esse bonæ? nisi fortasse turpis transfuga fieri cupis, & in porticum è Lycio commigrare nunc paras: uestri enim omnes, quos politissimos

simos philosophorum non immerito esse iudico, tertie bonorum classi, non minus uere, quam omnium suffragante consensu, illa adscribere dicuntur. Est ut narras, inquam, Marce. Sed ita hæc tamen illi existimant esse bona, ut neque se possidentes felices sanè efficere ualeant, et sine illis etiam uita beata esse possit. Quanquam hoc etiam in loco, si contendere uellem, iure optimo dicere possem, ijs uitæ commodis, quibus nihil indigeant, haudquaquā carere mortuos. Verum de ijs aliàs, si dabitur: nunc ad propositum reuertamur. Dixeras (si recte memini) Marce, te utriusque causa, tui scilicet et illius dolere. Hoc autem id ualet (ut quod ad te attinet primo uideamus) te ideo dolere, quia commodis multis cum domesticis, tum forensibus, quæ tibi ab illo, si uiuisset, peruentura speraueras, posthac tibi carendum esse percipis: utilitatis igitur tuæ gratia, qua illius obitu priuatum te esse sentis, nimirum doles, et id immodice facis. Atqui dolorem, nostri causa susceptum, quod modice ferre debeamus, imo quam ocyus cum extinguere, et abijcere contendamus, non solum omnes philosophorum omnium clamant scholæ, sed ipsa etiam nobis sanè dictat ratio, ne nosmetipsos uidelicet nimium amare uideamur: quod qui non à se exclusit uitium, omnibus profecto illum uitiorum patere incurribus est necesse. Qui enim plus nimio se diligit, et charum habet, hunc et iniustum esse, et timidum, inconstantem quinetiam, et incontinentem summa est necessitas. Tum ille, Videtur, inquit, sanè Leonice, et tibi prorsus assentior, nostri causa dolorem modicum, uel potius nullum esse suscipiendum. Turpe namque id esse apparet. Verum isthuc, quod ultimo conclusum est loco, cum scilicet, qui se diligit, omnibus turpissimum esse uitij, præcise admodum, et subobscurè mihi conclusum

clusum esse uidetur. Quamobrem rogo te, ut illud (si placet) prolixius explices. Et ego, Libeter, inquam, isthuc faciam Marce, non solum tua, sed Lucæ etiam, & Alfonsi causa: quod enim tibi subobscurum est, illis tenebricosum nō immerito uideri potest. Quare hoc agamus modo. Qui se impendio plus diligit, hunc profecto suiipsius causa nullo delectu, omnia & uelle, & facere credibile est. Hic igitur (ut hinc exordiar) si amici depositum quippiam seruandum acceperit, quod in rē suam facere uideatur, nō ne diuino humanoque neglecto iure, id non minus impudenter, quā scelestē negabit? hac autem re quid improbius, aut iniustius inter homines fieri possit, nō uideo. Idē si latēre se credet, furabitur: palām etiā rapiet, si id impune facere licebit. Infantes accepto prēmio cōdēnabit: fana expilabit: patriam, pecunia corruptus, prodet: et ad summā, omnia diuina humanaq; lucelli sui gratia cōfundet & cōturbabit iura: isthac autē omnia quorsum pertineant, iam intelligere potestis. Iniustissimum, inquit ille, Leonice nobis planē hominem expressisti. Et profecto ita est, inquam Marce: sed is etiā eam ob causam timidissimus sanē erit: nā ut seipso, suisq; diu fruatur commodis, quæ suiipsius causa undiq; exquisitissime diligentissimeq; comparauit, neq; in amicorū aduersis rebus officium obibit, aut pericula unquam adibit: nulli enim nisi sibiipsi est amicus. Neque pro patriæ salute arma capiet, aut in aciē descēdet: mortē nāq; impensius formidabit, ne re amata, id est, seipso, carere cogatur: nihilq; nō suspiciose, demisse, formidolose aggredietur, aut faciet unquam. De illius autē incōstantia & mutabilitate, morūq; intemperātia, nō est quod pluribus uos teneā. Qui enim se ipsum plus æquo diligit, is nimirum uitæ suæ statum, fortunæ semper reflatibus accommodat, & in

duabus (ut aiunt) sedet sellis, nusquamq; stabilem uitæ tenorem perpetuo conseruare potest: & cum se charum habeat, omnibus sibi blanditur illecebris, omniaq; sedulo exquirat illa quæ corporis suauiter famulatur obsequijs. Ex quibus clarissime patere potest, ne in hæc turpissima delabatur uitia, contaminatusq; merito uideri possit, dolorem suiipsius causa, & ut ipse sibiipsi faueat, à uiro præsertim probo non esse suscipiendum. Est ne ita Marce ut uidimus, an aliud quippiam hac de re audire expectas? Minime, inquit ille, nam in hoc mihi abunde satisfactum abs te esse planè cōfiteor. Sed neq; illius qui uita functus est causa (quod etiam te facere dixeras Marce) impensius tibi dolendum esse nunc assero, ne forte sapientior, quàm es, et quàm modestia patitur tua, in præsentia existimari uelle uidearis, & scientiam rei tibi penitus ignotæ contumaciter uendicare studeas, ut ridiculus posthac, si secus esset, à prudentioribus non immerito haberi possis. An quicquam est turpius homini, præsertim erudito, quàm profiteri quod nesciat, & de re sibi omnino ignota uelle contendere? Atqui neq; uulgus imperitorum id facere percipimus. Musica enim ignarus neque fidibus canere audet (nisi forte desipiat) neq; de rhythmis harmonicisq; modulis iudicium ferre præsumit: saltandi expers et imperitus, de chironomiae legibus non contendit: nullusq; sanè hominum adeo peruerse depudere didicit, ut eam quam ignorat artem, arroganter sibi uendicare præsumat. An ne ita tibi uidetur? Prorsus ita est, inquit ille. sed quorsum hæc? Quoniam inquam Marce impensius tibi dolendum esse iudicis eius quo orbatus es gratia, ueluti si exploratum haberes, certissime que cognosceres illum uel in aliquo esse malo, ex ijs quæ uulgò opinantur homines, uel ijs indige-

re bo

re bonis, quæ, si uiueret, illi abunde suppetere possent. Id autem ipsum quo nam se habeat modo, et utrū morte obita melius sit homini, an peius, deos quidem immortales cognoscere par est: hominem uero scire neminem, merito contēderim: nisi forte tu tibi ab inferis missas habes epistolas, aut de Castore quopiam, qui crebro illas (ut poëtæ narrant) itq; reditq; uias, quæ istic gerantur inaudisti. Et quanquam hoc in loco, si uellem, iure optimo contendere possem, cum mortuis non male, sed bene potius & feliciter actum esse, tū quia uniuersis uitæ careant molestijs (quis enim hic infinitorum causas nō semper habet dolorum?) quæ morte sola finire effugiq; possunt: tum quia liber animus nullo prorsus impedimēto proprijs tunc & peculiaribus fruatur bonis. Vbi etiam sancto antiquitatis testimonio ex uerissima repetito historia efficaciter uti possem, quæ Argiuos fratres, Cleonem scilicet & Bitonem, necnō Trophonium & Agamedem, pietatis, meritorumq; suorū præmium ueluti optimum quiddam mortem reportasse cōstanter asseuerat. Cum hæc inquam in medium asserre, & sententiæ suffragari possem meæ (uide quā causæ confidam) omnia isthæc in præsentiā missa facio, hoc tantū cōtendo, eos qui in malis esse mortuos, aut bonis omnino illos carere iudicant, tum in profundissima erroris uersari caligine, tum etiam se scire quod nesciant mendaciter fingere, turpiterq; mentiri. Quod cum cæteris in rebus, tum in hac maxime, quæ omnem ferè uitæ continet disciplinā, temerariū proculdubio & perniciosum non immerito esse censendū est. Non ab re igitur diuinus ille Plato huiusmodi in rebus, quas calamitates & miserias uulgus hominum uocat, quiescere nos admonet, quippe qui nesciamus quorsum illa tendere uelint, & utrum ne bona an mala recte existi

existimari conueniant: cum & alioqui dolendo etiam nihil proficere ualeamus. Mentis enim aciem, qua sapere & discurrere circa rem illam possemus, dolore nimirum offi-
ci & hebescere. Quamobrem in ijs uitæ casibus iubet nos ille, ceu in tessera ludo, ad ea quæ ceciderunt, quomo-
do dictauerit ratio, optime se habere, ita nosmetipsos no-
straq; omnia componere & conformare. Ex ijs igitur (ni-
fillor) perspicue satis patere potest, in huiusmodi uitæ sta-
tibus nullum à nobis iure suscipiendum esse dolorem, cum
neque nostri, neque illorum qui uita functi sunt causa (ut
uisum est) merito dolere debeamus. Satis ne id tibi conclu-
sum uidetur Marce, an adhuc aliquid quæris? Tum il-
le, Videris mihi, inquit, Leonice cū necessarij disiuncti uni-
uersas infirmaueris partes, certissimis Dialecticorū præce-
ptis, totum sanè destruxisse propositum, & geometrica
(ut aiunt) necessitate effecisse, huiusmodi in rebus minime
à nobis dolorem esse suscipiendum. Sed nescio quomodo,
dum hæc quidem proferuntur, & in cursu est oratio, ce-
dit animus, et illi planè obsequitur, et paret: cum uero de-
fierit, ueluti desultorius ex alio in aliud resiliciens, mæro-
ribus se denuo & lacrymis transuersum tradit. Et ego,
Nō est mirandum, inquam, Marce si id tibi usui in recen-
ti uulnere nunc euenit, quod illis ferè omnibus accidere ui-
detur, qui hanc rem opinione magis, quàm ratione perpen-
dere solent. Nam se suaq; (ut diximus) nonnulli plus ni-
mio amantes, & de rerum natura secus, quàm par est, sen-
tientes, effusis nimirum desiderij feruntur habenis: et cum
naturali ægritudini, suapte natura modicæ, & exili, præ-
ter fas decens que opinionum fomenta falsarum submini-
strent, illi que uano quodam erroris consensu agrestes
etiam sæpius, & immanes misceant affectiones, ad im-
modic

Apologus de
luctu.

modicos postea luctus, turpesq; interdū, & foemineos eiū
latus, & inexplabilia lacrymarū studia nō immerito deuo
luuntur. Quamobrē non incōcinne (mehercule) hac super
re huiusmodi ab Aesopo narratur apologus: quōd scilicet
cū genitis à se dijs honores & munia singulis adscriberet.
Iupiter, accessissetq; ad eum cū alijs etiā Luctus, sibiq; huius
modi quippiā expostulasset, Iouē dixisse, hoc se illi cōce
dere munus, ut solis scilicet ijs qui uoluisent, & illū elegis
sent semper adesset. Et profecto ita se res habet: principio
enim unusquisq; mœrores luctusq; ad se aduocat, et admit
tit, quæ aßuetudine postmodum si neglecta fuerint, & tē
pore cōfirmata, ceu domestica animis familiariāq; iam effe
cta, haudquaquam faciliter inde deiici extrudiq; possunt.
Quamobrem sub ipsis statim initijs resistere & ob stare
conuenit; & in ipsis (ut aiunt) animorum limitibus cum
agrestibus huiusmodi & feris affectibus conscrendæ sunt
manus, & acriter dimicandum, ne illorum recepto præsi
dio, & mentis arce occupata, parti rationis experti, et sur
sum uersus cupidus semper affectionibus agitata, turpiter
posthac seruire cogamur. Sed nescio quomodo uulgus ho
minum, quemadmodum in alijs ferē omnibus, ita hac etiam
in re perperam facere uidetur. Mœstis enim tristibusque
amicis, & consolatione indigentibus, non modo nihil ad
minuendum dolorem, cōpescendasq; lacrymas afferre con
sueuerunt, sed potius ad mœrentes & orbatos accessuri,
suspriorum luctusq; fomenta domo secum afferunt, atra
tiq; sedent cum mœstis & afflictis, lacrymisq; suis illorum
planē prouocant lacrymas, ciulatusq; fouent et adiuuant,
& omni prorsus studio hac in re turgenti animorum in
temperantiæ suffragantur & fauent. Atqui ijdem ipsi, si
uicini domum deflagrantem forte conspexerint, ocyus ac
currunt

currunt omnes, & quā quisq; potest ad extinguenda incē
 dia egregiam nauat operam. Amicos autem ægritudine
 quapiam deslagrantes, & luctu mœroribusq; inflamma-
 tos, uerborum lugubrium efficacia superaddentes fomēta,
 & ignem (ut aiunt) igni coaceruantes, penitus exurunt,
 & insanabile, quantum in ipsis est, id efficiunt malum.
 Tum ille, Est profecto, inquit, ut dicis Leonice, & pleriq;
 hominum opinionibus mœrores & luctus sibi comparant
 & affciscunt, nonnulliq; etiam illos fouent, & in maius
 augere student, quos merito mehercule damnandos esse iu-
 dico: uerumtamen aduersis in rebus positum quempiā nō
 dolere, cum homo natus sit, uix posse fieri contenderim:
 quod tu etiam retro (si recte intellexi) breuiter sanē uisus
 es tangere, naturales inquit ægritudines esse modicas &
 exiles: qua de re (nisi est molestū) aliquid ex te audire nūc
 uellē. Tum ego, Recte quidem, inquam, existimas Marce,
 si tristibus in rebus naturalem quēdam hominibus sensum
 & dolorem adesse censes. Non enim ex quercu (ut inquit
 ille) aut ē silice nati sumus. Et Stoicorum indolentiam il-
 lam, tanquam feram, & immanem aspernendam & explo-
 dendam esse contēdo, quam sanē & animi duritiam quā-
 dam, & morum etiam asperitatem sequi necesse est. Verū
 ut hanc non admitto, neque laudo, ita neque quibuscunq;
 tangi frāgiq; doloribus sanē probo. Neq; enim Crassi si-
 mulem uirū natura philosophū esse uolo, neq; rursum De-
 mitij: quorū alter extincta in piscinis muræna fleuissē: al-
 ter uero cū tres extulisset uxores, neq; illa crymā se dici-
 tur: adsint bona cū uenia, animorum motus affēctionesq;
 istæ: uerum modicæ sint cæ, & exiles, & quæ faciliē corr-
 cerni, diduciq;, & in melius cōuerti possint. Verum de ei-
 usmodi etiam naturali animorum ægritudine in præsentia
 m aliquid

aliquid dicere, cum alioqui ad propositum faciat nostrū,
 nulla certe est inuidia. Nā illius origine cognita, haud ma-
 gna cum re salutaria illi remedia adhiberi sanè poterunt.
 Hoc autem exordiamur modo. Humanos animos in par-
 tes distributos esse duas, omnium mater artium Philoso-
 phia nos docuit. Harū autem altera quidē rationis est par-
 ticeps, & cōsiliij: altera uero horum expers & uacua: &
 hanc naturaliter famulari et parēre, illā autem ceu mode-
 ratricem & dominā, imperare & regere aequū est. Porro
 hæc quidē (ut dominā decet) sublimis et alta est, nihil humi-
 le, nihil demissum & uile curans. Altera uero illa contrā
 mollis est, eneruata, humilis, languida, quæ uisis, opinionibusq;
 pulsata inanibus, temere semper agitur: cum illa
 prior notionibus, & discursibus stabilita certis, nihil nisi
 quod uerum et rectum est, speculetur & sapiat. Quam-
 obrem cum eiusdem philosophiæ uerbis palam præcipitur
 et præfinitur, ut nobismetipsis imperemus, ceu duo quidā
 simus, nihil profecto aliud præcipitur, nisi ut cōsiliū stul-
 ticiam cōpescat, et ratio temeritatem coërceat, & domet.
 Cum enim in molli illa et humili animorum parte, uigeat
 appetitus, in altera nimirum sedē constituit suā ratio, quæ
 si (ut par & decens est) inferiori dominetur illi, eamq; nu-
 tu suo moderetur et temperet, tanquam in optimo monar-
 chie principatu uniuerſa hominis illius opera recte cōcin-
 neq; se habere uidentur, et nihil in illo non excussum &
 elegans reperitur. Quod si secus cōtigerit, et rationi præ-
 ualuerit appetitus, ceu effrænis excusso domino equus, o-
 mnia raptat & dissipat, nihilq; sincerū et stabile, aut pul-
 chrum diutius conseruare potest: unde hominis illius uita
 cum turpis et scelestā esse percipitur, tum mors etiam in-
 famis et misera posthac consequi animaduertitur. In hac
 igitur

igitur animorum parte (ut ad propositum nostra reuertatur oratio) uniuersa agritudinum omnium colluices, et affectionum mala collocantur initia. Hinc moerores et luctus, hinc suspiciones & formidines: amores quinetiam, et gestientes profusæq; læticiæ: necnō furores, ambitiones, opū cupiditates, aliæq; multa eiusdē notæ uitia, originē exortumq; suum habere censentur. Quæ tamen animorū affectiones dum modicæ sunt et exiles, naturales proculdubio (ut diximus) & nō inutiles etiā illarum nōnullæ quādoq; esse cēsentur. Si uero temporis diuturnitate, seu peruerso opinionum iudicio altius radices egerint suas, ut extirpari, conuelliq; aut uix, aut ne uix quidē possint: id autem est, cū rationi præualuerit appetitus, tum præter naturam affectæ in agrestes quasdā & feras euadunt agritudines, quæ hominis animum nedum in corpore degentem, sed cū exierit etiam, uexant & male habent. An tu aliā ob causam Marce, impiorum apud infros supplicia & pœnas, de quibus cū antiqui ferè omnes, tum nōstri nō minus concorditer quàm ueraciter prædicant, à summo rerum opifice constituta esse censes, nisi ut eæ animorū noxæ, siue labes, seu macule, aut exurantur, aut abluantur, aut quo illi alio placet modo expientur? Non enim isthæc in præsentia à nobis pertractanda proponuntur, quæ alio sanè tempore idoneam nacti occasionem non incommode fortasse explicare aggrediemur: sed nunc quod instat agamus. Et Marcus, Recte, inquit, narras Leonice: nam quod pollicitus es, libenter (mehercule) arripui, et id aliquando (ut spero) tuo commodo persolues: nunc quod in manibus est, perfice. Tum ego, Ex superioribus inquam Marce satis clare perspicui potest, naturales quasdam animorum esse ægritudines, quæ nisi à recto mētis iudicio ueluti

ab optimo agricola circuncidatur sepius, & ratione, cunctura quadam, frequenter coercantur, & mutilentur, præter naturam in agrestes quosdam & feros mentis eundunt morbos, qui per uniuersum postea uitæ curriculum non mediocre nobis negotium faciunt. Quamobrem non leuis à nobis (ut arbitror) ponenda est opera, quin potius totis uiribus contendendum, ut illas quam exiles & castigatas, id est naturales reddamus, ne parti officiant & oblucentur meliori, sed magis illam sequatur, & illi pareat. Ita uidetur, inquit ille, & sic esse faciendum planè sentio. Ex eisdem etiam manifestum est inquam Marce, immodicas istas animorum ægritudines ex corruptis peruersisq; opinionum fallacijs, & non ex rerum natura temere esse susceptas. Nam ut de proposita loquamur re, & propius ad id, quod in manibus habemus, accedamus, tu quod propter fratris amantissimū è uita discessum impensius nunc dolens, recentiq; & tumido uulnere non medicinā, sed unguē (ut aiunt) admoues, tempore profecto lenior fies, & hoc, quod nunc turget ulcus, aliquādo coibit, & ad cicatricem certe perueniet. Quod profecto indicio esse potest, non naturalē & insitū, sed aduentitiū, & opinione susceptū, & adscitū hunc esse dolorē: si enim natura cōstaret, idē sanè semper esset, eūdemq; nimirum continuo seruaret tenorē, neq; cum longa dies (quod profecto faciet) unquam labefactare, aut obruere posset. Opinioni igitur Marce, ut uulgus imperitū solet, & non rationi potius, ut fortē decet uirū, obsequeris, & illi parēdum nunc esse præscribes. Atqui turpe sanè est, à tali præsertim uiro (qualis tu es) quod dies impetratura est, is huc ipsum rationē in præsentia impetrare non posse. Sed esto, fuerit hoc malū, & magnum etiā quantumuis (si uidetur) amissū fratrē, de quo tamen mox uidero

videro, non ne id à te aut proculcādum omnino, aut æquo saltem ferendum animo erat? An te præterit prudentis, experientisq; officium esse uiri (quod ait Plato) aut ingruentia cauere mala, aut si secus euenerit, pro uirili ea corrigere, & quā leuissima efficere: aut si neq; id fieri potest, uiriliter illa generoseq; sustinere? Et ut alio etiam in loco idem ait philosophus, Bona quidem à nobis esse optanda, forti autem animo ferenda quæcunq; secus nobis fors ipsa deusq; attulerint. Et profecto ita se res habet: Quæadmodum enim corpora, quæ nullo negotio frigora & calores sustinere possunt, ualida esse, & bene se habere non ab re existimantur, sic animorum natura, quæ tristibus in rebus haudquaquam concidit, sed solidum semper & eundem retinet tenorem, & excellens profecto, & laudanda esse censetur. Abijciendæ igitur à uiris istæ sunt nugæ, & isthæc opinionum ludibria proculcāda, humanaq; omnia humaniter, & æquo animo toleranda. Non enim in conuiuijs solum & lusibus (ut recta dicat ratio) temperatum & abstinentem esse oportet, sed nihilominus in dolore & luctibus turgentis æstum ægritudinis ratione compescere & coercere decet. Quæ tunc non solidæ & ueræ amanti animorum parti repugnat (ut pleriq; falso existimant) sed incontinenti, & enervatæ, & humili: illi nanq; priori rem gratam facimus, si modice desideremus, si colamus, si memuerimus illorum quibus orbatī sumus, non si lugubriter conqueramur, & nosmetipsos male mulctemus. Sed nescio quomodo huiusmodi luctus lacrymarūq; affectio & propensum ad lugubres eiulatus desiderium, cum neque minus turpe, neq; secius damnandum merito esse censeatur quā uehemens circa corporeas uoluptates & procliuē ludium, haud tamē ita uulgo existimatur.

Nam in uoluptatibus quidem nimium quenq; & profusum, omnes nimirum reprehendunt & damnant: plus nimio autem huiusmodi in rebus dolentibus & affectis, cōcedunt, et mirifice etiā fauent, quoniam illis ærumnas & mœrores cōuenire credunt, qui charissimus fuerint orbatipignoribus: sed profecto (pace corū dixerim) mirum quātum sibi non constare illi, & nullo rerum delectu contraria inter se & pugnantia etiam facere uidentur. Quid enim per deum immortalem absurdius, & à recta ratione alienum est magis, quàm à probis quidem et grauib; uiris insulsos cachinnorum modos, & profusam gestiētemq; auferre leticiam: nulla autem lege luctus immodicosq; mœrores refrænare, & inanes cōpescere lacrymas, quæ non minus ex eodem incontinentiæ fonte scaturiūt, & emanant? Et fœminis quidem uiros unguentorum lasciuia, et gemmarū sumptus, et purpureas obiectare uestes: nihil autem curare, si in ægritudine luctuq; positi genas sibi unguibus radant, aut capillos manu uellicent, humiq; cubent, et in puluere sedeant? Tā enim dedecet hoc, quàm illud: & utrunq; in frænis animi nulliq; obedientis rationi certissimum est indicium. Atqui si pueros quissiam suos, aut seruitia huiusmodi iniuria cogat perferre mala, bonorum reprehensionem non immerito subeat. Quæ tamen uulgi fauore et plausibus mœrentes non nulli in se ipsos turpiter patrare uidentur, quo præsertim tēpore laxatione quadā & humanitate potius esset utendū. Quod alioqui amoris etiā, et beneuolentiæ erga uita sanctos manifestum esset indicium. Amor enim et uera animi beneuolentia immodicos luctus, & inanes nō quærūt lacrymas: pulchræ nāq; sunt, et laudabiles illæ animorū affectiones: pulchra autē & honesta, haudquaquam indecora et tur-

pia, qualis omnis sanè est perturbatio, expetunt et exqui-
 runt. Sed nos (ut retro diximus) opiniones sequuti inanes
 naturali animorū ægritudine modicæ alioqui et exili præ-
 postera subministramus fomenta, illiq; inmanes commisce-
 mus affectus, ex quibus omnia nimirum, quæ recensuimus,
 cōsequuntur mala. Sed iā receptui, si placet, canamus: &
 quoniam de cōpescendo luctu, minuendisq; animorum cu-
 piditatibus, pro mediocritate nostra satis (ut arbitrer) est
 pertractatū, tēpus admonet, ut quod antè polliciti sumus,
 nunc exequamur: id autē est ut nedum non male, sed opti-
 me potius cum ijs qui uita functi sunt, actum esse ostenda-
 mus, illosq; felices & beatos merito prædicemus, ne hoc
 etiā consolationis remedio disputatio nostra nunc careat.
 Quæ non solum immodice non dolendum ob nostrorum
 hinc abscessum & mortem, sed neq; dolendum quidē, imo
 potius letandum gaudendumq; esse suo iure contendit.
 Quo in loco celebrem illam Socratis iam morte multatū
 distributionem, qua apud iudices usus est, pluribus addu-
 cere possem: Mortem scilicet alterum de duobus necessā-
 rio esse, aut omnimodam sensuum omnium priuationem,
 placidissimo profundissimoq; somno similitam, qua nihil
 (mehercule) posset esse iucundius: aut migrationem quan-
 dam in eas oras, quas qui uita excesserunt incolunt, quod
 expediens & optimum proculdubio existimandum es-
 set, ut cum à uinculis & carcere liberi exierint animi,
 ad proprias peculiare que posthac sedes commigrare
 possint. Sed cum hac de re luculēter sanè & copiose cum
 à Græcis, tum à Latinis rerum scriptoribus memoriæ
 proditum sit, ad illos recurrendum esse censeo, nobis
 id tantum in præsentia delibasse sufficiat, cum ad alia præ-
 sertim ijs non minora nostra jēslnet oratio, quorum uel

præcipuum isthuc esse censetur. Cum enim hominū gene-
 ri nihil uel maius, uel præstabilius à dijs immortalibus con-
 templatione, liberoq; mentis motu cōcessum esse constet:
 illo enim cum rerū naturam & causas, cœlestiaq; omnia,
 tum ipsos cognoscimus & percipimus deos, illisq; simul
 hoc tantum opere humanus efficitur animus, cum tempo-
 ris scilicet puncto terras percurrit & maria, diuināsq; a-
 cie sua spectat & cōtemplatur essentias. cum hæc inquā
 animorum motio incitatorum, quam contemplationem uo-
 camus, deorū munere humanis sit permissa & tradita ani-
 mis, haudquaquā ij recte incontaminateq; illa uti possunt,
 nisi prius, quantum fieri potest, à corporum contagio sese
 liberent & expediant, eorumq; assernentur consortia.
 Infinitas enim nobis molestias (ut ait Plato) & impedi-
 menta uaria moles affert corporea, & ob necessariam
 esculentorum poculëtorumq; indigentiam plurimum no-
 bis faceßit negotij: ad hoc morborum diuersa genera inde
 nata, nobis proculdubio sunt impedimento, ne ueras in-
 telligere contemplariq; rite ualeamus essentias. Cupidita-
 tum præterea & inanium desideriorum uaria examina
 idem nobis adducit corpus. Timores quinetiam, & imagi-
 nosa mentis ludibria, cæteraq; huiusmodi deliramenta cō-
 tinuò nobis affert. Quamobrem id, quod à plerisque dici
 contendiq; solet, haudquaquam falsò (mehercule) dicitur,
 quòd scilicet nequaquam cum illo uere sapere liceat. Ni-
 hil enim aliud, quàm corpus, & illius afflictiones, cupidi-
 tatesq; uariæ, seditiones in nobis conflant & prælia. Nā-
 que pecuniarum opumq; gratia omnes ferè bellorum ex-
 citantur causæ: has autem corporis gratia expeti manife-
 stum certe est, dum illius libidini & cupiditatibus obsequi
 cupiunt homines, unde philosophiæ contemptum posthac
 sequi

Sequi necesse est. Et ad summam, si quippiam nobis ab illo aliquando ad modicum tempus conceditur otij, & ad aliquid exquirendum perscrutandum uel excitus intenderit animus, illico irruens corpus intempestiue conturbat & dissipat omnia, tumultusq; & turbarum ita nos replet, ut minime quod uerum est & pulchrum dignoscere ualeamus. Quamobrem certissime est tenendum, si ueri quippiam indagaturi perspecturiq; sumus, ab illo penitus nos liberari absoluiq; oportere, ita ut ipso animo res ipsas libere & expedite contemplari possimus. Tunc enim nobis id, quod tota mente cupimus, & cuius muros flagramus desiderio, facile concedetur. Quare post obitum (ut uera dicat ratio) nobis praesto erit prudentia, quam dum uiuimus, certe habere non possumus. Si enim a corporea oppressis mole recte aliquid sciri haudquaquam potest, ex duobus sane alterum sequi necesse est, aut nusquam scire contingere homines, suoq; penitus frustrari desiderio, aut morte obita id illis nimirum accidere. Et ita profecto rem se habere uerisimile est. Tunc enim per se liber animus, & a corporis seiugatus cōtagio, nullo impedimento res agit suas, prius autem haudquaquam potest. Cuius rei uel euentissimum est indicium, quo scilicet tempore hic sumus, quam fieri potest ad scientiam proxime nos accedere, quātum a corporis societate quam longissime abductus fuerit animus. Id igitur omni studio nobis est contendendum, si dijs similem uolumus agere uitam, a corporeq; quam remotissime seiugandus est animus, nisi quantum necessarius illius nos coegerit cultus. Habes nunc Marce hac de re Platonica, id est naturae ipsius certissimam sententiam, quam, meo more sensa magis quam uerba sequutus, quamuis et illa quoque, cōuertit & Latina feci. Ex qua liquido patere potest,

peculiare animorum bonum, in cuius perfecto exactoq; opere perpetua illorū summaq; consistit felicitas, nō prius illis posse contingere, quā ē corporis uinculis, ceu ē tenebroso euolantes carcere, soluti & liberi ad illas sanē redierint oras, ubi beatam posthac stabilemq; illis degere uitam concessū est. Hoc enim in loco ueluti extorres et profugi, neq; bene profecto se habent, neq; recte sapere possunt: sed hebetes sanē & cecutiētes, quæ clarissima alioqui dei & naturæ sunt opera, ueluti in caligine solem cernunt, et coniectantes magis quā intelligentes rerū essentias percipere ualent. Non ab re igitur diuinus ille Socrates, hanc rem innuere uolens, uniuersam philosophātium uitam mortis commentationem esse dixerat. Quid enim aliud agunt ij, cum à uoluptatibus, id est à corpore, cum à re familiari, quæ ministra & famula est corporis, cum ab huiusmodi denique omnibus animum seuocant suū, quā illum secum esse cogunt, & à corporis societate quā maxime possunt abducunt? Secernere autem à corpore animum, quid aliud est, quā emori discere, & mortē (ut inquit ille) commentari? Et profecto ita res se habet. Ex ijs enim uinculis emissī animi, qui eo usque pro mortuis haberi poterāt, tunc demum uiuere incipiunt, & perenni agitati motione, quæ illorum est uita, uegeta naturæ suæ opera recte perficere & exercere ualēt: quod in Legibus etiā testatur Plato, recta mentis sententia inquitens se contentere animi cum corpore coniunctionem haudquaquā dissolutione esse meliorem. Quamobrem dolere & conflictari propter illorum à corpore discessum, nihil aliud profecto esse uidetur, quā illis proprium inuidere bonum, quod dum carent, nihil aliud sanē quā debiles & manci (ne miseros & infelices dicam) merito existimari possunt. Ut igitur

igitur si quispiam fratre suo multum post tempus peregre reuerso, cum gratulari gaudereq; deberet, prae poster agens lamentaretur & fletet, is merito stultus & ridiculus ab omnibus haberetur: ita profecto qui mortuos lugeat suos, non modò quid melius illis fuerit ignorare, & stulte quodammodo illis inuidere, sed ridicule etiam desipere censendus est. Verum hoc in loco Marce illorum sese mihi offert ratio, satis argutula illa quidem, sed, ut uidebitur, futilis & falsa, qui ideo mortuos lugendos esse censent, quoniam cum prius illos impensius amassent, charosq; habuissent, illis orbat, erga quos huiusmodi exerceant affectus non habere se dicunt: qui que asserunt, si remouendus omnino sit dolor, amorem quoque & humanitatem à rerum natura esse tollenda, ut nulla interueniente beneuolentia, aut animi charitate, cum nostris ferarum more uiuamus. Quibus ego, quanquam satis in ijs quae antedicta sunt responsum esse non dubitem, uanis scilicet illos opinionibus laborare, neque quicquam pensi habere quid, aut quomodo amandum, & de quo, aut quantum sit dolendum: nihilominus ut mortuos etiam ij aliquando amare discant suos, nihil opinor prohibet, ut hæc etiã pauca ijs quae præmissa sunt subtexantur, quod amare scilicet illos qui è uita excesserunt, nulla est inuidia, quos etiã quãtum uoluerint charos habere possunt, dummodo sciant quòd amare uita functos & illorum desiderio teneri, non est (ut recta dicat ratio) illorum gratia conflictari & extabescere, lamentabiles que eiulatus emittere: sed potius quantum fieri potest, grata illorum recordatione perficui, & illos incessanter laudare, id est, illos diligere, uenerari, colere. Nullius enim probi uiri à uite uinculis exitus lacrymis est dignus, sed laudibus: nec turpi
luctu

luctu & mœroribus anxij mortui prosequendi, sed iucunda potius perenniꝫ memoria sunt celebradi: cum alioqui à calamitatibus humanisꝫ miserij, quas in hac uita subire necesse est, sciugati & liberi, ad meliorem (ut retro diximus) beatioremꝫ transierint uitæ statum. Quamobrem præciaro (mehercule) morum instituto apud I. ytijs lege sancitum fuisse memoriæ proditum est, ut si quis mœroribus lacrymisꝫ operâ dare uellet, haud aliter id illi, quàm muliebri sumpto habitu palàm facere liceret, insigniter (ut arbitror) hoc declarantes decreto, ægritudinem hanc non uiris, sed mulieribus potius conuenire. Et profecto ita se res habet. Mulieribus enim, & enervata, & uilis admodum isthæc animorum est perturbatio, hauquaquam generosam sublimẽꝫ; illorum indicans naturam: & iccirco fœminas uidemus uiris in luctum propensiores, & querulas esse magis. Hoc etiam in Barbaris ipsis Græcorum Italorumꝫ collatione animaduertere licet: quin & in ijs ipsis qui præstantiores animis esse censentur, & Galli & Germanorum natio, munus luctibus uacare dicuntur, quàm ij qui imbelles & formidolosi existimantur. Quales Aegyptij, Lydij, Syriꝫ; esse perhibentur. Horum nanq; nōnullos aiunt post charissimorum funera pignorum foucas cuniculosꝫ subintrare quosdam, & ibi quàm plurimos latitare dies, ne solis scilicet lumen conspiciant, quando uita functum illo priuatũ esse sentiunt. Sed quid ego hæc tibi Marce in præsentia recolo, quæ bene tibi perspecta sunt, & cognita? An mihi dubiũ est, istam in te omnium bonarum artium eruditionem, rerum maximarum experiẽtiã, animi firmitudinem, & constantiam penè singularem, huiusmodi consolatione nō nimis egere? Nam de religione, & tua erga Deum Optimum Maximum pietate nunc taceo, qui
huius

huiusmodi in rebus, & in hoc præcipue (ut audio) casu, patientissima illa, & uere sancta uerba crebro usurpare soles: Dominus dedit, Dominus abstulit: Sicut Domino placuit, ita factum est. Hæc enim profecto uera est philosophia, qua nullum hominibus præstātius datum est bonum. Hoc uel maximum (mehercule) sapientis officium, cum commoda acceperis plurima, aduersa etiam patienter & æquo animo sufferre posse: & non minus horum causa, quàm illorum dijs gratias agere. Ingrati enim & contemptoris profecto animi esse arbitror, præteritorum quidem cōmodorum uelle obliuisci, et solius habere rationem detrimenti. non enim si quippiam quod cupimus prodiga nobis fortuna non dederit, iccirco quæ prius nobis præstita sunt cōmoda floccifacere & contemnere nos cōuenit, sed præteritorum potius bonorum memoriam grato recolentes animo, præsentia, qualiacunq; fuerint, componere, & si quid Deus, aut fortuna secus uoluere quàm cupimus, æquo id animo, et inconcussa mente ferre debemus. Semper enim constans erga Deum animus, uariantisq; fortunæ intrepidus, non deiectus, non querulus, cum cæteris in rebus omnibus, tum maxime in huiusmodi, uberes sanè cōstantiæ suæ decerpit fructus. Segregās nanq; se ab istiusmodi (ut dictum est) mentis perturbationibus, cœu à caligine quadam uitæq; tenebris, quæ totum inuoluunt conturbantq; hominem, & ad limpidissimam se transferens mentis tranquillitatem, aut dolorosum à sese penitus expellit omne, aut cōtrarij saltem commixtione mancum illud & imbecille omnino reddere consuevit. Et quemadmodum preciosi uis unguenti semper quidem suapte natura odoratum demulcet & afficit, ad fætida autem & male olentia nobis sanè succurrit et remedio est: ita bonorum memoria cum
semper

semper delectet & mulceat, in malis positos etiam subleuat, iucundamq; illorum molestia affert medelam: illis inquam qui recordari potius suorum uolunt bonorum, quam malorum, quæ ad se, id est animum suum, nihil pertinet, meminisse. Quod probis uiris uirtuteq; præditis, qui cum multa, tum etiam præclara in sese habent bona, quam maxime facere conuenit. Id autem (ut sæpius dixi) cum uera polliceatur præstetq; philosophia, quæ sola medetur animis, inanes detrahit sollicitudines, cupiditatibus liberat, pellit timores, eo tamen euidentius & exquisitius efficere animaduertitur, quo idoneam magis & excellentem fuerit composita naturam. Quæ cum essent dicta, & iam satis decumbulatum uideretur, idemq; omnibus placuisset, in cubiculum ire perreximus, quod in porticus latere collocatum, uarijs mathematicorum monumentis, instrumentorumq; præclaris operibus erat refertum: ubi cum resedisset Marcus, & nos itidem fecissemus, Ne uiuam, inquit ille, Leonice, nisi hæc tua oratio & mirifice placuit, & plurimum etiam mihi mororis ademit. Optime enim & diligenter à te collecta sunt omnia, quæ non ad minuendum, sed ad tollendum etiam, & stirpitus eradicandum euellendumq; dolorem, meo quidem iudicio, præclare & efficaciter faciunt. Et profecto ita res se habet: nam si quis (ut recte antè dictum est) philosophia duce & magistra rerum naturam inspicere uoluerit, & non oscitanter abstrusas illius causas perscrutari, & inde quod uerum est sedulo excutere tentauerit, is profecto opinabilem & uoluntarium omnem repperiet esse dolorem. Quamobrem si mihi duo aut tres huiusmodi contigerint meridiationes, & ad sedandos animi motus, & ad omnia recte componenda, optime sanè mecum actum iri existimarè. Et ego, Nihil hoc, inquam, fieri prohibet

hibet Marce, quare & cras (si ita uidetur) & perendie tibi morem gerentes huc uenimus. Sub ijs dictis, cum Lucas & Alfonsus surrexissent, & ad sphaeram quandam æneam uisendam, quæ in cubiculi medio collocata erat, accessissent, illiusq; pulchritudinem & exactam artificij diligentiam admirarentur, & laudarent, ad illos accedens Marcus, ut illius disciplinæ inter paucos studiosus erat, & eruditus, multa & præclara cum ostendendo, tum docendo, quod reliquum dici fuit, nō minus docte quàm suauiter & grate composuit. Habes Balbe quæ tunc de perturbationibus sedandis, & minuendo luctu inter me & Marcum fuere disputata: quæ (ut retro dixi) cum ad illius leuandum ægritudine animum nonnihil contulisse mihi essent uisa, in hoc luctuoso casu meo illa repetere, & huic descriptionis stylo mandare sum aggressus. Quod præclare (mehercule) cecidit. Nāq; id (ut uera fatear) tantū mihi re medij sanè attulisse cognoui, ut ne temporis quidem longinqui medela, qua nihil in huiusmodi re ualētius esse perhibetur, mihi certe plus afferre potuisset.

P H O E B V S,

S I V E,

DE AETATVM MO-

R I B V S.



UPERIORIBVS diebus Alexander Capella, dū Venetijs apud Amulios fratres essem, & quotidie multa (ut fieri solet) pomeridianis præcipue horis (æstas enim erat, & dies longissimi) inter nos iucunde & licenter fabularemur: plerunq; etiā nonnullis

nonnullis propositis quæstiunculis de philosophiæ fontibus haustus, serio disertaremus (nosti enim Amulij maioris cum excussum ad omnia ingenium, tum mirificum sanè ad perscrutandas naturæ causas semper studium) incidimus in sermonem de ætatum moribus uarijs, quantaq; in illis, sicut in alijs plerisq; rebus naturæ uis, rationi nunc me obtemperantis, clare interdum elucesceret. Sermonis autem huiusce nobis ansam uicinus quidam præbuit senex, qui cum adolescente filio de re nescio qualitigabat: neq; id modeste me equidem & mediocriter (ut quandoq; inter domesticos fieri solet) sed magnis clamoribus res agebatur, & conuitijs etiam adeo claris, ut de longinquo facile percipi exaudiriq; possent. Et Amulius ad me conuersus, En, inquit, Leonice, ij quotidie nobis audiendi sunt cantus: isthæc concentus harmonia aures demulcet nostras. Atqui si lites has quispiam ab illis auferret deus, satis mediocriter mehercule in alijs cum ijs actum esse uideri posset. Prudens enim est senex ille, & frugi, paterq; familias sine controuersia bonus. Iuuenis autem hilaris natura est, & officiosus: & cum ingenio docili, tum literis etiam satis expolitus: uerum contentiones istæ inter illos & rixæ utrosq; sanè turpiter commaculant, & in omni hac uicinia male diffamant. Tum ego, Ne nureris inquam Amuli, neq; id omnino illis uitio uertas, quanquam immodicum certe omne, & quod laudatam excedit modicitatem, ueluti rationi contumax & rebelle, non immerito à sapientibus dānari reprehendiq; soleat. Magna nāq; in huiusmodi affectibus est Naturæ uis, excellensq; proculdubio & efficax illius potentia: quæ coërceri quidem compesciq; aliquanto potest: interim uero, aboleriq; penitus haudquaquam potest. Nisi si quis (ut aiunt) Gigan-

tum

tum more cum dijs bello depugnare contendat. Et quid est, inquit Amulius, quamobrem agrestes eæ & concitata animorum motiones uinci superariq; nequeant? An non domina in nobis est ratio, quæ rebelles alioqui, & effrænes illarum insultus iure suo inhibere & frangere ualeat? Tū ego, Vera, inquam, narras Amuli, & quæ, si recta rationis uia proficisci homines uellent, & non potius in lubricum præcipites ferri, proculdubio facere deberēt. Cum enim rationem appetitumq; quiuis in se habere censeatur: & illa quidem diuina sit res, omnia consilio perpendens, nihil temere, nihil agens perperam: hic uero preceps, importunus, effrænis, omnia numis uolens, cui dubiū esse debet, illi quidem meliori excellentiori q; hominum parti imperium: huic uero peiori & inferiori obsequium famulitiumq; merito conuenire, & iure deberi? Verum quotus quisq; est Amuli, qui ita in præsentia uitam degat, ut omnino sibi imperare ualeat: & non potius aut auaritiæ deseruiat, aut luxuriæ sit mancipatus, aut ambitionis æstu, huiusmodiq; alijs animi affectionibus conflictetur, et transuersus ad peiora rapiatur? Paucos hoc in loco prætereo, excipiq; uolo, quos æquus amauit Iupiter, aut ardens euexit ad æthera uirtus, ueræ religionis philosophiæq; cultores legitimos & alumnos, qui se à corporis illecebris contubernioq; seuocantes, illudq; nisi quantum summa est necessitas, negligentes, animo certe uiuunt, soli q; deseruiunt menti. Cuius cuecti pennis, & ad alta leuati, ea demum speculantur & cernunt bona, quæ non immerito nefas esse homini loqui, electionis redolentissimum uas, diuus scripsit Paulus. De pluribus uero nunc loquor, illisq; qui humanis addicti negotijs, in ciuilibusq; exercitiis administrationibus, cum publice communes, tum pri-

uatim res curant suas. In ijs nanque de huiusmodi ætatum uarijs, & ueluti pugnantibus inter se studijs, morumq; diuersitatibus, de quibus cœptum est loqui, perspicuè animaduertere licet. Quæ de re nōnulla me habere profiteor, quæ adolescens olim de clarissimo uiro Phœbo Capella audiui, auditq; notauī, dum cum Thomæo patruo meo, uiro (ni me fallit amor) inter paucos & probo & erudito, ad illum uisendum accessissemus. Non sua autem isthæc (ut erat candidus) ingenue profitebatur esse tunc Phœbus, sed de antiquorum deprompta thesauris, præcipueq; ex Aristotelis deducta commētarijs palàm præ se ferebat. Quod si uolentibus uobis id me nunc facturum existimarem, libenter equidem illa ut tunc à me patruī iussu fuere conscripta, in præsentia referrem. Quare uestrum est iubere, meum uero exequi. Hic cum ambo se percupere dixissent, & Amulius etiam maior magnam se habere gratiam illis litigiosis uicinis subiunxisset, quando eorum causa canunc auditurus esset, quorū mirifico teneretur studio, rogaretq; insuper, ut omnia quæ cōscripsissem, ordine recenserem suo: Quādoquidem, inquam, nihil aliud in præsentia habetis, quod huic sermoni præuertendum putetis, faciam quod sponte mea receperam, idq; libenter mehercule faciam, tum ut uestræ morem geram uoluntati, quos plurimi facio, tum ut longo temporis interuallo repetendo canunc renouem, quæ olim adolescens cupide didici, & scriptionis etiam intercedente opere, memoriæ mādauī. Hoc autem res transacta est modo. Cum enim (ut reuoli) ego & patruus ad Phœbum uenissemus, qui forte fortuna ex leui quadam commotiuncula domū se continebat, et nescio quis incidisset de difficili morosaq; senatoris cuiusdā primarij natura, qui cū alioqui uir esset probus & prudens,

reiq;

reiq; cū priuatæ, tum publicæ, siquis alius, bene gerens, asper tamen erat & immitis adeo, ut nemo ad illum lubēs unquā accedere uellet. Cæterum iuuentuti etiam sic infensus, ut in minimis quibusq;, & contēnendis etiam iuuenū delictis, contumax semper, & inexorabilis esset animaduersor: quē cū patruus dānaret meus (mitis enim uir erat ingenij) mirareturq; insuper, in tali præsertim uiro, tantā morum acerbitatem, & erga iuuenes præcipue tam austeram inclemētiam, ueluti si ab initio senex natus esset, nullamq; ætatis nouellæ experiētiam habuisset unquam: Non est quod mireris Thomæ, inquit Phœbus, ætatis enim isthæc naturalia sunt uitia seu mores, siue proprios quosdam peculiaresq; affectus eos appellare maluerimus. Non solum enim morosi difficilesq; omnibus sunt senes, sed multa etiam natura huiusmodi habent alia, quæ sibi met non minus quàm alijs, illos molestos efficiūt. Pariq; rationis modo adolescentibus sua sunt studia, peculiaresq; animi affectiones, quibus cupide ad pleraq; & petulanter illa effertur ætas. Quorum omnium rationes & causas diuinus uir Aristoteles in suis de arte rhetorica commētarijs, præclarissime quidem ut omnia, uerum breuiter admodū & conciseretulit. Qui certe libri cum paucis omnino obscuritate sua sint peruij, iccirco ab omnibus ferē ætate nostra cū philosophis, tum etiā rhetoribus fuere neglecti, cū tamen artis præcepta in sese colligant omnia, miraq; styli breuitate nihil eorum prætermittant, quæ antiqui post illū rhetores magnis uoluminibus sunt prosequuti. Tum patruus: Si quidem, inquit, Phœbe molestus tibi esse non uererer, & commodo tuo fieri posset, libenter de te audirem, quid nam uir ille de ijs ætatū differentijs eo in opere disertauit. Et Phœbus, Nulla est inuidia, inquit,

Thomæe, nihilq; prohibet ea me in præsentia recensere, quæ & tibi grata fore cognosco, & mihi relatu facile esse non dubito, quippe qui ab illa sum lectione satis recens. Caterum ne in plerisq; styli philosopho consueti te defatiget modus: causarumq; signatarum magis quam expressarum concisa lasset breuitas, longiori orationis ductu, eodemq; planiori pro uirili omnia explicare conabor. Recte sic fiet, inquit Thomæus, quamobrem exordire, & ad me conuersus, Tu uero, inquit, Leonice omnia diligenter excipe, accurateq; notato, & ne quid tibi excidat caue. Posthæc dicta sic exorsus est Phoebus: Quoniam ætatum mihi omnium, sed iuuenum præcipue senumq; mores sunt explicandi (in ijs etenim, quam modo quærimus, diuersitatis species, expressa habet indicia, cum reliquæ interiacentes ætates, sicut harum sunt mediæ, sic communes utrisq;, & ueluti commixtos habere uidentur affectus) hoc profecto dicendorum exordio conuenientissime me uti posse nunc uideor, quod scilicet non solum annorum spatij, ætatisq; ratione iuuenes à senibus distare censentur, sed multo etiam magis uitæ institutis & moribus.

Iuuenilis ætatis affectiones.

Contrariæ etenim & pugnantes inter sese nimirum cæuidentur esse ætates. Iuuenes nanq; (ut ab ijs nostra exordiat oratio) cupidi sunt maxime, & quæcunq; uolunt, uehementer sanè, & nimis uolunt, eaq; perficere & complere, ætatis laboribus non cedētis præsidio, ualenter possunt: id autem maxime circa corporcas perspicitur uoluptates, cum alias sanè, tum eas præcipue, quæ ad res spectant uenereas. Harum enim ualde sunt cupidi, ætatis calidæ & humētis gratia, & ad illas effrænes incontinētesq; sunt, sibiq; ipsis haudquaquam in huiusmodi re bene imperare possunt. Sunt præterea circa quæcūq; alia desideria

via natura incōstantes iuuenes, & leues, citoq; quod ual-
 de uoluerunt, leui de causa negligunt, cupitæq; admodum
 rei satietatem incurrūt, uehementes enim & ualidæ san-
 guinis & spirituum in iuuenili corpore motiones agita-
 tionesq; in causa nimirū esse censentur, cur acutæ potius
 quàm solidæ, & magnæ quàm perdurantes illorū sint ap-
 petentiæ, ucluti ægotātium sitis & fames esse cōspiciun-
 tur. Facile etiā omnes excādescunt iuuenes, irāq; leuibus
 de causis superātur, & quo traxerit illa, nullo respectu se-
 quūtur, furorīq; & iracundiæ tunc magis impetu, quàm
 consilij rationisq; ductu omnia faciunt. Honoris enim cu-
 piditate, cui maxime student, cōtemni negligiq; æquo ani-
 mo nō ferunt, iniuriāq; affici feruida ingenio atas minime
 patitur. Cū autem honoris (ut diximus) cupida & appe-
 tens sit inuētus, nō minus etiam contentiosa pugnaxq; esse
 percipitur. Siquidē supereminere alios, & omnibus maxi-
 me excellere semper cupit: cōtentio autem, & peruicacia
 excellentiæ appetitus esse quidam iure cēsetur. Cāterū ut
 isthæc hoc se habeāt modo, ad utraq; tamē has animi af-
 fectiōes propēstiores sunt iuuenes, quàm ad uehementem
 anxiamq; pecuniarum appetētiā. Pecuniæ nāq; minime
 iuuenes natura sunt auidi. Huius autem rei causa esse cēse-
 tur, quoniā ætatis nouellæ gratia adhuc indigentiam non
 sunt experti: nō curant igitur quorum sibi futuram indi-
 gentiam nō uerētur. Sunt præterea iuuenes haudquaquā
 maligni, sed faciles potius & fatui, id autem iccirco, quo-
 niam multas adhuc hominū peruersitates & uersutias nō
 cōspexerunt, neq; notas habēt. Credula etiam, & optimæ
 semper spei illa est ætas, quoniā sui breuitate exiguitatē ue
 in paruo temporis spatio neq; sæpius fuit decepta, neq; à
 spe frustrata sua. Quēadmodum enim uino madidi hilares

sunt, & spei semper bonæ, sic ætatis gratia iuuenes nō im-
 merito se habere uidentur. Viuere autē bona cum spe ut
 plurimum iuuenes iccirco censentur, quoniam spes quidē
 futuri esse apparet temporis, memoria uero præteriti, iuue-
 nibus autem quod restat futurumq; est, multum certe pro-
 tensumq; est, præteritum uero admodum exiguum & bre-
 ue: quamobrē primis in annis cum paucorum omnino me-
 minisse possint, omnia certe sibi in spem ponunt, nihilq;
 tam arduum est, quod non sibi illa polliceatur ætas: id quæ
 ipsum in causa est, cur facile etiam, & nullo negotio falli
 decipi q; possint iuuenes. Quicunque enim omnia sibi ex
 uoto successura confidunt, ij profecto subdolorū peruerso-
 rumq; fraudibus sunt obnoxij. Quamobrem adulatoribus
 scurrisq; facile patent iuuenes. Quæ etiam res fortes illos
 animososq; nimirum efficere uidetur. Cum enim natura
 (ut diximus) iracundi sint iuuenes, haud facile timere sci-
 unt. Spes autem bona illos sanè audaces facit, & profecto
 ita se res habet. Iratus enim timet nemo. Qui uero bene
 semper sperat, præsentī & magno quodcunq; aggredi-
 tur animo, & ad omnia intrepidus, & audax proculdu-
 bio esse conspicitur. Verecundi quin etiam sunt iuuenes,
 & natura magnanimi. Et uerecundi quidem, quoniā alia
 adhuc ætatis gratia non norunt bona, neq; pulchra, nisi
 quæ illis patriæ dictant leges, urbisq; bene institutæ con-
 suetudines ostēdunt, à quibus discedere illos mirifice pu-
 det. Cum igitur quippiam sibi secus agere uidentur, illorū
 memorati facile uerecundiam incurrūt. Magnanimi autē
 nō immerito esse censentur, quoniā tum nullas offēensiones
 quibus humiles sanè, & deiecti fiunt homines, illorū bre-
 uis recepit ætas: tum plurimarum, quæ longo proueniunt
 æuo, necessitatum penitus sunt inexperti: & alioqui bona
 illos

illos spes, qua (ut dictum est) uiuunt, erectos, & magna quæq; sibi pollicētes planè efficit: quod magnanimi proprium & peculiare esse cēsetur. Non immerito præterea pulchre magis quippiam, & decore facere eligūt iuuenes, quàm fructuose & utiliter: quoniam more potius & consuetudine (ut diximus) quàm ratiocinationis cōsilijs; opere uiuunt iuuenes. Ratiocinatio autem (ut uidetur) ipsum spectat utile, cum mos & uirtus quod pulchrum est appetant & consequantur. Est præterea inter omnes maxime ætates Iuuetus cum amicorum semper cupida, tum socios sibi complures facile concilians: hoc autem ideo, quia conuersatione conuictuq; ætas illa apprime gaudet, una'que cum sibi gratissimis semper esse cupit. Nec minus etiam quia nihil adhuc utilitatis ratione iudicat: neq; quod cōducibilius, aut ex re sua magis, sed quod iucūdius gratiusq; expetit. Omnia autem quæcunque uolunt, uehementer & anxie iuuenes semper uolunt, eoq; peccare uidētur, quod nihil mediocriter expetunt. Plus nimio igitur amant, & magis quàm par decensq; sit odio habent, eoq; modo in cæteris animi affectionibus se habent, nimijq; in omnibus sunt: qui etiam scire se omnia planè credunt, omniumq; sibi iudicium præsumptuose adsciscunt & uendicant, de omnibusq; licentiose contendunt: quæ res nonnihil causæ præbere uidetur, cur omnia ætas illa nimis uelit. Iuuenum autem delicta, ad contumeliam magis, quàm ad maliciam uergere uidentur. Excellentes enim esse uolunt (ut dictum est) & magnanimi. Libere autem reprehendunt, & nullo damnant respectu: quoniam omnes rectos probosq; esse rati homines, et ad simplicitatis, integritatisq; suæ regulam illos examinātes, si quid secus illis acciderit, aut à quopiam contra illos quid perperā patratū fuerit,

ceū indigna patiantur, non æquo ferūt animo, neq; dictis bene temperare possunt. Est etiam ad irridendum ætas illa propēsior. Vrbauitatis enim, & cauillorum, dicteriorūq; multum secum semper habet, cum contumelijs gaudeat. Vrbauitas autem ipsa moderata quædam, & quodamtenus castigata contumelia esse censetur. Et iuuenum quidē mores, qui naturæ fontibus scaturire uidentur, non ab re huiusmodi esse conspiciuntur: quibus tamen ratio, uitaq; institutio, & educationis modus moderari efficaciter possunt. Grandiores autem natu, & ij qui decursa iam ætate

Senum mores. meliori, in senium uerģūt, contrario (ut dictum est) se habere uidentur modo. Quoniam enim multos uixerunt annos, multotiesq; (ut par est) fuisse decepti: pluraq; semper rerum esse mala, & perperam euenire uiderunt, neq; obstinate quicquam asseuerant, neque uehementer, nimisq; quippiam expetunt: neque se scire omnia contendunt, ambigendoq; semper dictis addunt suis forsitan, contingit. Suspiciosi præterea sunt senes, cogitandoq; ad peiorem semper uerģunt partem: hoc autem iccirco, quia increduli sunt. Increduli uero non immerito esse cēsantur, propter multarum experiētiā rerum, in quibus sæpenumero cos fuisse deceptos, & sp̄e frustratos uerisimile sanē est. Quamobrem hac etiam de causa, neq; impendiō plus amant senes, neq; nimis oderunt: uerum secundum Bian-tis præceptum, amant ut osuri, & oderunt ut aliquando amaturi. Pusillanimes quinetiam sunt senes, quoniam longis annorum spatijs humiles sunt effecti, uiuuntq; deiecti, & quasi despectui habiti: quamobrem magnum & excellens nihil eorum, quæ in communi uersantur uita, amplius desiderare uidentur. Ad hæc illiberales etiam sunt senes, tum quia ex necessariarum numero rerum facultates

tes diuitiasq; existimant, tum etiam quia longa docti experientia, probe sciunt, facultates sibi uedicare, & acquirere, rem sanè esse perdifficilem: easdem uerò amittere & deperdere, perquam facilem. Timidi præterea sunt, & ad omnia formidolosi. Cōtrario enim iuuenibus se habēt modo: calentes nanq; sunt illi & feruidi, ij uerò algentes natura, & frigidi. Timor autem frigiditas quædam non immerito esse censetur. Cupida quinetiam uitæ huiusmodi est ætas, in extremo præcipuè constituta senio: quoniam absentis maximè rei cupiditas desideriumq; esse perhibetur, & cuius quispiam rei indiget maxime: maior autem illis ætatis decursa est pars, qua certe indigere uidentur, inde illius desiderio flagrant. Queruli etiam semper sunt senes pusillanimitatis gratia, & ad utile magis quàm ad pulchrum respiciunt. Hoc autem ideo, quoniam seipsos amantes sunt senes: utile uerò ad se pertinens reputant bonum: pulchrum autem simpliciter communeq; existimant bonum. Impudentes præterea magis, quàm uerecūdi sunt senes, quoniam non æque pulchrum sicut utile curantes, negligunt sanè, & pro nihilo ducunt cuiusmodi esse uideantur, alijsq; appareant. Desperant autē ut plurimum de omnibus senes, propter longum uitæ usum, rerumque experientiam. Cum enim hominum res omnes fere malas usu pertractationeq; animaduenterint, & esse cognouerint, malos etiam non immerito timent euentus. Cui certè opinioni non nihil illorum innata suffragari uidetur timiditas: cum enim timeant omnia, non ab re de omnibus etiā desperant. Viuere quinetiam memoria magis censentur, quàm spe: illorum nanque quod uitæ restat exiguum est, præteritum uerò longum: spes autē (ut retro dictum est) temporis est futuri, cum præteriti sola restet memoria.

Quæ etiam res illorum nugacitatis uera censetur esse causa. Garruli enim ferè, nugacesq; omnes sunt senes: reminiscetes nanq; non sine quadam uoluptatis titillatione, & loquendi pruritu, quæ præterita sunt nullo dicendi sine commemorant, & inculcant. Illorum præterea indignationes, excandescentiæq; acutæ quidem esse animaduertuntur, uerum imbecilles, & mancæ. Ex desiderijs autem alia quidem longo penitus æuo discesserunt, & cuanuerunt, alia uerò imbecillia sunt, & inania. Quamobrem neque appetentes ualde natura sunt senes, neque actiuosi admodum, & prompti, nisi lucelli quippiam arriserit, & hanc ob causam temperati apparent senes esse: uehementes enim & concitæ ab illis abscesserunt appetentiæ, neglectisq; alijs, solis inferuiunt lucri compendijs, ut cum alia ætatis uitio sibi desint, cōmoda hac se saltem uia sustentare ualeant. Magisq; ratiocinatione consilio'ue (ut diximus) uiuunt senes, quàm consuetudine, & more, cum ad utile magis, quàm ad pulchrum honorabileq; conspiciant. Peccant autem in ijs quæ secus admittunt, & perperam agunt senes iniustitia potius, quàm contumelia: nō enim arroganter insultant ut iuuenes, sed peruerse & maligne agunt. Queruli etiam esse percipiuntur, quoniā ætatis uitio & pati dura se omnia, & tantum non passuros existimant: quamobrem tanquam in duris et aduersis constituti, & mala mox expectantes, alia conqueruntur, sortemq; damnant suam. Et ea etiam de causa neque urbana sunt, neque risus facietiarumq; amici. Et ij quidem naturales senectutis sunt mores. Ex quibus etiam manifesto perpendere, recteq; cognoscere licet, quæ nam aliarum etiam ætatum peculiaria sint studia. Cum enim inter has coniectæ, non ab re quodammodo censeantur esse mediæ,

non

non eminentes adeo & expressos hos animorum habere affectus, sed refractos, & ueluti adumbratos, uero consentaneum est. Quam rem usu experientiaq; quotidie indubitatam certamq; esse percipimus. De pucrorū autem moribus, quorum ætas ueluti uitæ exordium quiddam iuuenilem præcurrit ætatem, illis certè in commentarijs nihil Aristoteles refert: à Cicerone tamen nostro nullius nō philosophiæ peritissimo, hæc memoriæ prodita fuere, quæ quoniam proposito conueniunt sermoni, non malum est hoc etiam in loco recēscri: Pueros scilicet æqualibus cōtaneisq; natura duce delectari, libenterq; cum eisdem cōgregari, & se ad ludendum dare. Fabellarumq; auditione mirifice duci: quas etiam narrare alijs gestiunt. Pompis præterea, spectaculisq; & huiusmodi ludicris rebus præcipue pueros teneri, & ob eas res sitim plerunq;, & famem perferre. Esse præterea eos natura liberales, deq; eo quod ipsis superat, alijs libenter gratificari: aduertereq; etiam curiosius ea quæ domi fiunt, ut illa proferant: commentariq; aliquid & discere semper uelle, & eorum quos uident nomina non ignorare: quibusq; in rebus cum æqualibus decertant, si quidem uincunt, lætitia efferri: e contra uerò debilitari, animosq; demittere, si forte uincantur. Hæc cum dixisset Phœbus, & illis addere quædā (ut mihi tum uisum est) uellet, quominus id facere posset, quorundam interuentu, qui illi à senatu mandata cū literis attulerūt, prohibitus est: eoq; modo disertatio tunc illa finē habuit, quam omnibus (ni fallor) expressam uerbis, & ut eam tūc literis mandauī, in præsentia retuli. Vbi Aristotelis quidem sensus ad unum omnes, Phœbi uerò explicationē, & Latina uerba proculdubio, si hæc retines, tenere te Amuli non dubites. Tum ille qui attentam sanè mihi auscultando præstit

præstiterat operam, & siccis (ut aiunt) auribus omnia
 ebibisse uisuserat, Profecto, inquit, Leonice, dum hæc me=
 cum cogito, & tota mentis acie examinare contendo, ita
 se mihi res, & non aliter ac dictum est, habere uidetur.
 Neque secus mehercule fieri posse apparet. Has enim in
 naturæ uisceribus congenitas, coalitasq; animorum affe=
 ctiones, illarū utraq; parturit semper, & in lucem produ=
 cit ætas. Quamobrem posthac uicinis ijs nostris æquior
 sanè ero, admirariq; desinam, cur semper litigent, cū æta=
 tum uitio potius, quàm suo, naturaliter uterque ægrotare
 uideatur. Cæterum unum est, quod à te scire nunc cupio,
 quod etiam dum loquereris animi me dubiū habuit: an sci=
 licet Phœbus noster, quem modo audiuiumus uerbo tenuis
 (ut pleriq; solent) dum uixit sit philosophatus, & isthæc
 ceu dictata retulerit: an potius philosophorum placitis
 initiatus, illorum sacraria legitime riteq; sit ingressus,
 neque extremis (quod aiunt) labris gustauerit, sed toto pe=
 ctore illas hausserit disciplinas: mihi enim hucusq; persua=
 sum creditumq; est, illum quidem in reipublicæ negotijs,
 & ad se petinentibus administrationibus, sine controuer=
 sia inter alios omnes excelluisse, ex literarum autem stu=
 dijs humaniora semper calluisse, in illisq; etiam quodam
 tenuis progressum, omnes ordinis sui homines facile supe=
 rasse. Verum à maioribus disciplinis cum uitæ instituto,
 tum ingentibus occupationibus, à quibus nunquam ferè
 (ut audio) uacabat, abductum seiugatumq; fuisse: quam
 ob rem si quid habes quod ab hac me animi perplexitate
 liberet, rogo te ne graueris adducere. Et ego, Id à me, in=
 quam, exigis Amuli, quod sanè tibi integre persolvere nō
 possum: qua enim tempestate uir ille floruit, ego per æta=
 tem huiusmodi de re haudquaquam iudicare poteram. Ve=
 rum de

rum de patruo sæpenumero audiui, magnum illius ingenium nunquam per occupationes à literis cessasse, sed bonarum semper artium studijs fuisse addictum, & philosophia præcipue, quòd eam facultatem ceteris & studijs, & artibus antecedere existimaret. Quinetiam addebat Bessarionem philosophum & theologum (ut fama noster) eminentissimum, dicere solitum, Phœbum, nisi diuersa illum uitæ ratio à philosophiæ iugi studio auocatum & abductum, in ciuilia negotia publicasq; coniecisset curas, sine controuersia omnes sui temporis philosophos facile superare potuisset. Hæc de illo audiui, & hæc uobis testata nunc refro. Cæterum eius certè rei quæ ad me tunc attinebat, & cuius gustatum aliquem habere tunc poteram, iudicium audacter sanè & libere hic proferam meum, ea uidelicet tempestate audisse me neminem qui tali uerborum ornatu & copia, tantaq; eloquentiæ suauitate & gratia polleret: & aderant sanè pleriq; tunc magni nominis oratores, senatoresq; primarij, inter quos Bernardus Iustinianus, & Vitalis Landus cum excellenter maxime, primas tamen Phœbo sine controuersia deferebant. Hæc cum dixissem, nō nullaq; etiam alia subiungere pararem, campana intonuit illa, cuius signo patricij ad senatum accedere admonentur. Quare cum fratre Amulius consurgens: Nos quidem, inquit, imus quò uocamur. Tu uerò Leonice memento ea quæ tibi de Phœbo restant, posthac, cum otium dabitur, omnia recensere.

Seuc

SEVERINVS,

SIVE,

DE RELATIVORVM

NATURA.



VO sunt Fusce frater, quæ de uniuerso
 entium ambitu difficulter admodum à no-
 bis, & obtuse comprehendi, dignosci ue-
 possunt. Primum scilicet ens, & ultima
 omnium materia. Neque hoc immerito
 (mehercule). Nam cum omnis nostra cognitio per formæ,
 quam speciem uocant, comprehensionem fiat quandam,
 quæ uisis intercedentibus ab ipso colligitur intellectu:
 alterum quidem cum longe omnem superemineat men-
 tium formarumq; omnem ordinem, haudquaquam intelli-
 gi, aut recte percipi potest: alterum autem quoniam sua-
 pte natura informe quiddam est, & minimæ (ut aiunt)
 essentiae, comprehendi bene iccirco dignosci que nequit.
 Quamobrem diuinus ille Plato, à quo ceu ab exuperanti
 quodam fontis initio, omnia rectè philosophantium ema-
 narunt fluxeruntq; dogmata, materiam quidem ipsam spu-
 ria quadam discursus ratione percipi posse dixit. Ad pri-
 mæ autem causæ cognitionem non ex directo sanè, sed
 per omnium abnegationem remotionemque aliorum,
 humanum quoad fieri potest, peruenire cōcedit animum.
 Vnde recentioribus postmodum Academicis affirmandi
 præbitam fuisse ansam iure contenderim, primam scilicet
 materiam, deo dissimiliter esse consimilem. siquidem ut ab
 illo omnia quæcunq; sunt merito abnegantur entia, cum
 longe superemineat, & præcurrat omnia, omniumq; sine
 controuersia sicut est primus, ita sit optimus: ita à materiæ
 natur

natura uniuersum remouetur entium genus, cum quidem illa peior omnibus, & uilior merito esse censeatur, & neque sit quippiam quod rite ostendi monstrariq; possit, neq; sensus moueat ullos, omniumq; intellectus notionem ceu Homericus ille Proteus semper lubrice fallat & fugiat. Et profecto ita se res habet: cum enim cognoscens intellectus existat, cognitum uerò ipsa rei sit essentia, eò confusior sanè hebetiorq; cognitio non immerito redditur omnis, quò res depressiorem obtusioresq;, aut exiliorum habere essentiam perhibetur: ut non ab re illud apud Peripateticos uulgatum passim perstrepat axioma, quoscilicet ad esse res se habent modo, eo ad cognosci percipiue proculdubio se habere. Huiusmodi autem post primam materiam cum pleraq; reperiri alia, ab ijs qui res curant philosophis memoriæ proditum est, tum uel maxime illorū esse naturam, quæ dicuntur ad aliud. Quæ nos usitato iam & recepto uocabulo, correlatiua passim appellare solemus. Hæc enim ob adumbratam imbecillēq; naturæ suæ essentiam cū habitudines quædam siue respectus existant, à nobis aut uix, aut ne uix quidē dignosci percipi q; possunt: sensus enim isthæc haudquaquā mouere ualent, à quibus origo (ut aiunt) & initium omniū est notionum. Quamobrē multæ in ijs difficilesq; admodum uersantur quæstiones, & non contēndæ philosophantium controuersię perstrepunt, cum de illorū essentia & natura, tum de proprietatibus & differentiis assidue contendunt, & inter se dissidentium, ut non immerito huiusce rei pertractatio, apud Peripateticos maxime, & difficilis semper habita fuerit, et nūc, si unquā aliàs, apud nostrates obscurus admodum, et plenus controuersę dissensionis iste sit locus. De quo nonnulla à me, et aliàs sæpe

cum

Correlatiua.

cum alijs, & nuper cū Seuerino monacho, uiro (ut nosti) cum probo, tum inter eius ordinis uiros etiam erudito, & diligēter satis fuere quæsitā, & mediocriter disputatā. Nā cum superioribus diebus ad diui Georgij cognomēto Maioris, insulam ego, & B. Carzonus, & N. Spinellus cymba uecti fuissēmus, quō animi causa nōnunquam accedere solco (nostī enim cum loci illius à uulgo semoti festiuitatem & gratiam, tum hortorū in illo syluarumq; semper uiuentium uarias amœnitates) fortē illum offendimus solū in porticu quadam deambulātem, cogitabundo (ut uisum est) similem, et clausum libellum manu gestantem. Qui cū nos accedentes procul conspexisset, hilari statim accurrēs uultu, Salucte, inquit, tria mihi charissīma pignora, quos ego licet sæpe (quæ uestra est humanitas) & uideā, & alloquar, sæpius tamen id mihi contingere sanē optauerim, imo totos (ut aiunt) cum noctibus etiam dies libenter uobiscū transmittere perciperē. Et ad me cōuersus, Quā oportune, inquit, huc uenisti Leonice, ad quem profecto ire decreuerā, nisi felix quædā mea hodie sors, seu potior sorte deus, te huc adduxisset. Tum ego, Gaudeo, inquam, mehercule, & mirifice lætor mi Seuerine, quādo huc tibi optatus (ut ais) & tēpestiuus acceßi: uerum quidnā isthuc est negotij, aut in quo tibi nunc præsentia mea adeo usui esse potest, ut quod nō sæpe facis, etiā ad me uenire cogitares? Et ille, Haud magna, inquit, Leonice, tibi præsertim (ut arbitror) res illa est, de qua percontari & cōsulere te uolebam, mihi uerō cū suapte natura, tum ueterū maxime uarijs & disidētibus ferē sententijs satis difficilis & abstrusa esse uidetur. Quamobrem nisi & tibi & istis molestum me esse subuererer, libenter de te nunc id quærerem, quod alioqui me ambiguū iamdiu et dubiū animi habuit.

Tum

um ego, Non est nunc quod dubites, inquam Seuerine, aut mihi, aut istis (ut pro omnibus loquar) importunus unquam aut molestus uideri, qui & te fraterne amamus, & huc accessimus, ut te simul uideremus, & aliqua de re seria tecum & loqueremur inuicem, & audiremus: illud profecto tibi magis est dubitandum, an id quod in præsentia quæris, & quod te animi (ut dixisti) iandiu ancipitem habuit, apud me ex sententia depositum reperire possis, qui neq; studio (mehercule) neq; diligentia ulla in re anteire uideor, qui tibi potius primas cum omnibus alijs, tum in ijs præcipue, quæ ad literarum pertinent studia, facile concedo. Verum age, profer quod cupis, & in mediū constitue. nanq; pro huiusmodi disquisitione operam ego tibi, quātula est, hodie polliceor meam. Et ille, Benigne, inquit, & amanter facis, ut semper omnia Leonice: sed abscedamus paulisper hinc (si placet) & aliquò concedamus, ubi minus nosler interpellari possit sermo: monachis enim istac (ut uidetis) ultro citroq; comeantibus, satis frequens & inquietus is est locus. In xystum igitur (si uobis uidetur) diuertamus: siue in syluā potius illam eamus, quæ raris consita stirpibus, neq; solis penitus officit radijs, & illorum tamē uim crebris interpellantibus umbris frangit, neq; sedentes illic, aut inambulantes ledere patitur. Hic cum ei omnes assensi fuisset, primus ire perrexit, nosq; per transuersum hippodromum, qui orto in medio à uitiū efficitur ordine, in propinquam deduxit syluulam, quæ ad illius consita latus, omnibus profecto gratiarum renidet illecebris. Et ad nos conuersus, Hic, inquit, locus commodam planè sermonibus nostris interpellante nullo præbebit mansionem, siue eos sedendo, seu inambulando potius transigere maluerimus, licet nunc, uel quia imbecillo



cillo sum corpore, uel quia deambulauī, satis blande me illa inuitent sedilia, quæ sub antiqua collocata lauro, molli undiq; hedera conuestiuntur. Tum ego, ut lubet, inquam Seuerine, & ut commodò conducit tuo, & alioqui sedendo (ut aiunt) & quiescendo, ipse seipso fit sapientior animus, quod perperam à multis receptum, uulgo hodie sic proditur, cum longe tamen elegantiorē, & reconditum magis uerba illa recte intelligentibus innuant sensum. Cæteram de hoc aliàs. Tu uerò quando tibi morem gessimus, & confedimus omnes, ediffere id, de quo te iandiu animi ancipitem fuisse dicis. Tum ille, Superioribus, inquit, diebus, dum Categorias Aristotelis nouitijs nostris interpretarer (scis enim quòd aliquot iam annos hoc mihi muneris est demandatum, ut Aristotelica inter nostros profitear) de relatiuorum differens natura, proprietatem illorum esse quandam, peculiaremq; naturam de philosophi sententia cōfirmari, ut simul essent illa, & dicerentur simul, ita quòd altero posito, poneretur & alterum: & alterutro interempto, reliquum etiam interire necesse esset. Verum nō in omnibus hoc cōtingere relatiuis, licet ut in pluribus id uerum esse appareret. Quo in loco id tum mihi, quod sæpius aliàs etiam, in mentem uenit, non ab re dubitare, quanam peculiaris alia relatiuorum proprietas reperiri possit magis, quando hæc ipsa, quæ uidetur maxime, simul scilicet esse natura illa, haudquaquam omnibus contingere relatiuis manifeste percipiatur: & cum philosophus Aristoteles in alijs quidem rerum prædicatis accuratas asserat, & quadrantes illorum proprietates, in ijs autē quæ sunt ad aliud, hanc exilem adducat & mancā, uniuersum illorum ambitum minime complectentem. Latinos igitur Aristotelis, inquit, interpretes diligenter euolui omnes

mnes, & quid hac de re scriptis mandassent suis, accurate
 perquisiui, qui tantū (meo quidem iudicio) absunt ut hāc
 rite soluant dubitationem, ut illorum uel accuratissimus
 D. Thomas in commētariolo quodam sub certam hanc re=
 latiuorum distinctionem ponat, æqualiter scilicet illa, &
 inequaliter esse, & dici: ex quo non eiusdem esse naturæ
 omnia, ut simul existant, & posita se inuicem ponant, &
 perempta interimant, non solum admittere uir ille, sed etiā
 constanter asscuerare uidetur. Hanc igitur ob causam (ut
 retro dixi) ad te accedere cogitabam: & hoc est quod te
 percontari, & rogare insuper nunc sanè uolo, ut siquid ui=
 delicet hac de re à Græcis autoribus expositum, pertracta=
 tumq; habes, quod te habere non dubito (scio enim quāz
 accurate superioribus annis Græcos Aristotelis commen=
 tarios Patuij publice sis professus) id mihi in præsentiā
 uelis explicare, meq; hac animi cura & perplexitate libe=
 rare. Tum ego, Non contemnendam profecto ardua quæ=
 stionis difficultatem Scuerine mouisti, quæ cum antiquio=
 res semper exercuit Peripateticos, tum uel maxime no=
 stra ætate eosdem cōturbat & uexat, neq; sibi ipsis inter=
 dum bene constare patitur. neq; hoc immerito (mehercu=
 le). Cum enim recto (ut certum est) iudicij examine relati=
 ua omnia simul esse natura affirmauerint, hancq; illorum
 proprietatem esse dixerint, rursus obiectionibus coacti
 quibusdam, & ueluti de recta deturbati semita, id ipsum
 negare coguntur, & hac de re quod miserandum sit, an=
 xie laborantes, inter sese cum aperte dissident, tum sibi e=
 tiam ipsis eorum nonnulli contraria loquuntur, & senti=
 unt. Non mirum est igitur, si te hic (ut modo dixisti) locus
 iandiu accipitem animi habuit, quando & per se diffici=
 lis sanè est, & expositorum inter se dissidentes ferè habet

sententias: ceterum bene (ut arbitror) in praesentia tecum actum est, nam cum hac de re mihi superioribus forte diebus cum Iulio Brauo Veronensi, medico praestantissimo, & philosopho in primis erudito, Patavij quaedam, ut assollet, disputata fuissent, isq; ex D. Thomae sententia relatiua inequaliter, & non aequaliter talia disternari contendere, ego uero contra, omnia simul esse natura asseuerarem, ceu ad honorarios arbitros, ad Graecos scilicet Aristotelis interpretes communi consensu ab utroq; est prouocatum: qui statim nullo negotio rem aperuerunt, & inter nos facile composuerunt. Quamobrem teneo adhuc illorum nonnulla, & (quod aiunt) ad manum etiam parata habeo, quae (ni fallor) huic commodè quaestioni, & tuae satisfacere poterunt uoluntati. Tum ille, Existimabam profecto, inquit, Leonice, neque animi (ut uidetur) sanè fallebar, te & locum istum iam pridem signatum habuisse, & quid de hac re ueteres dixissent, diligenter exquisiuisse: scio enim quàm accuratus, huiusmodi praesertim in rebus, & quàm diligens perscrutator existas: iccirco id de te quaerere constitueram, & ad te ire cogitabam: uerum quoniã geminata sortis meae felicitate, & huc hodie uenisti, & satis etiam paratus (ut ais) accessisti, omnibus à te contendere precibus non desisto, ut compotem me hodie uoti facias, uniuerfamq; hanc difficultatem pro uirili distincte & congruenter explicare cõtendas: qua in re (nisi aliter tibi uidetur) tacitum me tibi hodie auditorem praestabo, neq; sermonem usquam interpellabo tuum, nisi forte huiusmodi inciderit quippiam, quod praetermissum, intelligentiae officere possit meae. Age igitur mi Leonice, & Dei (ut par est) inuocato numine, rem istam aggredere. Tum ego, Philosophus, inquam, Aristoteles in Categorijs suis (sic enim au-

reus de decem prædicatis inscribitur commentariolus) difficultatis huius initium sanè dedisse, & ijs qui distinctiōnem per æquale & inæquale in relatiuis fecerunt, ansam præbuisse, manifeste censetur: scribit enim in illis, quòd ea, quæ ad aliud sunt, simul quidè esse natura uidentur, quod in pluribus sanè uerum esse apparet: cæterum in aliquibus hoc haudquaquam uerū reperiri. Simul enim, inquit, Duplum est & Dimidium: Dominus quinetiam simul est & Seruus: quæ se inuicè perimere etiā uidetur: intercepto enim Dimidio, interimitur & Duplum: & deficiente Domino, deficit & Seruus: coq; modo plerisque in alijs eiusdem notæ relatiuis manifeste contingere apparet: uerum in nonnullis hoc, inquit, uerum haudquaquam percipitur esse: non enim positi se inuicem ponere aliqua, neq; intercepta, se interimere uidentur: quod illorum quæ natura sunt simul, peculiare proprium uè esse censetur. Cuius statim res claras etiam (ut uidetur) asserre tentat ostensiones. Scibile enim, inquit, cum ad scientiam dicatur, illam proculdubio præcedere, & non simul natura esse percipitur: siquidem res ipsæ proprias de se præcurrere scientias clare animaduertuntur. Scientia præterea corrupta haudquaquam corrumpi scibile perhibetur: cuius rei uel clarum esse exemplum quadraturam inquit circuli, quæ scibilis quidem est, licet à nullo perspicue sciatur. Eodem etiam modo de sensibili & sensitiuo, quæ sine controuersia ad se inuicem dicuntur, posse deprehendi dicit. Destructo enim per suppositionem animantium genere, sensitiuum manifesto destruetur omne. à sensu nanq; peculiarem suæ essentiæ characterem accipit animal. Animalibus autem interceptis omnibus, alia destrui interemuq; sensilia non est necesse. Simul igitur natura non sunt sensile & sensitiuum.

tiuum. Hæc ille pluribus hac de re eodem scribit in loco,
 quæ nos restrictius sanè in præsentia collegimus, uim so-
 lummodo illius rationum, non uerba singula recensendo.
 Ex quibus non obscure sanè deprehendi licet, uerborum
 solummodo corticem inspectantibus, & non recondita il-
 lorum sensa, ueluti obstrusam sub illo medullâ, linceis (ut
 aiunt) oculis introspicientibus, Aristotelē planè uelle non
 omnia æqualiter dici, & eiusdem naturæ esse relatiua. Cæ-
 terum antiquiores illi, & uere legitimi philosophi, illius
 interpretes, præcipuèq; inter illos magnus Iamblichus,
 & Porphyrius, necnon horum uestigia clare postmodum
 insequutus Simplicius, uir inter Aristotelis expositores
 uel eminentissimus, qui ut ætate omnium ferè antiquorum
 est ultimus, ita dignitate, & interpretationis claritate &
 diligētia inter cæteros facile primas sibi uēdicat. Omnes,
 inquam, isti concorditer affirmant, ueram scilicet & exa-
 ctam relatiuorum esse naturam, semper æqualiter dici,
 simulq; se inuicem illa & ponere, & interimere. Huius-
 modiq; indubitata philosophi Aristotelis aiunt esse sen-
 tentiam, in ijs uidelicet commentarijs, ubi hac ipsa de re
 accuratiori diligentia opera pertractare aggressus est. in-
 diuinis nanque primæ philosophiæ uoluminibus eundem
 constanter asseuerare, relatiua simul esse natura, quia po-
 sita inuicem se ponant, & perempta interimant. Nihil e-
 nim aliud, inquiūt, indicare uelle illud, simul natura omnia
 esse relatiua, nisi quòd simul coalescunt, & quasi simul
 ex eodem pullulare & nasci germine uidentur: isthuc ete-
 nim Græcum sonat & signat nomen: ita quòd causæ sibi
 inuicem ipsa sunt correlatiua, & ad se inuicem coniuncta
 complicataq; esse planè conspiciuntur. Quamobrem ad
 ueram alterius positionem, alterum etiam esse deprehen-
 ditur:

litur: & alterutro interempto, reliquum sine dubio in-
 erire animaduertitur: ubi etiam non minus scienter, quam
 significanter & clare ij notant uiri, hoc uidelicet, simul
 esse aliqua (id enim ut possum nunc exprimo, quod illi u-
 nico uocabulo *συνεχόμενα* uocant) duobus intelligi posse
 modis: Aut quia illorum subsistentia, quam illi *ὁντοσύνη* ap-
 pellāt, in eodem incipiat, & desinat temporis spatio. Se-
 cundum quod sanè dicimus significatum, lumē simul cum
 solis esse præsētia, quoniā solis posita subsistentia, ipsum
 ponitur esse luminis: qua etiam remota uel ablata, ipsum
 remoueri & interire lumen necesse est. Aut quia habitu-
 do quædam inter illa, siue respectus simul esse uidetur,
 quomodo omnia profecto relatiua simul esse dicuntur.
 Quod inquirunt simul esse non statim in relatiuorum ge-
 nere inferre essentia æqualem esse subsistentiā. Neq; hoc
 ab re (mehercule). Pater enim secundum essentia subsisten-
 tiam suā, filium præcedere animaduertitur: & mortuo
 etiam filio, secundum eandem restare percipitur essentia.
 Qui tamen secundū id esse quod à paternitatis (ut ita nunc
 dicam) respectu accipit, neq; ante ipsum filij esse, neq; post
 filij non esse remanere planè censetur. Ante genitum nan-
 que filium esse nondum erat, defuncto autē illo, destructus
 est, & omnino interiit ille paternitatis respectus. Et ut id
 ipsum clarius etiam explicem. Homo quidem & ante, &
 post filium quispiam & esse, & restare potest, pater au-
 tem sine filio remanere non potest. Huiusce autem rei uel
 manifestissima est ratio, quoniam ea quæ sunt ad aliud o-
 mnia, in eo dici uerisimile est simul esse, in quo manifestum
 & certum habent esse: suum autem proculdubio omnia
 habent esse in habitudine, siue respectu illo propter quem
 ad se inuicem dicuntur: per habitudinem igitur illam, siue

respectum simul esse illa clarissimum est. Caterum cum respectus ille inter duo semper sit, neque aliter reperiri, aut intelligi possit: alterutro certe corrupto & deficiente, respectum interim illum, & deficere necesse est. Duo igitur illa simul esse dicuntur, quando respectus inter illa integer & constans remanet, à quo solummodo. ut relatiua sint, & dicantur ea quæ huiusmodi sunt, manifestissime habere percipiuntur. Cum igitur (ut uisum est) eo usq; relatio maneat, quoadusq; respectus manet ille, eousq; autem respectus manet, quoadusq; duo saltem restauerint illa in quibus respectus firmari constareq; potest ille, geometrica (ut aiunt) rationis necessitate concluditur: Relatiua omnia ut huiusmodi existunt, simul natura esse, & posita se inuicem ponere, & interempto altero simul etiã alterum interire. Ex quibus corollarij etiam modo audacter potest inferri, relatiua omnia æqualiter dici, nullamq; illorũ esse diuisionem, qui relatiua per æquale & inæquale disternare contenderunt. Caterum quoniam huic sententiæ Aristotelis refragari uidetur autoritas, easq; non minus quæ retro adductæ sunt impugnant rationes, ut omnis non ab re dubitantium facessat ambiguitas, credulitatisq; in contrariam partem cautus euanescat timor, illos hoc in loco commonefaciendos sanè censeo, quòd ex superiori scilicet ipsius simul esse distinctione, rationes illæ nullo negotio recte dissolui possunt. Quamuis enim ante omnem scientiã res præfuerint scibiles: & destructo animantiũ genere, siue per suppositionem, seu aliquãdo per mundi ipsius conflagrationem (ut Stoicorum quondam natio, nunc uero Christiani constanter asseuerant) remaneantq; cælum & terræ globus, quæ sensus obiecta esse possunt: tamẽ neque ibi res ipsæ scibiles esse rite dicentur, nulla existente scientia

scientia, neque hic cælum & terræ, nullo remanente sensu, sensilia merito existimari poterunt. Relatio enim secundum quam talia dicebantur, huiusmodi respectu, habitudine uel illa interempta, euauit penitus: interimitur autem (ut diximus) ipse respectus, extremorum alterutro interempto. Res igitur ipsæ non simul esse censentur secundum suæ subsistentiæ essentia, quæ tamē eadē sub respectu uo tali esse, et simul esse, & simul nō esse uerissime sanè dicuntur. Quamobrem nō irrationabiliter etiā dixisse uidetur illi, qui hanc ad cætera prædicatorū genera, relatiuum differentiā assignare cōtenderūt, illa scilicet peculia ri quodā modo semper pluraliter proferri. Cum enim reliqua omnia prædicata tam singulari quàm plurali referantur uoce (substantiā nanq; dicimus, & substantias: & quantū, & quanta: quale quinetiā, & qualia) sola relatiua pluraliter tantummodo proferuntur. Dicimus enim ea quæ sunt ad aliquid, eorum quæ sunt ad aliquid, in ijs quæ sunt ad aliquid: quoniam non quemadmodum animal una est substantia, aut album unus est color, ita ea quæ sunt ad aliquid in unico tantum existunt perstantq; subiecto, sed duo ad minus esse illa necesse est. Habitus enim illa inter plura sese offert mediam, quam profecto alterutro cessante, interire summa est necessitas. Et ideo ut relatiua sint, simul esse oportet illa, inter quæ, siue in quibus consistit relatio: sunt igitur (ut retro dictum est) æqualiter, & simul natura relatiua omnia, nullaq; est in relatiuorum genere diuersitatis uera distinctio. Cæterum altera etiam ad rationes illas, nec minus sanè elegans & accommodata responsio, ex philosophi Aristotelis uerbis in metaphysicis commentarijs adduci potest, quam quoniam nostra in cursu est oratio, & nihil aliud sane est quod in præsen-

tiā potius nobis sit agendū, haudquaquam silere decernō.
 Hac enim de re uerba faciēs ille, Sēsilia, inquit, et scibilia,
 & huiusmodi reliqua, quæ dicuntur ad aliud, bisariā intelli-
 gi cōsiderari uē possūt, actu uidelicet, & potestate. Et sen-
 sile quidē actu, ad sensitiuū refertur actu: sensile uero po-
 testate, ad sensitiuū potestate suam habet relationē: cum
 igitur in superioribus dicebatur ante omnē scientiā rem
 præesse scibile, quoniā illud scibile potētiam innuit quan-
 dam, ad scientiā potestate existentem referri proculdubio
 necesse est: simul autē profecto sunt & potētia scibile, &
 illius potestate sciētia. Similiq; rationis modo post animā-
 tium interitum omniū, sensile potestate remanet, quia si=
 mul etiam est potestate sensitiuum, licet actu nō sit, quo=
 niam neq; sensile actu esse percipitur. Et hac etiā respon=
 sionis uia, illa de circuli quadratura peculiariter dissolui
 potest ratio: scibile enim quiddam est potestate, non actu
 circuli quadratura: quāobrem illius etiam simul potesta-
 te nō actu est sciētia: quāuis magnus Iamblichus scientiam
 de circuli quadratura apud Pythagoræos aliquādo uiguis-
 se cōfirmet, Sextumq; nomine quendam inter Pythagori-
 cos magni nominis uirū, plures huiusce rei demonstrationes
 scriptis suis memoriæ prodidisse: Archimedē quinctiā
 Syracusium, & Nicomedē præterea, & Apolloniū insi-
 gnes Pythagoræos, hac de re diffusissime pertractasse,
 quadratūq; æquale circulo per duplicē motum Cochlisfer-
 mis ab illis appellatæ lineæ, satis commode fuisse demon-
 stratum. Additq; insuper uir ille, circuli quadraturā si sci-
 bilis est, & à nobis penitus ignoretur, nihil prohibere ab
 alijs eam recte sciri percipi uē posse: partialiū quinetiam
 rerum cognitiones esse peculiāres, si non in paruo (ut ait)
 mundo, id est homine, at in magno certe mūdo, in reliquis
 scilicet

scilicet intellectiuis naturis. Ex quibus insigniter (meher-
 cule) patere potest id, quod à nobis retro etiã ostẽsum est,
 relatiua uidelicet omnia proculdubio simul esse natura,
 nullamq; diuersitatis uarietatem suscipere posse. Philoso-
 phi autem Aristotelis in Categorijs autoritas, quæ huius-
 modi de relatiuis sententiæ non mediocrem asserre uide-
 tur tumultum, haudquaquam nos, si recte illam pensicula-
 re uoluerimus, satis poterit commouere: ibi enim uir ille,
 ceu in introductorio nouiciorum libello, hac de re crassio-
 ri quodam doctrinæ modo pertractare uidetur, de qua ac-
 curatius profecto, et exquisitius in metaphysicis (ut dixi-
 mus) suis, uerba postmodum facere animaduertitur, ubi
 simul natura omnia esse relatiua certissimis monstrat ra-
 tionibus: quæ profecto res ex illius etiã elocutionis modo,
 in Categorijs inquam, perspicienti satis aperta & clara
 esse potest: utimur enim à principio statim hoc uerbo, ui-
 detur, quod nõ certam (ut patet) animi sententiã, sed pro-
 babilem quandam ex aliorũ sæpius dictis signare opinio-
 nem existimatur. Quo sanè loquendi modo non uitur ubi
 hac de re postmodum accuratius (ut dixi) certiusq; per-
 tractare censetur. Nihil est igitur quod illis insigniter mo-
 ueamur uerbis, cum & ratio (ut uidimus) naturaq; rela-
 tiuorum palàm ijs aduersetur, nosq; contrarium sibi con-
 tingere doceat & idem ipse autor, qui illa in Catego-
 rijs (ut diximus) non satis constanter affirmat: in Meta-
 physicis postmodum suis, quibus in commentarijs uniuersum
 ingenij sui acumen manifesto expressisse censetur, ali-
 ter loquatur & sentiat. Nam rationes ab illo contra ue-
 ram sententiam in Categorijs adductæ satis commode (ut
 uidistis) à nobis de antiquorum sententia sunt dissolutæ.
 Omni igitur ambiguitate semota (ut ad summam nostra
 concluda

cōcludatur oratio)relatiua ego omnia simul natura esse
 & æqualiter dici oportere asscueranter iudico & con=
 tendo. Hæc sunt Siucrine, quæ ego pauca de multis hæc
 super re in præsentia tibi dicere habui. Tu qua ingenij es
 perspicacia, isthæc ipsa postmodum recto iudicij exami=
 ne pensiculabis, & si uere tibi commodèq; explicata fuise
 se uidebuntur, Græcis id acceptum referas autoribus: si
 minus, elegantiùs tu quippiam, & elucubratum magis de
 nostris, quod adhuc forsitan me latere potest, cum huc re=
 diero, recensebis. Tum ille, E quidem, inquit, Leonice plus
 multo quàm sperabam effecisti, & licet mihi de te multa
 eruditaq; omnia pollicebar, hæc tamen in re expectationẽ
 longè superasti meam. Tota enim hæc quæstio in præsen=
 tia ita est à te pertractata, adeo bene excussa, ut meo qui=
 dem iudicio, nedum reperiri quippiam, quod magis qua=
 dret, sed nec optari sanè melius possit. Veritas enim (ut
 aiunt) unica est, cui recta omnia cōcinunt. Quamobrẽ ni=
 hil est quod de quopiam queritando, amplius negotij ha=
 beam, quãdo hæc quæ dicta sunt, & ipsi consentire ratio=
 ni, & antiquis placeri philosophis, ijs præsertim quos re=
 censuisti, clarissime ostensum est. Cæterum quia de circu=
 li quadratura à nonnullis Pythagoreorum pertractatum
 fuisse, et scriptis etiã mādatur, retro dixisti, libenter abs=
 te scire nunc uellem, si illorum apud Græcos adhuc exa=
 tant commentaria, an ut alia pleraq; bona, sic & ista lon=
 ga nobis inuidit dies. Intericre inquam Seuerine, interie=
 re, nō solum ista, sed alia etiã multa, quæ si haberẽtur ho=
 die, elegãtior (mehercule) & eruditior multo, nostra iure
 censeretur ætas, quæ & alioqui, si qua sibi supersunt bo=
 na, præpostero tamen mentis iudicio haudquaquam recte
 cognoscere, aut illa admittere uidetur, quando neq; opti=
 marum

narum artiū studijs amplius, neq; ijs qui ea sectantur & iouent, ullus sanè est honor, sed omnia ponuntur in censu, uniuerſa diuitijs parent, ad quas fuis (ut aiunt) habenis, bonis contemptis artibus, uniuerſorum in præſentia prosperāt & affatim anhelāt studia. Hic ille, Vera, inquit, naras Leonice, sed pernicioſiorē profecto aliam (nisi propitiū illam auerterit Deus) literarum studijs imminere uideo pestem, à qua non iactura ſolummodo & calamitas aliqua, sed extremus illorum extimeſcendus est interitus. Quid iſthuc est inquam quod dicis? Et ille, Non ne percipis, inquit, quos bellorum tumultus, quantosq; armorum ſtrepitus, in Chriſtiana nuper republica furens commouit discordia? Qui niſi dei benignitate aliquo ſedentur cōponantur uē modo, non literarum ſolummodo (quod diximus) sed omnium penitus bonarum artium, & cultioris etiam uitæ formidandus est interitus. An neſcis Platonem tuum, ceu ex oraculi uoce dicere, peſtilentias & bella, diſciplinis quāmaxime aduerſari, & officere? Tum ego, Ne deſperes, inquam, Seuerine, aut animo cadas: iſthæc enim Deus Opt. Max. bonitate ſua cito (ut arbitror) uertet in melius, & dominici paſtor ille & rector gregis, illius nutu commiſſas ſibi oues haudquaquā deſeret, & perire patietur. Quanquam huiusmodi sanè res non temere (ut uulgo ſtultè creditur) aut infelici quodā caſu, hominū accidere generi exiſtimādum eſt, ſed certis annorū curriculum, & temporū quibuſdam periodis, ad illorum etiam utilitatem, ſalubremq; animorum medelam contingere, & euenire credūtur. Quomodo iſthuc, inquit, Leonice? Hoc inquam modo: ſicut enim partiali ſolitarioq; animanti leuiſ plerunq; febricula, & ſobrius ſæpe tenuis diætæ conſert cibus, ſanguinisq; interdum miſſio ex redūdanti corporis periculo

periculosoq; habitu stabilem effecit sanitatē: ita uniuersi animantium generi, quæ perniciosissima uulgo existimantur mala, pestilentia inquam, & bella, & fames, non modo non incommoda & aduersa, sed salutaria plerunq; & prospera sunt iudicanda, ab ijs uidelicet, qui non minuta ista & partialia singularium quorundam cernunt euenta, sed qui uniuersam penitus rerum naturam non conuiuentibus mentis oculis introspicere, illiusq; rimari causas rite possūt. Sed iam (ut audio) Seuerine tintinnabulū ad uespertinas te uocat horas, quamobrē loquēdi finem (si ita tibi uidetur) hic faciamus. Tum ille, Faciamus, inquit, ut dicis Leonice, sed hac cōditione, ut ad nos te cito reuersurū pollicearis, & hac de re quæ admirabilis sanē mihi esse uidetur, longiores postmodū sermones facias. Vt lubet inquam Seuerine, tibi enim & nunc, & semper posthac, nostra quātulacunq; est præsto erit opera. Iis dictis, surreximus omnes, & ille quidem rectā ad templum ire perrexit: nos uero deambulatū ad Hippodromi spatia descēdimus.

B O N O M I N V S,

S I V E,
D E A L I C A.

O M I N I C V S Bonominus Brixianus, qui nuper Taruisij est defunctus, uir fuit (ut nosti) Latymere doctissime cum Græcis & Latinis literis liberaliter eruditus, tum uita & moribus adeo probis & candidis, ut & omnibus serē alijs, & ijs præcipue, quibus cum consueuerat, gratus & amabilis non immerito semper extiterit. Is cum ab humanioribus aliquando

quando literis ad philosophiæ studia, mox etiam ad medicinæ se cōpendia contulisset, ut sibi suisq; pro uirili emolumento esse posset (urgebant enim illum, ut plerosq; solent, domesticæ angustia) qua erat animi libertate & candore, stomachari non desinebat quotidie philosophorum & medicorum non minus nostræ ætatis inscitiam, qui cum materiam quique suam, & subiectas illis disciplinis res, Latinis planè uerbis, & decenti orationis cōtextu, si paululum operæ adhibuissent, luculenter docere & pertractare possent, deprauatæ tamen consuetudinis absorpti æstu, omnia sursum uersus confuso scriptiois stylo, barbarisq; rerum uocabulis fœdarent & peruerteret. Quã obrem multam ille salutem præceptoribus dicens & libris, à publicisq; abdicatus scholarum gymnasijs, totum se tandem isthæc nauseans antiquis euoluendis autoribus cum Græcis, tum Latinis multa & iugi diligentia & studio tradidit, breuiq; profecit adeo, ut quæ illi immensis uoluminibus librorumq; acruis posteritati mādauere præcepta, mentis ille thesauro collocata, & tenaciter custodiret omnia, & facile etiam cum libuisset, expromeret: uerum ille (proh dolor) quo maxime tempore & sibi & alijs usui esse potuerat, repentino è luce sublatus, magnum sui desiderium omnibus bonis, nobis uero etiam non mediocrem reliquit dolorem: qui tali orbatu amico, haud sanè paruam breuiq; resarciendam iacturam fecisse uidemur. Is igitur dū Patuij superioribus annis studiorū gratia esset, domumq; nostram frequētaret (semper enim aliquid cū de Græcis, tum de Latinis rerū scriptoribus secū afferebat, quo quiuis indagator teneretur excitareturq; animus) forte die quadam ad nos uenit, in qua postmeridianis horis ego & Hieronymus Rufus medicus, uir (ut nosti)

nostri) utriusque linguae peritus, in inferiori porticu nostra soli sedebamus: sermo autem erat nobis, nescio quomodo ex Plinij secundi excitatus uerbis, de celebratissima apud ueteres Alica coëfectura, de qua se multum diuq; dubitasse Rußus dicebat: addebat'que insuper illius naturam coëpositionisq; modum, sicut etiam Ptisanæ, à paucis admodum nostra ætate medicis dignosci, certò se credere. Ingressus igitur Bonominus, post consueta illa quæ primo dici solent: Nescio, inquit, si sermonibus uestris intempestiuus accedo: uideo enim uos hoc in loco cum solos, tum secreto (ut arbitror) colloquentes: quamobrem paululum, hinc facessam, & in pratulo isto, donec inceptum perficiatis sermonem, solus interim deambulabo. & alioqui percommode mihi illa se rosaria offerre uidentur, quæ me & amoenissima simul umbra, & florum suauitate & gratia iucunde oblectabunt. Tum ego, Non est, inquam, Bonomine hanc ob causam cur hinc abscedere uelis, nihil enim inter nos secreto conferimus: quanquam quid tam arcanum & arduum esse potest, omniq; à nobis silentio suppressum, quod tibi & fidei tuæ tutò committi non possit, ijs præsertim initiato sacris, quorum mysteria ego & Rußus in præsentia pertractabamus? Et quid tandem isthuc est? inquit ille, aueo enim audire quæ inuicem conferebatis, quando illa, ut uidetur, ad me etiam pertinere posse confido. Et ego, Attulit, inquã, ex Pliniana lectione Rußus noster non contemnendam sanè de Alica quaestio nem, quæ cum notissima prioribus esset seculis, pluribusq; uitæ commodis utilissima, & multis morborum remedijs laudatissima, hac certe ætate cum bonarum artium luctuoso interitu, tum illorum etiam, qui hæc profitentur, ignauia & ruditate, adeo exoleuit & euauuit, ut ne de nomi-

ne quidem

nine quidē noscatur. Tum ille, Vera, inquit, narras Leonice, & ego simul de causa in plerisq; cum primū arti medicae appuli, multū diuq; nauseans, stomachari iam desij, & ad ipsorum ineptias prorsus occallui. Ceterum haudquaquam desperandum est: nam quod huiusmodi in rebus Medici nequeunt, Grammatici certe possunt, qui ceu derelictum illorum patrimoniū iure sibi uendicantes, soli nūc Galenos, Paulos, Celsos, Plinius, interpretantur & docēt. Quare ab illis cum plurium aliorum quæ ignorant Medici, tum Alicæ ipsius uim & confecturam petendam esse existimo. Tum Russus leuiter (ut mihi uisum est) commotus, Quos tu, inquit, grāmaticos nobis inculcas Bonomine, aut quæ isthæc tam arrogans est natio, quæ sine iure manu confertum in alienas possessiones licenter adeo inuolat? cum quibus satis bene (mehercule) & feliciter agi uidebitur, si nuda rerum uocabula, ijs quæ ad se non pertinent rebus dimissis, commode interpretari & explicare possent, & non impudenter (ut faciunt) & ridicule interdum supra crepidam (ut aiunt) iudicare contenderent. quāquam si quid forte huiusmodi aliquando ex ijs nōnulli aggredi audent, ut philosophos medicosq; decēter agant, grammaticam illos proculdubio exuere necesse est. Non ut grammaticos igitur de uocabulis, sed ut philosophos & medicos de rebus tum disertantes illos audimus. Verum hos nunc (si placet) bona cum uenia missos faciamus, idq; potius, quod agere institueramus, te adiutore & socio (si ita uidetur) peragamus. Mihi quidem, inquit Bonominus, & uidetur, & summe placet, quare institutum de Alicæ sermonē proseguere Leonice. Tū ego, De Alicæ, inquā, dicebamus Bonomine re cum in medicina ipsa, tum in omni et iā uitæ usu præstātissima, cuius naturā & uim co minus

nostri temporis cognoscunt medici, quo de illa ab antiquis diuersimode sanè, & inuolute admodum memoria, proditum est. Quidam enim ex illis de Alica ueluti de tritici generis grano perscribere: nonnulli autè, illam confectionem siue compositionem esse quandam uoluere. Sed quid ego nunc diuersos de Alica diuersa sensisse commemo, quando unus & idem autor Plinius secundus hac ipsa de re, tū ut semine, tum ut cōfectione, diuersis in locis commentariorū suorum loquatur & sentiat? Libro enim **xviii. capite vii.** quod de frugū uarijs generibus et natura inscribitur, in principio ferè, ubi de satione agit, isthac ad uerbū scribit. Aliqui uerna Miliū, Panicū, Lenatē, Cicer, Alicā appellant. Et rursum circa medium ferè, Tunica frumēto plures, Hordeū maxime nudū & Alica, sed præcipue Auena. Quibus in locis de Alica illum, ut de Tritici quodā genere uerba facere, meridiano (ut aiūt) clarius est sole. Eodem autem libro, capite undecimo circa finem, ubi de Alica suo pertractat loco, illius cōfectionis modum pluribus sanè docet uerbis. Et libro uigesimo secūdo, capite uigesimo quinto, ubi de frugum medicinis, Alica, inquit, res Romana est, & nō pridem excogitata, alioqui non ptisanæ potius laudes scripsissent Græci: nōdum arbitror Pōpeij Magni ætate in usu fuisse, et ideo uix quicquam de ea scriptū ab Asclepiadis schola: & quæ sequuntur. Et rursum paulo infrà, ubi de Ptisana loquitur: Ptisana, inquit, quæ ex ordeo fit, laudes uno uolumine condidit Hippocrates, quæ nūc omnes in Alicam transeunt. & quātum innocētior Alica? Ex quibus de Alica illū ut de farina cuiusdā confectione & cōpositura loqui, clarissimo apparet indicio, siquidem cum Ptisana cōparari, & illius æquare laudes uerissime potest Alica. Quamobrē mi B=

nomine

nomine si æqui esse uolumus, nō adeo fortasse, ut initio fecimus, nostrates sunt taxādi medici, si Alicæ uim & naturam ignorāt. Res enim ambigua est, & inuoluta, & aliter ab alijs, imò ab eodē (ut uidimus) Plinio diuersimode recēsetur. Tū Bonominus, Vera, inquit, narras Leonice, et ego aliquādo Plinium legens, quo certe autore nimium delector, hac de re memini nonnihil dubitasse, uerum alia mihi tū erant agenda, quæ ab huiusmodi me disquisitione sanè reuocarunt. Quamobrem hac ipsa de re (quando nihil aliud agimus) si placet, in præsentia diligētius cōsideremus. Et ad me respiciens, Imò uero tu potius, inquit, Leonice, siquid parati habes, nam te habere non dubitamus, largiter deprome, & controuersam hanc rē quo maxime potes modo dissolue. Ego enim tacitus te auscultabo: nanq; auditorē tantum me hodie, non disceptatorē præsare decreui. Et ego, Quid tu inquam Bonomine hoc mihi oneris imponis, & nō potius Russus, qui et elegās est medicus, et artem insigniter exercet illam, & isthæc ipsa ad manū habere debet, id ipsum bono iure exposulas? Ego enim (ut scis) succisui (ut aiunt) operis hæc studia delibauī potius quàm elucubraui. Tū Russus, noli, inquit, Leonice inficari quod tādīu debes: huiusmodi enim de re à principio sermonē ideo moui, ut tuā elicerē sentētiam. Sed nescio quomodo præuenit me Bonominus, idq; abs te petijt, quod ego mox enixe etiā cōtēdere decreuerā. Age igitur perspicue (ut soles) & una utriq; opera facito satis. Tum ego, Ista quidem, inquā, socij manifesta est uis, qui de cōposito huc nō simul acceßistis, ut demū me id quod uolebatis uero arbitrato facere cogcretis, cædēdū est igitur, quando (ut in Græco est prouerbio) cōtra duos neq; Hercules. Cæterum memētote me ea quæ nūc dicam, non mathematica

(quod aiunt) necessitate comprobaturū. Neq; enim ea, de qua agendum est materia taliū capax est ostensionum: & alioqui propter uocabulorum tum inuersionem, tum etiā confusionem magna profecto in eiusmodi re subest obscuritas, ut luculenter etiā in suo de alimentis cōmentario Galenus attestatur: magnam asserens in triticeo genere apud ueteres medicos uersari difficultatem propter nomīnū cōfusionem, cum plerunque à scriptoribus ex illorum numero nonnulla prætermittantur: aliās autem uni generi duo applicentur uocabula: ccu, inquit, idē esse Tiphē et Olyram nonnulli uoluere. Exactas igitur huiusce rei demonstrationum certitudines in præsentia ne requiratis, & satis contenti sitis, si quæcunque uobis adduxero, cū fide dignorum testimonijs, tum probabili etiam coniectura concludam. Ut lubet, inquit Bonominus, & ut apte poteris: nō enim latet nos, quā in ijs rebus, quæ opinionibus cōstant, & diuersa sint hominū iudicia, & ancipites undequaque uersentur angustiae: tu modo rē aggredere, nāq; omnia (ut confidimus) tibi recte feliciterq; succedēt. Tum ego, Alicæ inquam nomen (si bene quæ retro Plinij uerbis sunt adducta animaduertistis) anceps & ambiguū nō immerito esse uidetur. Et tum Triticei cuiuspiam generis granum apud ueteres signare autores, tum confectio-nem quandam à Plinio, & à plerisque antiquorum enarratam decernere animaduertitur. Cæterum id genus Tritici quod Alicæ, cum pro simplici & uniusmodi accipitur grano, designare uidetur, id esse iure contenderim, quod Græci Zcam appellāt, siue alterā illius speciem. Cū enim ipsius (ut apud Dioscoridem legimus) duæ sint species, & una quidem simplex, altera uero quæ ob plures circumiectas tunicas appellatur Dicoccus, generis quidē Latinum assignat

assignat Plinius nomē: ait enim semē illud duntaxat uocari: specierum autē, simplicis quidem illius uocabulū esse Alicam, apud illum sanē affirmauerim. Alterius uero, nulum (quod sciā) neq; apud Græcos, neq; apud nostros propriū reperitur nomen. Nā Dicocus penes Dioscoridē cū cōtra simplicē ponatur Zeā, & ex altera illi parte respondeat, nō nomē esse, sed speciei illius differentia, & ceu cognomē non immerito uideri potest. Cū ex Zeis aliā quidē unico uestiātur inuolucro, quæ simplices à Dioscoride uocātur: Aliā uero pluribus sepiātur tuniculis, quas Dicocos idē appellat autor. Quā tamē Zeā speciei à Dioscoride Dicoccō appellatā, si quisquā in huiusmodi re probabili est locus cōiecturæ, eā esse crediderim, quā in Africa degenerare scribit Plinius, cuius latiores & nigriores sunt spicæ, & breuis stipula: & ex qua adulterinam factitari solitam fuisse Alicam idem recenset autor. Nihil prohibet igitur (ut diximus) illi simplici Zeā speciei Alicæ inditum fuisse nomen, quæ inter uerna à Plinio cōmemoratur grana, & maxime nuda (ut retro uidimus) esse perhibetur. Et hanc Zeā speciem (si coniectura uti licet) id esse non abauerim quod nunc Speltam uocāt. Et hoc etiā modo Theodorus Gaza uir utriusq; linguæ exactissimus, in Theophrasti de stirpibus interpretatione, Zeam conuertit. Et Simon Ianuensis, uir in medicinæ arte & eruditus & diligens, Græcēq; non imperitus, & in uerborum maxime significatis, siquis alius, industrius, Alicam frumenti genus scribit esse, quā quidā, inquit, speltā dixere. Est præterea oppidū in Italiæ confinibus iuxta Alpes quā in Germaniam itur, quod Feltrium uocant. Huius tractus accolæ quod nos uulgo Speltam, passim pro Alicā immutatis literis Algam appellant. Cui etiā nonnihil suffragari uidetur

sententiæ , ea quæ de Zea , ab autoribus memoriæ sunt prodita. Scribit enim in suis de Alimētis commentarijs Galenus , quòd duo ex Triticeis seminibus frumento eximie uidentur esse similia, Tiphe scilicet & Zea, & quòd frigidis præcipue gaudet locis Zea, quoniam inter alia frigori bus resistit maxime. Theophrastus quinetiam libro de stirpibus v 11. de Tritici scribēs generibus isthæc ad litteram subdit : Ex illorum numero quæ in frumenti ordeiq; sunt interstitio, & utrisq; sunt similia, Zea scilicet & Tiphe, Olyra & Bromo , ualentior & fruticosior est ipsa Zea. Multiradix enim est , & multicalama : illius autem granum cum uilissimum est , tum omnibus frè gratum animalibus . Et paulo post : Tiphe omnium est leuissima & unicalama. Quamobrem terram amat tenuem, & nō pinguem sicut Zea & fertilem . Ex quibus si ullus (ut dixi) apte coniectantibus est locus, Zeam esse illam, quam uulgo speltam uocamus, omni prorsus assueuratione cōtenderim. Caterum isthæc in præsentia ita constituatur & iaceant, & sic à nobis (nisi aliter uobis uidetur) esse censeantur: siquis autem posthac melius, uincat ueritas, & inuentori gratiæ erunt agenda. Et de Zea quidem & Alica cum Triticeum designant granum , hætenus sit à nobis pertractatum. De fictitia uero Alica, & de eo quod chōdrōn Græci uocant, rem Alicæ & natura & uiribus per quàm similem, ino Alicæ genus alterū deinceps , si placet, perscrutemur. Chondrum, siue Chondrus (nam utroq; apud ueteres legitur modo) inter Triticea esse genera clarius est , quàm ut longiori ostensionis nunc indigeat ambitu. Galenus enim (nam sæpe mihi præclarissimus autor est citandus) in suis de alimentis commentarijs , solitarium de chondro facit caput , cumq; inter Triticeas connumerat

species

Species, additq; insuper illum & commode corpus alere, tenacisq; & glutinosi esse succi. Paulus quinetiam Aegineta, secundum Galenum medicorum facile princeps, in primo uiatrici sui commentario, Inter Triticea, inquit, appellata semina chondrus & nutrit probe, & tenacem esse Chondrus. ficit succum, qui si diluatur, malus certe redditur, cum celeriter crassecat. Melior autem illius est succus cum Ptisanæ in modum bene decoquitur. Dioscorides præterea non absimilem Tiphæ illum esse dixit. Et ad summam in Triticeo connumerat genere: quem non ab re id esse crediderim, quod nostri Far appellant, cum ex illius similitudine formæ ductus, tum ex remedijs etiã quæ Farri probe quadrare animaduertuntur. Cæterum quoniam hoc quispiam in loco haud oscitans rerum existimator nō immerito ambigere posset, de fæctitio chondro, quem nonnulli Alicam esse uoluerunt, cum id Triticei esse generis apud Galenū (ut uidimus) iam sit constitutum, diligenter animaduertendum esse censeo, quemadmodum retro diximus, Alicæ nomen & simplex designare granum, & confectio-nem insuper illam à Dioscoride insigniter enarratam, quā nonnulli apud nostros uocauere Alicam. Non est igitur quod moueamini, & ambigui animi sitis, si pro Tritico aliquando chondrus, aliquando pro confectioe illa apud ueteres rerū scriptores legitur. Plures enim sunt res, quam rerum uocabula, ad quas illis uel relictis, uel opinino neglectis mentem adhibere Physici sanè debent. His etiã nō inutiliter adijciendum esse iudico, aliquãdo ex Zcæ fæctitatā fuisse Alicā, ut Plinius & Dioscorides clare attestantur: nonnunquam ex frumento, ut idem recenset Plinius, quod interpretâtes nonnulli haud perperā (ut arbitror) ex frumenti, inquit, genere fieri solitam, quod posteriores

chondrum denominauere; nam hoc uocabulum neq; apud Thcophrastum (quod sciam) neq; apud quempiam ueterrum autorum uspiam legitur, sed far, & alia similia tritici **Triticum.** ceo ponebantur in genere: latum enim apud illos Tritici erat uocabulum, & non solum frumentū, sed Zea etiā, & Olyra, & Tiphe, & Bromus illo passim appellabantur nomine. Est autem Tiphe (ut hoc etiam obiter dicatur) describente Galeno, corporis colore, & spissitudine caliditateq; frumento haudquaquam absimilis, nisi quod breuior est & exilior, ut paruum uideri possit frumentum. Leuior autem & facilior, & ideo innocue illa equos uesci, qui alioqui à frumēti ui comesti manifesto lædi percipiuntur. **Bromus.** Bromum autem Auenam esse apud Dioscoridē in adiūctis uetustis legi: sunt qui id esse Tritici affirmant genus, quod scandellam uulgo appellant, cuius omnis Germaniæ, Galliarumq; etiam tractus feraces nimium esse dicuntur: ueterinorum autem illum esse tantummodo cibum Galenus memoriæ prodidit, & ad nullum prorsus hominum facere usum, nisi si quādo ualida illos urserit fames, cum alijs supra enarratis naturaliter & inuocue uescantur homines. Ad summam igitur (ut breuiter ea quæ dicta sunt colligam, omniaq; sub uno contuitu pro uirili nunc reponā) duplicem Alicæ naturā, fictitiæ scilicet & naturalis existimo: similiq; modo chondrū & natura sui consistare, & hominū composituræ ascribi debere iudico, Alicamq; Zeæ simplicis speciem quam speltam uocāt: Chondrū autē esse far: ita quod ex farre & ex spelta, id est Zea, itidem laudatissima illa apud ueteres fiebat Alicia. Quā obre Plinius (ut opinor) libro xvi. cap. vii. cū scribit, Qui Zea utūtur, nō habēt far, ambo hæc triticea semina, cognationē ad se inuicē habere quādā et similitudinē, innuere

innuere potius quàm exprimere uidetur: cum tamen alterũ ab altero (ut plerunq; accidit) bonitate aliqua & peculiari quadam naturæ proprietate uincatur. Neq; hoc in loco id me ualde mouet, quod Paulus Aegineta uaticini sui lib. primo, capite (si recte memini) LXXVIII. scriptum reliquit, ubi Alicam à Chondro manifeste disternare uideatur: quẽ tu locũ Hieronymi nudius quartus, dum hac de re fortè inter nos esset sermo, scite mehercule, & memoriter recẽsuisti. Nõ crit autẽ fortasse malũ (ut arbitror) Bonomini nostri causa uerba illius, ut iacent, recensere, & Latina etiã facere, ut ex illis rectè interpretatis omnis postmodum hac super re facessat controuersia. Hæc autem ad literam scribit ille: Ex frumentaceo genere chondrus quidem eximie corpus alit, & glutinosum generat succum. Verum dilutus efficitur malus, quoniam cum crassescat, facile perseuerat incoctus. Melior autem illius est succus cum totus rectè decoquitur, quẽadmodum ptisana. Alica autem in alijs quidem, chondro est perquàm similis, nisi quòd illo uentrem magis astringit. Rursumq; libro 111. capite LXII. Pro cibo, inquit, dādus est chondrus ex oxycrato dilutus, seu oriza, siue Alica, à uino autem illum penitus prohibētes. Aquā ex austeris malis, aut omphaco mel, siue huiusmodi quippiā illi propinabimus. Ex quibus de Pauli apparet sententia, aliud esse Chondrũ ab Alica, quod profecto non inficias eo, si rationem, quam sequitur ille, admittere & probe tenere uoluerimus. Paulus enim ceu ueterũ postremus medicorũ, exactiori uocabula examinans cura, & ætatis suæ usitatũ forsitan loquẽdi seruās modũ, confectiõnẽ quidẽ illam, quæ ex Zea fiebat, Alicā maluit appellare: nam Zea speciei quandā à Latinis Alicā nouerat uocitatam: cõpositionẽ autẽ cam, quæ ex farre cõ

stabat, quod (ut diximus) chondrum posteriores uocauere Græci, grano suo cognominē chondrū appellare maluit: nihil tamen obstat (ut opinor) apud autores utraq; confectioes illas, quæ tum ex færrē, tum ex Zea ipsa factitari sunt solitæ, à Latinis quidē Alicam, à Græcis uerò Chondrum promiscuo appellata fuisse uocabulo: & ideo sicut Alicæ nomē apud antiquiores non reperitur Græcos: ita Chondri uocabulo Latini nō sunt usi autores, cum tamen utriq; tam ex Zea, quàm ex færrē cōfectiones illas factitare sint soliti. Posteriores autē medici, de quorū numero cēsetur Paulus, exactiori quascunq; res diligētia perpēdentes, ex Zea & færrē cū natura, tum uiribus perquàm similes cōfectiones, aliqua tamē peculiari proprietate præditas, uocabulis etiā distēminare cupiētes, illam quidē Alicam, hanc uerò Chondrū appellare uoluerūt. Nihil igitur prohibet (ut arbitror) Alicam & Chondrum idem apud ueteres rerū scriptores designare, cū tam Alicā quàm Chondrus ex færrē fierent & Zea: & peculiari tamen quadam diffērentiæ nota Alicam à Chondro distare, ea qua posteriores medici nominum rerumq; usi sunt ratione. Cæterū in hac etiā sermonis nostrī ad calcē festinātis peroratione, isthuc obiter nō tacuerim, haud rectē illos meo iudicio facere, qui Alicæ nomē aspirandum esse cēsent: siue enim usum ipsum, et antiqua scriptiois indicia sequimur, sine aspiratione apud omnes ferē autores, omnibus in locis isthac reperitur dictio: seu rectē malumus obsequi rationi, cū ab alendo (ut uoluerē grāmatici) denominetur Alicā, neq; sic aspirationis admittere debet notam. Ad hæc ne cū Græco coincidat nomine, Halica, quod in plurali casu sale maceratas significat res, ab aspiratione illius nominis prorsus abstinendum esse censuerim. Et hæc de Alicā & Chondro

Chondro, quæ mihi in præsentia ad manum uenerunt, ut breuius fieri potuit, uobis sunt à me nunc explicata, nō ut meam sanè ijs de rebus sententiam indubitatam, certamq; esse contenderem (non enim adeo mihi ipse placeo) sed ut uobis potius paratam sedulæ disquisitionis ansam præberem: scio enim quo ingenio, & qua eruditione uterq; sit uestrum, & quantum etiam coniunctis studijs huiusmodi efficere ualeāt ingenia. Quare agite socij, & nostræ ætatis cum medicis, tum philosophis, uestris studijs pro uirili cōsulite et faucte. Et Bonominus, Faciemus, inquit, ut suades Leonice, ut pro Russo etiam tibi respondeam, modo facultas nobis detur & otii: & tales simus, quales tu nos esse existimas. Cæterum quæ abs te nunc de Alica dicta sunt & Chondro, mihi profecto ita quadrare uidentur, ut meliora à nobis præsertim reperiri posse sanè diffidam, nisi aliter Russo uidetur. Mihi quidem, inquit ille, quæ dicta fuere ualde placent, sed posthac etiam uidebimus. Sub ijs dictis assurreximus omnes, & Russus quidē ad ægrotos suos uisendos ire perrexit: ego autem & Bonominus in bibliotheculam nostram ingressi sumus.

SANNUTVS,

SIVE,

DE LVDO TALARIO.



V M apud Marcum Sannutum Capella, uirum (ut nosti) senatorij ordinis facile primarium, et cum ingenio excusso, tum uariactiam eruditione singulārē, aliquando Venetijs cœnaremus ego & Fuscus frater, nonnulliq; præterea illius domestici amici, quibus
cum

cum ille, si quando à maioribus reipub. negotijs uacabat, libenter otiari & conuiuere solebat, inter quos Franciscus Priolus, & Benedictus Longus, & Antonius Canalis erant. Post apparatissimas epulas, & splendidissimum omnium obsoniorum genere conuiuium, quo omnes opipere & liberaliter fueramus accepti (anniuersaria enim natalitia sua fortè celebrabat) appositis iam secūdis mensis, circiter accensis luminibus, Alexāder Leopardus, uir mechanicæ omnisperitissimus, & Sannuto inter paucos charus, ad nos ingressus est. Quem cum omnes non immerito taxarent, & carperent, turpemq; officij desertorem insimularent, Sannutusq; etiam illum durius appellauisset, Quid tu, inquit ille, Marce, uosq; cæteri omnes indicta (ut aiunt) causa in præsentia me tam propensis animis, & tam facile condemnatis, & non perquiritis potius, cur ego, qui alijs semper in rebus præsto uobis & impiger esse soleo, in hac una, & omnium simul uestrum, & mei penè ipsius oblitus fuisse uideor, qui & tali defui officio, & tam bonā insuper perdidici cœnā? Hic cum rectè dicere uideretur, et omnes eū pariter hortaremur, ut moræ illius causam in medium afferret: nō enim uile quiddam uidebatur, & contemnendū fuisse, quod ille huic officio præuertendum putasset, & Priolus etiā ut hoc faceret illum sanè impensius rogaret: Quid uos, inquit Fuscus, intempestiue adeo Leopardo molesti estis meo, qui scro huc et incœnatus ueniens comesse (ut arbitror) magis quàm disertare nunc cupit. Permittite igitur, si placet, ut fame prius procul expulsa, ea postmodū satur dicat, & ordine referat, quæ alioqui famescens nō ab re confundere & inculcare cōtenderet. Ita profecto, inquit Marcus, & simul astantibus iussit pueris ut esculentorum fercula quædam, quæ
adhuc

adhuc in repositorio aderant, Leopardo asserrent, illiq;
 sedulo ministrarēt. Interea loci cœnāte illo, secundis etiā
 remotis iam mēsis, dum Sannutus & Longus nescio quid
 serio (ut ex uultu coniectari licebat) inter se colloqueren-
 tur, cōuersus ad Canalem Priolus, Quid cessamus, inquit,
 mi Canalis, aut quid potius in præsentia nobis est agendū
 (nisi fortè bene cœnati stertere hic malumus) quàm ut hoc
 tēporis spatium donec cubitū inus, aliqua lusus iucundi-
 tate hilariter transmittēdum curemus? Hic enim, ad me re-
 spiciens, lectione aliqua oblectare se cogitat, fortè nanq;
 libellum quendam in triclinij angulo iacentem sumpsisse
 me et reserasse cōspexerat. Et Canalis, Vt libet, inquit, mi
 Priole, quādo aliud nihil in præsentia agimus. Verū quod
 potissimū ludicri genus exordiri nunc uolumus? Hic San-
 nutus, qui sermonem (ut arbitror) cum Longo inceptum,
 ne cōiunctus hilaritate officeret, obmiserat, & in aliud di-
 stulerat tempus, Cui potius, inquit, quàm consueto nobis
 lusui operam dabitis, qui ut ingenij plurimum, ita minimū
 fortunæ non immerito in se habere percipitur: & in quo
 uterq; uestrum primas sibi uēdicare anxie semper studet?
 Et cum dicto astanti innuit puero, qui illorum non igna-
 rus consuetudinis, ocys accurrens alucolum cum latrun-
 culis attulit, & in mensæ reposuit medio. Hic dum illi se
 lusui parant, ad Fuscum respiciens Sannutus, Quanta, in-
 quit, mi Fusce cum ludorum omnium, tum huiusce præci-
 pue adest amœnitas & gratia, quæ non solum inuitare
 suauiter, sed ualidè etiam & diutius continere animorum
 studia potest. Quosdam etenim noui, & si uellem, nomi-
 nare etiam nunc possem, nullam aliam ob rem, nisi ut lu-
 derēt, cibi somniq; oblitos (ut cætera obmittam alia) dies
 cum noctibus sæpe ludendo continuasse, ut non alia (ut
 arbitror

arbitror) de causa isthæc ipsa res, nisi ob temporis iacturam, quam uel maximam aleatores faciunt, male audire, & ad infamiam uenisse uideatur. Nec immerito mehercule, inquit Fuscus, quando inter res maxime hominum generi expectandas preciosissimum sanè à dijs immortalibus concessum sit tempus, cuius uel minima etiam iactura recte perpendenti omnia, magni semper est existimanda. Non ab re igitur si quis istiusmodi rem dialecticorū more definire uellet, & temporis inanem quandam translationem ludum esse diceret, eleganter profecto & accomodate illius uim naturamq; describeret, necnon illius etiam originem, primaq; recte comminisceretur exordia. Et quænam fuisse illa, inquit Sannutus? Audire enim abs te cupio mi Fuscæ, si quid forte reconditi hac super re teneas: nam Grammaticorum pleriq; quos uiderim cum alia nonnulla, tum isthuc latrunculorū ludicrum ad Palamedem Nauplij refrunt, qui id in diutina Ilij obsidione & inuenerit primus, & Græcorum etiam duces otio marcescentes hoc solatij genere nō inutiliter oblectauerit. Tum Fuscus, Scribuntur ista, inquit, ut memorasti Sannute: Cæterum de illorum inuentione antiquior etiam Troianis temporibus extat fama, ut apud Herodotū & Pausaniam probatissimos sanè autores memoriæ proditum est. Leonicus quinctiam frater in suis de uaria historia cōmentarijs, qui adhuc in uulgus nō prodire, huiusmodi meminit rei, à quo (ut arbitror) opere, si quando in lucem uenerit, nisi me fraternus fallit amor, omnes qui humanioribus uacant studijs iuuabuntur sanè, & non mediocria reportabunt commoda. Est enim, ut inscribitur, planè uarium, & cum reconditis, tum ab omni antiquitate conquisitis refertum historijs, ex Græcorum nostratiumq; autorum penetra-

libus

libus erutis. Hic Sannutus ad me conuersus, & leniter
 (ut solebat) renidens, En ea, inquit, fides Leonice, is a=
 mor, ut hac de re, qua in primis me delectari certissime
 nouisti, me celatum tam diu uolueris, & nisi nunc aliud
 agens Fuscus illius in transcursu meminisset, hoc me diu=
 tius etiam latuisset. Verum haud impune feres, nam te ali=
 quando, Fusco etiam teste, iniuriarum exposulabo. Cæ=
 terum inchoatum persequere sermonem, mi Fusce, & lu=
 dorum originem primam, ut occepisti, commemora. Tum
 Fuscus, Ludorum, inquit, complurium inuentionem, Ly=
 dorum populis non immerito adscripsit antiqui=
 tas. Cum enim eo terrarum in tractu Tyrscenus aliquādo,
 & Lydus Atynos (ut ferunt) filij regnarent, ualidaq; fa=
 mes cū cœli intemperie, tum terrarū etiā iniuria, uniuer=
 sam inuasisset Lydiam, ut præsenti calamitati quo maxi=
 me possent modo aliqua illi quærent remedia, tēporisq;
 moras inanibus frustrarentur ludibrijs, atq; hoc sese falle=
 rent modo. Pile lusum & Talorum insuper, & Tesserae,
 aliāq; pleraq; id genus animorū oblectamēta excogitasse
 feruntur. Qua etiā tempestate, inualescente in dies fame,
 Tyrscenum ferunt cum popularium parte quadam naues
 ingressum, sedes patrias reliquisse, prospera'que usum
 nauigatione in Italiam peruenisse, & eam occupasse
 regionem, quam postea de suo nomine Tyrsceniam ap=
 pellauit. Quamobrem nō inficias etiam ierim, ludos, qua=
 si lydos à primo inuentionis exordio, elementi consueti
 permutatione ab antiquis Italiæ populis fuisse denomina=
 tos. Delectatus sum admodum (mehercule) inquit Mar=
 cus, hac tua breui mi Fusce & nitida historiuncula. Cæ=
 terum ut alia ex alijs plerunq; prouenire & procedere
 solent, nostra isihæc disceptatio non mediocrem sanè stu=
 dio

Lydi complu=
 rium ludorum
 inuectores.

dio anſam dedit meo, ut de te, uel de fratre tuo, meo iure
 nunc quæra id quod iam diu ſcire cōcupiui, quodq; à nul-
 lis unquā grāmaticis plene perdiſcere potui. Quid tandē
 iſthuc eſt? inquit Fuſcus. Et Marcus, De Talorū, inquit,
 ludo Fuſce, paulò antè mentionē feciſti, de quo et ſemper
 aliàs dubius animi fui, quis nam is eſſet, quo'ue luderetur
 modo, & ſuperioribus etiā annis de Georgio Merula ſtu-
 dioſe perquiſiui, qui (ut probe noſti) inter paucos erudi-
 tus, & multæ lectionis uir ætate noſtra nō ab re habitus
 fuerat. Is hac ſuper re mihi nōnulla ex Euſtathio, pleraq;
 etiam ex Iulio Polluce ſemper adducere ſolebat, quæ ex
 illius ſanè commentarijs cognoscere licet. Ex quibus ut
 quædam iſthuc ſpectantia cognoscere me profiteor (uera
 enim ut arbitror ſunt fatenda) ita quæ ad exactam illius
 notitiam pertinent, ignorare me nō eo inficias. Qui enim
 talus à teſſera diſtat, ut id quod Græci cubum uocant, ab
 aſtragalo, quamuis recentiorum nonnulli grammaticorū
 apud nos iſta confundant: & quòd teſſera quidē ſena ha-
 bet latera, talus uerò quaterna, probe me tenere nunc ar-
 bitror. De Senione quinetiam in teſſeris & Cane, ſiue ut
 nonnulli, Aſino, dicere aliquid poſſum: uerum de ijs ipsis
 in talorum alea, deq; ipſa Vcnere, quem feliciffimum anti-
 qui iactum eſſe uoluerunt, neque quid dicam ſanè, neque
 quid intelligam me habere, præ me fero. Tum Fuſcus ad
 me cōuerſus, Hæc ſunt, inquit, frater, quæ ſuperiori anno
 dum Ariſtotelem Patavij publice profitereris, quia alia
 tunc erant agenda, ſignaſti potius quàm explicaſti, quæ
 (mchercule) de te aliquoties quærere uolui. Sed multa (ut
 ſcis) interceſſerunt, quæ me diſtraherēt, & ab iſtiusmodi
 auerterent ſtudijs. Quamobrem poſteaquam is incidit
 ſermo, tuū erit quid hac de re ſentis aut explorati habes
 diſſer



Differre: de me enim in presentia taceo, sed Marco nostro
 (ut uides) non dubito te rem inter paucas gratissimam
 esse facturum. Tum ego, Multa sunt, inquam, Fusce fra-
 ter quæ me hoc facere adhortantur. Sed in primis Sannuti
 nostri hac de re tam uehemens sanè studiū. Ceterum quo-
 niam is paulo antè iniuriarum mecum agere comminatus
 est, non prius certe incipiam, quàm ab eo fidem accepero
 se posthac præmeditatam in me accusationem illam peni-
 tus aboliturum. Hic cum subriisset ille, meq; ut bono ani-
 mo essem, & accurate id facerem insuper rogasset, ita sum
 exorjús. De re Sannute & Fusce etsi non magna, satis
 tamen ambigua & subobscura nunc dicere me uultis, de
 qua ut pleriq; nõnulla, ita nullus (quod sciam) complexus
 est omnia. Parebo libens, & quæ uaria lectione, sedulaq;
 animaduersione comprehendere potui, uobis pro uirili
 breuiter exponam. Sermonis autem nostri exordium à phi-
 losopho capiam Aristotele, qui talorum naturam & si-
 tum, partiumq; insuper uocabula in suis de animalium hi-
 storia commentarijs, hoc maxime describit modo: Omnia
 quibus datus est talus, cruribus cum posterioribus conti-
 nent, ita ut erectus in suffragine parte sui prona foris, su-
 pina introrsum spectet: & quæ cola uocant, intus aduer-
 sa sibi posita sint: quæ ischia, foris: quæ antennæ, supra ha-
 beantur. Situs talorū omniū talis est. Quo in loco Theodo-
 rus Gaza uir nostra memoria utriusq; linguae cum crudi-
 tissimus, tum etiam obseruantissimus, ubi Aristoteles cola
 scribit, ille Venerem, ubi ischia, ille canem inuertit: quod
 insequuti posteriores grammatici, & cōstanter approba-
 runt omnes & sedulo etiam eorum nonnulli pro parte illi
 suffragari conati sunt: nam dictionē ischia silentio præter-
 eantes, nescio quid de Veneris Coliadis apud Atheniēses
 q cognomine,

cognomine, frigidè (mehercule) ne dicam insulsè script
 suis memoriæ tradiderunt. Cæterum utrum ne recte sic,
 an perperam dicatur, paulo post uidebimus : nunc uero ex
 Aristotelis uerbis talos omnes, quos astragalos Græci uo=
 cant, quatuor habere latera siue facies, seu uultus appel=
 lare malumus (ijs etenim omnibus eadē in re autores utun=
 tur uocabulis) manifestissime deprehendere licet. Iactus
 enim talus, aut in pronam sui partem cadit, aut in supinā,
 uel in illas quæ cola & ischia dicuntur. Supersunt ex par=
 tium numero antennæ illæ geminæ, quæ ideo in talorum
 non connumerantur iactu, nec partes dicuntur, quia nus=
 quam super illas iactatus stare potest talus. Ex quibus (ut
 arbitror) grammaticorum quorundam manifestissimum
 deprehenditur erratum, qui talum quidem sex habere late=
 ra, Tesseram uero quatuor scriptis suis posteritati manda=
 uere: quos miror, si modo Pollucem inspexerunt (ut planè
 uideri uolunt) in tam manifestū concidisse errorē, cum ille
 Cubus, qui in cōfissus est tessera, sex habere dicat facies, to=
 Talus. tidem punctis, siue lineis insignitas. Talum autē quatuor,
 utpote à quo binarius, & quinarius absint, qui reperiun=
 tur in cubis. Verum isthæc obiter sint dicta, quamobrē un=
 de digressi fuimus (si placet) redeamus. Adduximus (ut uidi=
 stis) ex Aristotele talorum facies quatuor, & illarum etiā
 uocabula recensuimus. Cæterum ex ijs duo illa cola & i=
 Ischia. schia, meo quidem iudicio, paucularum adiectione literarum
 in omnibus quos uiderim exemplaribus mendose sa=
 Coa. nè scribuntur & leguntur. Coa enim & Chia, hinc duo=
 Chia. bus, inde unico detractō elemēto, uera (ut arbitror) et in=
 corrupta habere debet lectio. Quod ut constanter assue=
 rem usurpatū primo illud apud Græcos in Talario ludo
 prouerbiū sanè facit: Nō Chuus, sed Cous. Cuius cum in
 Batrachis

*Batrachis suis comicus meminisset Aristophanes de Thera
 mene scribēs, qui ob ingenij uersutiā & agilitatē, cothur
 nus ab Atheniēsisibus est cognominatus: locū illum expli=
 cantes Aristarchus & Didymus, inter antiquos Grāmati
 cæ professores sine cōtrouersia primi, cōū in talis contra
 rium esse chio autumāt, & cōū semper lucrum facere,
 chium autem iacturam asferre dicunt. In Theramenem
 autem ideo à poēta adductum fuisse prouerbiū de talo=
 rum iactu, translatione mutuata, quoniam is ingenij de=
 xteritate & morum uersutia, quodcūque cupiebat & se=
 quebatur, feliciter semper assequebatur, & incommoda
 plerunque mentis agilitate corrigebat, & tanquam com=
 moda proferebat: ut Coa igitur & Chia, pro colis &
 ischijs apud philosophum legantur Aristotelem, isthæc
 (ut dixi) in primis me admonuit ratio. Deinde ipse=
 met etiam, ut hoc modo corrigenda sit litera, alio sanè
 in loco nos docuit Aristoteles. In ijs enim quos de cœlo
 inscripsit libris, secundo (ut arbitror) commentario, ostē=
 dens superiora corpora paucioribus id facere motioni=
 bus, quod uix pluribus inferiora ualent efficere corpora,
 isthæc quæ ego de illo ad literam nunc exprimam, subij=
 cit uerba: Est autem recte agere difficile, uel multa, uel
 multoties, ueluti decem milia talos coos iacere difficile,
 unum uero, aut duos facile. Hæc ille, ex quibus cōū in
 talis faciem esse quandam, & eandem felicem & fortuna=
 tam meridiano (ut aiunt) sole clarius esse potest. Quem lo=
 cum (ut obiter etiam hoc tangatur) exponens Simplicius
 inter ueteres Aristotelis interpretes uel accuratissimus,
 adeo friget, & ita comminisci uidetur, ut reuerentia ui=
 ri commotus ego, nusquam aliās in Aristotele oscitan=
 tis aut cōniuetis, tacere potius, quàm eius hoc in loco ex=
 positionem*

positionē asserre praelegerim. Ceterū ut Latina etiā cum
 Graecis nō inutiliter cōiugamus, quōue illa modo inter se
 quadrēt uocabula scire possimus, aduertendū, Cōm in ta-
 lis latus senionē à Latinis uocitari, & quod Graeci chium
 uocabant, nosiri canem appellauere: quod ad numeros e-
 tiam translatus canem quidem unitatem, oppositum au-
 tem illius hexiten, id est senarium, uel senionem denomina-
 tos fuisse Pollux in onomasticis suis refert. Canē quinetiā
 iacturam semper, Senionem uero uictoriā saepius & lucrū
 apportasse apud ueteres legimus. Inde apud Persium est
 uidere, Quid dexter senio ferret Scire erat in uoto, dam-
 nosa canicula quantum Raderet. & Martialis: Senio nec
 nostrū cum cane quassat ebur. Quo in loco Sānute silētio
 praeterendum non censco, pueris nobis (nam adhuc talis
 ludebatur, quos parellas uocabant, ferē enim abhinc qua-
 draginta sunt anni quōd is inoleuit lusus) faciē in talo quae
 uictoriam dabat quam cōm & senionem appellari dixi-

Ancinus. mus, ancinum uocitatum fuisse: oppositam uero & peio-
 rem quam sequebatur iactura, tione dictam, cuius uel uni-
 ca interuentu (nam quatuor & ipsi ludebant talis) ineffi-
 cax ancinorum reliquorum erat iactus: & illa nusione
 is qui iccerat neq; lucrum, neq; damnum faciebat. Quam-
 obrem si accuratissimus alioqui uir, & inter paucos indu-

Theodori Ga
 zae error. strius Theodorus Gaza in ijs quae de talo Aristotelem ex
 Graeco conuertens elegantissime conscripsit, quae nos

Venus. etiam retro adduximus, pro uenere senionem apposuisset,
 & commode profecto tali latus illud interpretatus fuis-
 set, & uerbi illius uim & naturā Latino uocabulo signi-
 ficanter expresisset. Nunc cōm in uenerem transferens,
 & manifestissime errat, & mirum quantum illa in re se
 ipso minor esse uidetur. Quōd enim aliud in talis à uenere
 fuerit

fuerit senio, si quis est qui forte ambigat, uel pauculis ijs
 Cæsaris Augusti uerbis omnem penitus (ut arbitror) exuet
 dubitationem. Scribens enim ad Tiberiū filium (ut Tran-
 quillus in illius refert uita) ijs ad alteram utitur uerbis:
 Lusinus mi Tiberi geronticos & heri & hodie. Talis
 enim iactatis ut quiq; canē, aut senionem miserat in sin-
 gulos talos singulos denarios in medium conferebat, quos
 tollebat uniuersos qui Venerē ieccerat. Ex quibus sanē a-
 liud fuisse Venerē, aliud Senionem manifestissime patere
 potest, cum ille quidem eo in ludo damnum & iacturam,
 Venus autem uictoriam & lucrū apportaret. Nec minus
 præterea ex hoc etiā id ipsum dignoscere licet. Cōū enim
 siue Senionem uel in unico tantum reperiri contingit ta-
 lo, ut ex Aristotelis uerbis in commentarijs de cœlo re-
 tro est declaratum: Venerem autem nisi quatuor iactis ta-
 lis prouenire non posse certissimis ostenditur euidentijs.
 Cicero enim in suis de diuinatione cōmentarijs demonstra-
 re studens, quod casus in ijs non sit rebus, quæ omnes in se
 ueritatis habent numeros, hæc subiicit uerba: Quatuor
 tali iacti casu Venerem efficiunt, num etiam centum Vene-
 res, si quadringētos talos iecceris, casu futuros putas? Quā
 etiā rem Lucianus Samosatæus apud Græcos lepidissimus
 sanē autor, in amoribus suis ostendit, de quodam scribens
 iuvene, qui præpostero mentis iudicio Cnidia Veneris si-
 mulachrum Praxitelis opus efflictim deperibat: illius hæc
 sunt uerba ad literam (si recte memini) de Græco expres-
 sa: Cumq; talos quatuor Libysse damæ super mensam ia-
 ctasset, spem suam ludo & alce cōmittebat: & recte qui-
 dem iaciens, præcipue si deam ipsam prospero effecisset
 iactu, talorum nullo aequali cadente effigie, & Deæ simul-
 achrum cernuus adorabat, & potiundi aliquando desi-

derij non mediocri erat in spe. Si autem (ut assolet) perperam talos iactasset, & in contrariam illi, tristemq; stettissent faciem, uniuersæ Cnido multa imprecatus mala, ueluti propriæ cuiusdam calamitatis gratia tristitia & moerore conflictabatur. Hæc ille. Ex Luciano igitur & Cicerone (ut animaduertistis) clarissime patere potest, uenerem non unico, sed quaternis effici talis, & tunc esse (ut hoc etiam quod non omnes aduertunt, obiter adducatur) cum singuli quatuor tali diuerso inter se steterint aspectu, ita ut simul quatuor una missione iactati, omnes talorum referant uultus, hoc uidelicet modo, ut unus eorum, siue senionem ostendet: alius chium, siue canem: tertius pronam tali monstret partem: quartus uero supinam. Quam rem cum Valerius Martialis in Apophoretis suis innuisset potius quàm expressisset, à nullo grammaticorū (quod sciam) ad hanc usq; diem expositus aut intellectus est locus. Quæ enim Domitius & Merula ea de re afferunt, meræ sunt nugæ. Est autem Distichon huiusmodi, cū quo tali remittuntur eburnei,

Cum steterit nullus uultus tibi talus eodem,

Munera me dices magna dedisse tibi.

Quasi enim exiguum amico commendans munusculum poëta, affirmat tum deniq; illud magnum sibi uisum iri, si quando in ludo talario Venerem iecerit. Fortunatum inquam & lucrosum iactum, nullo talorū eodem stante uultu. Hæc sunt Sannute & Fusce, quæ de talorum partibus Coo & Chio, quas Latine Senionem & Canem appellari diximus, & quæ de Venere etiam, assidua & diligenti cum Græcorum, tum nostrorum lectione perquisita, pro uirili comperire potuimus. In tenui fatcorre posita fuit opera, sed quia succisiuis id effectum est studijs, non uilis est

est (ut arbitror) neq; contemnendus labor, & alioqui isthæc ipsa quantula sunt, ut cognita parum laudis afferunt, ita ignorata homini præsertim crudito, et isthæc profitenti non nihil uituperationis adducere possunt. Sub ijs dictis cum reticuissem, & Sannutus, qui diligentē auscultando præstauerat operam, nescio quid dicere uellet, Leopardus accedens, qui & cœnauerat interim, & cum Longo etiā tesseralis luserat, En, inquit, adsum amici, prætermissi à me nuper officij longam, si me audire patiemini, afferēs defensionem. Et Marcus, Hui longā, inquit, Leopardus parde. Atqui nox haud longa est, cuius bona etiam præterijt pars. Cæterum ne te absolutum iam putes, cras hoc in loco, & apud hos ipsos iudices (nam mecū omnes in prædio eritis) tibi dicenda erit causa. Quamobrem bene præmeditatus accedas. Et ad nos cōuersus, Vos, inquit, Leonice & Fusce (quoniam intempesta est nox) hic apud nos optime manebitis: nam Priolus & Longus, cum Canali & Leopardo cimbis suis domum uehantur: & cum dicto, uespertina de more præfata salutatione, nos in cubiculum cum Sannuto ingressi sumus: illi ad cimbis suas descendunt.

NICOLAVS LEONICVS

THOMAEVS RENOL-
DO POLO S. D.

QUIA in sermonibus nostris quos abhinc ali-
 quot annos confecimus, & tibi denominaui-
 mus, dialogus est De animorū immortalita-
 te, qui Bembus inscribitur, ubi omnis serē ea
 de re Platonis explicatur ratio: idcirco superioribus die-
 bus dum uacuus esē, mihi in mentē uenit, non ab re esse, si
 aliquid etiam de illorū essentia pro uirili mea disquirere:
 quod haec illi affinis esse uidebatur quaestio. Verū cum rem
 sanē arduam, & profundissimis abstrusam tenebris, aggre-
 di me intelligere: dum de illa cogito, uiresq; insuper meas
 perpēdo, rursum an eam omnino tentare, aliquādiu animi
 dubius fui. succurrebat enim mihi non solum diuersa &
 uaria hac de re ab antiquis rerum scriptoribus, sed cōtra-
 ria etiam & pugnantia memoriae fuisse prodita: quae neq;
 dijudicare facultatis meae, neq; approbare aut reprobare
 professionis & modestiae esse ducbā. Et alioquin religio-
 ni nostrae piē semper addictus, quae sola sapere, & recte
 sentire uidetur, ea constanter uera esse existimo, quae illa à
 sectatoribus suis indubitātē tenci obseruariq; praescri-
 pti. Veruntamē cum nuper ab amico quodā meo, cui non
 obsequi nefās esse ducbam, ut id oneris subirem, ad quod
 (ut dixi) sponte etiā mea ferebar, impensius rogatus fuis-
 sem, uici omnem difficultatē, & quae iam pridē de Bembo
 audiueram, & multiplici etiam uariāq; lectione ipse col-
 legeram, in unum dialogi corpus coniecta, tibi, ut de alijs
 etiam feci, nūc Pole dedico. Cui enim potius hos serotinos
 fructus meos cōmendare debeo, q̄ tibi, cū philosopho prae-
 stantissimo, tū patre de me semper optime merito? Vale.

B E M B V S,

S I V E,

D E A N I M O R V M
E S S E N T I A.

VPERIORIBVS diebus, Bembe, ut ex Ioanne Baduario audiui, de animorum immortalitate breuiter à te atq; dilucidè de Platonis sententia est disputatum: ubi omnia (ut dicebat) memoriter a te collecta fuere, quæ diuinus ille uir in commētarijs suis sparsim huiuscemodi de re memoria prodita reliquit: cui certè disputationi quo minus interfuerim (nam profecto interfuissem) hospitis cuiusdam mei negotium fuit in causa, cui me operā non præstare, illiberale sanè fuisset. Verum Baduario plurimam habeo gratiā, qui illius diei sermonem tuum, singulasq; eius partes ita clarè mihi enucleateq; recensuit, ut nihil aliud mihi nisi uox illa tua suauis, uerbaq; cum Latine, tum efficaciter prolata defuisse uideantur: quorum quanta fuerit uis & gratia, existimare possunt ij quibus rectè cognitus est Bembus. B E M. Tu uero Leonice facis ut semper omnia, & quia plus nimio me diligis, mea etiam tibi plus nimio omnia concinna præclaraq; esse uidentur. Verum quæ tunc ego dixi, quia ex recentis Platonis lectione mihi insederant, & sub manum (ut aiunt) habebam, paruo certè negotio mihi præsto fuerūt: & ueluti ex tempore disertata, neq; leporem quem existimas, neq; eloquentiam, ut digna erant, habere potuerunt. Paruam igitur iacturam fecisti, qui de me illa non audieris, quando tibi Baduarius apte, ut dicis, omnia ordineq;

recensuit: quæ etiam de fonte cum uolueris abunde haurire poteris, præsertim cum philosophi illius lectione maxime opere delecteris. LEON. Rectè narras Bembe. nanq; ego ea de re & apud Platonem ipsum & apud plerosque Academicorum multa præclare scripta lectitavi. Verum aliud quiddam si tunc præsens fuisset, non minus scitu dignum, & ut mea fert sententia, longè difficilior, à te exquisiuisset, quod non me solum in præsentia, sed antiquos ferè omnes dubios animi habuit. BEM. Quid est tandem illud, quod ita arduum & difficile esse narras? An quippiam fortasse de animorum essentia dicere uis? LEON. Istiuc ipsum est Bembe, de quo tunc percontari te & Iustinianum & Baduarium uoluisset: qui quoniam absunt, teq; uacuum (ut arbitror) in præsentia & feriatum cōspicio, nihil sane prohibet, nisi fortasse aliud quippiam huic rei præevertendum esse putas, aliquid eorum quæ hac de re uaria lectione cōpereris, in medium abs te proferri. Tempus enim commodum est, nulliq; adsunt qui nos interpellare, & ab hoc negotio auocare possint. Nanq; ego etiam pro uirili parte meam tibi operam præstabo: duo autè simul (ut in prouerbio est) omnia melius. BEM. Rem profecto arduam & abstrusam Leonice cognoscere desideras, de qua nemo, quod sciam, antiquorum neq; recentium philosophorum plenè pertractasse uidetur, sed ueluti qui hanc rem de industria subterfugerent, alij quidem intactam eius omnino disquisitionem reliquerunt: alij uerò ceu balbutiētes rude quiddam et inexplicitū musitauerunt. Nam de proprietatibus, ut probè tenes, animorumq; partibus & uiribus, peritè sane & eleganter pleriq; conscripserūt. Quam ob rem quod de huiusmodi re tibi planum faciā, haudquaquā habeo. LEON. Est ut ait Bembe, & ego istiuc ipsum
sapien

sapenumero expertus sum: uerum si de multis quippiam
 colligendo in medium conferre studuerimus, si non plenè
 et exactè, aliquid tamè quod huic conferat quæstioni, for-
 tasse reperire poterimus, & ex unguibus (ut aiunt) Leonè
 quo dabitur modo effingere conabimur: atq; fortasse de se
 quærentibus nobis & disertantibus ipse sese ostendet ani-
 mus. Tumodo i præ, ego autem subsequar. B E M. Sic fiet,
 quando tu ita fieri uis. Verum quoniam obscura multū &
 insolens quærenda nobis & indagāda est res, noua etiam
 pleraq; & inusitata ijs qui Latine probè sciunt, proferre
 uocabula oportebit, ut res ipsæ, quo fieri potest modo, cla-
 rius exquisitiūsq; ostēdi atq; declarari possint. In ijs enim
 præcipuè præsens studiū & opera omnis nostra uersabi-
 tur: quare boni consulas oro, si quid eruditas fortè aures
 tuas offenderit. LEON. Non me offendūt Bembe ea, quæ
 iam pridem & recepi libens & admisi: perge modo. Verū
 quid cessas? B E M. Quoniam mirus profecto homo mihi
 uideor, qui in hac quæstione nostra de elocutionis modo
 tecum paulò antè diligēter & sedulo me excusauī: utrum
 autem de illa eloqui quippiā & dici possit nec ne, non ani-
 maduertī. LEON. Quorsum hæc, Bembe? aut quid hæsi-
 tatio isthæc tua noui ad quæstionē nostram adfert? B E M.
 Quoniam multa sunt Leonice quæ mente cōprehendi pos-
 sunt & intelligi, quæ tamen uerbis explicari nequeāt: con-
 traq; de plerisq; multa dicere & loqui possumus, quæ in-
 telligere nequimus. LEON. Aenigmata mihi uideris Bē-
 be et gryphos complicare. quid est enim tam absurdum, et
 ab omni cogitatione alienum, quàm esse aliquid quod sci-
 ri quidem possit, explicari uero non possit: & de quo insu-
 per cum multa uere dicantur, illud tamen intelligere ho-
 mines nequeant? Istud me prius Bembe doceas uelim, &
 postea,

postea, si placet, ad quæstionē nostrā reuertemur. B E M.
 Non abstrusa admodum neq; perplexa isthæc est res Leo-
 nice, si exēplis agere uolumus. Nanq; uerbi gratia, deum
 esse primum ens, summū bonum, & bonorum omniū cau-
 sam, omnes scimus: quid autem sit is, & quo ea produxit
 modo, uerbis explicare non possumus. Præterea de deo ue-
 re prædicant & dicūt omnes, quod omni caret principio:
 quod ubiq; est, & tamen quomodo ubique sit & qualiter,
 intelligere non possunt. De deo igitur multa intelligimus,
 quæ uerbis explanare & effari non possumus: contraq; de
 illo multa loquimur, quæ tamen intelligere & scire nequi-
 mus. Nanq; si uerum confiteri & dicere uoluerimus, neq;
 deus illius nomen est substantiæ: & omnino essentiæ illius
 nomen reperire non possumus: de quo dictum est, Et dedit
 illi nomen quod est super omne nomen. Cæterum quid tam
 admirandum est de deo, qui omnē supereminet essentiā:
 & cuius per rerum omnium abnegationē remotionemq;
 siquando ad eum quoquo modo pertingere contendimus,
 in profunda nubes caligine cæcutientes cernere uidemur
 speciem: quando ne mentium quidem supernarū, quos no-
 stri Angelos uocant, reperire quis potest nomina, quæ illa-
 rum essentiā repræsentare ualeant? & fortasse (ut arbi-
 tror) de anima ipsa, de qua nunc agitur, isthuc ipsum me-
 rito dici potest. non enim, ut uidetur, nomē hoc apud Græ-
 cos, licet accuratissimū rerum nomenclatores extiterint,
 illius ostendit essentiā: sed τὸ ψυχῆς, id est, refrigerandi
 quandam illius repræsentat uim, sine qua stare non potest
 uita. Et idcirco uariis exprimitur signaturq; modis anima.
 nanq; cor illam & mentem aliquando appellant: aliās co-
 gitationem & uoluntatem: nonnunquam ratiocinationē,
 non ex illius essentiæ dignitate, sed ex uiribus quibusdam
 & potest

& potestatibus illam denominantes. LEON. Ita esse ap-
 paret, & ego sepe numero de huiusmodi re animi dubius
 fui. Verum haudquaquam nobis idcirco cessandum esse du-
 co, quin potius omni ope contendendū, ut quò pertingere
 possumus, peruenire studeamus. In arduis enim rebus (ut
 dicitur) non solum effecisse, sed etiam uoluisse laudi datur.
 Aggredere modo. BEMB. Ut uia igitur Leonice nostra
 procedat oratio, ab usitata quadam claraq; rerum distri-
 butione exordiri incipiam, hoc modo: Entium omnium duo
 prima sunt genera, intelligibile scilicet, & sensibile: & il-
 lud quidem primum nobilioris est ordinis & dignationis,
 æternum, incommutabile, incorruptibile. Alterum uero se-
 cundo ponendum loco, temporaneū est & uariabile, cor-
 ruptioniq; obnoxium. Ex priori autem illo ordine rationa-
 les esse animos nemo fere est qui ambigat. nam & immor-
 tales sunt & æterni, nulloq; dignosci percipi uē possunt
 sensu. sui igitur natura omnem supereminent corpoream
 molē, mundanīq; esse hac ratione non existimantur. Mun-
 danum nanque omne, quicquid id fuerit, sub aliquo certe
 corporis sensu cadit. uisibile enim est aut tactile: aut olfa-
 ctu gustū uē, aut omnino auditu iudicatur et dignoscitur:
 quorum iudicia & cōprehensiones humanus longē super-
 greditur animus, qui intellectione solum cōprehendi per-
 cipi q; potest. Rectē ne igitur Leonice hæc tibi dici à me
 & proferri uidentur? an est de quo iure ambigas? LEON.
 Distributionem illam entium & sufficiēter ad ductam, &
 clarē enarratam non eo inficias. omnia enim in se colligit
 entia, nihilq; subterfugere illius complexum uidetur: uerū
 prioris illius ordinis humanos esse animos, immortales sci-
 licet & æternos, non quiuis fortasse tibi facile cōcesserit.
 sunt enim de philosophorum numero pleriq;, neq; ij uul-
 garis

garis sanè notæ, qui illos & fieri & interire existiment: qui licet inter se uariè de illorum natura dissideant, hac tamen in re præclare conuenire uidentur. Cum enim corporis forma sit animus, & uera compositi pars, ad illius certe corruptionem destrui illum & interire necesse est: quamobrem non est, ut dixeras, ab omnibus fere cōcessum ex priori illo entium ordine humanos esse animos. Quam etiam rem eiusmodi sectæ uiri ratione demonstrare contendunt. Cum enim humanum, inquiunt, corpus ex materia & forma compositum esse censeatur, ut de materia natura nunc silentio prætereatur, quam formarum susceptricem & receptaculum esse certum est, & ab omnibus concessum, formam ipsam sub duplici differentia ab antiquis intellectam, & nobis declaratam fuisse palàm esse: uel illam quam ex dissimilariū partium compositione resultat uidemus, quam Græci *μορφή*, nos figuram dicere possumus: uel illam quæ ex similariū partium proportionem quadam efficitur, quam *ἰδέα* Græci, nostri cum formam, tum speciem appellare solent. Vtrasque autem formas istas composito corpore dissoluto corrumpi & interire necesse esse dicūt, similaribus & dissimilaribus partibus ad nihilum reductis, & materia sub alia alterius rei facie remanente. Humanos igitur animos, siue animas (nihil enim refert utro illos appellemus modo) non ex priori illo esse genere, ut immortales sint, & æterni existimentur, cum dissipentur, ut ostensum est, & intereant, merito credere oportet. Plures etiam hac de re uiri illi, nec minus efficaces adducere rationes solent, quas, ne in longum noster protrahatur sermo, præsertim cum in præsentia non contendere, sed te audire cupiam, uolens & libens mehercule prætermitto. B E M B. Aduersariorum senten

sententias Leonice, & rationes etiam breuiter collegisti. Cæterum æquum esse arbitror nihil prius hac in causa decernere, quàm aliorum etiam dicta pernoscamus. Iniquum enim est (ut opinor) in philosophorum controuersijs, non minus quàm in iudicialibus causis, parte non audita altera, de quacunque re, nedum de hac, quæ est profecto maxima, facile, ne dicam negligenter, proficere sententiam. Formam enim hanc quæ humano dat esse corpori (de hac enim in præsentia dicere uideris) alterius factio- nis uiri simplicem esse dicunt: quæ cum huiusmodi sit, in sese ipsa subsistens, nunquam se deserit, suumq; esse in seipsa continet. æterna igitur est, nulloq; corruptionis modo interire potest. Præterea ad idipsum hoc etiam instari potest modo: si forma simplex perdenda sit, cum sua pte natura huiusmodi sit, in nihilū profecto redigetur. in aliud enim, cum sit simplex, transire non potest: quæ etiā si generanda sit, ex nihilo sanè generabitur. ex nullo enim præexistente fiet: hæc autem per se physicorū non admittit ratio. Est igitur anima incorruptibilis & sempiterna. si enim de quopiā, præsertim cum non fuerit, sit effingenda, cum de nullo materiali principio simplex existens forma effici possit, illius certe autor cogetur deus de propria illam procreare essentia: quamobrem commutabilem esse illum necesse erit dicere, si quando faciat quod non fecerit prius: quod cum absurdissimum sit, & à nemine unquam concessum (primum enim ens simplex & incommutabile omnes philosophorum clamant scholæ) humanos esse sempiternos animos, & ab omni æternitate præexistentes summa est necessitas. Hæc illi cum alijs plerisq; quæ superioribus diebus disputando collegimus, in medium asserre solent, quæ in præsentia consulto prætereo. De animæ
enim

enim essentia, non de illius immortalitate querere propositum est, licet hæc se inuicem consequantur, & unum cum altero inseparabiliter sit copulatum: sed alia nobis disquisitionis nunc habenda ratio est. L E O N I C. Vera narras Bembe, neque quisquam (ut arbitror) sanæ mentis isthuc inficiari poterit: utrum cum utrinque sanè cogentes prope & efficaces adducuntur rationes, nihil opinor prohibet utrorumq; sententias ueras esse, si recto intelligantur & dirigantur modo. B E M. Quanam isthuc fieri potest ratione, ut de eadem re contraria uere dicantur, de anima scilicet mortale & immortale, corruptibile & incorruptibile? L E O N. Hac certe fieri potest ratione, si alio & alio modo formæ naturam, id est, humanos animos sumere uelimus. Nam si ad formam respiciamus illam, quam ex simularium partium complexione, qualitatumq; primarum commixtione & proportionem resultantem, ipsi materiæ inherere existimamus, ex quibus copulatis & in unum concurrentibus, tertium fieri compositum dicimus, generari profecto & interire eam dicimus naturæ essentiam. dissoluto enim composito (quod manifeste percipitur) illius certe complexionem ex primarum qualitatuum proportionem resultantem dissolui & interire necesse est: imò quia hæc prius dissoluitur complexio, compositum dissoluitur & interit corpus. Ex quo manifestò cuius patere potest, hanc hominis formam cum generari, tum ad extremum interitum deuenire. Secus autem est de alterius modi forma illa, quam extrinsecus accedere complures Philosophorum, & fortasse grauiores, uoluerunt. Hæc enim cum uitam corpori, tanquam ab ea fluentem actum præbeat, nunquam sine uita est, nunquam illius essentiam proprius & peculiaris deserit

deserit actus. Veræ igitur utræque, si ad diuersa referantur, proculdubio sunt sententiæ, quæ claros etiam assertores habent suos. B E M B V S. Est quidem ut dicis Leonice, & de hac re nulla mihi tecum est cōtrouersia: uerum, si placet, materialē illam formam in præsentiā missam faciamus, quam generari et interire nulla unquā apud exactiores philosophos fuit ambiguitas. de forma autem illa, id est, humana anima perscrutemur, quæ sensum hominum generi cogitationemq; & ratiocinationem præstare cēsetur, quænam sit, & quam habere dicatur essentiā. L E O N I C V S. Isthuc ipsum nunc faciamus, itaq; sequere: ego enim te posthac Bembe nō interpellabo. B E M B V S. Arduam & inuolutam (ut à principio dixi) aggredimur rē, & à nemine, quod sciā, satis clarè discussam et explicatā. de qua cum nō parum sæpe & diligenter ab antiquis rerum scriptoribus exquisiuissem, mecumq; ipse tota mentis intentione id efficere cōtendissem, tantum profecto absuit ut ea de re mihi unquam satis fecerim, ut magis semper inuolutus, & animi dubius à perscrutando destiterim. Verū quoniā tu me id facere uis, et ego tibi non obtēperare nefas maximum esse duco: et præterea quoniam (ut inquit ille) est aliquid prodire tenus, si non datur ultra, dicam quæ audiui, et à plerisque hac de re memoriæ prodita legi: tu boni consules si ambigendo disscram, & in omnibus frerē assensum sustinucro meum. Turpius enim esse arbitror arroganter quippiā quod tibi planū non sit profiteri, quā ingenue te nescire quod nescias confiteri. Quatuor, ut in uniuersum dicatur, de animæ natura philosophorum fuisse sententiæ, eorum uidelicet qui animarum multitudinem partialemque numerum esse uoluerunt. Nanque illorum qui unicam esse omnibus assistricem mundi ani-

r mam,

mam, ut plerique ex Peripateticis, neque ij sane ignobiles, affirmarunt, alia profecto est ratio, de qua nisi temporis discludemur angustijs, nam multa sunt recensenda, fortasse aliquid in medium adducemus. Prima igitur illorum est opinio (ut primā illam nunc recensendo faciamus) qui animas generari per propagationem quandā & à generantibus traductionem uoluerunt. cum patris enim semine animalem prodire facultatem asserunt, quod in muliebribus locis receptum, & foeminae mēstruus applicatum, calore naturali medio ueluti instrumento generandæ prolis animam efficit. calor enim naturalis in semine, qui astrorū calori quodammodo proportionatus esse censetur, animæ instrumentum quæ in semine actu est, sicut in grammatico (uerbi causa) non operante est grammatica, dum tangit mulieris menstrua, sicut iam operans per artem grammaticus, in ipso factu innata uirtutis propriæ facultate quasi transfusam ex anima generat animam. quo certe in semine omnes animales esse uolūt potestates: quæ in actum postmodum exeuntes, omnibus numeris completum animal efficiunt. Et hæc quidem Aristotelis ueterumq; Peripateticorum sententia esse perhibetur, de materialis uidelicet animæ origine, quæ generatur & interit, & quam inseparabilem corporis esse formam asserunt. nanq; de ea quæ extrinsecus accedere dicitur, cuius (ut aiunt) intellectus est caput, longe aliam uolunt esse rationem. de qua, si forte dubitur, aliàs differendi accommodatior erit locus. Altera opinio, creatori omnium deo animarum munus acceptum refert, qui organizato, ut ita dicam, in mulieris utero factu, statis temporum interuallis, nouas illico introducit animas, omni essentia illius potestate insignitas, quæ illis merito conuenire possunt: quæ postmodū à corporum

carce

carcere exeuntes, ad propria constitutāq; secundum illarum merita uel demerita feruntur loca, ibi sempiternò cum immutatis corporibus permansturā: quod ex fide omnes Christiani certum & indubitatum tenere debemus. Tertia præterea alia est opinio animas à mundi initio iā creatas, à deo quibusdam de causis illi soli cognitis, in corpora demitti, cum quibus uarijs posthac exercitiæ uitarum conditionibus, in seculorum (ut aiunt) sine exæquatis omnibus, in pristinum, ut ab initio fuerunt, restituentur habitum. Quarta est Academicorū sententia, hoc se habēs modo, animas humanas cum mundi huius sint accolæ, coniuncta sibi & coæterna quædam habere corpora necesse esse, quæ illarum appellant uehicula: cum ijs autem, uolūtibz statim annorum periodis, cū descendere huc illas, tum ascendere, in sublimeq; ferri asseuerant. cum enim non idem solum in sui natura habeant, sed etiā diuersum: eius rei gratia mutabilitatem, & uariabilem habere naturā non immerito cēsentur. Volūtatē igitur suā & arbitrio, quod proculdubio in sese habent, si imaginatione magis quàm intellectu uti uoluerint, & à communi immutabiliq; bono auersæ, ad proprium peculiareq; bonum se conuerterint, seq; solummodo curare uoluerint, ad inferna illico delabuntur, ultimisq; corporum ergastulis se immergunt. quibus emancipatæ, pro stabili atque beata miseram & infelicem uitam degunt, quæ cum superioribus cōparata uita, mors est potius dicenda quàm uita. si autem contrā intellectu potius quàm imaginatione agere studuerint, & communi magis inherere bono, quàm partiali et proprio, tū profecto magna ab illo impetrātes bona, uirtutes scilicet ipsas, ad superna illico euadunt loca, & in communi rerum gubernatione prouidentiaq; uersantes, cœlestē & uere bea-

tam ducunt uitam. Voluntate igitur & imaginatione hu-
 manas animas cum descendere, tum uicissim ascendere au-
 tumant: quam rem huiusmodi claro docere exemplo conan-
 tur: Leue enim, inquiunt, corpus sursum existens, si forte
 grauitatis formam capiat, statim suapte ui deorsum ferri:
 contrà graue si leuitatis induat formam, illico superna pe-
 tere: quod ad animorum mutabilitatem translatum, mani-
 festam huius rei habere ostensionem suo iure asseuerāt. Ha-
 rum autem uicissitudinum causas fatalibus legibus adra-
 stiæq; necessitati ascribi oportere dicunt. ad quod discu-
 tiendum & pertractandum, quia plus temporis insumen-
 dum esset quàm quod ad præsentem sumpsimus operā, id-
 circo ea de re nūc consulto disputare prætereo. Hæc autē
 opinio, Leonice, licet aliæ fortasse sint ueriores: nā de Chri-
 stiana minime est dubitandum, quæ sola uera et certissima
 est, tamē physicorum decretis summopere quadrare uide-
 tur. neque enim ex nihilo fieri uult animas, quod philoso-
 phia abhorret: neq; animarum populum infinitum facit.
 actu enim huiusmodi nihil reperiri posse omnes philoso-
 phi cōsentiunt. Præterea ut exire possit à corpore anima,
 & ad illud accedere, similiq; modo ascendere & descende-
 re, & omnino mundi accola esse, coæternum et insepara-
 bile illi ætheriū ascribunt corpus. quod enim penitus cor-
 poreæ caret mole, aut non refertur ad corpus, id certe ne-
 que mundanum est, neq; loco moueri potest. Quoniam de
 animorum natura quatuor antiquorum philosophorū sen-
 tentias recensuimus, & de illis pro captu nostro clare satis
 (ut arbitror) uerba fecimus, licet de re difficilima quid sa-
 tis unquam & quid clare à quopiam dici possit nesciā, nō-
 nulla etiam addere decreui quæ ad huius negocij disquisi-
 tionem nonnihil facere uidentur. Fortasse enim plura inue-
 stigari

stigando, & omnem (ut aiunt) lapidē mouendo, quippiam odorari poterimus, quòd si non totum, aliquod saltem nobis quæsitæ rei uestigium ostendere & repræsentare poterit. Nam Stoicorum adhuc restat natio, qui de animorum essentia suo more locuti, et pleraq; innouantes uocabula, hæc memoriæ prodidere. Spiritum enim quēdam cum animam, tum naturam ipsam esse uoluerunt, uerū naturæ humidiorem & frigidum magis illum esse: animæ autem cum calidiorem, tum etiam sicciorem, qui animæ materia esse perhibetur, cum in eo formæ obtineat locum, tēperatio scilicet quædam quæ ex aëriæ ignitæq; essentiæ proportionē confici constareq; uidetur. Non enim aërem solummodo esse animam, neq; solitarium ignem asserunt, cum nulum nedum summè frigidum aut summe calidum reperiri possit animal, sed etiam si qualitatū harum alterutra in illo eminenter excellat, diutius in uita manere non potest, quando si paululum pristinæ proportionis temperatio illa perdidit, male se habere animal necesse est, & aut ardentibus exuri febribus, si ignea illa caliditas aëris frigiditatē superabit: aut contra morbis distineri frigidis, & cum stupidis, tum etiā nullis sensibus interire, si frigiditas caliditatem excollet. aërem enim suapte natura frigidum & humidum igne commixtum naturæ, si proportionē id fiat, ad optimam certe temperamenti formam peruenire. Hæc illi, ex quibus manifestò cuius palam esse potest, de Stoicorū sententia animæ essentiam temperamentum siue compositionem (ut dicunt medici) esse illam quæ ex quatuor primarum qualitatū ad se inuicem permixtarum proportionē in animalium corporibus generatur. Cuius certe opinionis & Galenus uir magni inter medicos nominis, & omnis serè medicorum antiquorum schola Hippocra-

te Coo duce fuisse uidetur, qui mortalem esse animam, & à corporibus inseparabile, ut mox illorum rationibus ostendatur, constanter affirmauerunt. Dicunt enim, ne longum faciam, in animalium corporibus duo esse spiritus genera, & alterum quidem animale uocari, qui in cerebri uentriculis generatur, & in illis sedem suam habet: Alterum uitalem appellari, qui à cordis uentriculus initium habet, atq; inde ceu à perennis quodā fontis principio per arterias in uniuersum animalis corpus deriuatur & labitur. Et uitalem quidem hūc spiritum pro peculiari propriaq; materia inspiratum habere aërem, necnon habitus illos qui ex succis & humoribus in animalium corporibus euaporant: ex quo postmodum in cerebri uentriculus perfectius excocto animalem effici & generari spiritum asscuerāt: qui certe spiritus de Galeni sententia neq; animæ ipsius est sedes, multatq; munus illius essentia, sed animæ instrumentum est primum ad opera peragēda, quæ per ipsam in corporibus fieri uidentur. Nec me præterit naturalem etiam quendam spiritum à medicis appellari, qui in iocinoris membro generatur, ibiq; collocatus ad nutritionis munia peragēda, quæ per altricē animæ fiunt uim, & per uenas postmodum in uniuersum animalis trāscurrens corpus, illud ex omnibus partibus alit & conseruat. Verum animæ instrumenta sunt hæc, ab illius essentia multum quātum sciugata: quæ admodum (ut exemplo declaretur) ferrā & dolabrā a fabri lignarij arte, cuius sunt instrumenta, semota separataq; conspiciamus esse: animam autem ipsam (ut superius diximus) & Galenus, & omnium fere medicorum chorus, esse uoluerunt commuxtionem siue temperamentum illud quod ex quatuor primis qualitatibus quadam proportionē iunctis & copulatis in animalium corporibus resultat, quæ il
lorum

lorum certe inseparabilis est forma, & cum illis simul generatur & interit. Quod etiā de Aristotelis sententiā ostendere conatur Galenus. Si enim, inquit, similes in animabus corpore partes, quæ & principales sunt, & quarū primo sine cōtrouersia sunt operationes, ex materia cōstant & forma, illi autem placuit quatuor primis qualitibus materiæ applicatis corpoream resultare & fieri complexionem: illi etiam necesse est concedere eam esse formam, si quidē materiæ aduenit, illamq; determinat & componit. quamobrem, inquit, concedere etiam illi necessariū est animam talem esse complexionem, cuius essentiam cum potestates omnes, tū actiones & opera postea cōsequi animaduertantur, quæ cuiusque rei essentiam proculdubio nata sunt sequi. Mortale igitur de Aristotelis sententia hoc animæ est genus, quod, ut ostensum est, & generatur & interit. Nā si immortale uoluerit esse, ut Plato asserit, quidnam, inquit, est causæ cur in frigidato summe animalis corpore, aut uenenis quibusdam id facere ualentibus, aut immodica sanguinis profusione, quod in uulneribus accidit, atq; idē potest: aut rursus enecto & exiccato, uel superfluentibus humoribus oppresso, breui interire cernitur animal? Certū enim est, inquit, id non alio cōtingere modo, nisi quod huiusmodi essentia animæ, illa est cōplexio, et cœta tēperamenti proportionē cōstans mixtio: qua dissoluta, illius sanē dissoluitur & interit essentia. Verum hac de re (ut mihi quidem uidetur) Galenus & Aristoteles bene cōuenire poterūt, si de materiali intelligatur forma, quæ materiæ præstat esse, & ex qua cum materia cōpositum constat corpus. Hoc enim & Plato et Aristoteles & omnes ferè qui recte philosophati sunt, sensisse existimātur. Ceterū prosequitur Galenus (ut hoc etiā obiter dicatur) se de

forma corporis separabili, qualē uoluit esse Plato, nullam certam & indubitatam habere ostensionem ex quonam sit entium genere incorporeorum, quoniam illius essentiam, qualisnam sit, ignotam penitus habeat, cū tamen sæpe multumq; de illa cogitasset, & diligenter exquisiuisset. Complexiones enim se in corporibus animaduertisse diuersas, multumq; inter se differentes, uariasq; ex illis procedētes actiones, quod per multijugos plerisq; in locis prolixè ostendit effectus. Incorporeæ autem essentiæ per se & in se existentis, quæ nec sit qualitas, neque inherens forma, ullam alterius ab altera differentiam, & distinctionis modū, quales in complexionibus animaduertuntur, nusquam se perspicere & intelligere potuisse: & alioquin, inquit, si talis existeret forma ut uoluit Plato, peculiarem quandam et æternā habens naturam, illam obsequi corpori, imò, quod absurdus est, illi turpiter famulari, summa esset necessitas, propter puerorum omnimodam rerum omnium ignorantiam, et senum repuerascentium deliria: morborū quin etiam certorum obliuiones, amentiasq;, & furores: quæ omnia, inquit, Platonem palam concessisse, ex illius commentarijs animaduertitur. Hæc à Galeno non continenter sanè, sed sparsim pluribus in locis fuisse conscripta. Verum non addidit ijs Galenus, quod profecto adiungere debuerat, quòd corporis instrumentis uitio aliquo labefactatis, et corruptis, uirtus quæ illis necessario uti debet, haudquam commode illis uti potest: sicut citharædus male temperata cithara, dissonantibusq; chordis, artificiose canere non potest. Præterea de duabus animæ partibus dicendum certe erat, rationali uidelicet, et irrationali, meliori et deteriori, imperanti & parenti, de quibus in commentarijs suis à Platone non minus abunde quam apposite & eleganter

ganter conscriptum est, & quod recte utiq; degit homo, quando in eo rationalis animæ pars imperat & regit, irrationalis autem obsequitur & paret: contra autem cum illo male agitur, si deterior animæ pars meliorem arbitrio suo trahit, illamq; sibi obsequi & obnoxia esse cogit. idcirco haudquaquam sufficienter & uere satis ab illo dictum esse contēderim, animas semper corporibus obsequi, & illis famulari, sed tantummodo partem ratione carentem, cum illi, ut par est, obtēperare noluerit. Verum quoniam hoc à proposito quæstionis ordine nos auocare uideatur, & in aliam sermonis deducere semutam, id in præsentia nullum faciamus, & ad ea quæ hac de re nobis dicenda restant, reuertamur. Animam Academici & Peripatetici etiam omnes, si sibi constare uolunt, & illam mundi accolam confiteri, & cum descendere statis annorum periodis (ut dictum est) tum ascendere existimant, corpus habere semper sibi annexum necessario concedere habent: splendidum quidem illud (ut aiunt) & æthereū, totumq; perlucidum, cum quo æternam ubique degit uitam, illoq; intercedente & medio fatali quadam lege & arbitrio commota suo, ad inferna descendit corpora, illaq; componit & tēperat, omnibusq; exornat modis, quos illorum perpeti naturæ & admittere potest: quibus postmodū aliqua de causa relictis, ueluti ad patriam posilimunio rediens suam, si quidem uirtutibus & disciplinis expurgata et exulta fuerit, intellectuali fruitur perfectione, quo quominus antea uti posset, crassa inferiorum corporum caligine præpediebatur. siquidem cum æthereo sibi semper annexo corpore ad uniuersalem mundi cum coelestibus animis prouidentia admittitur, quando uerissima illa censetur esse sententia, Sapiens domnabitur astris, uere enim sapiens anima illa

in æthereo degens corpore, nullis stellarum influxibus regitur, sed sui iuris est, & supra fatum (ut aiūt) donec sursum est, neque ad inferiora curanda suapte natura uergit & delabitur. Addunt quinetiam uiri illi quibus hac de re ulterius contemplari curæ fuit, animas in æthereo corpore uitam beatam agentes, nihil consulere aut imperare, neque etiam discurrere: cognoscere autē mutuo inter se sua per reciprocam quandam conscientie notionem, quando etiam multa hic tacentes intuitu solo & nutu percipimus. Ibi enim uniuersum corpus purum et illustre esse, totumq; uelut oculus, nihilq; ibi esse occultum, fictum nihil & uariū. Cæterum in aërio degentes corpore cum dæmones, tum animas non absurdum, inquiunt, uocibus etiam posse uti. animalia nanque esse, & in uocali sonoroq; uersari elemento. Hæc illi memoriæ prodidere. De ascensu autem animarum & descensu, & unde & quamobrem & quādo id illis contingat, satis antea dictum est. Peripateticorum autem nonnulli, ut hoc etiam indiscussum non relinquatur, magnæ autoritatis uiri, id quod Aristoteles menti ascribit, de anima etiam asserūt, unicam scilicet illam in omnibus esse, et de foris accedere, imò omnibus semper adesse cōmunem, in corpoream, omni penitus carentē materia, scedabilem enim materie naturam in causa sane esse cur partialia et plura fiant entia. Hanc autem animam quam mundi esse asserunt, undiq; diffusam, omnibus assistentem, & tanquam uniuersi partes omnia moderantem, uita, id est actu suo, mediante, eousq; cuncta conseruare et regere, quoad disposita aptaq; fuerint illa talem actum uirtutemq; illius admittere, et in sese conseruare: quòd si quo casu id efficere nequeant, mortaliq; necessitate inhabilia fiant, uitio suo, non illius, interire illa, & potius animā deserere quam ab illa

ab illa deferantur. Varietates autem per entium genera distributas, et operationum cum excellentias & perfectiones, tum defectus, et ijs contrarias affectiones; in ijs præcipue quæ generationi et corruptioni sunt obnoxia, ex corporum complexionibus cōpositionibusq; contingere, quæ profecto illorum sunt inseparabiles formæ, constanter asfirmauerunt. Hæc illi. Ex quibus omnium quæ hic fiūt operum principia et causas reddere conātur. quod et belle sane et probabiliter faciunt. Caterum ex ijs quorum de anima sententias huc usq; recensuimus, nulli profecto, nullis (ut uidimus) conuenire animaduertuntur. adeo difficilis (ut dictū est) & inuoluta hæc in philosophia semper fuit quæstio: quamobrem si quod à me exposulas, tibi plene persolvere nequeo, boni te consulere æquum est. non enim mihi studium et uolūtas, quæ promptissima certe sunt, sed facultas & uires deficiunt, & alioquin clarissimi uiri, & magni in philosophia nominis, alij quidem se animæ essentiam omnino ignorare ingenue professi sunt: nonnulli autem, ut uidetur, tectiores & uasri, ita de illa perplexe & obscure locuti sunt, ut posteritati quòd eam ignorauerint, non immerito suspicionem facere uideantur. et profecto nihil philosophiæ conuenientius, nihil ab illa requisitum magis, quam quæ sciri dignosciq; possunt, ea constanter affirmare et ostendere: quæ autem dubia sunt, et in rerū naturæ tenebris et obscuritate recōdita, ita ut sunt, hæsi tando ambigēdoq; proferre, cadidissimæq; ueritati semper addictū esse. Quamobrē Galenus Andronicū quendam sui tēporis Peripateticū haud ignobilē non immerito laudat, licet in quibusdā ab illo dissideat, cū propter apertam scriptorum illius styli claritatem, tum ob ingenuam animi sinceritatem & libertatem, qua non perplexe neque inuolute,

lute, sed perspicue & dilucide quæcunq; sentiebat profitebatur. Verum ad propositum reuertamur, & quæ dicenda restant breuiter constringamus, nihil (ut dictum est) pro certo asseuerantes, nisi quod catholica tenet fides, & uerissima Christianorum admittunt probantque dogmata. Quoniam autem hac de re multijugas philosophorum retulimus sententias, unicuique si non quod palam asserunt, quod tamen sectis consequenter suis dicere habent, conueniens de animæ essentia iudicium ascribamus. A nostris igitur initium facientes, dei inuocato nomine, à quo omnia procedunt bona, dicimus pium esse credere, imò pro certo tenere, rationales animas à Deo optimo maximo ex nihilo creatas, corporibus in matris utero formatis infundi, incorruptibiles quidem illas, & licet aliquando inceperint, perpetuò tamen permansuras ad extremum usque; uniuersalis iudicii diem, quando inuariabili & diuina lege corporibus rursus coniunctæ pristinis, pro ijs quæ in priori uita sunt promeritæ, uel celestem cum illis & beatam perpetuò degent uitam, uel in Erebi loca demersæ, æternus poenarum affligentur supplicijs. Essentiam igitur immaterialem et incorpoream non immerito per sese habere existimantur, diuersis tamen perturbationum affectibus à corporum contubernio cōtractis uariabilem. Qui autem animas per propagationem fieri, & cū parentum semine in muliebribus locis illarum infundi fierique; essentias asserunt, quæ una ex quatuor philosophantium opinionibus antea fuit cōmemorata, cuius certe sententiæ inter Latinos Tertullianum et Lactantium quidam fuisse dixerunt: animas profecto ij, cum generationi, tum corruptioni obnoxias ex primis qualitatibus cōmixtas cōstare uolentes, materiales illas esse formas & inherentes, à materiâque inseparabiles, necessario concedere

cedere habent. Quicunque uero factas olim fuisse animas existimāt, cum ex nihilo omnia creauit Deus, à quo in corpora dispensantur iudicio quodam illi soli cognito, quod Origeni & Græcorum plerisq; alijs ascribitur, ij profecto immortalis illas esse substantiæ & sempiternas uolunt: quas etiam in seculorum (ut aiunt) sine exæquatis omnibus, in pristinum naturæ habitū, ut ab initio fuerunt, restitui assæueranter affirmant: quod de reprobis etiam mentibus & Deo rebellibus uolunt intelligi. De rationaliū autem animorum essentijs ex Academicorum sententia satis (ut arbitror) antea pro captu nostro disseruimus, deq; illis semper annexo corpore, ut mundi accolæ esse possint: necnon de illarum descensu ascensuq; statis quibusdā annorum periodis, & quamobrem illis hoc accidere dicatur, est recensitum. Ex quibus profecto palam esse potest, animarum essentiam esse immortalem & perpetuam, corporibus utentem claris et illustribus illi semper annexis, qualia alio quodam rationis modo in astris esse uisuntur. Ex quibus cuius satis clarum esse potest, omnes istas philosophantiū sententias ad duas generaliter deduci constituiq; posse. Aut enim separabiles faciunt animas & æternas, uel inhærentes, uel assistentes: aut illas generabiles faciunt et corruptibiles, quæ à corporū natura minime separari possunt. Solitaria autem illa est opinio, quæ unicā mundi animam mundana omnia tanquam illius partes & mēbra uiuificare & animare assæuerat, ut quæque scilicet illam res decenter & aptè recipere potest. Et hæc de animæ essentia pro ingenij mei mediocritate in præsentia dicere habui, nihil assæuerando (ut dixi) nisi quod ueritati Christianæ conuenit. De reliquis scire quod in uero sit, soli permittatur deo, uel si cui ille reuelare dignabitur: cui laus, honor

nor et gloria in seculorum secula. LEON. Præclare profecto Bembe, & memoriter omnia frè quæ de animæ essentia ab antiquis dicta sunt, collegisti: & modeste mehercule, quod uiro philosopho præcipue cõuenit, iudicium interposuisti tuum, & difficilimæ rei ad aliquam partem assensum non minus reseruate quàm prudenter sustinuisti: quare et tibi pro suscepto labore ingentes habeo gratias, & ego posthac amplius nec tibi nec mihi simili de re negotiũ faceßam, neq; certe molestus ero ut ea anxie disquiram ad quæ nullo contemplationis modo peruenire possemus. Verum quoniã multa sunt quæ ad animæ operationes actusq; pertinent, quos profecto ab essentia emanare & fieri omnes proculdubio philosophi asseuerant, & ita rei est ueritas, fortasse non esset malũ à posteriori (ut aiũt) & consequenti, quod sæpenumero phisici facere solent, hac de re ab illis aliquid indagari. Hoc nanq; etiam modo opinor (nisi si quid tibi aliud uidetur) rei huius periculũ facere, nihil sanè prohibet. BEM. Vera narras Leonice, nam multa ab operibus comprehendi dignosciq; recte possunt. Verũ quo minus in præsentia id commode facere possimus, iam ingruens nox in causa est, cui dare locum oportet: cras autem, aut perendie, quando tibi hoc placere uideo, hoc in loco conueniemus, & studiose seduloq; quod fieri potuerit, exequemur.

LEON. Ita faciemus.

FINIS.





18693829





+ colorchecker CLASSIC

calibrite



mm